

الأعمال الكاملة للشاعر

صلاح جاهين



السيرة الذاتية

العامية المصرية

الرباعيات

الأزجال

الأغاني

المنوعات الغنائية

أوبريت الليلة الكبيرة

المسرحيات

دار الصفوة

صلاح جاهين

الأعمال الكاملة للشاعر

صلاح جاهين

دار الصفوة

حقوق الطبع محفوظة

ISBN : 9945-75-011-2

دار الصفوة - بيروت
لبنان

جسر المطار - بناية المرزوقى - هاتف : 854642
فاكس : 854644 - ص.ب. : 7766 بيروت لبنان

الإهداء

إلى كل المحبين

لشعر صلاآ آاهین

الناشر



مقدمة

أحد أعظم شعراء العامية في مصر.

صلاح جاهين فنان شامل فهو شاعر مجيد ورسام كاريكاتير من الدرجة الأولى أعطته شخصيته المرحية وظرفه الكثير من التفرد في مجال الشعر العامي ومجال رسم الكاريكاتير. بل حتى انه كاتب سيناريوهات من الدرجة الأولى كتب سيناريوهات العديد من الأفلام الشهيرة ومنها خلي بالك من زوزو ولد صلاح جاهين في 25 / 12 / 1930 م بحي بشبرا في شارع جميل باشا. وصلاح جاهين هو الأكبر بين إخوته.

والده المستشار بهجت حلمي الذي تدرج في السلك القضائي بدأ من وكيل نيابة حتى عين رئيساً لمحكمة استئناف المنصورة.

كانت ولادة صلاح جاهين متعثرة تعرضت أثنائها والدته للخطر، فولد شديد الزرقة و دون صراخ حتى ظن المحيطون أن الطفل قد ولد ميتاً، ولكن جاءت صرخة الطفل منبهة بولادة طفل ليس ككل الأطفال.

وكانت لهذه الولادة المتعثرة تأثيرها، فمن المعروف أن الولادة المتعثرة تترك آثارها على الطفل فتلازمه طول حياته وقد تتسبب في عدم استقرار الحالة المزاجية أو الحدة في التعبير عن المشاعر - سواء كانت فرحاً أو حزنًا، وهو ما لوحظ في صلاح جاهين الذي يفرح بالأطفال ويحزن لدرجة الاكتئاب عند المصائب.

استطاع صلاح جاهين ببساطته وتلقائيته التعبير عن كل ما يشغل البسطاء بأسلوب يسهل فهمه واستيعابه، وهو ما جعله فارساً يحلق برسومه وكلماته ويطوف بها بين مختلف طبقات الشعب المصري، بل كانت جواز سفره لختلف البلدان العربية التي رددت كلماته حَفْزاً للعمل والإنجاز.

كل ما نبع من صلاح جاهين وما أحاط به كان يؤهله للثراء الفني والإنساني.. بل كان يرشحه أيضاً لعانة تصنعها نيران الموهبة.

حظي بحب جماهيري جارف فلم تشهد مصر إلا فيما ندر هذه الموهبة المتسعة الأرجاء شعراً ورسماً وغماءً وتأليفاً وتمثيلاً.

الأعمال الكاملة للشاعر

لم يستكمل صلاح دراسته بالفنون الجميلة ولكنه درس القانون في كلية الحقوق إرضاءً لوالده ، ووصل إلى السنة الأخيرة لكنه في النهاية لم يدخل الامتحان ولم يتخرج منها فقد كان بالفعل وقتها ملء السمع والبصر كفتان وشاعر متميز وكان قد اختار طريقه في الحياة،

تزوج مرتين الأولى من السيدة سوسن التي أنجب منها بهاء وأمينة والثانية من الفنانة منى قطان التي اشتركت في تمثيل الأفلام التي انتجها وأنجب منها ابنته سامية

كان أبدع من كتب بالعامية المصرية الأصيلة مستخدماً ألفاظ الشارع المصري البسيط لتصوير الأحداث الجارية في كلمات أغنياته وفي وجوهه الكاريكاتيرية المعبرة عن الواقع وقد أحب جاهين البسطاء وأسكنهم كلماته ورسومه فمنحوه كل الحب والاحترام وقد عشق الجمهور رباعياته بل أصبحوا يترنمون بها فهي مدرسة في فلسفة الحياة بل أنها أصبحت أمثالا يرددونها العامة وقد اعتبره النقاد امتداداً ليرم التونسي سيد الزجل الشعبي والسياسي في مصر القرن العشرين.

عمل رساما في العديد من الصحف أخرها الأهرام

كتب العديد من الأغنيات العاطفية والوطنية وسيناريو وحوار أفلام مثل - خللي بالك من زوزو - أميره حبي أنا - شفيقة ومتولي - المتوحشة كما ألف العديد من مسرحيات العرائس منها - الليلة الكبيرة واوبريت - القاهرة في ألف عام

كان يحس أن الحياة قصيرة جدا وسريعة فدخل في سباق معها فأنجز المئات من القصائد التي تراوحت بين الزجل والشعر العامي والشعر الشعبي وتحولت إلى أغنيات غناها عشرات المطربين وراوحت بين أغاني الحب والأغاني الوطنية والأغاني الخفيفة، وكتب أيضا عددا من الأوبريتات الغنائية ربما كان أشهرها أوبريت الليلة الكبيرة الذي ما زال يحتفظ بألقه حتى اليوم، ومئات الرسوم الكاريكاتيرية التي بدأ في رسمها أسبوعيا في مجلتي صباح الخير وروز اليوسف الأسبوعيتين، قبل أن ينتقل إلى صحيفة الأهرام التي كانت آنذاك في أوج ازدهارها، فكان يلخص في رسومه اليومية تلك و في صورة كاريكاتيرية ساخرة الموقف السياسي السائد آنذاك.

صلاح جاهين

بدأ صلاح جاهين يكتب الشعر الكلاسيكي في أواخر الأربعينات، قبل أن يبلغ العشرين من عمره. لكنه قرأ يوما قصيدة بالعامية المصرية لشاعر لم يكن قد سمع به آنذاك، فقرر التعرف إليه و كان له ذلك. و لم يكن ذلك الشاعر سوى فؤاد حداد، الذي أثر فيه تأثيرا كبيرا و جمعته به صداقة عميقة استمرت فيما بعد حين تزوجت ابنة صلاح جاهين السيدة أمينة من ابن فؤاد حداد الشاعر أمين فؤاد حداد.

- وفي أواسط الخمسينات بدأ صلاح جاهين مسيرته الفنية التشكيلية في مجلة روز اليوسف، ومسيرته الشعرية التي بلغت ذروتها في ديوانه الشهير والكبير "الرباعيات" خلال الفترة التي فصلت بين أواسط الخمسينات و بين الخامس من حزيران (يونيو) 1967 غنى صلاح جاهين للحب و الشباب والأطفال، كما غنى للثورة المصرية ولزعيمها جمال عبد الناصر. و لكنه بعد النكسة التي حدثت في ذلك اليوم أصيب بحالة من الكآبة لم يشف منها حتى رحيله، فتوقف عن كتابة الأغاني والأناشيد الوطنية، و اتجه إلى الكتابة في اتجاهين؛ الشعر التأملّي العميق كما في الرباعيات (الأشهر بالعامية) التي كتبها قبل النكسة وكتب خمس منها بعد النكسة ، والأغاني الخفيفة، و التي ربما كان أشهرها تلك الأغاني التي غنتها الممثلة سعاد حسني في فيلم "خللي بالك من زوزو"، مثل الأغنية التي حملت عنوان الفيلم، و"يا واد يا ثقيل" و غيرها.

- والطريف أن ملحن هذه الأغاني هو الموسيقي الكبير كمال الطويل، الذي كان في الفترة السابقة، يلحن له أغانيه الوطنية و الحماسية مثل "صورة" و"يا أهلا بالمعارك" و"بستان الاشتراكية" و غيرها. كما لحن له آخر أغانيه الوطنية وهي "راجعين بقوة السلاح" و قد قال صلاح جاهين مفسرا حالة الكآبة التي دخل فيها و مبررا قراره بالتوقف عن كتابة الأغاني الوطنية، إنه كتب الأغنية المذكورة التي لحنها كمال الطويل لتعنيها أم كلثوم عشية هزيمة الخامس من حزيران (يونيو) 1967. وتقول كلمات الأغنية:

راجعين بقوة السلاح *** راجعين نحرر الحمى

راجعين كما رجع الصباح *** من بعد ليلة مظلمة

الأعمال الكاملة للشاعر

- و في اليوم التالي جاءت النكسة على نقيض مروع من الأمل الذي تحمله كلمات هذه الأغنية، فلم يحتمل قلب صلاح جاهين المثل كل هذا الألم فدخل في حالة الاكتئاب حتى مات في 21 نيسان 1986 تعتبر القصيدة الملحمة "على اسم مصر" أهم ما كتب من شعر بعد ذلك وقد كتبت سنة 1971 إلا أنه أيضاً كتب ديوانه الأخير الجميل "أنغام سبتيمبرية" بعد 1967 وكتبت معظم قصائده في الثمانينات. من أعماله السينمائية تمثيل: لا وقت للحب اللص والكلاب المائيك حوار: اللعنة المتوحشة خللى بالك من زوزو شيلنى واشيلك شفيقة ومتولى سيناريو المتوحشة خللى بالك من زوزو شفيقة ومتولى ومن أعماله الشعرية، رباعيات "صلاح جاهين" التي لحنها الفنان الراحل سيد مكاي، وغناها المطرب علي الحجار، وكذلك كلمات الكثير من الأغاني مثل والله راجعين بقوة السلاح التي لحنها كمال الطويل وغنتها المطربة أم كلثوم، وكذلك الأغنية الشهير لسيد مكاي "ليلة امبارح ما جانيش نوم"، وله أيضا عدة دواوين شعر عامي ومسرحيات أطفال، كان أروعها بالتأكيد ما لحنه سيد مكاي على شكل أوبريت.

- الليلة الكبيرة

- رحمك الله يا علم يا شاعر

- شاعر الحب والثورة

بين أيدينا الآن مقال مهم كتبه الناقد نصر جميل في العدد الأول لمجلة الغاؤون

يقول فيه :

الشاعر المصري، العامي، الأهم والأشهر الراحل صلاح جاهين جمع في رباعياته - وإن جاءت بالعامية- بين قصائد الطبيعة والأحياء الشعبية والمدينة. إذ تنمّ رباعياته عن فلسفة صادرة عن خلاصات تجارب في مدينة يسودها الضجيج والصخب والتفاوت والتناقض في مستويات وتفاصيل التجربة المعاشة، وعلى تخومها، وفي قلبها، تفاصيل الأحياء الشعبية التي لا تنفك تثرثر بفهارس مطالبها وأوجاعها. ولنقرأ هذه الرباعية، كمثال يتصادى مع رباعيات كثيرة لجاهين: « زحام وأبواق سيارات مزعجة/ للي يطول له رصيف يبقى نجا/ لو كنت جنبي حبيبي أنا/ مش كنت أشوف إن الحياة مبهجة/ عجبني!! ».

ولكن ما سنسلط الضوء عليه، في هذه المقالة، هو «لجوء» جاهين للطبيعة، وتوظيف كائناتها، في بنية مُغرية ومثيرة وحميمة؛ حتى لتكاد تكون رومانتيكية؛ وذلك خدمة لغرض أو هدف ثقافي واجتماعي في رأيها أو موظفها.

نظرة أخرى

تشرب جاهين الأغاني الشعبية والمواويل، وخلال تنقله مع والده بين محافظات مصر استطاع بوعيه الحاد استلهم أشكال شعرية شعبية، لذا تمتع بالفراة في كتاباته المتنوعة، فكتب شعر العامية والزجل والأغنية والأشعار المسرحية والسينمائية، فضلاً عن مسرح العرائس والفوازير الإذاعية والتلفزيونية. ناهيك عن السيناريو السينمائي والتلفزيوني.

يقول الشاعر أحمد عبد المعطي حجازي. «عرفت جاهين عن قرب. تزاملنا في دار «روز اليوسف» وعملنا معاً في مجلة «صباح الخير». كنا نجلس في مكتبين متجاورين تجمعنا غرفة واحدة. آنذاك كنت في العشرينات وكان جاهين يكبرني بخمس سنوات. كان أكثرنا نشاطاً ومرحاً وحضوراً، يرسم وينظم ويغني، بالعربية فحسب. كان أحياناً يغني بعض الأغاني الأسبانية من تراث الحرب الأهلية بالإضافة إلى الروسية، أما صوته فكان قوياً قادراً على أداء الألحان الصعبة»

التراث الإنساني

يشير حجازي إلى أن جاهين كان نموذجاً حياً للشاعر المغني «كان صوت مصر وصوت البشرية. صوت الجماعة المصرية كما رآها في الواقع وفي الحلم، ناهضة حرة متقدمة سعيدة، فجاهين ليس ثمرة تراث قومي مغلق، بل ثمرة التراث القومي والإنساني، وهو يدين لغديكو لوركا وبول إيلوار بقدر ما يدين لبيرم التونسي وغيره».

أما الناقد فاروق عبد القادر فيوضح: «من المؤكد أن رحيل جاهين مس نبضاً حياً في قلب كل مصري، وعلى رغم تعدد وجوهه وتنوع عطائه يبقى المثل المؤدي دائم الولع بالأقنعة والأدوار».

يؤكد عبد القادر أن ازدهار شعر العامية المصرية تزامن مع صدور مجموعة جاهين الأولى «كلمة سلام» في عام 1955، فبدأت الموجة الجديدة الصاعدة في القصة والرواية والنقد والمسرح وشعر العربية والغناء، بالإضافة إلى الاهتمام الرسمي وغير الرسمي بفنون الشعب وآدابه. آنذاك كان الرائد بيرم التونسي (1883-1961) لا يزال يواصل عطائه، لكن معظم اهتمامه كان موجهاً إلى الأغنية الفردية.

الأعمال الكاملة للشاعر فلكلور

يرى الشاعر مسعود شومان أن أشعار جاهين تقوم على توظيف التراث والمأثور الشعبي، والجمع بين الشعبي والعامي والزجلي. «هذه الظاهرة تطرح أسئلة جوهرية عن علاقات هذه الميادين التناسية، وتحديد مستوياتها، استلهاماً وتوظيفاً، إيماناً ونفياً. هذه الإشكالية تدعونا إلى التساؤل عن علاقة أشعار جاهين بالفلكلور، تراثاً ومأثوراً، بما تضم من معتقدات ومعارف شعبية: عادات وتقاليد، أدب شعبي، ثقافة مادية، ألعاب شعبية...»

المؤرخ والناقد الموسيقي د. زين نصار يقول حول أهمية جاهين: «احتل الفنان العبقري متعدد المواهب صلاح جاهين مكانة فريدة في تاريخ الفن المصري، فقد كان رسام كاريكاتور بارعاً وشاعر عامية لا غبار عليه، وقد بدأ بنشر إبداعه في الشعر الشعبي منذ عام 1955، وذلك بعد توالي إبداعه كلمات مئات الأغاني العاطفية والوطنية والتأملية.

أصدر جاهين ستة دواوين هي: «كلمة سلام، موال عشان القنال، عن القمر والطين، قضاقيص ورق، أنام سبتمبرية، رباعيات صلاح جاهين». ويرصد نصار مشاركة جاهين في عدد من الأفلام السينمائية، هي: «لا وقت للحب»، «رابعة العدوية»، «اللس والكلاب»، وكتابته الأوبريت الشهير «الليلة الكبيرة» لمسرح العرائس.

وبحسب نصار، بالإضافة إلى سيد مكاوي لحن أعمال جاهين كل من رياض السنباطي، منير مراد، كمال الطويل، محمد الموجي. ففي عام 1961 غنت له أم كلثوم أغاني كثيرة، وبعد هزيمة يونيو (حزيران) كتب جاهين نشيد «راجعين بقوة السلاح» ولحنه السنباطي وغنته «كوكب الشرق»، وفي 6 أكتوبر عام 1973. تشرين الأول تحقق حلم جاهين بالانتصار، الذي كتب له نشيد «والله زمان يا سلاحي» ولحنه كمال الطويل إبان العدوان الثلاثي.

كذلك غنى الفنان عبد الحليم حافظ أغاني وطنية كثيرة من تأليف جاهين مثل «إحنا الشعب»، التي غناها عام 1956 بمناسبة اختيار الشعب المصري جمال عبد الناصر كأول رئيس منتخب للجمهورية، ثم «بالأحضان» عام 1961، وبعدها «المسؤولية» في عيد الثورة عام 1963، بالإضافة إلى «يا أهلاً بالعارك» و«صورة» و«ناصر يا حرية». وأبدعت سعاد حسني عندما غنت من كلمات شاهين «خللي بالك من زوزو» و«يا واد يا تقيل» و«الدنيا ربيع» و«الأم» وجمعة من الأغاني في مسلسل «أنا وهو وهي» الذي شاركها بطولته الفنان الراحل أحمد زكي.



على اسم مصر

الجزء الأول

النخل في العالي والنيل ماشي طوالي
معكوسة فيه الصور .. مقلوبة وانامالي
يا ولاد أناف حالي زي النقش في العواميد
زي الهلال اللي فوق مدنة بنوها عبيد
وزي باقي العبيد باجري على عيالي
باجري وخطوي وثيد من تقل أحمالي
محنه قامتي وهامتي كأن فيها حديد
وعينيا رمل العريش فيها وملح رشيد
لكني بافتحها زي اللي اتولدت من جديد
مصر التلات أحرف الساكنة اللي شاحنة ضجيج
زوم الهوا وطقش موج البحر لما يهيج
وعجيج حوافر خيول بتجر زغروطة
حزمة نغم صعب داخلة مسامي مقروطة
في مسامي مضغوطة مع دمي لها تعاريج
ترع وقنوات سقت من جسمي كل نسيج
وجميع خيوط النسيج على نبرة مربوطة
اسمها مهموسة والا اسمها مشخوطة
شبكة رادار قلبي جوه ضلوعي مضبوطة



وترن من تاني نفس النبرة في وداني
ومؤشر الفرحة يتحرك في وجداني
وأغاني واحشاني باتذكرها ما لهاش عد
فيه شيء حصل أو بيحصل أوح يحصل جد
أو ربما الأمر حالة وجد واخذاني
انا اللي ياما الهوى جابني ووداني
وكلام على لساني جاني لابد اقوله لحد
القمح ليه اسمه قمح اليوم وأمس وغد
ومصر يحرم عليها .. والجدال يشتد

على اسم مصر

ولما زمانى رمانى عليل

نسيت كل شيء عن حبيبي الجميل

انا مانسأهوش

نسيت مشيته وصوته كان شكله إبه

ورسمة شفايفه

ولمسة إيديه

نسيت نظراته

نسيت لون عينيه

وقوس الحواجب وسهم الرموش



لكن هو أبداً
أنا ما انساهوش
نسيت إسمه وحكايته وعرفته فين
وعشنا سوى العمر
والا يومين
وكان م البشر
والا طير بجناحين
نسيت حتى كان له وجود أو مالوش
لكن هو أبداً
أنا ما انساهوش



قطعوا الأغاني وطارت نشرة الأخبار
دارت على كل دار في الكوكب الدوار
يا حاضرين اعلموا الغايبين بأنه في مصر
اتغير الاسم منذ الآن فأصبح .. مصر
ضحك التاريخ ضحكته المشهور بها واندار
ودخل مناقشة مع الجغرافيا عما صار
هل نسترف بالبيان اللي أذيع العصر
أم ننتظر مصر تطرد اسرائيل بالقصر
وساعتها تحصل بكل جدارة يوم النصر

على اسم مصر

على اسم مصر التاريخ يقدر يقول ما شاء

الأعمال الكاملة للشاعر

أنا مصر عندي أحب وأجمل الأشياء
باحبها وهي مالكة الأرض شرق وغرب
وباحبها وهي مرميه جريحة حرب
باحبها بعنف وبرقة وعلى استحياء
واكرهها وألعن أبوها بعشق زي الداء
واسيها واطفش في درب وتبقى هي ف درب
وتلتفت تلقيني جنبها في الكرب
والنبض ينفض عروقي بألف نغمة وضرب

على اسم مصر

مصر النسيم في الليالي وبياعين الفل
ومرايه بهتانة ع القهوة .. أزورها .. واطل
القى النديم طل من مطرح منا طليت
والقاهها برواز معلق عندنا في البيت
فيه القمر مصطفي كامل حبيب الكل
المصري باشا بشواربه اللي ما عرفوا الذل
ومصر فوق في الفراندة واسمها جوليت
ولما جيت بعد روميو بربع قرن بكيت
ومسحت دموعي في كمي ومن ساعتها وعيت

على اسم مصر

مصر السما الفزدقي وعصافير معدية

والقلبة مملية ع الشباك .. مندبة
والجد قاعد مربع يقسرا في الجرنال
الكاتب المصري ذاته مندمج في مقال
ومصر قدامه اكثر كلمة مقربة
قريتها من قبل ما اكتب اسمي بإيديا
ورسمتها في الخيال على أبداع الأشكال
ونزلت أيام صبايا طففت كل مجال
زي المنادي وفؤادي يرتجف بجلال

على اسم مصر

رحيلاً رحيلاً بغير هوادة

رحيلاً فإن الرحيل سعادة

عبادة

إرادة

سيادة

ولادة

رحيلاً إلى أين ليس يهم

وليس يهم بأي وسيلة..

أجيراً بلقمته في البواخر..

على وحمد من جواد القبيلة..



الأعمال الكاملة للشاعر

على مقعد في ذرى الجوف فاخر
وتملأ الكأس بنت جميلة..

على قدمي أو بفكري .. أهاجر

أبادر

أغادر

أخاطر

أسافر

ولكن إلى أين .. ليس يهم

إلى حيث لا تعبر الأفق شمس

إلى حيث لا تعبر الأفق شمس

إلى القطب أو حلقة الاستواء..

إلى حيث يسمع للجن همس

إلى مرفأ الغد .. أو أرض أمس

أرى كل شيء ومن أين جاء

وأفعل ما قاله القدماء

من الفقراء

أو الحكماء

أو الأمراء

أو الأشقياء أو البلهاء فليس يهم



لقد قيل وهو الكلام المهم

اللي يعيش ياما يشوف

واللي يمشي يشوف اكر



شفت الجبرتي بحرافيش الحسين وبولاق
بان البلد ماشي زي النمس في الأسواق
بالفلاحين ع المداخل من بعيد وقريب
بالأرنؤوط بالشراكة بكل صنف عجيب
مترصين سور رهيب مزراق في ربح مزراق
كأنهم لا بشر ولا خلقة الخلاق
ومصر فلاحه تزرق بين رقيب ورقيب
من غير أبو الهول ما ينهض ناهضة شايله حليب
والصبح بدري الجبرتي ينام وقلمه يسيب

على اسم مصر

مصر اللي عمر الجبرتي لم عرف لها عمر
وطلع لقاءها مكان مليون عوام وزعر
جعيدية غوغاء يجيبوا تملي وجع الراس
وخليط أفارقه هنا دوة روم ملل أجناس
والترك في القلعة والممالك خدودهم حمر

كان عمرها ستلاف سنة .. كلها سنين خضر
بس الزمان يختلف زي اختلاف الناس
ناس تبني مجد وحضارة وناس بلا احساس
وناس تنام لما يزحف موكب الأحداث

على اسم مصر

أنا اللي اسمي حتحور أنا بنت رع
مثال الأمومة ورمز الحنان
تفويض حلماتي وتملا الترع
وتسقي البشر كلهم والغيطن
أنا ربة الحب حتحور أنا
أنا السيدة المنجدة المغرمين
وكم من محب ف هواه انضني
دعاني وطببت خاطره الحزين
أنا طيبة انما طبعي صعب
وديعه ولو ثرت بطشي مهول
ما اشوفش اللي قدامي لو ألف شعب
أدوسهم وتجري دماهم سيول
ويسوم رع مافات بسناه في السما
وكل العيون خايفة تنظر اليه

وجاله القمر خلقتة معتممة
وعدى قصاده .. وضلم عليه
يا ويل اللي فتح في ابويا العظيم
يا ويل من تناول يا ويل من ضحك
يا ويلك يا مصر مصيرك اليم
أنا اللي اسمي حتحور اناح امسحك
يحاول يهديني رع ما اسمعوش
وادمر واطيح في البلاد والعباد
أنا الطيبه .. كنت زي الوحوش
سفكت دمء البنات والولاد
دبحت المحبين في عز القبل
هدمت المعابد علمي المنشدين
قلبت علمي النجساتين الجبل
حرقنت الغيطان هم والفلاحين
لحد مارع نادى ع الآلهة
وقال صبوا في النهر كل النبيذ
وشفت المياه حمرا ومزهرة
وظنيتها دم الضحايا اللذيد
شربت انتقاماً شربت شربت
وأنا بالعن المفتري والغبي



وحبة بحبة عن الوعي غبت
ونمت على النيل في ضي أبي
وقمت .. بكيت من فؤاد أم تكلتي
ونهنهت فوق صدر مصر العريض
على العالم المبدورين جنبي قتلي
وكان دمعي ينصب في النيل يفيض
واقول ليه يا مصر ولادك كده
يا إما المذله يا يتجبروا
يا خوفي يا فرحة قلوب العدا
ويا ندمي لو ما يتغيروا
ومن يومها والنيل في نفس المعاد
يفيض كل عام قبل فصل الخريف
بلون حمرة الدم يملا البلاد
ويملا النسائم بعطر مخيف
بعطري أنا اللي اسمي حتحور أنا
وعطري مخيف وحنون وطري
يفرح بس مرة في كل سنة
ويهمس يا مصر اذكري .. واحذري
نهايته يا مصر اللي كانت أصبحت وخلص
تمثال بديع وأنفه في الطين غاص
وناس من البدو شدوا عليه حبال الخيش



والقرص رع العظيم بقى صاح خبير للعيش
وساق محارب قديم مبتورة ف أبو قرص
ما تعرف اللي بترها سيف والا رصاص
والا الخراب اللي صاب عقل البلد بالطيش
قال ابن خلدون أمم متفسخة تعيش ليش
وحصان سهل صحى جميع الجيش

على اسم مصر

حصان عرابي جميل حصان عرابي أصيل
حصان عرابي رشيق ديله طويل
يسهر مع الخيل طول الليل يتكلم
ويقول أراء رغم إنه ماكانش متعلم
ويقف في عابدين وياخذ زاوية البروفيل
للسامين يرسموه ونشوفه جيل ورا جيل
ويعدي كالريح على المجاريح وسلم
وحافره ع الصخر في التل الكبير علم
ولما صابه انفجار القبلة اتالم

على اسم مصر

والمس حجارة الطوابي وادق بكعابي
يرجع لي صوت الصدى يفكرني بعذابي
ياميت ندامة على أمة بلا جماهير

الأعمال الكاملة للشاعر

ثورتها يعملها جيشها ومالها غيره نصير
والشعب يرقص كأنه عجوز متصابي
إنهض من القبر احكي القصة يا عرابي
يطل لي رافع الطهطاوي م التصاوير
شاحب ومجروح في قلبه وجرح قلبه خطير
وعيوننه مغرورقين بيصبوا دمع غزير

على اسم مصر

مالك سلامتك بتبكي ليه يا طهطاوي
قال لك عرابي .. انكسر بسلاح أوروباوي
وسلاح أوروبا ما هواش المدافع بس
ده فكر ناقد مميز للثمين والغث
قلناها ميت ألف مرة ألف مرة بصوت جهير داوي
بس الحماقة لاليها طيب ولا مداوي
ولا حد م الخلق بالخطر اللي داخل حس
الغفلانيين اللي خلوا العقل صابه مس
قالوا الخطر هو فكر أوروبا لو يندس

على اسم مصر

أحسنت في القول صحيح يا ولد يا متنبني

جبت اللي جوه الفؤاد عن مصر متعبى
وحكمت بالعدل لكن بعضنا انظلموا
يا أمة ضحكت من جهلها الأمم"
العلم كان عندنا من صغره متربي
لكنه هاجر وعدى البحر متخبي
لما الإيران هجموا ثم اليونان هجموا
ثم الرومان دمروا ثم التتار هدموا
ثم الجميع كل واحد جه مسح قدمه

على اسم مصر

أيها الديق رفيع الموضع
يا صفيحاً فوق مسمار يدور
صف لنا فعل الرياح الأربع
قل لنا لو كنت تدري ما يدور
قال صه . فالآن ريح الشرق جاءت
تحمل الضوضاء من سوق المزاد
وتغني دون لحن كيف شاءت
أنا ريح الشرق أدعى شهرزاد
أنا أحكي ثم أحكي ثم أحكي
وأمامي السيف كالعشب يميل

وبكسائي يتساوى مع ضحكى
طالمما كان بأسلوب جميل
ثم ها قد أرسل الغرب رياحه
تزكم الأنف برائحة عجب
وتغني كبتى فى مناخه
أنا ربح الغرب لوني كالذهب
أنا صفراء برمى الصحراء
أدفن الخضرة تحتي دون رحمه
أوصدوا الباب بوجهي الحراء
حسنا فلتصبح القريه فخمة
ثم ها قد اقبلت ربح الجنوب
بدخان السدهن تسري عابقه
وتغني انني أدعي الهبوب
أنا سوداء كبئر المشنقة
أنا سوداء كأفعى هائلة
كرماد النوم ينثر في العيون
كالغراب في المروج الموحلة
سعداء تعساء.. يرقصون
وتأني برهة ديك الصفيح
يلقط الأنفاس وهو يترنح



صلاح جاهين

دائراً دورته مع كل ريح
وأخيراً صاح كالأسد المجنح
هللويبا أقبلت ريح الشمال
في غلالات رقاق راعشه
وهي تشدو بحنو ودلال
ها أنا ريح الشمال المنعشة
إنني وردية مثل العسل
ديدمونا هكذا يدعونني
قد عبرت البحر يحدوني الأمل
لعطيل أسمر

يخنقني!

ومضى ديك الرياح في دعه
من يمين ليسار يتذبذب
وبسدا اضسحوكه وإمعه
وهو مصلوب شهيد يتعذب



وعلى رأي المثل
الديك الصفيح
بيدوخ وبأ الريح
والديك الصفيح

م البيضة بيصبح

ويقول بالصریح

الفكر فوق في الشمال يا الله الحقوه يا ولاد
لحقوه ولاد من ولاد الأغنيا الأسياد
وهم راجعين رموه في الباخرة في البحر
ونزلوا حكموا في ظل الانجليز والقصر
ومصر في الشمس بتغربل كلام منعاد
عن ابن بنت ابن حنت وطارق ابن زياد
والانجليز راضية بالخطباء وخطب الفخر
خطيب يهز الرؤوس وخطيب يهز الخصر
وخطيب يموت موتة الأبطال قتيل القهر

على اسم مصر

والانجليز معجيين بمراسم التابيين
مات مصطفى كامل اتملت البلد صواوين
والمشرقين شوقي جابهم لجل يبكوا عليه
آه لو عرف هم إيه دلوقت وبقم إيه
المشرق الأولاني هو شعب الصين
هزم التخلف بتنظيم اشتراكي رصين

تنظيم يروح اللومان على طول كده برجليه
والمشرق الثاني ينحط الحديد في إيديه
مليون شهيد يعني ثورة تخض شوقي بيه

على اسم مصر

هل مصر موميا جميلة صورتها فوق النش
يعشقها مجنون ينادي عليها ولا تطلعش
هل مصر نار صففت والنفخ فيها محال
والأرض نشعت على رمادها استحال أوصال
سألت أنا الرافعي كان عجز ولا بيسمعش
لكن عينيه كانوا يحكولي قصص ما اشبعش
يقولولي ماتخافش مصر بخير وعال العال
مصر الجبرتي ومصر الرافعي حال غير الحال
انظر محمد فريد أعظم وأرقى مثال

على اسم مصر

خذ الكتاب في يمينك وانظر الترقيم
عند المحبة وعند الموت في حرف الميم
تلقى محمد فريد بينهم مقيم ع العهد
وتلقى وجهه المدور زي قرص الشهد

الأعمال الكاملة للشاعر

مليان حماسة وكياسة وجدعنه وتصميم
على إيه مصمم؟ .. يسهم زي كل زعيم
ويقول على الثورة اللي وأدوا ثورته في المهدي
أنا بابني في السر شيء صعب المنال كالفهد

على اسم مصر

محلول مركز من السكر في كباية
وف قلبه خيط يتلضم حباية حبايه
سكر نبات بللورات الماظ بتضوي ضي
وتفضل الألماظات تكبر شوي شوي
لحد ما العقد يبقى في الجمال غايه
ده الحزب في الشعب نضرب به المثل آيه
الصلب والسائل الاثنين سوا ياخي
تنظيم محمد فريد في كل قريه وحي
بللوره بتشع بالثورة اللي يومها جي

على اسم مصر

العقد الماظ ورقبة مصر لايقاله
ضيق فريد كل أرضه عليه وأمواله
وفجأة حاكموه وبالله نفوه عن الأوطان

وحرب عالمية أولى ووفد م الأعيان
وثورة والانجليز انحطوا وانشالوا
مين اللي نظم فلول الشعب ده بحاله
ازاي جميع البلاد تنهض في نفس الآن
القاهرة اسكندرية منفوط اسوان
وبعيد يا ولداه فريد مرمي وحيد شرقان

على اسم مصر

السيمفونية اسمها الثورة على المحتل
سنة تسناشر اتعزفت في كل محل
تأليف محمد فريد ألفها من سنوات
وكتب لها النوتة بوق وبيانو وكمنجات
عزفوها من غير قيادته وجمعهم ما اختل
غير وقت صرف الأجور لما النفر ينذل
من وقتها وغلوشت نغمات على نغمات
وسعد زغلول زعيم مشغول في الانتخابات
يخطب ويضرب يابسه يطبع البصمات

على اسم مصر

وف أوضة عربانة فيها كل شيء بردان

رقد فريد وحده بالحمى والهديان
وقام وقف ع السرير في تلج المانيا
ينده يا مصر اسمعي اللبي مفاق الدنيا
ووصيتي الثورة لاشتراكية والبنيان
ثورة بحق وحقيق مش حركة م الأعيان
ماغمضوش عن وحوش الغرب ولا ثانية
ح تروح وحوش لنجليز تطلع وحوش ثانية
وسقط ونطق الشهادة ونظرته الحانية

على اسم مصر



على اسم مصر

الجزء الثاني

أنا الذي مشيت ادور باشتياق وحنين
على مصر المشي خدني من سنين لسنين
لحد ماسينها وسنيني بقم واحد
وعاصرتها يوم بيوم لم فاتني يوم واحد
وحضرت شاهد عيان مولد وموت ملايين
مازعلت من كلمة قد البركة في الجاين
مين هم دول يا جدع .. ما توحد الواحد
البركة فينا وفي السامعين بالواحد
أنا قلتها بنرفزة .. من غيرة الواحد

على اسم مصر

مصر الرمال العتيقة وصهدا الجبار
والنبيل كخرطوم حريقه وحيد في وسط النار
في إيدين بشر نمل رايحه وجاية ع الضفة
فيهم مطافي وفيهم كدايين زفة
وفيهم اللسي تعالى وقال أنا حكمدار
وكل باب م البيان مقبول على اسرار



وكل سر بحريقة عايزة تتظفا
من أهلي تدهلي وتقوللي تعا اتدفا
أنا اللي عمري انكتب إلى يوم ما اتوفى

على اسم مصر

على اسم مصر ارفعوا الانخاب واملولي
شدوا الوترع القمر يا شباب وغنولي
نسكر على جبهها بالفن والاحساس
نسكر ودمع الحماس يملا لنا تاني الكاس
احنا يا حلوه الفدا بس اطلبلي وقولي
يا سمره بعيون كده وسنتك لولي
وغنوه الحب تعالا ويسمعوا الحراس
بصفروا ويحضروا بفرقة طبول ونحاس
ويتقبل سجن مصر امام عيون الناس

على اسم مصر

والمطبعة تدور وتخطف كل إيد منشور
عيش لسة م الفرن طالع ريحته ريحة النور
يا فلاحين يا جنود يا طلبة يا عمال
عدوكم حلف لاستعمار ورأس المال

صَلاح جاهين

عاش الطريق لشتراكي قوم يا شعب وثور
وحكمكم حكم اقطاعي عميل مأجور
عاش الكفاح بالسلاح إلى القنال يا رجال
خلوا حياها لنجليز المستقرة محال
والشمس نامت ليلتها وفكرها شغال

على اسم مصر

القاهرة في اكتئاب والآنس عنها غاب
من عتمة تدخل لعتمة كأنها ف سرداب
أوقرية مرمي عليها ضل هجانة
الحظرم المغربية بأمر مولانا
ومصر في الليل بتولد والبوليس ع الباب
صبية ولأدة يابا ولحمها جلاب
طلع الصباح زغرطت في السكة فرحانه
على كتفها مولودتها لسه عريانه
وف لحظة كانت جميع الدنيا دريانه

على اسم مصر

على كتفها مولودتها وتجري وتنادي
ياولادي من يوم ميلاد الأرض ياولادي

الأعمال الكاملة للشاعر

ينهض لها امحتب بدواه يقويها
وبنتاؤر ينشد الاشعار يهنيها
وسعد زغلول يكح يزلزل الوادي
وعرابي يهمس ومصر ترد بتمادي
تقوله آه برضه ثورة جيش وح احميها
بالدم بالروح بكل حياتي ح افديها
اما الأسامي معنديش غير اسمها

على اسم مصر

مولودة كبرت وشبت في ثلاث تيام
من هبة هبت لثورة لبست الاحلام
والعرش عام راح ايطاليا بعيد ورا البراميل
يا هلترى دي حقيقة والا وهم جميل
ومصر من امتى كانت حظها بسام
ظهر قميص العرق متشمر الاكمام
أنا شفته عقلي برق وبدأ لصاحبه يميل
نقشت له ف قلبي احلى وأروع التماثيل
بدراعي والمطرقة وبايدي والأزميل

على اسم مصر

المرافعة

حلمت الليلادي،

بإني في موقف رهيب،

بأقول، والكلام مني طالع نحيب

سيادي القضاء،

دفاعي بسيط.

كلامي ماهواش غويط، وماهواش عبيط

بسيط،

بساطة هدموم الغلابا الفقاري الحفاه

بسيط،

زي اسم صديق على شفة صديق

بسيط

زي دمعة برى،

بسيط

زي وحش جعان في الفلاه،

بسيط

زي حفنة دقيق.

سيادي القضاء،

يا ذمم يا همم يا قمم يا عتاه،

دفاعي قوي.

الأعمال الكاملة للشاعر

قوى،

زى صرخة غريق،

بينده لقارب نجاه

بينده بآخر قواه، للحياه

دفاعى قوى

زى دقماق حديد،

قوى

زى نظرة وعيد،

قوى

زى تمثال اله،

قوى

زى بلطة رجال الحريق

فوق بيان الحريق

سيادى القضاء،

سيادى الكرام

العظام

الفخام

العلاه،

دفاعى مؤيد،

مؤيد بكل الكلام العظيم،

بتواره،





بإنجيل،

بمزامير داود،

بقرآن كريم.

دفاعى مؤيد

بكل أنين الكمنجات

فى كل الوجود

بكل حفيف النسيم.

بتهنينة الأمهات للعيال فى المهود،

بصوت القبل،

وكل ابتسامة بحق وحقيق،

تؤيد دفاعى.

وبارفع صباعى الضعيف

وباقول كلمتى

سيادى القضاء،

سيادى الحدادى

اللى حايمه على رمتى،

ح اقول كلمتى.

لكن قبل ما انطق واقول كلمتى

قولولى انتوا ..

إيه تهمنى .. ??

إِيسِه اللّٰهِي وَصَلْنِي هِنَا
أَنَا صَاحِبَ الْبَيْتِ وَالْأَضِيفِ
صَوْتِي أَنْحَسِي
مَا أَقْدَرُشْ أَقْسُولِ
مَا عَرَفْشْ حَاجَهْ عَشَانِ أَقْسُولِ
مَا عَرَفْشْ غَيْرِكْ أَنْتِي بِسِ
يَا بَتِ بِاللّٰهِي فِي حَبِكِ الْعَقْلِ أَتَهْوَسِ
مَكْبَانِ غَرِيْبِ
كَأَنَّهُ سَجْنِ كَأَنَّهُ مَخْدَعِ لِحَبِيْبِ
كَأَنَّهُ بَيْتِ
شِبَاكِ حَدِيدِ وَعَلِيْهِ سِتَائِرِ مِنْ حَرِيرِ
وَالرِّيْحِ بَيْنْفِدِ مِنْهُ زِي الْمَسَامِيرِ
الرِّيْحِ عَسْوَِي
قَلْبِي أَنْقَبِضِ
قَلْبِي أَتَلْوَِي
الشَّمْسِ تَلْجِ أَصْفَرِ شَعَاعِهَا صَارُوْخِ هُوَا
الضَّلْمِ تَلْجِ أَسْوَدِ كَتِيْرِ
أَلْوُفِ الْقَنَاطِيْرِ
خَبِيْنِي فِي شَعْوَرِكِ يَا بَتِ

شعرك خشن زى الجرام الصوف يابـت
خبينى فى فيه م الزمهرى رر
وئيمىسنى فى السـرير
دخل النبى بردان خديجه لفتـه
حطت عليه غطيان لحد ما دفته
دخل النبى بردان وقال: فىن الغطا
البسمة غطت شفـته



أغنية إلى ذكرى صديق

الشعر شارد فى الجبل منى
عملت انا هجان ورحمت وراه
قلبي دليلسى يطير ويغنى
عصفور جناحه بدمه متحنى
لَفَقْنِي لَفَقْنِي الجبل ولا تراه
تسفى الريح سبعين صباح وصباح
قلبي دليلسى وانتما وراه سواح
والشعر شارد فى الجبل منى
حبيت غزال غنيت له بالموال
صد الغزال ساق الدلال أهوال
حبيت غزال غنيت له غنيوه
صد الغزال علشان ما هو حليوه

هجر بقصد

غنيت صبا

جافسى وتبىا

غنيت له بيأتى

رقاص أنا وشاعر وناياتى

وافدى رفاق الفن بحياتى
وافديك يا نجم اخضر يا بياتى

أفديك أنا

يا عندليب ع المشنقه عشه
عافر مع الجلاد قام هشه
علشان يروق الجولف عالاه
يقتل فى ورد الحب ويحشه
صوتك من البلد البعيد جاله
عدى من الحراس وعداله
وكان يد الرب نازلا له
تكشف نقاب الغش عن وشه

أفديك أنا

يا عندليب ع المشنقه عشه
خارج فى يوم العيد وقلبي سعيد
شفت البنات يتعاجبوا فى الألوان
كانهم أغانيك يا بياتى
يايو الأغاني الزرقا والخضرا
وكان حلمك بان وآن له أوآن

مديت خيالى للعراق .. لبعيد
لابنك "على" وهاديته بالونه
كاتب عليها جميع حكايته

كان ياما كان
ملك الزمان
كان ياما كان
ظلم وهوان
إنسان جعان
كان ياما كان

وكان حلمك بان وآن له أوان
الغنوه زرقا والكلام بجناح
فتحت أنا للشمس شباكى
على قاعده الشباك أنا تاكى
بين شفتى وصوابى ناي نواح
تسفى الريح سبعين صباح وصباح
قلبي دليلى وأنا وراه سواح
والشعر شارد فى الجبل منى

سيد درويش

واقف لحد الفجر، باستغفر،
ورا عمود مرمر
مشروخ، وانا شايب،
والخضر فات بحصانه من جنبى،
لابس صديرى بالقصب، دايب.
طب الحصان، فطسان، وطلع الفجر...
الفجر كان أخضر،
الأرض كانت ريش نعام بمبى،
القلعه سوده، والبيوت بيضه،
فى كل بين خزنة،
والخزنه مليانه، شِفْ نساوين.
نام الأفندى، يئن بالتركى ..
والبياعين بينادوا ع الحنه،
والرعد ساكت،
والنقرزان بينفذ القوانين!
الشمعه وقعت فى جب،
أول رجب، ألف وميتين هجرى،
عشرين كياك، مصرى ..
أنا كنت سكران، سكر شيخوخه،



لكنى دريان باللى حواليا،
اسكندريه الملح غطاها،
حبلت، وولدت، ورد على ياسمين،
ولدت حديد على نار،
مبييضين، على شيالين، على مراكيه ..
قال اللي قال: حوشوا،
كانت مراكب، أصبحت نوابيت ..
رد اللي قال: صلوا على طه،
الواد أبو السيد فى الفنار
فى إيده ريشه عود،
بيلون السماوات، سحب، ورعود ..
يا مرحبه!
نزل المطر ع الأهالى،
خرجت جنازتى، الضهر، م الأزهر،
- والضهر كان أحمر -
فتحت انا عنيا
من قبل ما وصل للضريح، وصحيت
على شفتى غنوة صنايعيه،
أبو عرب غناهاالى



الموتى

في صفحة الموتى
بيكلمونى كل يوم الصبح
بصورهم الباهتة
بعيونهم الثابتة
يسألونى كلهم إمتى
ح تنطبع صورتك كمان
انتا ..

هنا زينا فى صفحة الموتى ؟
حبايبنا يا غالين
محناش ح نتأخر
الدورح يبجى
والمصير محتوم
ياللى صورتها
بطرحة الزفة
ده حكم من قبل الوجود
محكوم
يا اتنين عجائز:
حاج، ومقدس
صورتين بلاسة





والجبين مهموم
يا مغترب
يا صورة طالعة
من جواز السفر
يا رسم على وش التابوت
مرسوم
في حفاير الفيوم ...
وحفاير الفيوم
جبانة م الزمن العتيق
مشهورة بالصناديق
وعليها بالالوان
صور مخاليق
كاهن ..
مراكبي ..
ست بيت ..
تاجر ..
بنية حلوة ..
عسكري ..
شاعر
صور بشر أيامهم انحسرت
مدائهم اندثرت
توايبتهم انكسرت ..
مافضلش منها غير وشوش

الأعمال الكاملة للشاعر



يبصوا نفس البصّة
ويحكوا نفس القصة
مستفرقين في الموت
بلا عُصّة
وفي الخلود رايعين ..
زى اللى في الجرنال
في صفحة الموتى
قلت الشبه من أين يتأتى ؟
قالوا عشان الكل مصريين .
الكل مصريين
الكل نفس الهوية
نعى المطارنة
جنب نعى الشيوخ
طالبين سوا الرحمة الالهية
طالعين سوا أمجاد سماوية
في وحدة أبدية
ما تعرف الطائفة المسيحية
م الاسلامية ..
تشهد صورهم جنب بعضهم
في الأعمدة السوداء البكائية
يان دى .. هيا ديا
باحكى عن الموتى

وملك الموت
يحصد امم
ويذري في الملكوت
يقعوا كندف الثلج
غير مسموعين
أو كالجبال
يقعوا بأرعبها صوت
باحكى عن الموتى
فى شتى العصور
وباقول عليهم
ألف رحمة ونور
مش باحكى ابدأ
عن أمل دنقل
لأنه عايش
رغم سكنى القبور
وقالوا فى الأمثال ..
اللى خلف ما ماتش
وعن أمل يتقال ..
اللى ألف ما ماتش
وسلام على اللى
فى صفحة الموتى
وسلام على اللى
فى صفحة الاحياء.



المقابر

باحب المقابر، واموت فى التراب
هناك،

زى حى العُناى فى الهدوء الجميل
هناك

زى شط البحور، فى النسيم العليل،
هناك

العجب.

هناك

تمشى تسمع لرجلك ديبب على
يرضى الغرور،
هناك

كله راقد، مفيش غيرك انت

اللى واقف فخور،

وأما الزهور،

هناك

بالمقاطف على الأرض، يا مسروقة

يا بتحتضر،

تجيب أدوات العطور،

وتصنعها عطر اسمه مثلاً:



عبير العبير!
تبيعه، وتكسب ذهب.
وتدهس على العضم،
وتقول كلام فلسفة،
وتملا كتب.
ده غير الثواب
اللى تقدر كمان تكسبه،
من الفاتحة ع الميتين.
فمنها عباده،
ومنها استفادة،
ومنها أدب،
لهذا السبب،
باحب المقابر
لكين،
بعقلى الرزين،
باحب البيوت،
واللى فيهم،
زيادة!



بكائية إلى جون كنيدي

يعنى كان لازم تطاطى

وتغسل الرجلين يا "جون"؟

يعنى كان لازم

يفيض بيك الكرم،

وتفيض بروحك ع الغيطان

يعنى كان لازم تموت؟ ..

علشان أفتح محارة قلبي

عن كلمة حنان ..

مرة في العمر،

لمليونير من البيض الجبابرة الأمريكان

بس إنسان؟ ..

أه لو الانسان

يشوف التانى إنسان

قبل ما يفوت الأوان

آه .. وآه ..

لعنة الله ع الحياة،

لو تكون ستار

ولازم يتمزع

علشان مابنى آدم بيان ..



رحمة الله على الشرف،
لو يكون نجمة "شريف"،
لا بد يخرمها الرصاص،
لجل يخرج م الرعاة،
راعى يبشر بالخلاص.
وسلام الله على جسد الشهيد،
الوليد،
اللى عمدوه بدمه،
وانتزع من حضن أمه،
واترسم قديس عريس
فى "روحانيات" الزنوج
"جون" يا "جون"
يا ابو الجراح،
"جون" يا "جون"
نام فى أمان،
شعلة الحرية
وقعت ع التلوج
فى بحيرة ميتشجان
واشتراكى عربى وأفريقى،
ناح
وانتجب ع "الساكفون"



الأعمال الكاملة للشاعر

مرة في عمر الزمان ..

"جون" يا "جون"

روحك مياه

بلورية،

صافية،

دافية،

جايه من كل اتجاه

زى ما تكون دسعة واحدة،

كبيرة،

قد الكون يا "جون"

يا "يوحنا المعمدان"



إلى اللقاء

بابلونيرودا
إلى اللقاء
قتلوك حقيقي
والا افتراء؟

الشعر طول عمره
سكة واحدة
وغنوة واحدة
بلا انتهاء
تهنينة واحدة
من غير ولادة
مرثية واحدة
من غير بكاء
لحظة سعادة
تَمَنَّاها غالى
بوشكين يقولك
وابو العلاء
الشعر طول عمره
تهمة غامضة
وكل شاعر



وله جزاء
ولو يغنى
للشعب زيك
يبقى مصيبة
وأُس البلاء
يلحق بلوركا
ويقابلة لوركا
هناك في مستنقع الدماء
يمسح جراحه
ويقول له قل لى
فيه لسه
فى الدنيا أدنيا؟
فيه لسه ناس
ماسكة بندقية
ومصوباها للأبرياء؟
للحب؟
للحلم؟
للحقيقة؟
للصدق؟
للطهر؟
للنقاء؟



دماء كمال ناصر
اللى لسه
طراى
وزى العسل صفاء
تنطق تقول
ايوه لسه برضه
الضلمة قادرة
على الضياء
وقادرة تقتل
بابلونيرودا
وألف غيره م الشعراء
وأقول أنا
صحيح ..
ولكن الشعر متعة
وأى متعة
زى العطاء



بابلونيرودا
إلى اللقاء

اللى جرى لجميلة

شفايفها لمتاضحك
زى شفايف فثريسا
وعيونها بالحواجب
تمام شبه سنوية
وشعرها المموج
مفروق من الشمال
على الموضة البناتى
زى عروسة كمال
وسمرا زى خضره
ورق يقه زى سوسن
والورد فوق خدودها
صلاة النبى أحسن
والصورة بين إيدينا
مع كل حى حبه
ياخددها يطل فيها
حرام يا عينى .. شابه
واللى مادريش يقولك
مالها؟ جرى لها إيه
ده اللى جرى لجميله

ما ينسكت عليه
وجميلة من الجزاير
بلد البحر الكبير
بلد ولاد عمامنا
فرسيان الأساطير
اللى زارعين رأيتهم
ع القومه مرفرفه
اللى سايبين بيوتهم
والفرش والدفنا
عشان عاوزين يعيشوا
حياة مُشرفه
جميلة واحده منهم
واحده من شعب تاير
بتكبره المظالم
وبتحب الجزاير
وبتحب الأغاني
وبتحب العماير
وبتحب الجنانين
والورد والعاليال
واللى جرى لجميله

شئ من ورا الخيال
تجري والدم نازف
وتقول يا جرح جازف
اصبر ده الوقت آزف
والناس مستنظره
أوامر القسيادة
أحبك يا جزاير
أكثر من العباداة
أجري كمان شويه
خطوة كمان زيادة
وف كنفها الرصاصاة
وعضام اتحطمت
تنزف تنزف وتجري
لحد ما اترمت
وكلاب الصيد جابوها
ومها ما يعذبوها
ومها ما يصلبونها
ومها يضربونها
ومها اتالممت
أبدأ ما سلمت

ومهما يغصبونها
أبدأ ما اتكلمت
يا حشره ع الشيباب
بين أنياب الكلاب
كتبوا العذاب عليها
بدال كتب الكتاب
والدنيا تروح وتيجي
جوه عيون البنيه
اللى ف صورتها بانست
شبهه عيون سنبيه
وتبهرت الشفايف
الضحاكه الشهيه
اللى ف صورتها بانست
زى شفايف ثريا
وشعرها المموج
اللى ف صورتها سال
من فرق ع الشمال
زى عروسة كمال
معجون بدمها
حبة عين أمها

حبة عين النضال
واللسى جرى لجميله
ما تحمله الجبال
وتر من الكمنجه
وتر واحد وحيد
نوح عشان جميله
فى أول النشيد
والأوتار اللى باقية
صرخت من غير دموع
وامتدت م الكمنجه
لحناجر الجموع
على باب المحكمة
والعالم كله واقف
على باب المحكمة
بيغنى غنوة واحدة
راعدة ومدمه
تزلزل السماء
وقضاة المحكمة
العصبة المجرمة
بقلوب مظلومة

وعلى عينيهم غمما
وفى ايديهم دما
يسمعوا الأغاني
وهما فى وادى تانى
وايش تعمل المعانى
فى عقول مضللة
طول الليل السجانة
يسبوا المقصلة
وجميلة فى الززانة
ساعة ومستحالة
طول الليل المعارك
دايرة ف حزن الجبل
وجميلة فى المهالك
عايشه على الأمل
أمل أمل أمل
اتقدم يا بطول
تبنت فى البنديفة
خلى النار تشتعل
ده اللي جرى لجميله
مالوش غير العمل

المطبعة

يا مطبعة

يا معسبد الديمقراطية العظيم

على مذبحك

قتلوا ابراهيم ، وكان خسارة ابراهيم

هجموا الوحوش

قتلوا الورق واللى عليه من كلام

بالرشاشات

قتلوا المحابر نكلوا بالقلام

ما يهمنناش

الفكر عايش فى صميم الفؤاد

والمطبعة

لساهها دايرة بكبرياء وبعناد

نزل الجوع

مامعاهش غير قلبه بينبيض شغوف

صحفى أصيل

أعزل يدافع عن صفوف الحروف

يا ميت نسدم

اتفجرت فيه الحروف العزاز

فارت لهيب


طاشت رذاذ واتحولت سم غاز

آه يا صديق

باللى ماعدناش تانى نسمع له صوت

احنا كده

مانموتش غير م اللى احنا بنجبه موت



فى الربيع

الربيع جاى السنادى شكل تانى،

خضرتة نجوم وحدويه.

عصافيره نسور صلاح الدين قويه،

ورده دم احمر ملهلب،

والأغانى

صرخات الجماهير الثوروية،

الربيع ذات نفسه ثورة،

ثورة ع الموت والخمود،

الربيع فى دمشق كان حالف يعود،

شق فى الجلمود وعاد،

زى ما ف بغداد نبع وسط الشتا ..

يا حلاوه ع الربيع وسط الرمال ..

الرمال غطت على القدس

ليالى طوال طوال،

ألف ليله إلا ليله

.. ودوام الحال محال.

نغشت فى الرمل زهرة،

رفعت راسها بحذر، تحت الرياح، متلفته

الربيع ادألها قوة فى المعافره،




فَرَعْتُ، وَاثْمَطَّعْتُ ..
الرَّمَالِ اتَّعَمْتُ،
وَالرِّيَّاحِ اتَّزَعَزَعْتُ،
وَالصَّخُورِ اتَّقَلَعْتُ،
وَالوُحُوشِ اتْفَزَعْتُ،
وَالقُلُوبِ السُّودَاوِيهِ اتَخَلَعْتُ،
رَكَعْتُ تَحْتَ الْجِزْمِ وَاتَضَعَضْتُ
وَالرِّيَّاتِ اتْرَفَعْتُ،
وَالحَنَاجِرِ لَعَلَعْتُ،
وَالسِّيْقَانِ الشَّابِهِ فِي الرِّقْصِ الْمَزْلُزْلِ بَدَّعْتُ،
وَالبِنَادِقِ طَرَقَعْتُ،
كُلِّ بِلْدَانِكَ يَا أُرْدُنْ وُلَّعْتُ،
كُلِّهَا سَمِعْتُ، وَعَتُّ، قَالَتْ آمِينَ ..
يَا سَلَامَ
الرَّبِيعِ، حَتَّى فِي قَلْبِ مَعْسَكَرَاتِ اللَّاجِنِينَ.
مَشْ بِاقُولِ لَكُمْ،
الرَّبِيعِ دِهْ شَكْلِ تَانِي؟! ..



الأمير

المجد للجندي اللي من غير لبس حرب
الفارس اللي مش على صهوة جواد
الراجل الغلبان فى روحه وعيسته كرب
لكن أمير عاشق بروحه ودمه جاد
عاشق بروحه ودمه جاد وكان أمير
وكان ولى العهد فى الكون الكبير
الصولجان مكتوب باسمه فى الديوان
والوحوش والنزلان باسمه تستجير
والنحل والعصافير تجيله تكلمه
أنبل أمير أساطير خيالك يرسمه
السحارين سحروه صبح عتال فقير
شيل الحمول يحنيه ويوشك يهدمه
عتال فقير فى السوق يسير محنى البدن
حكموا عليه يفضل كده طول الزمن
لحد ما ف يوم دق باب قلبه الهوى
وكان هواه وغرام صباه هو الوطن

لما انضرب بالنار على المتاريس ومات
بصديري بلدى وبقميص مربعات
مالت عليه الحلوة بلده ودمعت
والدمع زى الدم يعمل معجزات
الدمع فك السحر والأمر اتضح
وعرفنا مين هو الطريح اللي انطرح
وفوق جبينه اللي بقى ف وش السما
زالت خطوط الهم وارتسم المرح



شدوان

كان ياما كان وعلى مدى الأزمان
بلد وكانست أول البلدان
بكرية الدنيا لكين صلى ع النبي
كانت ترضع امها الألبان
من قبل منها الأرض عاشت سداح مداح
تسكنها أشباح ناس على حيوان
وشعرها منكوش ولا عارفه إسمها
والعقل غائب والكلام هذيان
الا وتطلع جنب نيل مصر للعجب
مخاليق تقيس الأرض بالفسدان
تعمل بيوت لها سقف ومحل للأدب
وفرن عيش ومراية للنسوان
تحسب بروج النجم والشمس والقمر
وتقول ح يجى يوم كذا الفيضان
تبرى القلام البسط وتخط ع السورق
جوابات حكومة وفلسفة وبيان
تمان تلاف عام كل عام الف تجربة
ولكل تجربة ألف ألف ميدان

يا مفتحين العين كلامى يسركم
ويا غفلانيين نشوا على الدبان
ولا كل من لها خارطة قالت أنا بلد
البرك ع المدينة والعممران
وعمار يا مصر عمار بنيلك وأمتك
عمار بأفراحك وبالأحزان
آدى اللى دم الجندى ع الصخر أثبتته
بحروق من النار فى نهار شدوان




ميلاد

بعدت ولادتي في الزمن ثلاثين سنه
صبحت تاريخ زى السيوف والسقاين
زى الشراكسة والشموع والسلطنه
زى الخيول .. ضاعت سنيي في السنين
القاهرة، والألف مدنة شمعدان
آدم عريس في بولاق وحواء في الحرير
القاهرة، والناس في كهف الليل ديدان
آدم وحواء بيقرأوا توفيق الحكيم
غنالها بشرف كرد غنت له عجم
رديت أنا من فوق بجواب الجواب
وخرجت كالعنقود من كرم العدم
قطرة حياه مخلوبة من ضرع السحاب
آدم وحواء شقطنوني في الهوا
زى المخدة الريش ولعبوا في السرير
صرخت ضموا الصرخة بالحضنين سوا
ونعست نمت سعيد في المهدي الحرير

جدى رفع يدي بطرطوفة البنان
ضحكت شواربه وكرمشت أركان عينيه
مولود ذكر ينشال على كفوف الحنان
محروس من الله والملايكة حوالبه
يا هلتري الطفل اللي نايم يتسم
من خلف جذران فى العدد ثلاثين سنه
هو الحزين .. هو البدين الملتحم

هو أنا يا رب؟

والامش أنا



الدرس انتهى

الدرس انتهى لموا الكراريس
بالدم اللي على ورقهم سال
فى قصر الأمم المتحدة
مسابقة لرسوم الأطفال
ايه رأيك فى البقع الحمراء
يا ضمير العالم يا عزيزى
دى لطفلة مصرية وسمرا
كانت من أشطر تلاميذى
دمها راسم زهرة
راسم راية ثورة
راسم وجهه مؤامرة
راسم خلق جواره
راسم نزار
راسم عسار
ع الصهيونية والاستعمار
والدنيا اللي عليهم صابرة
وساكنه على فعل الأباليس
الدرس انتهى

لموا الكـراريس ..

ايه رأى رجال الفكر الحر

فى الفكرادى المنقوشة بالدم

من طفل فقير مولود فى المر

لكن كان حلو ضحوك الفم

دم الطفل الفـلاح

راسم شمس الصباح

راسم شجرة تفاح

فى جناين الاصلاح

راسم تمساح

بـألف جناح

فى دنيا مليانة بالأشباح

لكنها قلبها مرتاح

وساكنة على فعل الأباليس

الـدرس انتـهى

لموا الكـراريس...

ايه رأيك يا شعب يا عربى

ايه رأيك يا شعب الأحرار

دم الأطفال جايلك يحبى

يقول انتقموا من الأشرار
ويسـمـيـل ع الأوراق
يتـهـجـي الأسماء
ويطـالب الآباء
بالثـأر للأبـناء
ويرسم السـيف
يهـد الزيتـف
ويلمـع لمـعة شمس الصيف
في دنيا فيها النور بقي طيف
وساكنة على فعل الأباليس
الدرس انتهى لموا الكراريس



عناوين جرائن المستقبل

احنا العمال اللي انقتلوا
قدام المصنع فى ابوزعبل
بنغنى للدنيا ونتسلو
عناوين جرائن المستقبل:
"وحدة صف الأحرار"
"جبهة لكل الثوار"
"عبور الجيش لسينا"
"الزحف مسن الأغوار"
"جيش العدوان يتقهقر"
"الأرض قايدة نار"
"والبحر قايد نار"
"الاستعمار أثبت فشله"
"البيت الأبيض لا يخجل"
"احنا العمال اللي انقتلوا"
"قدام المصنع فى أبوزعبل"
بنغنى للدنيا وتلوا
عناوين جرائن المستقبل:
"محاكمة للمجرمين"

- "قائمة بالمتهمين"
"إدانة مستر نيكسون"
"بقتل الاسطى ياسين"
"القناتل استعمارى"
"القتلى وطنيين"
"عمال مدنيين"
"نصارى ومسلمين"
"مرتكبوا المذبحة يقتلوا"
"الحكم على المتهم الأول"
احنا العمال اللى انقلوا
قدام المصنع فى ابوزعبل
بنغنى للدنيا وتلوا
عناوين جرائين المسقبل:
"الجو غدا يتحسن"
"معرض لزهور السوسن"
"الخطبة الخمسية نفذ"
"مهرجانات النسصر غدا"
"تصفية الصهيونية"
"دولة فلسطين .. تعلن"

"دستور وقوانين .. تعلن"

"حربة السدين .. تعلن"

"قوس تذكارى جارى عمله"

"طالبين منه احنا ووح نفضل"

احنا العمال اللى انقتلوا

قدام المصنع فى ابو زعبل

بنغنى للدنيا وتلوا

عناوين جرائين المستقبل



صديق عمرى

عشرين سنة

عمرى أنا

أنا العجوز الشائب الحزين

أنا العجوز من غير ما تمضى السنين

أنا العجوز من قبل سن أربعين

عمرى النهاردة

رغم المرارده

فى عمر وردة

عشرين سنة

كانلى صديق وكان حبيب عمرى

هو اللى علمنى المشيمب بدرى

حضرت مولد كل شعراية بيضا

عبرت سوافه كما الشهاب تجرى

كما برق سيف الحق فى الهيبضا

وسط الظلام تبرق هلال هجرى

تحسب تاريخ الكون حقيقة ومجاز

كالأبجدية بالقلم لردواز

بالشعر لابيض كان يعلمنى

أستاذ تاريخ وفى التاريخ أستاذ
قابلته من عشرين سنة وكلمنى
وانالسه باحبى فى الظلال
علمنى مشيئة الرجال
سلمنى راية النضال
ولحد هذا اليوم .. بيلهمنى
وخياله كل ما اقح يقومنى
وكل ما اتبعتر يللمنى
وانهض واقوم بأمل جديد
وبقلب أقوى من الحديد
وليد .. عجوز .. شايب .. حزين
وعمرى عشرين سنة



الليلاى

الليلاى

كل أحببى زارونى

طيف خيال كحل عيونى

هام معاهم قلبى .

سافر ودعاهم

محللا طعم السهد

لما سهرونى

قلبى سافر ودعاهم ..

م البوادى

من على روس الجبال ..

من كل وادى

فى بلادى

اللى منها الشمس جايه

البلاى العربيه

الليلاى

زارنى فارس م الجزائر

طيف على جبينه

قريت كلمة بطل

السلاح فى إيديه



وفى عينيه الأمل
والشباب من قلبه فاير
قبل ما يرد السلام
قال ح انتصر
انت منصور
والسلام راح ينتشر
وح نبني له مناير
والهناح يقول
أنا جاي ف ميعادي
ليله تشبه لليلادي
في بلادك وبلادي
اللي منها الشمس جايه
البلاد العربيه
الليلاادي
زارني من شعب العراق
طيب جميل ..
علمني إيه هو الفدا
بنت عم الشهداء
ماشيه في الموكب
بتهتف للحقيقة
جرحها وسامها ..



الأعمال الكاملة للشاعر

وفي دموعها البرينة
كل دم الأبرياء
زارني طيفها
وابتسم لي بضحكة مرة
قلت بكره
يكون لقانا ف أرض حرة
بعد أهوال الفراق
والهناح يقول
أنا جاي ف ميعادي
ليه تشبه الليلادي
في بلادك وبلادي
اللي منها الشمس جايه
البلاد العربية
الليلادي
من فلسطين
جت لي نسمة
فيها من ريحة زهور البرتقان
فيها طيف إنسان
واحشني من زمان
جه وزارني



وقال لى كلمة
زى أجراس الكنيسة
والأدان
احنا راجعين أرضنا ..
آن الأوان
والشقا ح يدوب
فى بسمه
والهنا ح يقول
أنا جاى ف معادى
لبله تشبه للبلادى
فى بلادك وبلادى
اللى منها الشمس جايه
البلاد العربية
الليلادى
ياما سهرنى انشغالى
على أحابى
فى لبنان والجزيرة
فى السودان
وف كل أوطاننا الكبيرة
كلهم كانوا فى بالى
قلبى قسمته



الاعمال الكاملة للشاعر

عليهم كلهم

عشان ينشد لهم

ويقول لهم

بكره تصفانا الليالي

والليلا دي

كل أحبابي زاروني

طيب خيال كحل عيوني

هام خيال كحل عيوني

هام معاهم قلبي ..

سافر ودعاهم

محلًا طعم السهد

لما سهروني



بكره أجمل من النهارده

حبلى النسوان تسع شهر طوال
راحت الأيام وجت كبروا العيال
أصبحوا الصبيان رجال
والبنات طلعت على صدورهم بزاز
وأستحق لهم جواز
نسجوا توب الفرح من نور عينيهم
غرزوا الأزهار فى ديل الفساتين
بساتين
رفعوا الصبيان إيديهم
بالشاكوش والمساطر
عملوا البيت والجهاز
رفعوا الفاس والكوريك فى الفلاحين
جهزوا الصندوق ورجعوا بالطحين
واشترتوا حلقان خرز
والزمن فسات ... فسات سنين
تجبل النسوان وتولد
ملايين
والغيظان

ترمى غله وفول تلؤل فى كل رميه
ترمى توم وخيار وبناميه
والشجر يطرح جوافه وبرتقان
والعنب تحت الورق لا خضر يعنقد
والبالح فوق النخيل يظهر ويعنقد
لما تبقى الشمس حاميه
والزمن فات .. فات سنين
السنة تسحب سنه
لمسا حصّلتنى أنا
وناقاعد على كرسى خرزان
على قهوه فى الميدان
وبافكر فى الحياه من حواليا
والزمن واقسف شويه
جنب ساعة البلدية
والعيال واقفين كمان
زى ما هم فى الميدان ما بيكبروش
والبنات قاعدين وما بيتجوزوش
والغيطان هناك بعيد تحت السما
تحت عين الشمس راقده مسهمه

وناقاعد وبافكر فى مشاكلى
والزباين كلهم فى القهوة شكلى
كـلـهـم بيـفـكـرـوا
والعيال واقفين ولا بيـفـكـرـوش
إنـمـا بيـهـزـروا
قبل ما يسير الزمان ويكبروا
والزمن عـايز يسـير
ونـا عـايزـه ينتظر وباصـبره
لما اقـول لـه شـىء كـثير
يسـا زـمـن آه يا زـمـان
ياللى طابع رسم كـفـك عـ الحيطان
خمسه وخمسه فى عين ألعن شيطان
أنا شفتك وانت ماشى فى الغيطان
خطاويك هيا السنابل ع العيدان
خطاويك فوق الدرّه هى الكيزان
هيا صوت الفاس بيفتح فى الحيضان
هيا لون القطن لابيض
زى قلب الفلاحين
خطاويك الفيضان

أنا شفتك وانت خارج م البيان
فى الصباح وبنا العيال والشغالين
وانت ماشى ع الرصيف
خطاويك صوت القروش
فى الكفوف
فى خيال الشقيانيين
والعرق فاحت ترع فوق الوشوش
والعيال رايحه المدارس
والقبسارك والورش
والآبيلموا السبارس
علشان ياكلوا الرغيف
الشريف
وانت ساير يا زمان
وانت داير من زمان
زى ما تكون ساقيه هايه
قواديسها ف كل لحظة تقب شايه
ميه تجرى فى الشقوق
والعيدان تخضر فيها وتبقى خايه
زى ما تكون ساقيه هايه

قواديسها ف كل لحظه تقب شايه
دم يجرى فى العروق
يبقى بنت عيونها بحر من العسل
والشفايف دول عقيق
والشعور السود خصل
م البريق
والإيديين
تغسل القلب الجريح
والقميص والهدمتين
دم يجرى فى العروق
يبقى واد مخلص جرىء
واد صريح
راسه تشبه للشاكوش
الوحوش ما تخوفش
والجبال ما توقفوش
والزلازل والجوش ما تكسروش
دم يجرى يبقى شعب كبير كبير
يسأمر الأزمان تسير
والزمن فات فات .. سنين

ففى خيالى
وناقاعد والميدان ملىان قبالى
شفت نفسى حواليا عيال كتار
فاتت الأيام وفاتت الليالى
شفتهم صبحهم كبار
مشيوا ويا الناس فى عيد
ونا وياهم باغنى الأناشيد
واحننا شايلىن الرايات
طايبره ويا النسمه ويا الأغنيات
على دقات الطبول
واحننا ماشيين فى المظاهره
بنت مالت ناحيتى وادتنى ورده
ورده حموره
قمت م القهوه سعيده
وباقتول
بكره أجمل م النهارده



العرس

النيل رجع زاد، وعاد، من غير معاد مرسوم،
كيف ابن شداد، ما طب ف يوم يحوم ويزوم،
مطهوم، ينادى: يا عبلة، ومهرك المعلوم
حاضر، وفوق منه عُقد من النجوم ملضوم ..
يام الضفاير ألوف، ملهوف أنا ومحروم،
يا تمره سمرا، يا جمره حمرا، خلف غيوم،
لجلك يا حلوة شربست المر والزقوم،
وصبرت، وكبرت، وانحفرت فى وشى هموم،
العرس دقت طبوله يقولوا: هب وقوم!
هبيت ولبيت، وعريت صدرى للمقسام،
أخو البنات .. هات . وهات جروحات ودم يعوم،
وان قلت: آه، تحت كرباجك، يا عيب الشوم،
ما يقولها فارس وحارس ع الديار، وكتوم،
والنيل شَلَبَ دم، كيف عنتر فى حرب الروم؟
وفاض وخاض فى البرارى، كالقضا المحتوم ..
فايت علينا، وصامت، صمت ماله لزوم،
زايد سمار، والشرار يقدح فى أمواجه،
سألته: مالك يا نيل؟.. قال جاى م "الخرطوم"

كلام إلى يوسف حلمي

الأستاذ يوسف حلمي!؟

أهلا عمي

لأمش م البيت ..

أنا باتكلم م الشارع

حلوه .. على رأيك ..

ماهو بيتنا الشارع

كنت ف سهره وراجع

قلت اتكلم ..

واهو من حظي لقبتيك

مع أن تصور

وانا بنقل أرقام تليفون

من نوته لنوته

جيت عندك ..

قام شبيء ملعون قال لأ ..

ما خلاص

ومشيت سطرين

والتالت ..

قلت لايمكن



يوسف حلمي خلاص

ورجعت كتبت الاسم

ماخلصيش

شوف الاخلاص ؟

كانت سهره جميله

أيوه ..

الشله اياها ..

تسلم وتعيش

كانت وحياء النبي عايزاك

غنينا ياسيدي حاجات سيد درويش

معلهش ..

ما هو انت برضه كنت هناك

أنت تمللي معانا

وحوالينا

وبيننا

موت مين ده يابو حجاج

اللى يخبيك منا !؟

يعنى كان خبا الشيخ سيد؟ ..

ما هو زى الجن

ولا لحظه بيهمد ولا بيون



الأعمال الكاملة للشاعر

في المسرح

في المصنع

في الغيظ

في المدرسه

في السجن

ده وتر مشدود بابا

لمسوه من كام ألف سنه

ولساه بيزن

وكلام بيرن

رنه طويله طويله

بتضحك وتئن

من قلب ربابة النيل

على قلبه

على قلبك

على قلبي

على قلب الشمس الشموسه ..

اللى الليله قعدت جنبى

أيوه ..

كان فينا الليله جماعه جداد

أنضمت فوجه جديده ..



بنات وولاد

طبعا زى المعتاد

صاحبين صاحبين صاحبين صاحبين

قلنا ياسيدى ..

فضلة خيرك

ما تفوقوا يا مصريين

والجلوه دى قامت و السياس

قلنا بلادى بلادى

تعرف ..

حسيت احساس ..

أن الشخص البلطجى ده

اللى أسمه الموت

عاجز قدام الناس

قلنا

يا هادى يا هادى

البنيت قالت لى

عرفت منين الغنوة دى؟

قدمتك ليها ..

وسبتك واقف وياها

سبتك واقف

بتكلمها وتعلمها وترعاها



الاعمال الكاملة للشاعر

ماهو كله كلام..

أنا باتكلم م الشارع

والشارع فيه جامع

والجامع

مبنى بقاله ميات م الأعوام

..أنما شبايكه كلام

وبيبانه كلام

وعرايس أفريزه كلام

وحيطانه

المعمار جي اللي بناه

واقف قدامي ويكلمني

بيمد لي أيده

بياخد كبريت مني

بيولع

ويضرب لي سلام

ياسلام ؟

موت مين ده يا يوسف حلمي

اللي يحوشك عنى ؟

تصبح على خير



قصاقيص ورق

منين أجيب مقص مجنون زيي - بس نص نص

واجيب ورق وافضل أقص أقص أقص

أفضل أقصقص ورد من على كل لون

لحد ما اعمل عندي حبه كتير كتير،

واركب لي نسمة، واطير اطير،

واحفن وادرب ع البلاد، مطر غزير،

ينزل يرخ يرخ، على قرعة بنات أخت البشر

يتسبسبوا، ويتشيكوا،

ويبقوا لابسين - لا مؤاخذه - طراير.

ويا سلام

لو كان كمان معايا وقتيها

قلم كوبيا، طويل

طويل طويل،

أبله من قلبي،

اللى عرقان م السفر

واكتب به وانا طاير،



على خد القمر ..

أنا باحبك يا جميل

قصاقيص ورق

لكن مطر

يرخ، جامد،

قد ما يحبوا الولاد،

يادوب كده،

مقدار مايجروا، ويمسكوا

مطر!.. خطر!

ينزل على كتاف العجايز!..

يضحكوا

يشبك في سالك التلفزيون

هنا، وهنا، وهنا، وهنا،

على كل لون،

واللى ف جنازته فى التابوت،

يفوت، يبص

يلاقى عالم،



كله كله كله زينة عيد ميلاد،
ويبقى فصل، لكين مفيش بالشكل ده!
لابد من عيد الميلاد
أنا عيد ميلادي مالوش معاد،
فين الورق، والنسمة، والمقص،
والقلم يا واد
والا بلاش، ده مفيش أمل!
أعياد كتير بيبتدوا، وبيفرغوا،
وبيفضل العالم كده،
مكبوس، ودمه ثقيل ثقيل
يا ربنا،
يا اللي خلقت لنا الأيادي،
للهزار، وللعمل
ادينى قوة ألف مليون إيد،
عشان
ازغزغه!



الشاي باللبن

أربع إيديين على الفطار
أربع شفايف يشربوا الشاي باللبن
ويبوسوا بعض ويحضنوا نور النهار
بين صدرها وصدره وبين البسمتين
ويحضنوا الحبيب
اللى جمعهم سوا على الفطار
ويحضنوا الشمس
اللى بتهمز الستار
وتخش من بين الخيوط
وبعضها مع الهوا
لأودة ترسم نفسها
على أرضها
على البساط اللى اشتروه مع الجهاز
على الخرام اللى اشتروه من غير تمن
وعلى القزاز
ويشربوا الشاي باللبن
فى فنجالين
على الفطار أربع إيديين ودبتسين

يصحوا قلبي كل ليلة في المنام
وبيكتبولي بلون منور فزدقي
علي الهوا الاسود
وع الجفن الللي ننام
كلمة "سلام"



زى الفلاحين

القمح مش زى الذهب

القمح زى الفلاحين

عيدان نحيلة جدرها يياكل فى طين

زى اسماعين

ومحمدين

وحسين أبو عويضة اللي قاسى وانضرب

علشان طلب

حفنة سنابل رِيها كان بالعرق

عرق الجبين

القمح زى حسين يعيش ياكل فى طين

أما اللي فى القصر الكبير

يلبس حرير

والسنبله


يبعت رجاله يحصدونها من على

عود الفقير



روحانية

فيك يا حديد روحانية
ان كنت مسمار، والافاس
ان كنت مفتاح، والا بريمه،
ان كنت سيف، والا إبره،
ان كنت محركات،
ان كنت مشبك شعير،
ان كنت مروحة موتور،
ان كنت مطرقة،
ان كنت سيخ،
ان كنت جنزير خرده في التراب،
فيك روحانيه ..
عشان ما بين الرب والحديد،
فيه ابن آدم.



تراب دخان

لقيت في جيبى قلم.
قلم رصاص، طول عقلة الصابع،
معرفش مديت إيدى عايز إيه ..
راح طالع،
أصفر، ضعيف، ضايح،
وما بين تراب دخان، وقشر سودانى،
كان مدفون،
وكنت ماشى لوحدى فى الشارع،
معرفش رايج فين، لكن ماشى،
والليل عليا وع البلد غاشى،
ليل، إنما ليل أسود الأخلاق.
ليل، إنما عملاق،
اسود سواد خناق،
أسود، كمليون عسكري، بستره خفاشى،
وجزمه ضباشى،
بينظموا السهرة.
الخلق يا حسره،
الخلق مالهاش خلق للسهرة ..
الخلق عاملين زى عشاق كلهم مهاجير،
ومروحين مقاهير
يستنظروا بكره.
مقهور أنا وماشى
- أصل القمر قال جاى وماجاشى -

ع النيل ماجاشى .. وماجاش كمان ع الهرم ..
لقيت عليه القلعه لقيت بولاق،
قمرى لقيته عدم.
لقيت عليه امبابه والوراق،
قمرى لقيته محاق.
وعنيا وقعوا م السماع الأرض،
الأرض برضه محاق.
قهاوى، سوده من الهباب والهدر،
والراديوهات تنعب نعيب الجنون.
يا ليله من غير قمر
يا كحل من غير عيون.
ولقيت فى جيبى قلم،
كأنه واد مقروض ومتجادع،
قُرعه لكين ملعون،
مبرى قوى ومسنون
تقولش ح يخطط نظام الكون؟!
وأعمل بيه إيه وأنا ماشى فى الشارع،
أنا كمان قُرعه وكمان ضايح
وكمان عليا تلول تراب دخان.
يا ميت ندامه عليكو يا صنايع،
سبع صنايع، بس آه يا ندم،
سبع صنايع بس آه يا زمان
ارسم لى قطه يا بابا ..
ارسم له قطه بتشتغل بهلوان
أكتب لى اسمى يا بابا ..



الأعمال الكاملة للشاعر

أكتب له اسمه بخط مرعوش حنان.
أديني قلمك يا بابا.
أديله قلمي يشخبطه ع الحيطان.
وشيلني أوبح يا بابا ..
أشيله على صدرى كما الصولجان!
كان القمر أيامها طفلى أنا،
وعليه زغب ناعم كممثل الطير،
واخضر كأنه لمونه م البنزهير،
وكنت أشيله ، وافرجه لكل حى،
اتفرجوا، شوفوا غلاوة الضنا
والناس يقولوا اسم الله خير والله خير،
يا رب خليه لك ..
الرب خلاه .. بس مش ليا،
ضاع القمر منى وانا غفلان،
وصبحت يا إخوان،
لايد ما يتشحتفوا عنيا
علشان أطول منه شعاع من ضى
واديني ماشى لوحدى فى الشارع ..
معرفش رايح فين، لكن ماشى،
والليل عليا وع البلد غاشى،
ولقيت فى جيبى قلم ..
كتبت به غنوة عذاب.



بكائية

نزل المسيح من ع الصليب

نزل ونام

في مرج دمع

من غير قميص

وتلج شمع

والمجدليه تميل عليه

وتنوح تنوح

تنده عليه

تلاغيه

تولول

تحضنه

تندب عليه وكأنها بتهننه

تجدل له مهده من جدائل شعرها

وتدفنه في صدرها

ما رضعش منها

إلا جرح من الجروح



بوابات الرحيل

ولما عديت بوابات الرحيل
وخرجت م العتبات
انصوبت نحوك عيون الحرس
عيون عنيفة بس من سكات
جامدة كمثل النحت في التماثيل
بتقول كمثل الغولة في الحكايات
"يا شاطر احمد رينا يحرسك
ح تمر من باب سر يفقسك
معاك سلاح ح يدق لك جرس
ما معاك سلاح ما يدق لك جرس"
.. وان دق لك جرس
أوعى يا ولدى تخاف
ح يفتشوك يلقوا قلم حبر جاف
ولما عديت بوابات الرحيل
ومرقت زى السهم في السموات
لنجمك العالى
قلبي انفطر
أصل الضنى غالى

ابنى الكبير أول وليد جالى
مجنون ومثالى
رايح يجيب الغرب من ديله
والفجر من ليله
"سكة سلامة وخطر"
قالت عيون الجند والمضيفات
من لهفتى سالت دموعى مطر
وانا مانعنى الطبيب
مابكيش ولو لحظة فراق الحبيب
ح أقول لك ايه
الله يبارك لك فى هذا السفر
بوابات الرحيل
جالك منين الاسم ده المسرحى؟
يحق لك تفرحى
عداكى شاعر شاب .. مثله قليل



بكائية إلى ناظم حكمت

مت متأثر بجرحك القديم؟

بعد ما قلنا خلاص،

عم ناظم طاب، وقاعد في الجنينه،

يقرأ في الجرنال، ويكتب جوابات

قالوا: مات.

مش خلاص كنا انتهينا؟ ..

مش مسحنا مطرح القضبان بتبسيمة عينينا

مش دواك جنباه من الهند، من الصين واليابان،

من بلاد الثلج، من باندونج وجزيرة سيلان،

من هنا في القاهرة؟

مش صحيت، ومشيت، وجيت ظليت علينا؟

من سنه، ومش جيت وظليت ع الغيطان،

ولقيتها بين ايدين الفلاحين؟

من سنه، مش جيت وظليت ع المصانع،

ولقيتها بين ايدين العاملين؟ ..

من سنه، مش جيت ودورت هنا

ع الولد، اللي في قصيدتك "بور سعيد"

قلبه كان تفاحه خضرا، ومات شهيد ..

مش لقيته من جديد؟ ..



ولقيت قلبه حديد؟ ..
ولقيت شعرك على لسانه نشيد؟ ..
ولقيت شعرك ، بيتجسد على مر الزمان؟ ..
ليه تموت يا عم ناظم.
قبل ما "أزمير" تغنى لك كمان! ..
كنت عشت.
كل شيء وله أوان
"جومو كينياتا" انت فاكروه؟
كان زميلك فى ضلام الزنانيين،
أنتوا لاتنين كنتو من حبة سنين.
دمعنا المر السخين،
قلبنا الحر الحزين ..
مش خرج م السجن، والحق انتصر؟ ..
مش حكم "كينيا" بإسم الملايين؟ ..
مش خرج "بن بللا" م السجن ورفع راية "الجزاير"
"واليمن" مش جالها يوم؟ ..
انما برضه انت شاعر،
قلبك الحلو معذب وكظيم.
له فى استانبول، بيشحن فى البواخر،
ويا عمال الموانى ..
له فى "الأناضول" ، بيتكلم مع فلان الفلانى ..

الأعمال الكاملة للشاعر

لسه بيعانى الأمانى،
لسه بيغنى: "أمان" ليل بعد ليل ..
شجر البندق عطش ع "الدردنيل".
جفت الأغصان، بقت شكل الخناجر،
وأنت شاعر،
قلبك البلبل، حضنها ومات، مهاجر
يه يا ناظم يا عظيم،
جرحك اللي مت بيه، مش القديم! ..



بكائية

جسايه عروس الشعر م البغالة
بملاية لف وكف متحنى
شافت صوان وحبال وناس شغالة
وأنا بابكى جنب الباب ومستنى
والشمس تقطر حزن ع الصبحية
مين اللى مات يا شب يا بو دموع
قالت عروس الشعر للموجوع
مين اللى مات يا شب، قل لى يا خويا
قالت عروس الشعر لا يكون أبويا
أنا قلت ابونا كلنا يا صبية
مات زى ما كتف الجبل ينهد
مات باقتدار وفخار ماقالش لحد
بيرم .. ومات ماشى ف طريق الجحد
وجنازته ماشية أهه فى شارع السد
والنعش عايم فى الدموع فى عينيا
مات زى ما كتف الجبل ينهد
فايت فى قلب القاهرة ومعدى

هو عارفها وهي مش عارفاه
على كل حاره وكل عطفة يهدى
كأنه راجع لسه من منقاه
بيبوس بعينه اللبنة والجلبيه
ده القبر ده .. والا كمان منفي
طالع عليه الشوك والحلفا
ده القبر ده .. والا كمان تبعيده
حدفوه عليها كلمتين في قصيدة
بيرم .. فتحت ديوانه رد عليا



بحرى

آخر النهار هفهمت نسمة على الميه
بعودا ليام على الجدعان وعليا
يا صيادين القاروص صيد القاروص غيبة
رمى الشبك ع السمك يلزم له خفية
طرحت طرحة لقيت فى الطرحة جنية
حلت شعورها وعقدتهم على عينيا
ونزلتني القرار صرخ الشبار فيا
إرمى الشبك ع السمك يا واد بحنيه
لادق ع الباب واقول للحلو يا جارى
رمى الشبك صنعتى والصبر دا كيارى
أصبر على الرزق لما تملى بحارى
وأصبر على العشق لما تنظفى نارى
يا ميت ندامة على اللي البحر ما اداله
مفتوح عليه الحنك والكف ما داله
عدى الشطوط والخطوط اللنش عدى له
غفر السواحل يا صاحبي مستعداله
أنا مذهبي الصبر واصبر حتى على نارى
واطعم شباكى وصنارى بصبارى
أنا أعوم على الصبر لما أوصل لأوطارى
والصبر دا مركبى والقلع والصارى

مرحب

باكلم الناس كلهم، من هنا ..
وباقول لهم، وللحياة: مرحب.
ودى كلمة ياما اصعبها، ياما اصعب،
لو تنطلق من هنا،
م الصدر، من ع الشمال،
من قلب شال أحمال مهيش هيئة ..
يا قوة الله ..

أحمال جبال فى جبال، يا ولداه.
أحمال جبال، كوايس على قلبى.
مولود بها؟ .. والارمانى البين؟ ..
أعرف منين!

جانى حكيم واتنين يا صاحبى
جانى حكيم واتنين.
حكيم يقول: ده الهم.
وحكيم يقول: يا عم،
دى خلقه وورائه عن الوالدين.
ومنين أزيح ده كله عن قلبى ..

قالوا: اللى مكتوب ع الجبين، لازم تشوفه العين!



جبين وعين مين بس يا جدعان؟..

مفيش إيدين للجان، عشان تكتب،

مفيش إيدين، غير بس للإنسان.

هو اللي وياه القلم،

يكتب به ويمللي.

ومفيش جبين مكتوب عليه طلسم، ولا قسم،

اتخط واترسم.

ومفيش قدر ع الخلق متولى

قلبي اللي شال أحمال جبال ابتسم،

وقال: زيادة علاده يا خللي،

مكتوب على جبين الزمان كلمه،

كتبها إيد إنسان:

"أسوان".

"أسوان" أيا "أسوان".

"أسوان" يا أم السد،

جيت لك وأنا أسيان،

وأسايا ماله حد..

جيت لك حزين، وجريت على المطرح،

مطرح ما باجى كل عام، أفرح،

بالسد زى الورد بيفتح،

وسط العرق والجهد،



الأعمال الكاملة للشاعر

وسط الغبار، والبرق، والديناميت،

والانفجار، والرعد، والجرانيت

نازل كتل كتل كتل، حتا حيت

والكراكات جنب الجبل، كتناكيت،

بينقروا الفتافيت.

أعوذ بالله م الكابوس المقيت

حسيت كإني قمت من تحت الركام، وحييت،

وبالأسى بينزاح عن قلبي،

والكباشات بتناطح الجلاميد وتتعبى..

حسيت بإني عليت

على كل أحزاني،

مع كل مدماك بترفع فى السد، والتانى،

وطلقت شعرى، وبأصفارة العمل .. زغاريت!

مسنود على صدرك يا "أسوان" أنا ..

وبالكلم الناس، كلهم، من هنا ..

وباقول لهم، وللحياة، مرحب!



أرض مصرية

ملس بخدك ع التراكيب الجلوجية
والمس بيدك كرمشات الزمان
أحجار بهيئة ميه مغلية
معمولة هى والا عفوية؟
من عهد آدم والاعام الطوفان؟
ترابيزة بعد السكر قلبوها الخمورجية
ماليت سبع طبقات على طبقات
والسن بارز فى السما طبقات
شامخ شموخ فرعون جرانيتى
وف جبهته الحيه ..
والرخ بيقدف بأجنحته الجسام
صاعد يتمم مشهد التستويج
أنصت بوندك تسمع الأهازيج
من فرقة الكهنة ذوى الاحترام
والرقاصات فى المعبد الملكى العتيد التليد
بيطوحوا ساق المرح فى الهوا
وينطسوا ع الأمشاط بخفة سوا
ويدخل العسكر بأجمل نظام

والجنرالات تحت الرايات العظام
بيثبتوها فوق ربي "سينة"
ويدققوا بالأقــــــــــــدم
سينــة..
نبض وسرى فيكى يادى الزلطة
وح يسرى دايمًا.. بس تشبى دم
شكلك كمثلى القلب ع الخارطة
انش لله دايمًا يبقى خالى الهيم!
ياللى بكيــــــــت ياما
وحفرت وديان دمع فوق خدك
ملس بخدك ع التراكيب الجلوجية
وانصت بودنك تستمع ترانيم حماسية
ممزوجة من صوت صندل الفتيان
عــر السنيــن
مع ضياشات العسكريين لما أدوا الفرض
ويدققوا بالأقــــــــــــدم
ويطلع الصوت من صميم الأرض
من موضع الحمم الإلهية..
دى ارض مصــرية..
دى ارض مصــرية..

انغام سبتمبرية

وقف الشريط فى وضع ثابت
دلوقت نقدر نفحص المنظر
مفيش ولا تفصيلا غابت
وكل شىء بيقول وبيعب
من غير كلام ولا صوت
أول ما ضغط الموت
بخفة ويجبروت فى يوم أغبر
على زرفى الملكوت
وقف الشريط فى وضع ثابت
دلوقت نقدر نفحص الصورة
انظر تلاقى الراية منشورة
متمزعة لكن ما زالت فوق
بتصارع الريح اللي مسعورة
وانظر تلاقى جمال
رافعها باستبسال
ونزيف عرق سيال على القورة
وف عنفوان النضال
وقف الشريط فى وضع ثابت

انظر اليه شوف قبضته السمرة
وعيوننه ثورة مكحلة بثورة
وصدره عرض الأرض حاضن مصر
والشام وليبيا وتونس الخبضة
والقصبنة وفلسطين
والأردن المسكين
والبحر والبساتين والصحرا
وفعز طحن السنين
وقف الشريط فى وضع ثابت
انظر وشوف ع المهل بالراحة
الشمس وسط القبة قداحة
وناس بعيد فى الظل مرتاحة
ومصر واقفة صبية فلاحه
على كتفها بلاص
فيه ألف تقب رصاص
والميه منه خلاص
شلالها فى الرمل غصاص
صبية حلوة كأنها تفاحة
لكنهام الحزن دابنت
وسط السواد ندابة نواحة
ولما هل بطلها فى الساحة

بالحسب والاخصاص
وقف الشريط فى وضع ثابت
خلى المكنجى يرجع المشهد
عايز أشوف نفسى زمان وانا شب
داخل فى رهط الثورة متمرد
ومش عاجبنى لا ملك ولا أب
عايز أشوف من تانى واتذكر
ليه ضربة من ضرباتى صابت؟
وضربة من ضرباتى خابت
وضربة وقفت بالشريط فى وضع ثابت؟
قال المكنجى: رجوع مفيش
عيش طول مافيك أنفاس تعيش
وبص ص شوف ..
ركن الشباب صفوف صفوف
ركن الشباب فى السينما بيصفر
مفيشش وقفش
ركن الشباب فيه ألف مليون شب
ومش عاجبهم لا ملك ولا أب ..
انظروا إليهم
وأنت تتذكر

أمر الله

حتى الرسول مات وأمر الله لا بد يكون
بس الفراق صعب واحنا شعب قلبه حنون
وحشتنا نظرة عيونك للبلد يا جمال
والحزم والعزم فيها وحبها المكنون
وحشتنا عبسة جبينك وانتي بتفكر
ونبرتك وانتي بتعلمنا وتفسر
وبسمة الود لما تواجه الملايين
وقبضة اليد لما تدق ع المنبر
وقبضة اليد لما تلاطم الجرائيت
وترفع السد عالي المجد عالي الصيت
وتأدب النيل وتحكم مية الفيضان
ما تعدى نقطة سوى بالخطبة والتوقيت
وبقيت أقول: مية الفيضان واحشاني
سبتمبر ازاي بدونها يكون يا خلاني
يا ويلي من ده طلب وياريتني ما اتميت
لبي الزمان منيتي من دمع أشجاني
وعاد لسبتمبر الفيضان دمع هتون

ينصب م القلب ويهيم فى النسيم محزون
يميل نخيل الرطب على بعضه بالهمسات
حتى الرسول .. مات .. وأمر الله لا بد يكون!

التعلب والعنب

"العنب ده، طعمه مر!"

قال كده التعلب فى مره

"والدليل على أنه مر..

إنه جوه وأنا بره ..!

باليه

وبنت أم أنور بترقص باليه
بحيرة البجع
سلام يا جدع..

سلام ع الأيدين اللي بتقول كلام
سلام ع السيقان اللي مشدوده زى الوتر
سلام ع القوام اللي مليون دلح مش حرام
حلال ، زى نور القمر

سلام ع الخطاوى اللي بتمر ع الكون تداوى
سلام ع الغناوى

سلام ع النسيم فى الشجر
وبنت أم أنور ، بتضرب بساقها فى الفضا
وبتشب وتلب ، وتنط نطة غضب
ونطة رضا

وبتقول بلغوة ايديها اللي فات انقضى
حقيقى مضى.

كات أمك يا بنتى

فى أزجال معلمنا بيرم عليه السلام
ماتعرفش تركب سوارس تروح الامام
ونمشى .. تقع

فاطمة

المكن داير بيطلع ليل نهار
ليل نهار داير بيطلع المكن
من سنين ثلاثين وخمسه
المكن ما سكش همسه
إمتى ماتت فاطمه آل يوسف
وكم فسات من زمين
قالوا من سنتين
ضحكت وقلبت لأ
اللى بيمنوت قلبه يسكت
ولا نسمع له ش دق
بس دى لسه بينبض قلبها
قلها بينبض بينبض ليل نهار



فنان

فاخر محمد فاخر.

فنان: ممثل.

السن: خمسين .

راجل بسيط. اسمر.

فى خارج التمثيل: خفيض الصوت.

فى ايده دبلة جواز.

يقولو له يخلعها "عشان الشغل".

ما بتخلعش.

صباغه أصله مرة كان انكسر.

هو اللي قال لى.

وكان يقولى لى حاجات كتير.

واللى ما كانش يقوله كنت اعرفه.

أشوفه مرسوم.

"محلل الحياة حتى ولو فتافيت".

"محلل الحياة ولو فى أواخرها".

"أنا باحب الضحك".

"باعرف أخلى الخلق تبكى صبيب".

"عيونى سهيانة لكن لها فعل"

"الكشافات دى بنت كلب.



كانت ح تعميني".
"أنا هه. أهه. مش مريض.
جيت في الميعاد".
"مين اللي واقف ده ورا الديكورات؟
ده الموت؟ ده جي لمين هنا؟
لحد تانى.
مسكين. ما بيدبش في العافية.
لكين خلاص دوره".
"كان دور صغير. بس كان دور جميل".
"امتى العمل ينتهى؟"
"عاوز أنام لى قد كام ساعة"
"الليل ده زى عطيل"
"وكل شىء ديدمونة"
"عاوز أنام جبه"
"اتنين صباحا ياه"
"اتنين صباحا".
أبكى عليه؟ والا على روحى
والا على بلدى؟
فاخر محمد فاخر.
من غير قوافى كتبت فيه مرثاه
اكنمة مات مش زى كل الناس.



أهل الهوى

(1)

اللحم طين والعروق دود من ديدان الطين
آدم وحووا على أرض العدم حاطين
عاقبهم الرب .. أخرجهم من الجنة
آدم عمل حزن حوا جنته وغنى
الناس بتنهني مهما يكونوا منحطين

(2)

الولف لوشاف وليفته ورا الجبل هدمه
ياميت ندامه على جبلين واصطدموا
اتهد منهم جبل اسمه هابيل وانهار
قابيل أخوه اللي قاتله سكب دموع أنهار
واللي افتتن بالنهار بالليل ياندمه

(3)

ميرات عزيز مصر شابه وجوزها راجل كهل
يوسف حليوه فلسطيني عديم الأهل
فؤادها قناد نار وصار تحت اليهود لاعب
تهبش في يوسف وتترجاه وتداعب
والعقل صاعب لكين خلق المتاعب سهل

(4)

وفى التاريخ كليوباترة الأسمرانيه
كانت غرامها غرام اسكندرانيه
غرام عنيف له حفيف تعبان ولسعه نار
من عشقها لحسنها خافت عليه يحتار
واختارت الانتحار المعجبانيه

(5)

من برق سيف الجدع .. يطلع صباح أمله
عنتر معنتر لكين مسكين أبوه همله
بسيفه قَدَفَ فى بحر الدم عَدَاهُ عوم
ولجل عبلة وَقُبلة منها .. ساد القوم
والحُر له يوم يدوق الشهد من عمله

(6)

عالم من الهمس من غير أمس من غير غد
الشمس ليلى .. القمر ليلى .. السؤال والرد
ليلى .. ومجنونها قيس هايم يقول ليلى
دى مهما كانت لغيرى وقسمتى مايله
الروح مادام طايله .. مايمش تنول اليد

(7)

عنتر من الغرب، أسمر يندهوله عطيل
كلل على ديدمونه وشالها فى عينيه شيل

بياض عيوننه لمع من ضَى حلاوتها
أولاد حرام غيروه بالغيره مؤتها
والغيرة غشوتها ما تفرق نهار من ليل

(8)

كل الأجابة على حبال الهوى طالعه
فاكرين نجوم السما شبابيك غرام والعه
أنظر لروميو الجرىء طالع يشوف جوليت
تعرف بإن الغرام يكره بيبان البيت
وإن كنت حبيت ما تهزم قلبك القلعه

(9)

الريح تباريح جريح ما ينتهيله أنين
حسن قتيل من سنين ونعيمه فى المجانين
على كل ملقف هوا تستنى تستنى
يجيلها صوت كله موت ويئن له أنة
والحب له ناس فى جنه وناس غلبانين

(10)

كان ياما كان فيه ملك لكن مالوش أحياب
عشق رمى التاج وعاش العمر كله شباب
فيه ناس يقولوا عليه مجنون وناس جاحد
وأنا اقول أبيع عمري كله بيوم غرام واحد
ده الحب والحق واحد يا أولى الأبواب

سوناتا 1

أنا في الخلا، بانشد ولا بانام
صلوات غرام ، وباحرام تتمحي .
الليله بل الطل كل الكلام
ولا ملام ، مانا الخلا مطرحي
خلا خلا ، أنا شعري قد الوجود
وقدها وقدود ، وقلبي غني
كأنه عود، في الجود ما يعرف حدود
وحبيبتيه عواد، وعليه منحني
طلع النهار ، والشمس من غير غما
الشعر شت وطار، كأنه البخار
داريت حبيبتني عن لهيب السما
وصرخت فين السقف ، فين الجدار
أنا بيت حبيبتني ، وهي بيتي أنا
لكن ياريت ، يبقي لنا بيت م البنات

سوناتا 2

دار الزمان ، فاتت كمان سنة
والا اللي فايين احنا ، ع السنين؟
فتنا عليك يا كوبرى أمسنا ،
ونفسنا فى حاجات ، وسرحانين .
فتنا على عصفور جريح فى ربح
فتنا على منديل يسيل بكا ،
ع النبع فقنا لسبع ، مال طريح
مكتفاه حيلة ملعبكة .
ياما نفسنا العصافير تطير سرور ،
وتفحجح المناديل عرق ، وفل ،
وتلبس السباع عقود زهور ،
والكل يلقي الكل ... لو يطل .
ظلينا فى عيون بعضنا ، أنا و صديق
شفنا الحاجات دى ، بحق و حقيق .



سوناتا 3

عـرـيـتـيـن، مـحـمـلـيـن عُـنـا
...وـصـرـيـخـ بـنـات، وـقـهـقـهـة رـجـال
،يـا خـسـارـة مـا حـنـاش ويا بـعضـنا
نـاس لـلـجـنـوب و نـاس لـلـشـمـال

عـرـيـتـيـن دـول، و الـا قـبـضـتـيـن
،مـقـسـمـيـنا، قـسـمـة القـدر
...كـمـا نـهـم أـرـضـيـن فـي دـنـيـتـيـن
!ا حـنا بـشـر يـا حـبـيـبـتـي، مـش شـجـر

،جـار بـعضـنا فـايـتـيـن، نـظـرت لـك
،عـيـونـنا جـابـت فـي الحـلال و لـيـد
،لـو بـغـدت العـرـيـتـيـن هـلـك
...و هـو بـيـن الشـبـاكـيـن عـنـيـد

!أنا بـارتـعـش، و انـتـي... بـتـرـجـفـي
بـس الـولـد، بـاين عـلـيـه عـفـي



سوناتا 4

"وفرشت عشى ريش فى ريش فى ريش،
ومشاغله، وثوشوش، وصوصوه..
سواسواح نعيش نعيش نعيش،
نعيش نعيش، نعيش نعيش، سوا
لساه يا عصفور الربيع ما جاش،
عمال تشقشق، واحنا فى الشتا!
شجر الشوارع لسه ما انكساش،
ولا منه فتفوتيه، منبتيه!
"أنا أغنى صيف شتا ربيع خريف،
أغنى .. غنوة خضراع الدوام
ورق الشجر يقع، على الرصيف،
وانا، والغنا، مَشْبَكِين تمام
عندك يا عصفور يا بنى، ألف حلق.
الرياح ما بتوقعش غير ورق!"



سوناتا 5

من يوم ما شافنى طبيب ورا طبيب
وقالولى :خد بالك ويلزمك
بقيت بخاف م الشعر خوف رهيب
زى الحليب و الخمرة و السمك
ياليل ياليل لأأ بلاش بلاش
يا عيون حبيبتى..... لأ يا واد تموت
أسكت سكوت ، و أرقد على الفراش
أحسن ما ترقد داخل التابوت
يا مصر..... لأ..... يا مصر آه يا مصر
يا عيون حبيبتى ،العصر فى الغيطان
أهواكى آه ،عصرت نفسى عصر
فى همسة المحبه و الحنان
و بقيت بخاف م الشعر بس آه
الشعر موت أحلى من الحياة



سوناتا 6

بتهمز رأسك ليته وتبتسم،
يا غراب، فى ضل جنيتك التراب
من ضحكك وسطك ح ينقسم،
اطلقها عاليه، وقول: خراب. خراب.
برضك بتضحك، تحت سرتك،
وعينيك بتتغماز لبعضها؟..
ملعون أبو الفكره اللي سرتك،
ملعون سماها الشوم، وأرضها
"الدينا هي الدنيا" مش كده؟
الدينا يا غراب هي هي، نعم:
كرمة سكارى العشق والقد،
وسرير ولادة الحلسم والنغم!
اضحك وأنا ح اضحك، وشوف يا بين..
مين ضحكته توصل لحد فين!



سوناتا 7

وقالوا طَفَّوْا النُّورَ حَصَلَ هَجُومٌ
طَفِينَا كُلَّهُ بِسِ لِّلْأَسْفِ
قَلْبِي الْمَضَىءُ بِالْحَبِّ كَالنَّجْمِ
لَمَعَ فِ قَلْبِ الصَّلْمَةِ وَانكشَفَ
هَدَفٌ مَبَاشِرٌ جِئْتُ لَهُ قَنبَلَةٌ
جَالَهُ النَّبَالِمِ أَدَّالَهُ لَوْنٌ كَثِيبٌ
أَسْوَدٌ كَأَنَّهُ وَصْمَةٌ مَخْجَلَةٌ
أَوْ حَرَقٌ خَتَمٌ مَعْتَقَلٌ رَهِيْبٌ
وقالوا رُوحٌ لِأَطْبِيئَةِ السُّوفِيَّيْتِ
حَضَنَ الصَّدِيقِ عِلَاجٌ لِكُلِّ دَاءٍ
فِي مَوْسِكُو خَدْنِي فِ حَضْنِهِ كِلِّ بَيْتِ
مَا فَضَّلْتُ غَيْرَ خَطْوَةٍ عَلَيَّ الشِّفَاءِ
يَا أَصْدِقَاءَ أَسْفَ لَكِيْنُ مُحَالِ
مَا لِيْشِ دَوَا غَيْرَ طَرْدِ لِحْتِلَالِ



على الربابة

ما غنيتش يا خَلِي بقالي زمان
وجايب ربابتي .. إنما خجلان
ولابد قبل ما أقول أصلى على النبي
بذكر النبي يتطمن اللفهان
نبي عربي ما كان شاعر ولا نظم
ولكن قلبه كان ملان بحنان
ولكن قلبه ملان حب للبشر
وكان يكره العدوان والظفيان
وكان سيف وكان ورده وكان روح وكان جسد
وكان نار وكان جنة وكان إنسان
أصلى على نوره اللي يبشع بالأمل
رسول العمل طه النبي العدنان
يقول الفتى الشاعر على قد قدرته
وجوات صدره م الحماس غليان
ما عدناش نطيق الظلم فى الأرض يا عرب
وامتى العرب طاقوا يشوفوا هوان
هنا موطن الأحرار هنا قلعة الغضب
هنا كل شبر بينفجر بركان
هنا عاش صلاح الدين هنا مر موكبه

وفيه كل غارق فى الزرد عرقان
وفيه كل ظهمان الزمان وشه مبتم
فوارس حوارس ع الديار شجعان
كأنى شايقهم والعوالى فى يدُهم
وسامع أبو أيوب وهو غضبان
هبط لص قال له لا تعتب الحمى
هنا أرض ما تنداس بندل جان
حسامك يا جنس الكلب، وربنى قوتك
أنا قوتى فى الحق والإيمان
أنا قوتى فى الشعب، والشعب يسحقك
ويجعل هزيمتك عار مدى الأزمان
ولو كنت ما ترجع تكون دى مئيتك
ولو كنت ما تخشع تكون ندمان
معارك ودارت معركة تبرز معركة
صليل السيوف فيها ما زال رنان
وما زال رنان النشيد اللى أنشده
جدع م العرب مطعون على الكتبان
بلادى يا أمى يا حبيبتى يا طفلى
احبك واموت لجلك وانا فرحان
كفاية أشوف النصر بسام فى طلعتك

ولو كنت في بحر العدم غرقان
خديني على صدرك وغني لي غنوتك
أنا ابتسم يا حلوة في الأكفان
وكان نصر له جناحات تطير بها للعلا
وكان نصر له فتوحات في البلدان
وأيام تجيب أعوام وأعوام تجيب حقب
وراس العسرب مرفوعة ما تنهان
تولوا علينا الترك ضاعوا في وسطنا
كما ضاعت القطرة في بحر ملان
أنا الفن والصنعة لنا العلم والأدب
وما كان لهم إلا سلاح عدمان
يشيلوا السلاح رايعين وجايين بفشخرة
يهل الخطر يجسروا كما الجديان
نجاهه بدالهم كل صنديد بصدنا
وياما جابها بصدنا العريان
معارك حواري القاهرة عايشة في كتب
تأييد كلامي وتضرب البرهسان
فرنسيس أغاروا ترك طاروا وبرطعوا
وما فضلش إلا شعبنا سهران
أنا قدها وقدود قال ابن حينا

أنا قد لها وقدود يا جدمان
وشال أى حاجة فى ايده وانصب فى الخطر
أبوزيد زمانه بس ناقصه حصان
وحارب معاه حتى العواجيز والنسا
جواسر كواسر بفلقوا الصوان
كده شعبنا فى الشدة ما يكونش غير كده
كده الناس ضرورى يوم أصولها تبان
وثورة عرابى وطعنة الترك ضهرها
بتوزن أصول الغدأرين بميزان
وثورة هناتو ودعوته لوحدة العرب
وثورة تسعتاشر لهم تبيان
عرب مسلمين ونصارى بيلفهم علم
كما التفت الهلالات بالصلبان
عرب مسلمين ونصارى ناويين على الردى
شجاعة قلوبهم من رضا الرحمن
عرب مسلمين ونصارى وحدة ما تنقسم
ولو تنقسم شمس النهار نصفان
يقولوا بصوت واحد كما الرعد لوزعد
وللبرق فى عيونهم ضيا ولمعان
كفى من أمور "فرق تسد" يا عدونا
كفى دس يا حرباية يا لوان

أنا الشعب نصرانى ومسلم وبالعنك
ورا كل دعوة من جرس وأدان
أنا الشعب مار جرجس مع الخضر فى جسد
وبالرمح ضارب فىك يا شيطان
صحائف من التاريخ بتشهد بأسنا
كما يشهد الإبداع على الفنان
نشوفها ونتمتع ونرجع لنفسنا
كما يرجع الفنان إلى الألوان
نشوف لون لحاضرنا قصاد لون لأسنا
بيان القديم جنب الجديد بهتان
ولا كل من قال كنت يقدر يقول أنا
ولا كل من شاف يوم يشوفه كمان
مش احنا اللي نتفاخر بماضى مضى وفنا
مش احنا اللي نتباهى بكان ياما كان
لنا ملحمتنا وملحمتنا لها العجب
لنا معركتنا ومعركتنا الآن
يقول الفتى الشاعر وقلبه نيران
وهايب ربايته وهايب الأوزان
فى يوم فى الشتا فى اسكندرية اتولد ولد
صبي ما فى زُبه فى البلد صبيان

عينيه واسعه زى الصقر لكن مفكره
وله قامه عالية تزيئه فى الولدان
فى أول ما خطى رجل راح دوغرى للهدف
كما يتحذف نحو الظلال حران
جمال ابن عبد الناصر الاسم والنسب
عربان بنى مر العظام الشان
كرام فى سجايابهم وأحرار فى طبعهم
ومن نبعهم نشأ الفتى شربان
وشربان من طل الشطوط زى وردها
نبت وازدهى بعشق هوى الأوطان
وأول كفاح الفجر لاح لكن انطفى
ومركبنا تايهة لم لها ربان
ما بين الوجوه كان وجهه مشرق كما العلم
وياها وجوه لبست لتمام أحزان
وكان يبقى واقف فى الزحام شابل الكتب
وكان يبقى ماشى فى الطريق سرحان
ويحلم ويحلم بالحياة لما تزدهر
وللسيد الدرويش يقول ألحان
بلادى بلادى خد بناصرى ده دين عليك
وتطلع يا محلا نورها شمس أمان

ويوم يلقي نفسه ف وسط ميدان معركة
ويوم يلقي نفسه في العلوم دهشان
ويوم يلقي نفسه بيجمع الصف في الخفا
ويوم يلقي نفسه بيدي في المليون
ساعتها ما كنش ف حلم لكن في يقظته
ومن قبلها بليالي كان يقظان
ليالي في عام اثنين وخمسين سهر لها
كما يسهر الخباز للأفران
خبز قرص شمس طليق خبز ترس للعمل
خبز خبز للأرواح وللأبدان
وتنهض جموع الشعب ثورة مولعة
ومتطلعة لقدام في اطمئنان
لقدام لقدام يا جمال اسمع النداء
تنادى عليك الأهل والخيلان
لقدام لقدام يا بطل هب وانطلق
تنادى عليك الريح في الوديان
لقدام لقدام يا جدع ربنا معك
تنادى عليك عصفورة م الأغصان
تنادى عليك كل العرب يا فتى العرب
تقدم تقدم وأهزم الطغيان

ويتحدر الطغيان وفي البحر يختفي
وفي البحر يغطس آخر التيجان
مانسمش صوت الغطسة من ضجة الفرخ
ويمضي بلا رجعة كأنه ما كان
ويمضي الزمان نشوان والكل مبتسم
يغنى ايا حورية وقتك حنان
صبرنا على المستعمرين رغم أنفنا
عشان كان لهم بيننا عميل خوان
ولا بد ما يتُرد في التوحقنا
ولا بد، ما تتحرر الأوطان
ونظرة جمال كالنمر نظرة ما تنسى
في ساعة المفاوضة والعدو طمعان
كمثل البطل ما يهدد اللص في القفص
ويرفع ايديه اللص في خذلان
جمال سد الثورة طبنجة معمرة
وهو النشاجي اللي ما خاب له نشان
صدر العدو سددها ثورة مزمجرة
وقال له بصوت زلزل له كل كيان
إلى الخلف دريا جيش بريطانيا وانصرف
إلى الخلف دارت عسكر البريطان

صلاة النبي أحسن كده الشغل يا جدع
صلاة النبي، قال لك ولسه كمان
ما تقطعش ديل الأفعى قالوا اللي قبلنا
وتطلقها لا تكون البعيد غفلان
وأفعى الدخيل راسها اللي ما زال فى البلد
يبيلع فى قوت الراجل الغلبان
إذا كنت شهم أقطع دابرها وأصلها
على رأى ما الشاعر كتب فى ديوان
قنالنا فى ايد غيرنا ومالنا ماهوش لنا
وقدمنا لسه معركة عمران
ولا ينفع استقلال بلا مال يثبته
ولا تثبت الأحجار بلا موان
وكانت إرادتنا ونفذنا أمرنا
ولا همنا ساخط ولا زعلان
وشالت براسها الأفعى دسناها بالجزم
ولا خفنا من أفعى ولا تعبنا
وكيف يعترينا الخوف أو يستخفنا
وفى صفنا كل العرب أعوان
تزرط بورسعيد فجر نصرها
مخنية رجليها بعدما العدوان

مخّية كفيها بدمائها .. وشعرها
مع النعمة طائر كالعلم نشوان
أيا جزاير قربي شوفي نصرتي
كده راح تكون النصره في وهران
أيا فلسطين انظري واعرفي الدوا
وكيف الحياة تتردد في الشريان
أيا خليج شوف اعرف ازاي أنا كده
وعقبالكوزبي يا قطر وعمان
أيا ضحايا الظلم في الأرض كلها
أنا بورسعيد الرمز والعنوان
وردت عليها دمشق ودمشق اختها
أنا حره مثلك ما إيلي سجان
طردنا العدو وزال العدو وما بقى عدو
فقط خارج الباب الدياب قطعان
وقطعان دياب على باب مصر كشرت
عن الناب ولو كان قلبها خشيان
تصدت لها من مصر والشام وجت لها
صفوف شكلها يخلع قلوب الجان
مايخلعش قلب الشر غير منظر القوي
ولا قوّة إلا يلتمسة الاخوان

وما كان مقعدنا سوى القيد في رجلنا
وما كان مقعدنا سوى القضبان
هدمنا حديد السجن وحدود محدّدة
ومتمددة جرح وملان بديدان
نهضنا شمال وجنوب كأبوب من المرض
نردد صلاة الشكر والعرفان
وجرّيت دماء الصحة والعافية في البدن
ما بين حمص والحسكة وبين أسوان
ويخرج جمال في الشرفة ويطل ع العرب
وشكري على يمينه سعيد فرحان
وتوحد الأوطان والشمل يجتمع
وللشعب صيحة تشق كل عنان
وللشعب صيحة تشق للحق سكته
وما الحق إلا وحسدة الأوطان
باغنى وقلبي يدق ع السندان
باغنى وروحي فوق مع الدخان
أغنى لابو تمام أقول ألف معذرة
خدتنى الحماسة وباطلب الغفران
عرفناك تقول الشعر للسيف وللكتب
في أيام ما كان الشعر له سلطان

وكنتم تقولوا البيت من دول وتسكتوا
يدوى ويتردد فى كل مكان
وكانت حياتكم شعر فى شعر كلها
وحتى المعارك كان لها أوزان
عشان يتقتل إنسان يقاتل ويتقتل
ودلوقتى يفنى وهو مش دربان
قنابل بتفنى ألوف ألوف يا أخا العرب
يا ريتك رأيت ما حل باليابان
ياريتك رأيت أفريقيا والموت وكيف حصد
عنا تر كمثل السنديان والزان
وده اللي لهانى يا حبيب عن تحيتك
بشاعة الحياة فى عصرنا الحيران
تلايل بتنهشها الحدادى فى عشاها
وبستان ما فيهشى غير نعيب غربان
ولجل الجمال ما تعود إلى الأرض دولته
لابد الوحوش تفنى من الوجدان
وانا شعرى بيصور كفاح أمة العرب
عشان الجمال والحب والإنسان
شنى وقلبي يدق ويدق فى نغم
كدق القدم فى الدبكة والميجان
بها كنت قادرع الغنا قبل ثورتى

وما كان لي شيباً به ولا لي لسان
ما كنليش سوى إحساس مرهف ومختفى
كخنجر خفي بين التياب وتمعان
شهرته لقيته فاس ونبراس ومطرقة
ومنشار نجاره ومسطرين ببيان
ودورت على أفاظ كما السير للمكان
تدور تروس وتقول دروس ببيان
لقيت عمنا ابن عروس وشعره ودارجته
وفى لهجته ألحان لكل زمان
جعلته دليلى ولهجة الشعب سيكتي
اغنى كما الفلاح فى الغيطان
وحسيت كلام الشعب كالليل أبو القمر
وانافى القمر بانشد مع الكروان
يا رب الفلك الملك لك لك، وبأسألك
تعلمنى من علم الحكيم لقمان
وآخر الكلام أرجع واصلى على النبى
نبى عربى كان قلبه كله حنان





خرج ابن آدم من العدم قلت يا
رجع ابن آدم للعدم قلت : يا
تراب يحييا ... وحي بيصير تراب
الأصل هو الموت ولا الحيااه؟
عجبي !!!

ضريح رخام فيه السعيد اندفن
وحفره فيها الشريد من غير كفن
مريت عليهم .. قلت يا للعجب
لاتنين ريحتهم لها نفس العفن
عجبي !!!

ياما صادفت صحاب وما صاحبهمش
وكاسات خمور وشراب وما شربتهمش
أندم علي الفرص اللي أنا سبتهم
والا علي الفرص اللي ما سبتهمش
عجبي !!!

والكون ده كيف موجود من غير حدود
وفيه عقارب ليه و تعابين ودود؟؟
عالم مجرب فات وقال سلامات
ده ياما فيه سوالات من غير ردود
عجبي !!!

أنا شاب لكن عمري ألف عام
وحيد لكن بين ضلوعي زحام
خايف ولكن خوفا مني أنا
أخرس ولكن قلبي مليان كلام
عجبي !!!

يا باب يا مقفول ... إمتي الدخول
صبرت ياما واللي يصبر ينول
دقيت سنين والرد يرجع لي: مين؟
لو كنت عارف مين أنا كنت أقول
عجبي !!!

أحب أعيش ولو في الغابات
أصحي كما ولدتني أمي وابات
طائر .. حوان .. حشرة .. بشر .. بس أعيش
محلا الحياة .. حتي في هيئة نبات
عجبي !!!

سهير ليالي وياما لقيت وطفقت
وف ليه راجع في الضلام قمست شفت
الخوف ... كأنه كلب سد الطريق
وكنت عاوز أقتله .. بس خفت
عجبي !!!

كان فيه زمان سحليه طول فرسخين
كهفين عيونها و خشمها برسخين
ماتت لكين الرعب لم عمره مات
مع إنه فات بدل التاريخ تاريخين
عجبي !!!

عجبتني كلمة من كلام السورق
النور شرق من بين حروفها و برق
حيبت أشيلها ف قلبي .. قالت حرام
ده أنا كل قلب دخلت فيه اتحرق
عجبي !!!

رقبه إزازه و قلبي فيها انحشر
شربت كاس و اتنين و خامس عشر
صاحبت ناس م الخمرة ترجع وحوش
و صاحبت ناس م الخمرة ترجع بشر
عجبي !!!

ليه يا حبيبتي ما بيننا دايمما سفر
ده البعد ذنب كبير لا يغتفر
ليه يا حبيبتي ما بيننا دايمما بحسور
أعدي بحر ألقى غيره اتحفر
عجبي !!!

ورا كل شباك ألف عين مفتوحين
وانا وانتي ماشيين يا غرامي الحزين
لو التصقنا نموت بضربة حجر
ولو افترقنا نموت متحجرين
عجبي !!!

نوح راح لحاله و الطوفان استمر
مركبنا تايهه لسه مش لاقيه بر
آه م الطوفان وآهين يا بر الأمان
إزاي تبان والدينا غرقانه شر
عجبي !!!

علي رجلي دم .. نظرت له ما احتملت
علي إيدي دم .. سألت ليه ؟ لم وصلت
علي كتفي دم .. وحتى علي رأسي دم
أنا كلي دم .. قتلت ؟ والا اتقلت
عجبي !!!

انا كل يوم أسمع فلان عذبه
أسرح في بغداد و الجزائر واتوه
ما أعجبش م اللي يطبق بجسمه العذاب
واعجب من اللي يطبق يعذب أخوه
عجبي !!!

ينبوع وفي الحواديت أنا سمعت عنه
إنه عجيب .. وف وسط لهاليب لكنه
شقيت كما الفرسان طريقي .. لقيت
حتى الخنازير والكلاب شربوا منه
عجبي !!!

يا قرص شمس ما لهش قبة سما
يا ورد من غير أرض شب ونما
يا أي معني جميل سمعنا عليه
الخلق ليه عايشين حياه مؤلمة !!!
عجبي !!!

شاف الطبيب جرحي وصف له الأمل
وعطاني منه مقام يا دوب ما اندمل
مجروح جديد يا طبيب و جرحي لهيب
ودواك فرغ مني وابيه العمل
عجبي !!!

أعرف عيون هي الجمال والحسن
وأعرف عيون تاخذ القلوب بالحضن
وعيون مخيفة وقاسية وعيون كثير
وباحس فيهم كلهم بالحزن
عجبي !!!

إيش تطلبني يا نفس فوق كل ده
حظك بيضحك وانتي متنكده
ردت قالت لبي النفس! قول للبشر
ما يبصوليش بعيون حزينه كده
عجبي !!!

إقلع غمماك يا تور وارفض تلف
إكسر تروس الساقية واشتم وتلف
قال : بس خطوة كمان .. وخطوة كمان
يا اوصل نهاية السكة يا البير تجف
عجبي !!!

يا حزين يا قمقم تحت بحر الضياع
حزين أنا زيك وإيه مستطاع
الحزن ما بقالهوش جلال يا جدع
الحزن زي البرد ... زي الصداع
عجبي !!!

في يوم صحيت شاعر براحة وصفا
الهم زال والحزن راح واختفي
خدني العجب وسألت روعي سؤال
أنا مت؟ ولا وصلت للفلسفة
عجبي !!!

الفيلسوف قاعد يفكر سيبوه
لا تعملوه سلطان ولا تصلبوه
ما تعرفوش إن الفلاسفه يا هوه
اللي يقولوه بيرجعوا يكذبوه
عجبي !!!

علي بعد مليون ميل من أرضنا
من الفراغ الكوني بصيت أنا
لا شفت فرق بين جبال وبحور
ولا شفت فرق ما بين عذاب أو هنا
عجبي !!!

إنسان أيا إنسان ما أجهلك
ما أتفهلك في الكون و ما أضالك
شمس وقمر و سدوم و ملايين نجوم
وفاكرها يا موهوم مخلوقه لك
عجبي !!!

نظرت فوق للنجوم وانا ساير
رجليا عتريت في الحفر والحجاير
بقيت أقول وانا ع التراب: يا سلام
مش بس عبره أخذت لكن عبائر
عجبي !!!

-يا نجم .. نورك ليه كده بيرتجف ؟
هو انت قنديل زيت ؟ أو تختلف
-أنا نجم عالي .. بس عالي قوي
وكل ما انظر تحت اخاف انحدف
عجبي !!!

السم لو كان في الدوا منين يضر ؟
والموت لو عدونا .. منين يسر ؟
حط القلم في الحبر و اكتب كمان
..والعبد للشهوات .. منين هو حر ؟
عجبي !!!

وقفت بين شطين علي قنطرة
الكذب فين و الصدق فين يا تري
محتار ح اموت .. الحوت خرج لي وقالي
هو الكلام يتقاس بالمسطرة
عجبي !!!

سرداب في مستشفى الولاده طويل
صرخات عذاب ورا كل بساب و عويل
..وفي الطريق متزوقين البنات
متزوقين للحب و المواويل
عجبي !!!

الـدنيا أوده كـبيرة للانتظار
فيها ابن آدم زيه زي الحمار
الهم واحد .. والملل مشترك
ومفيش حمار يحاول الانتحار
عجبي !!!

أيوب رماه اليبين بكل العليل
سبع سنين مرضان وعنده شلل
الصبر طيب .. صبر أيوب شفاه
بس الأكاداه مات بفعل الملل
عجبي !!!

نسمة ربيع لكن بتكوي الوشوش
طيور جميلة بس من غير عشوش
قلوب بتخفق إنما وحدها
هي الحياه كده .. كلها في الفاشوش
عجبي !!!

يا طير يا عالي في السما طظ فيك
ما تفتكر شي ربنا مصطف بك
برضك بتاكل دود و للطين تعود
تمص فيه يا حلو و يمص فيك
عجبي !!!

كروان جريح مضروب شعاع م القمر
سقط من السموات فؤاده انكسر
جريت عليه قطه علشان تلعسه
أقاربه خيال شعراء و مالهوش أثر
عجبي !!!

ياللي نصحت الناس بشرب النبيت
مع بنت حلوه .. وعود ، وضحك ، وحديث
مش كنت تنصحهم منين يكسبوا
تمن ده كله ؟ ... والا يمكن نسيت
عجبي !!!

ما حد في الدنيا واخذ جزاته
ولا حد يفكر في غير لذاته
ما تعرفيش يا حبيبتي .. أنا و انتي مين؟
إنتي عروس النيل ... و أنا النيل بذاته
عجبي !!!

رقاصه خرسا و رقصه من غير نغم
دنيا .. يا مين يصلحها قبل النادم
ساعتين نهز بوجهها يعني لا
يترجروا نهديها يعني نغم
عجبي !!!

إخطفني ياللي تحبني ع الحصان
الدينا قالت يوم في ماضي الزمان
إخطفني ياللي تحبني ع الفرس
الدينا قالت .. قام خطفها الشيطان
عجبي !!!

من بين شقوق الشيش وشققت لك
مع شهقة العصافير وزقزقت لك
نهار جديد انا .. قوم نشوف نعمليه
انا قلت يا ح تقتلني .. يا ح اقتلك
عجبي !!!

جالك اوان ووقفت موقف وجود
يا تجود بده يا قلبي يا بده تجود
ما حد يقدر يبقي علي كل شئ
مع إن - عجبي - كل شئ موجود
عجبي !!!

جالك اوان وعرفت مشي الجنايـز
كيف شفتها يا عبد رب اللذايـذ
قال : شفت شيل بالحيل فقير أو امير
كما شالوا في الخمامير فواضي القرايز
عجبي !!!

أنا كنت شئ و صبحت شئ ثم شئ
شوف ربنا .. قادر علي كل شئ
هز الشجر شواشييه ووشوشني قال .
لابد ما يموت شئ عشان يحيى شئ
عجبي !!!

يا مشرط الجراح أمانة عليك
وانت ف حشايا تبص من حواليك
فيه نقطة سوده في قلبي بدأت تبان
شيلها كمان .. والفضل يرجع إليك
عجبي !!!

كيف شفت قلبي والنبي يا طبيب
همد ومات و الاسامع له ديب
قاللي لقيته مختنق بالدموع
وما لوش دوا غير لمسه من إيد حبيب
عجبي !!!

تسلم يا غصن الخوخ يا عود الحطاب
بيجي الربيع .. تطلع زهورك عجب
وانا ليه بيمضني ربيع وبيجي ربيع
ولسه برضك قلبي حنة خشب
عجبي !!!

قلبي عليل يا ناس وفي الكاس دواه
مديت له إيدي شربت م اللي حواه
جنبي الشمال خف .. اليمين اتوجع
وايه يداوي الكبد م اللي كواه
عجبي !!!

..دي مذكرات وكتبها من سنين
في نوتة زرقالون بحور الحنين
عترت فيها .. رميتها في المهملات
وقلت صحيح أما صحيح كلام مخبولين
عجبي !!!

دخل الشتا وقفل البيان ع البيوت
وجعل شعاع الشمس خيط عنكبوت
وحاجات كتير بتموت في ليل الشتا
لكن حاجات أكثر بترفض تموت
عجبي !!!

- الدنيا من غير الربيع ميينه
ورقة شجر ضعفانه ومفتته
- لا يا جدع غلطان تأمل وشوف
زهرة الشتا طالع في عز الشتا
عجبي !!!

ياللي انت بيتك قش مفروش بریش
تقوي عليه الريح .. يصبح ما فیش
عجبي عليك حوايك مخالبا كبار
وما لكش غير منقار وقادر تعيش
عجبي !!!

سمعت نقطة ميه جوه المحيط
بتقول لنقطه ما تنزليش في الغويط
أخاف عليك م الفرق .. قلت أنا
ده اللي يخاف م الوعد ببقى عبيط
عجبي !!!

بحر الحياه مليان بقرقي الحياه
صرخت خش الموج في حلقي ملاه
قارب نجاه .. صرخت قالوا مفیش
غير بس هو الحب قارب نجاه
عجبي !!!

فارس وحيد جوه الدروع الحديد
رفرف عليه عصفور وقال له نشيد
منين .. منين .. ولفين لفين يا جدع
قال من بعيد ولسه رأيح بعيد
عجبي !!!

كان فيه قمر كأنه فرخ الحمام
علي صغره دق شعاع شق الغمام
أنا كنت حاضر قلت له ينصرك
إشحال لما حتبقي بدر التمام
عجبي !!!

النهد زي الفهد نط اندلع
قلبي انهش بين الضلوع وانخلع
ياللي نهيت البنيت عن فعلها
قول للطبيعة كمان تبطل دلع
عجبي !!!

صوتك يا بنت الإيه كأنه بدن
يرقص يزيج الهم يمحي الشجن
يا حلوتي وبدنك كأنه كلام
كلام فلاسفه سكروا نسيوا الزمن
عجبي !!!

كرباج سعاده وقلبي منه انجلد
رمح كأنه حصان ولف البلد
ورجع لي نص الليل وسألني ليه
خجلان تقول انك سعيد يا ولد
عجبي !!!

مزينة هادية الكون فيها انتمر
وصيف ولبل وعقد فسل وسممر
يا هل ترى الناس كلهم مبسوطين
ويا هل ترى شايفين جمال القمر؟
عجبي !!!

إنشد يا قلبي غنوتك للجسمال
وارقص في صدري من اليمين للشمال
ما هوش بعيد تفضل ل بكره سعيد
ده كل يوم فيه الف الف احتمال
عجبي !!!

آه لو انا ومحبوب جزنا الفضا
في سفينة وحدينا .. واشيا رضا
ساعة صفا تعجبنا نرجع لها
والهم قبل ما يبجي .. يبقى مضى
عجبي !!!

أنا إله الوجد رب الهيام
أضرب بسهم الوهم وهم الغرام
وهم الغرام من كتر ما هو لذيد
رشقت انا ف صدري جميع السهام
عجبي !!!

حدوته عن جبران وعن خنفسه
اتقابلوا حوا بعض ساعة مسـا
ولا قال لهم حد اختشوا عيب حرام
ولا حد قال دي علاقة متدنسة
عجبي !!!

ياللي عرفت الحب يوم وانطوى
حسك تقول مشتاق لنبع الهسوي
حسك تقول مشتاق لنبع الغرام
ده الحب .. مين داق منه قطره... ارتوى
عجبي !!!

زحام و أبواق سيارات مزعجة
للي يطول له رصيف يبقى نجا
لو كنت جنبي يا حبيبي أنا
مش كنت أشوف إن الحياة مبهجة
عجبي !!!

إيديا في جيوبي وقلبي طرب
سارح في غربة بس مش مغرب
وحدي لكين ونسان وماشي كده
وبابتعد ما اعرف .. أو باقـرب
عجبي !!!

يا ميت ندامه ع القلوب الخسلا
لا محبة فيها ولا كراهه ولا
حتى يا قلبي الحزن ما عادش فيك
معلش .. لك يوم برضه راح تتملا
عجبي !!!

مرحب ربيع مرحب ربيع مرحبه
يا طفل يا للي ف دمي ناغا وحبنا
عشان عيونك يا صغتن هويست
حتي ديسان الأرض و الأعرسة
عجبي !!!

فتحت شباكي لشمس الصباح
ما دخلش منه غير عويل الرياح
وفتحت قلبي عشان ابوح بالألم
ما خرجش منه غير محبه وسماح
عجبي !!!

غمست سنك في السواد يا قلم
عشان ما تكتب شعر يقطر ألم
مالك جراك إيه يا مجنون ... وليسه
رسمت ورده ويست وقلب وعلم
عجبي !!!

انا الذي عمري اشتياق في اشتياق
وقطرد اخل في محطة الفراق
قصدت نبع السم وشربت سم
من كتر شوقي وعشمي في الترياق
عجبي !!!

انا الذي عشت الزمن مضيعه
بروح حزينة معفنة مضعضه
زرعت شجرة سنط لجمل انجرح
لقتها شعر البنات و مفرعه
عجبي !!!

لو فيه سلام في الأرض وطمان وأمن
لو كان مفيش ولا فقر ولا خوف جبن
لو يملك الانسان مصير كل شئ
انا كنت اجيب للدنيا ميت ألف ابن
عجبي !!!

العشب طاطما للنسايم ونسخ
أخضر طري مالهش في الحسن أخ
عصفور عبيط انا .. غاوي بهجه وغنا
ح انزلهننا .. وانشا لله بهرنسي فسح
عجبي !!!

أوصيك يا بني بالقمر والزهــــــــور
أوصيك بليلى القاهرة المسحــــــــور
وإن جيت في بالك .. إشتري عقد فل
لأي سمرا.. وقبري إوعك تــــــــزور
عجبي !!!

غمض عينيك وارقص بخفة ودلع
الدينا هي الشابة وانت الــــــــجدع
تشوف رشاقة خطوتك تعبــــــــدك
لكن انت لو بصيت لرجليك تــــــــقع
عجبي !!!

حاسب من الاحزان و حاسب لها
حاسب علي رقايبك من حبلــــــــها
راح تنتهي ولا بد راح تنتهــــــــي
مش انتهت أحزان من قبلهــــــــا؟
عجبي !!!

يأسك وصبرك بين إيديك وانت حر
يأس ما تيأس الحياه راح تــــــــمر
أنا دقت من دا ومن دا عجبي لقيت
الصبر مر و برضك اليأس مــــــــر
عجبي !!!

ولدي نصحتك لما صوتي اتبـح
ما تخفش من جني ولا من شبح
وان هب فيك عفريت قتيل إسألـه
ما دافـعش ليه عن نفسه يوم ما اندبـح
عجبي !!!

ولدي إليك بدل البالون ميت بالسـون
انفخ وطرقـع فيه علي كل لـون
عساك تشوف بعينك مصيرالرجـال
المنفسوخين في السترة والبنطـلون
عجبي !!!

خوض معركتها زي جدك ما خاض
صالب وقالـب شفتك بامتـعاض
هي كده... ما تنولش منها الأمل
غير بعض صد ورد ووجاع مخاض
عجبي !!!

كام اشتغلت يا نيل في نحت الصخـور
مليون بنونه و الف مليون هاتور
يا نيل أنا ابن حلال و من خلفتك
وليه صعيبه علي بس الأمـور
عجبي !!!

منين أجيبها كلمه متألمة
لعيبه فايره حايره ومصممه
منين أجيبها كلمه تكون بنت ارض
تشفي اللي ما شافهوش كلام السما
عجبي !!!

أنا قلت كلمة وكان لها معنيين
كما بطن واحد وتوأمين زي وشين
لو دنيا شر.. التوأم الخير يموت
لو دنيا خير الشرح يعيش منين
عجبي !!!

أنا اللي بالأمر المحال اغتوى
شفت القمر نطيت لفوق في الهوا
طلته ما طلوش إيه أنا يهمني
وليه .. ما دام بالنشوة قلبي ارتوى
عجبي !!!

بره الإزاز كان غيم وأمطار وبرق
ما يهمنيش - أنا قلت - ولا عندي فرق
غيرت رأيي بعد ساعة زمان
وكنت في الشارع .. وفي الجزمة خرق
عجبي !!!

عيني رأيت مولود على كتف أمسه
بصرخ تهنن فيه بصرخ تضامه
بصرخ تقول يا بني ما تنطق كلام
ده اللي ما يتكلمش يكثر همسه

عجبي !!!

يا عندليب ما تخافش من غنوتك
قول شكوتك واحكي على بلوتك
الغنوه مش ح تموتك إنما
كتم الغنا هو اللي ح يموتك

عجبي !!!

يساللي بتبحث عن إله تعبده
بحث الغريق عن أي شيء ينجده
الله جميل وعليم ورحمن رحيم
أجمل صفاته .. وانت راح توجده

عجبي !!!

حقرا وفوق كوكب حقير محتقر
في الكون تكون دنياك وإيه يا بقمر
رملايه من صحرا ! لكن إيش تقول
والكون بحاله جوه عقل البشر

عجبي !!!

الأعمال الكاملة للشاعر

لا تجبر الانسان ولا تخيـره
يكفيه ما فيه من عقل يحيـره
اللي النهارده يبطلبه و يشتهيـه
هو اللي بكره ح يشتهي يغيره
عجبي !!!

ياللي في حماه الشمس تلقى الملاذ
وألف بكره وبكره .. في ضلوعه لاذ
مين أنت ؟ ماردا ؟ رب ؟ قال لأده بس
انا اللي باروي القمح واسقي الفولاذ
عجبي !!!

غسل المسيح قدمك يا حافي القدم
طوبى لمن كانوا عشانك خدم
صنعت لك نعليك أنا يا أخي
مستني إيه .. ما تقوم تدوس العدم
عجبي !!!

البط شال عدى الجبال والبحور
ياما نفسي اهج .. احج ويا الطيور
أوصيك يا ربي لما اموت .. والنبي
ما تود نيش الجنة .. للجنة سور
عجبي !!!

طال انتظاري للربيع يرجع
والجو يدفا والزهور تطلع
عاد الربيع عرمم شباب
إيه اللي خلاني ابتديت افزع؟
عجبي !!!

ولو اتضنيت وفنيت وعمري انقرط
مش عاوز الجأ للحلول الوسط
وكمان شطط وحنون مانيش عاوز
يامين يقول لي الصح فين والغلط
عجبي !!!

عاد الربيع كأنه طعم الحبيب
والحب نار جوه العروق بتصب
اتممع ازاي بيه وأنا متقطع
من كتر خوفا لافي الخطيئة يطب؟
عجبي !!!

ازاي شبابنا يقوم وياخد دوره
من غير صراخ يئديه ويجرح زوره
يا هل ترى أحسن له يقعد ساكت
أو يترك ولو خرج عن طوره؟
عجبي !!!

عيني رأت عصفور ووباه أبـه
بيحده في الريح وياخده فحضنه
نوبتين وتالت نوبه - عجبني عليهم -
كانوا سوا بيرفرسرا و يغنوا
عجبني !!!

احسن ما فيها العشق والمعشقة
وشويتين الضحك والتريقة
شفت الحية . لفيت . لقيت الألد
تغيرها . وده يعني التعب والشقا
عجبني !!!

عجبي على العجب العجيب العجيب
لما الحقيقة تطل بعد احتجاب
وتروح وتحلا وفجأة تصبح مفيش
كمثل طراطيش بحر يامأ خد وجاب
عجبني !!!

في الهوامشي يا بهلوان إيش إيش
يا فراشة منقوشة على كل وش
شقلبت عقلي وعقلي شقلبني
وكنت باحسبني بقيت ما اندهش
عجبني !!!

وقفت ساعة الصبح باغسل سناني
قالت لي شايف قوتي و لمعاني ؟
إيش تطلب اليوم مني ضحكة أسد؟
والا ابتسامة اعلانات أمريكاني ؟
عجبي !!!

الحلو ييم اليم صابح رايح
سارح في حزن الميه سايج سايج
الحلو داب في البحر ، قلت أدوقه
وجدت لسه البحر برضك مالح
عجبي !!!

يا كل كلمة للعجب في قاموس
انسكلوبيديا لسان العرب أو لا لاروس
تعالوا نجدة . ده لسه في عصرنا
الشمس و البحر العريض بالفيلوس
عجبي !!!

الموج تلول تهبط وتطلع تلول
يا بحر خدني الشط صاحبك ملول
والا بلاش الشط ح اعمل به أيه
ده ريحته طحلب مهري وام الخلول
عجبي !!!

ما انتاش بتلعب ليه يا روح بابا ؟
ولا عسكري ولا لص في عصابة ؟
إلعب أسد أو ديب رهيب أو غزال
دي الدنيا في نهاية المطاف غابة
عجبي !!!

ورد في ورق سلوفان يا حلوة اهديك ؟
والا انقله بالطين في الشتلة واجلسك
الأولاني لروحنا بحنانني
عجبي علي الثاني بإيه يوحيلك
عجبي !!!

أنا قلبي كوكب وانطلق في المدار
حواليكي يا محبوبتي يا نور ونار
يلف مهمما يلف ما بيكتفيش
وتمللي نصه ليل ونصه نهـار
عجبي !!!

الأرض شوك أيوه لكين هايش
والحمرة مش يعني الطريق حايش
دي دمنا السيال .. وبشرة خيـنر
ان انتي عايشة وان كنت أنا عايش
عجبي !!!

إيه اللي خدته من مرور السنين
يا قلبي الا دمتك والنينين
بتنن وترجع وبتفرح وترجع تحن
مع إن مش كل البشر فرحانين
عجبي !!!

اوقات أفوق و يحل عني غبايا
واشعر كأنني فهمت كل الخبايا
وافتح شفايفي علشان اقول الدرر
ما أقولش غير حبة غزل في الصبايا
عجبي !!!

عيني رأت مخلوق في غاية البشاعة
أنا قلت له لما تأملته ساعة
اللذو والموت علموك اللزج
وانا علموني الفلسفة والشجاعة
عجبي !!!

غطس وقب الموج نهود بمبي
من ألف جيل جمالات ما تعلم بي
يا قلبي عيب دول امهاتنا القدام
أسْتَغْفِرُ اللهَ العَظِيمَ رَبِّي
عجبي !!!

علقت في المسمار قناع مهزلة
ومعاه قناع مأساة بحزنه ابتلا
بصيت لقيتهم يشبهوا بعضهم
واهووه العجب يا ولاد و الافلا
عجبي !!!

ظهر المسيح الحي على سفح ربسوة
ونزل بهالة الضي وقعد في قهسوة
بُصوا .. تعالوا .. قالوا خليه في حاله
الناس في حالهم يا بني مالهمش دعوة
عجبي !!!

لولا اختلاف الرأي يا محترم
لولا الزلظتين ما لوقود انضرم
ولولا فرعين ليسف سوا مخالف
كان بيننا جبل الود كيف انبرم؟
عجبي !!!

يا وردة قلبي معاكي في الريح لعب
لا تعبتي م الريح ولا قلبي تعسب
احنا كده : نرتاح في صخب الجنون
وفي السكون بنخاف قوي و نترعب
عجبي !!!

مركب ورق من نفخة تتطوَّح
ركبتها والكمل بيـــــــــــــــــلوح
سوّحت فيها اثنين وخمسين سنه
لآن ولا بتفـرق ولا تـروّح
عجبي !!!

عالجسرفت الصبح تحت الضباب
بين اللي لسه بينغرس و اللي طاب
ما اهتز قلبي لبنت طالع جديد
قد اللي ماشي .. وتحت باطه كتاب
عجبي !!!

يسا خالق الكون بالحساب والجبر
و خالقني ماشي بلختيار والجبر
كل اللي حيلتي زمزمية أمل
وازاي تكفّيني لباب القبر؟
عجبي !!!

قاعدة أناني الخمر ساكنة وساهية
مع ابن آدم في الشبه متناهيــــــــــــــــة
مفيش كده روقان في لحظة تشوفهم
وبعدها بلحظه يودوا في داهيه
عجبي !!!

حتى محارة وجدتها في يوم لقيّة
قالت لي شوف كيف الطبيعة شقية
نظرت للكهف اللي فيها و لقيت
إن الطبيعة كمان لا أخلاقيّة
عجبي !!!

بلياتشو قال إيه بس فايدة فنوني ؟
وتلات وقلق مساحيق بيلونوني
والطبل والمزامير وكتر الجمير
إذا كان جنون زبوني زاد عن جنوني
عجبي !!!

نقطة مرارة كمان على مشروبي
دوبها يا ساقى حسب مطلوبى
طعم الحياة .. مش برضه فيها وفيها ؟
ليالي وردي ونهارات خروبي
عجبي !!!

وسط الحطام اتفرجوا يا أنسام
تمثال ملك . و مبوله م الرخام
لتنين نحتهم نفس أسطي الحجر
و كانوا ذات يوم كتلتين لسه خام
عجبي !!!

عيد والعيال انتظتوا ع القبور
لعبوا استغمايه .. ولعبوا بابور
وباللونيات ونابلونات شفتشي
والحزن ح يسروح فين جنب السرور
عجبي !!!

أنا قلبي كورة والفرودة أكمم
ياما اتنطح وانشاط وياما انعكمم
واقول له كله ح ينتهي في المعاد
يقول بساعتك ؟ و الا بساعة الحكم ؟
عجبي !!!

الضحك قال يا سمع التكشير
امشير وطوبه وانا ربيعي بشير
مطرح ما باظهر بانتصرع العدم
انشالله أكون رسماية بالطباشير
عجبي !!!

أهوى الهوى وهمس الهوى في العيون
وبسمة المغرم ودمعه الحنون
وزلزلات الحب نهد الصبا
أكون انا المحبوب أو لا أكون
عجبي !!!

يا ملوَّنين البيض في شم النسيم
لُون الحنين و الشوق و خمرة النديم
ما تعرفوش سابق عليكو النبيبي
تلونوا الأيام بلون النعيم؟
عجبي !!!

الدنيا صندوق دنيا .. دور بعد دور
الدكة هي .. وهي كل الديكور
يمشي اللي شاف ويسيب لغيره مكان
كان عربجي أو كان امبراطور
عجبي !!!

قطبي العزيز راقد على الكنبات
في نوم لذيذ .. و بيلحس الشنبات
وانا كل عين فنجان مدلقد قلق
صدق اللي قال إن الحياة منبات
عجبي !!!

قالوا السياسة مهلكة بشكل عام
ويحورها يا بني خشة مش ريش نعام
غوص فيها تلقى الغرقانين كلهم
شايلين غنايم .. و الخفيف اللي عام
عجبي !!!

صلاح جاهين

سلام سلام سلام سلام سلام
كلام كلام كلام كلام كلام
هز الورق يا صاحبي كدهـوه
يطلع كلام سلام .. و سلام كلام
عجبي !!!

فوق تحت . ورا أدام . يمين شمال
في الجو . تحت الميه . أوفي الرمال
طلب الكمال يحرم على الممكن
والممكنات دول محرومين م الكمال
عجبي !!!







اتنين صباحا

النسور ملو الشوارع ،
ومليون راديو والصح ،
الساعة اتنين صباحا ،
لكين اييه الموانع
الخلق رايحة جاية ،
و الدنيا لسه حيا ،
مليان لسه بالله أو ،
وزعيم ق القهوة
واحد يقول لواحد
خليك ياعم قاعد ،
التاني يقول له : شكرا ،
ده أنام المغرب مواعد ،
فيه سهرة لسه عندي ،
في بيت فلان أفندي ،
ح ناكل حاجه حلوه ،
ونشرب تمسرهندي ..
واللي تروح دالقه جردل ،
فوق حضرة المبجل ،

طبعنا صاحبنا يزعل ،
وينفجر ششيتايم
والحمى كله يوصل ،
ما بين مصلح ولايم ،
اللى يقول :
يا جماعة
واللى يقول :
يا بهنايم
ومطرب الاذاعه ،
يصرخ وف وجدده هيايم
ولو طرقتك ودنك ،
فسى وسط دى العظايم ،
تسمع مسجراتى ،
بطلبة صوتهها واطى ،
يقول

اصحى يا نايم



الزباين

اللى زيك ويشتغل بالأجره
واللى زيى وله ماهيه مسوجره
طول حياتنا نغرق على رغيغ عشنا
والنهارده مايفيضش حاجة ل بكره
طول حياتنا نغرق على رغيغ عشنا
طول ما عشنا ما عمرناش حوشنا
المساكن والأكل ناتفين ريشنا
والملابس جايين لنا بالقدره
بعنا روحنا بالجمله والقطاعى
للشيطان والخواجه والاقطاعى
واشترينا بصحتك ودراعى
يوم زياده بيرا القبور الغبيره
يوم بيوم بالعرق كتبنا حياتنا
وكتبنا قصة حياة أبهاتنا
وقصة الخلق كلهم اخواتنا
اللى شاربين كاساتنا قطره بقطره
ناس كتير فى البلد دي زيك وزىي

كلنا مولودين فى أحوال نعيي
القرف مشترك فى حيك وحيي
فى الحسين والامام وغمره وشبرا
فى المحله والمنزله وبورسعيد
وبنى سويف وكفر شكر ورشيد
والبلاد البعيد فى آخر الصعيد
والبلاد اللى أرضها لسه صفرا
كنت باشرب عصير قصب من مده
والمعلم واقف قصاد العده
ينشف العود ده يلتفت للعود ده
شفت تفل العيدان تلول خدت عبره
شفت تفل القصب وشفت الزباين
اللى ممصوص واللى جميع عضمه باين
كلنا مهلوكات عدد ومكاين
كلنا ممضوغين على ضبه فاجره



البنيت والولد

البنيت فارت و الولد خشر
يا داهيه دقي! .. ألف بعد الشر
يا ريتها كانت نزلة شعبية،
والا وجع فى البطن .. يتدبر.
الا اللي نايهم، كان قضا وصايهم،
مالوش دوا، ولا طب، ياسى أنور.
البنيت فى الاعدادى لساها،
كان إيه لزوم الغصن يتدور ؟
والا الولد، ده يا دوب دخل ثانوى،
ليه خده ينظر شوك، بدا المنظر ؟
مش لما بس يكملوا علومهم .. ؟
ما كانش يومهم، يا دي النهار لا غير!
لو كان عليا .. لا واد ، ولا بنيه ،
أخلى فيهم (ملى) يتغير ،
غير لما يبقوا أساتذته، بماهيه ،
وبيت جميل، مفروش على صغير!

رأس السنة

ويسكى ، براندى ، نبيت ، كونيكا ،
بـــــــــــــــــيره ، فودكـــــــــــــــــا ،
عرقــــــــــــــــى ، مريــــــــــــــــه ، أرمنيــــــــــــــــك
هـــــــــــــــــنا وهـــــــــــــــــناك
صين ، مصر ، ايطاليا ، أميركا
تشا تشا تشا ، تانجو ، مازوركا
افريقيا بترقص دلوكة و سامبا ،
روســــــــــــــــيا بترقص بولكــــــــــــــــا
احنا بترقص بلدى و دبكه
طرايط و شرايط أصفر و أزرق و أخضر
ووشوش خنازير ، وملايكه ، و جن أحمر
اللى بيضحك ، وبيسكر ،
و اللى بيبكى وبيفكر ،
لكن أؤكد لك يا عزيزى - الكل يبسنظر
شئ واحد ، هو الراس الخاصة بعام
مــــــــــــــــش عــــــــــــــــارف كــــــــــــــــام
انــــــــــــــــما يــــــــــــــــاســــــــــــــــلام
بقى بعد الطرايط والبكا والرومبا ،
لو ههذا الراس مظهرش ..
لو هذا العام اللى احنا بنستناه ما حضرش
عــــــــــــــــشــــــــــــــــان
انــــــــــــــــضــــــــــــــــرت كــــــــــــــــذا بومبــــــــــــــــه

دموع ورا البرقع

أنا لوحدى مفيش حاجة
مجرد اسم متخبط على ورقه
فى ايد واحد مدير أصله قومسيونجى
يقدمها لتركى والا لخواجه
لا يعرف عربى ولا شفقه
يروح ماضى بقلم باركر بالفرنجى
أروح مرفود

وأصبح اسم متعلق على اللوحه
تشوفه زمائلى فى الجايه وفى الروحه
يفوت عامل فى ايده نص شقة بفول
يقف ويقول:

يا عالم ربننا موجدود
مفيش مهرب من التوفير
وعامنول ما رقدوا كستير
ويدخل وحده فى المصنع
ونا أطلع

أنا لوحدى

أنا لوحدى مفيش حاجة

مجرد اسم فى الجلسه بيتنادى
ما بين ميت اسم وزيادة
وجسدول جلسنى ملىان
والقاضى مهوش فاضى
ينادىلى أقول له يا سعادة البيه
مدير المصنع الدباح قطع عيشى
يقول ايه عشان جريمه ايه؟؟
وينزل أسنله يسألها ضيشى
وقدامه قانون عقد العمل
ودوسيه واسمى عليه
ونضارته وحبابى عنيه
ونا مجرد تلات كلمات على الأوراق
أسامينا أنا ووالدى
واسم اللى اترحم جدى
مايسألنيش ويسأل نفسه باستهزاء

عن الأوراق

وعن اثبات

بمستندات

أقول له مفيش

يقول خلاص ماتلقنيش

ويتمزج محامى الشركة وبهقق
خلاص القاضى أنهى المشكلة رسمى
ولا اترافع ولا دافع ولا زعق
وفيه أسماء ينادوا عليها غير اسمى
وحيد ... مدحت ... شريف ... سامى
يخشوا الجلسة بمحامى
ونا أخرج

وروحى من الشقا بتعرج
أنا لوحدى

أنا لوحدى مفيش حاجه
مجرد اسم كاتبه فى دفتر الاحوال
جدع ظابط بوليس فرحان
بنجمه يمين ونجمه شمال
يقشر موزه

ويأشعر على المحضر
وبيعت عسكرى يجيبنى مع المحضر
وأصبح اسم يتكفن بكل لسان
من السكان

بيعد عن بيتكوا يا أم فلان
خلاص يبيعدوا عفش فلان

وحا يطير الجهاز كله
بوريه ونحاس وربطة فرش
وصاحب الملك بفضل له
تلاته جنيه وستين قرش
وتمشي مراتي بعيالها
عشان تاكل في بيت أبوها
هناك في ناس يحبوها
أوصلها

وفي السكة تقول ربك يعدلها
وأشوف كل السدموع بتفور
ويتلمع ورا البرقع
أقول لازم نعدلها
وتدخل هيها بعيالها
ونا أرجع
أنا لوحدي



آلهة

ايـزيـس بتـحـب بوـذا ،
وكيوبيد السبب .
باخوس سقاها بوظه ،
شوف قلعة الادب ؟
حتحور و مناف و نبتون ،
واله بقرون و ديل ،
طلعوا الاوليمب هيلتون ،
واتعماركوا فى الاوتيل
زيوس اتحدى رع ،
فى بورصة البشر .
أبوللو وقاللوهج ،
فشرفشرفشرف .
والكل نزلوا ركبوا
عريسات فارهه ،
ان خسروا ولا كسبوا ،
الكل آلله

وكيل

وبهيه فى المحاكم ،
شدت واحد وكيل
عند البوفيه كان واقف ،
يشرب جنزيبيل
والجنزيبيل ده أصله ،
للصوت مالوش مثيل
مكتوب عليه ف مجلد ،
"مرافعات هايبيل"
يشرب منه المحامى ،
يمسح أجدع زميل
ويصفف النخيل
وفحتم النيايه ،
فى كوريدور طويل
وبهيه ماشية جنبه ،
وتبلبل مناديل
تشرح له وهى تبكى ،
يقول لها قليل
وتقول له: كثير عييا ،
مبلغ تافسه ضئيل
اتنين ريال يا وليه ،
ومن العلم الاصيل
خدى بالك م الفصاحه ،
مفعول الجنزيبيل
والاش لما يحصل ،
دخله أبو زيد ثقيل
عنها ودخل عالقاضى ،
أنا طالب التأجيل
خبط الترايبزه وقال له ،

التلامذه

يا عم حمزه

احنا التلامذه

جن و بلاوى مسيحه - من غير مؤاخذه-

تكبر ما تكبر

الله أكبر

طول الزمان ع الامتحان داخلين مبارزه

هل من مبارز

هل من مناجز

هل من معارك فى البلد دى ، لسه عايزه

هل من منادى؟

ونفير جهادى؟

قال لك: أجل ... لسه العجل فى رمله غارزه

لسه ف طريقنا للأمال

و الرمله من كل جهه

زقه مع زميلكم جمال

يا عقولنا يا متنبهه

الرمله حلوه ع البلاج

حلوه على باب الفرح

لكن لحد كده و بلاش

أحسن شعورى بينجرح

اسفخص على لون الاصفرار

و الفقر ، والخوف ، والمرض

ما شفته الا ودمى فار

وحلمت بيه زال وانقرض
كابس علينا الشىء ده ليه؟
هو انجليز؟
ولا تتر؟
دوكهم خطر ، قمنا عليه
رياح ما خلتلوش أتر
كان برضه أمشير زى ده
كان برضه فبراير كده
قمنا جموعا حاشده
سلاحنا أنشودة فدا
احنا الجواب ، و احنا النداء
واحنا التلامذه المنجده
يا عم حمزه ماشفتناش؟
الدنيا شافت دمننا
حنه على ايدين أمننا
حلفت يكون عيد بسمننا
عيد ابتدا ولا انتهاش
يا عم حمزه
"لا ماليف" وهمزه
لأ .. مش عاوزين عيشة وارثين
ولا دنيا جاهزه
ده أبو سد عالي
سهران ليالى
زى التلامذه ف الامتحان ..
يا عم حمزه

تحويل مجرى الأردن

وقفه يا بن عم ..

واحنناكم وكمم ،

واللى بيجرى بيننا ،

ميهـــــــــــــــــه ، والادم ،

واه يســـــــــــــــــانهر أردن ،

ريحك شليله هم

وقفه جدعنه ..

وقفه فلاحين ،

على رأس القننا ،

على قلب اللعين .

وقفه جبارين ،

بدارين تقاوى ،

وقفه كداحين ،

حمالين أساوى ،

نشاين نشاوى ،

بنايين عالاوى ،

حفار ينمـــــــــــــــــراوى ،

فى الصخر الضنين .
وقففة سهارين ،
تنقال الحكاوى ،
عنهم ، والغنساوى ،
أدهم الشـرقاوى ،
وبهيمه وباسين .
وقففة مؤمنين ،
عارقين ربنا ،
صابرين من سنين ،
ليوم المنى ،
وأخرة المـستم ،
وقففة يابن عم ..
وقففة عيد لنا .



الانتصار

فيه لسه ركن ف قلبى عاوز يتسم
أرض الجزائر لسه تحت الاحتلال
أنا قلت مش ممكن بلادى تنقسم
أرض الجزائر جزء من أرض القتال
و خرجت ناير
رايح الجزائر
و نسيم بلادى معايا طائر بالبشاير
للأنتصار

مشيت مشيت لون الجراح ما غابش عنى
مشيت مشيت جوّه الرياح اهتف و اغنى
يا سهرانين الليل عليكم السلام
شدوا الزناد شدوا انتصارنا و قرّبوه
بكره الليالى تعود و يملأها النرام
و كل طفل ينام سعيد فى حضن أبوه
يا دم يا احمر
ع الزرع الاخضر
أهل الجزائر بدروك علشان تزهر
للأنتصار

هناك هناك فوق الجبال آخر طريقى
هناك هناك وسط الضال واقف شقيعى
بنظرة مليانة حنان ضم الوطن
ضم السنابل ضم أغصان الزيتون
ورفع سلاحه وخط فى جبين الزمن
ميعاد لحربة بلاده راح يكون
و أنا سبت أرضى

وفيه وردي

رايح الجزائر بالرصاص أأدى فرضى
للانتصار

راح ننتصر ونشوف سلام و أيام جديدة
راح ننتصر ونعيش كرام فى بلاده سعيدة
وانا حامشى وامشى وامشى ف سكتى
واوصل واضم إيديا لألوف لألوف
وانزع من المستعمرين حريتى
وانشد مع الثوار وإحنا فى الصفوف
أنا جاي ثاير

ويا الجزائر

ونسيم بلادى معايا طاير بالبشاير

للانتصار

قصة

كان فى ولد صغير ، عنده اتناشر سنه
عيل مفعوص قصير ، وعاوى فتونه
بيمثل دور فى ذهنه ، لشخص عظيم الشأن
وبوماتى يحلق دقنه ، مع انه مالش دقن
بالموس وخلص ويحرت ، المجنون البعيد
لحد ما دقنه كبرت ، قال لك ده اليوم ده عيد
ووقف قدام مرايته ، يتنظط م الفرح
اكنه حسب روايته ، زى باباه انجرح
تع شوف بقى النهارده ، راجل بيه قد الحيط
وصداغه كل فرده ، فيها من القطن غيظ
يحلف عالنار و الميه ، مهو حالق جمعيتين
و دى قصة فلسفيه ، متزاهاف كلمتين
شرم برم ، يا حلولى ، هأو أو ، اش اش
تراللى ، أمان يا لاللى ، حرنكش ، طظ فش

التفريقة

أنا بغبنان من (افريقه) .
حافظ نصوص كهتة عتيقة
بحرين وبيت جبال عديت ،
قزحت نص الدنيا ، وبيت ...
اللى لقيتة ف أمريقه
نفس الكلام ..
نفس الكلام ..
نفس الكلام ..

(1)

(كلام الرجل الأبيض)
أبيض ، وفنطازيه
ومراتى المظية
وربنا اصطفانا ،
عشان حمرة قفانا ،
وششيلنا الأمانة ،
اللى تقبل الرزية .

(2)

(كلام الرجل الأسود)
أسود ، ودمي حامي ،
حامي الحمي يا حامي ،
ما فيناش لئونكم ولوننا ،
الكون ده كله كوننا ،
ماما مديا هو لنا ...
و مش هده المحامي .

(3)

(كلام الرجل المحامي)
محامي كبير قانونجي ،
وفي الكلام يرنجي
شايب وشكلي رائح ،
فصاهم كل الشرائع ..
لابيض وده رأي شائع
أبيض ، والزنجي زنجي

(4)

(كلام الولد الأبيض)
والله (الجلاس) مسا ادوقه ،

يا الزنجى ينسول حقوقه !
تلميذ ، وباســـــــــــــــــ تهجى ،
لكن فى السراى ... حجه ،
العالم بده رجـــــــــه ،
عشان تمسح فروقه !

(5)

(كلام الرجل الأفريقى)
يا ليل .. والبدر بمبى ..
يا ليل .. مقدرش انام بو ..
يا ليل .. أناسجنى باسبو ،
وان ماكسرتوش .. ده ذنبى !
عزبـــــــــــــــــ نى درش ..
زعلان قوى من (أمريقه) ؟
عشان حكاية التفريقة ؟
عاوز صراحة وحقية ؟
الجل يا بنى ف (افريقيه) !
الأصل لما يزول ،
الظل برضسه يزول !
سلم على خيالى شقيقة !

أجمل ما فيهم

يا بنيت يام المربلة كحلى
يا شمش هالله ، وطاله م الكوله ،
لو قلت عنك فى الغزل قوله ،
ممنوع علينا والاسموح لى ؟
أنا أحب أقول الشعب فى الحلوين ،
والحلو أقوله : يا حلو ، فى عيونه ،
ولو ابتديت بشفايفك النونو ،
مايكفينيش فيهم سسبع دواوين !
يا ملاك يا جنيه ، يا ست الحسن ،
يعجبني توهانك فى أحلامك ،
يعجبني شد الخصر بحزامك ،
يعجبني أخذك للكتيب بالحضن .
.. راحو الصبايا ، والصبايا جم ،
أجمل ما فيهم مين ، غير بنتى ؟
وأجمل ما فيكى يا بنتى ، ان انتى ،
فى عنيكى من نيتى .. حنان الأم !

الأدب

العلم قال

ان العيال ،

يلزم لانتاجهم رجال ،

ويا النسا

وايه كمان العلم قال ؟

قال لك ضرورى شخص واحد بس ، علشان كل طفل ،

وضرورى باب ،

وضرورى قفل ،

وضرورى حب ، انشائه ثانية .

ده ف بند حفظ النوع ...

لكين بقى فى الأدب ،

قريت " نهاية الأرب

وفلاسفة مش من العرب ، ومن العرب ،

وكلهم قالوا الكتاب

له فى تانى ، فن معروف من زمان

يا فرنسواز هانم ساجان ! ..

أكتوبر

من غير ما نتفاخر ونتباهي
لا بالرايات اللي رفعناها
ولا بالحصون اللي انتزعناها
ولا بالمدروع اللي مزعناها
ولا بالدموع اللي ابتلعناها
على الضنى العالي وحجبناها
وحياة عيون مصر اللي نهواها
واكتوبر اللي كما النشور جاهها
بلاش نعيد في ذنوب عملناها
أنا اتعس اللي بدعها وجناها
وما زلت تحت عقابها وجزاها
وحياة ليالي سود صبرناها
واتبددت بالشمس وضحاها
نكسبح جماح الزهو ، مع أنه
من حقنا ، ونحمي النفوس منه
ولو " العبور " سالونا يوم عنه
قول : مجرد خطوة خدناها !

ألفية ابن دنلوب

(1) أليفة خفية المسالك ،

أصعب من أليفة ابن مالك

(100) بالانجليزية يا شهاب الدين

أكتب من الشمال لليمين

(200) والعربي يا طالب المعالي

فاكتب من اليمين للشمال

(300) معلومة - والجمع معلومات

العلم ، لا دلوع ومفهومات

(400) اعلم هما ، ونحن عند الشط ،

أهم شيء هو حسن الحظ .

(500) السن ضع في الحبر ، واحذر البقع

إذ ربما فوق الكراريس تقع

(600) إذ ربما فوق الكراريس تقع

مواظباً ، سلوكه حميد

(700) باشكابتاً ، إن كان في الديوان ،

أو من رجال الطب والبيان

(800) العلم - يا مولاي - للتوظيف ،

لا - يا جعلت فداك - للتفلسف

(900) يقولها العلامة بن دنلوب ،

وليس يبنى - قط - أي مكسب ..

(1000) فهل الذي كان زمانا قد جبر ؟

والمبتدأ لوجاء ، هل يأتي الخير ؟ ..



برافو برافو

من قدم السبت يلقي الحد قدامه
كلمة قالوها فى معنى الجد ومقامه
واحنا اللى شفنا زماننا ومعجزاته نقول
من شاف بنا السد شاف الغد فى ايامه

برافو — و برافو — و بسطويسى
برافو — و برافو — و فلاديمير
دشنتوا الحديد بفود كسا
والحجر بلمون عصير

تلتميت مليون براوة
ع الشطارة والذكاوة
والبراءة والحلاوة
ومصر والعميل الكبير

سد جبار ماله زى
والنهارة العيد يا خى
عيد يبشر باللى جى
واللى جى كثير كثير

عيد لتمجيد الصداقة

والعمَلُ بـكُلِّ طاَقَة
لجـلُ تـدخُلُ الإضـياع
كـلُّ كـوْخٍ فـسـلـاحٍ فـقـير
لجـلُ تـشـتـغَلُ المـكـابـين
عـلـى كـيـفٍ كـيـفِ الزـبـانِ
والرـمـالُ تـطـسـرُحُ جـنـابـين
والايـديـنُ تـطـسـرُحُ فـطـير
لجـلُ تـخـضـرُ الصـحـارا
ويـرـقـصـوا فـيـها العـذارا
وابنـى يـلـعـبُ عـ الجـيـتـارة
أم أو تـار مـن حـريـر
كـان كـفـاح مـليـان مـرارة
كـان كـفـاح مـليـون جـيفـارا
ضـد عـراقـيـسـل الحـضـارة
تـحـسـت لـهـالـبـسـب السـمـير
فـتـنـا يـا وـلاد فـى الحـضـارة
كـل تـفـجـيرة انـتـصـارة
والقـلوب فـيـها الحـرارة

الأعمال الكاملة للشاعر

طاغية على حر الهجير

والقلوب فيها المعالي

شعلة في الضلام تلالى

ينقلب كحل الليالى

حنة حمرة ومونوكير

حنة مع رف ولادم

المهم بل الأهم

المهم اردة السدم

وايتدا الريف يستنير

غنى يا عصفير وهيصى

واهتفى يا جماهير

برافو و برافو بسطوي

برافو و برافو فلاديمير



بعد الفطار

عيني غفلت حبتين ، بعد الفطار
كل عام وأنتم بخير رمضان كريم
عيني غفلت ، م التعب طول النهار ،
والمجاهدة ، والمناهدة ، وسين وجيم ،
لحظة والثانية ، وبعد اللحظتين ،
جاني احساس إن حد دخل قعد ،
وابتدا يسبح ، وابص بنص عين ،
نص قلبى انسر ، والنص ارتعد ،
شفت بيرم .. أيوه بيرم .. أيوه هوه ..
لبده مصرى ، جلابيه مغربى ،
شمله شامى ، سبحة من أرض النبوة .
حد ما يعرفش بيرم والنبى ؟ ..
شفت بيرم ، بالصديرى اسكندرانى ،
شفته ، متلفح بشال من العراق ،
والحزام يمنى ، وعطر الايد سودانى ..

الأعمال الكاملة للشاعر

حد ما يعرفش بيروم يا رفاق ؟

- ضحكته المره اللى يتنقط غسل

قلت : خير إنشالله . قال : فين الديوان

فين "ديوان بيروم" . ما بطلتوش كسل ؟ ..

قلت له : معلش . قال معلش إيه !

وناتايبه عن بلدنا يا ولد ؟ ..

البعيد عن عينها ، يا حسرة عليه ..

يا بلدنا ، يا حلوة ، آه منك بلد !

قلت له : راح نحتفل بك . قاللى : لا ،

احتفالكوا وفسروة على نفسىكوا .

قلت له : ح نشيد بفضلك . قاللى ها ،

فضلى فين ، إذا كنتوا ناسيين درسكو ؟

قلت له : علمنا : بيروم قاللى : شوف ،

الميماتم فى الأزقة ملطعه ،

أنا مش عايز كراسى صفوف صفوف

أنا .. صفوفلى حروف المطبعة !!

حديث تليفزيونى

سـيـدائى آنـسـائى سـادتى ...
ده حـديـث ، عن مشكلات الوحدةتى .
ياما قالوا فى السياسة وكرروا ،
ياما ناس فى الوحدة باتوا يفكروا ،
كلهم ، قالوا كلام جدا غلط !
ومحدث صح ، غير أنا فقط !
أنا عندى فكره ، لكن مدهشة ،
وكبيره ، ولذيـذه ، ومنعشة .
الطريقة يا شعوب يا عربية ،
انكم ماتلبسوش الجلابية .
لما كله يبقى لابس بنطلون
تبقي وحده من هناك لحد هون !



الحرب مش نزهة

الحرب مش نزهة ومش تفاريج
مش طبل أجوف يملا سمع الريح
الحرب لما تبقى حرب صحيح
معناها مـوت وألم ودم يسـيح
راجل لراجل .. مش بنات قنازيع
على كتفهم مدفع فشنتك صفيح
وشمال يمين يستعرضوا المفاضيح
وبرقصوا نهـودهم بشكل قبـيح
وبصـورهم مـأجورين سـناكـيح
سايقين بطل مصرى ف كرامته جريح
ويقولوا دول أسروه كـذب صريح !
ده كان فى يونيه اللى ماشافش قتال
ودخلنا فى اكتوبر رجال لرجال
"إرحم يا مصرى" بضم يقولم قال
وبحسوا الأندال دموع تماسيح !

دعاية انتخابية

آلوه .. آلوه .. يا أمم
تعالالى لالى يا محترم
الحمد لله ، أنكم
مما بتعرفونيش كلكم
لو كنستم عاوزين أسطوات
أنا أسطى سواق الفيئات
وإن كنتو عاوزين فلاحين
أنا عندى حبة فدادين
والا أنتو عاوزين يا ترى ،
مرشحة حاية مغنـدره ،
متبـدره ، ومتحمـدره ،
إذا كان كده ، فأنا (.....)



رد

الشارع قال للحارة :

إخيه ..

ريحتك طعميه ، وفول وبصارة ..

آيباه ..

كل بيوتك بغدادلى

مافيهاش تكيف

وبيبانك نازلة لتحت ، بدال ماهى طالعة لفوق ،

ولا حتى ليكى رصيف ،

ستاتك بلدى ، وليل ونهار ع العتبة

قاعدين كده جوق

رجالتك نكته وعجبه ،

ولا يعرفوا ذوق ،

وعيالك دول ،

نسانيس مقاصيف الرقبة ،

الحارة ردت رد ..

خلى الشارع ينسد !

روزنبرج

فى الرواية الأمريكية ... العصابة
تقتل اللى تخاف ليفتن للنيابة
الزعيم يأمر بسحبه جوه غابة
والرصاص يعمل عزومه للدبابه

أصله كان يعرف حاجات فوق اللزوم
والقتيل عمره ما ينطق أو يقوم !!

والعصابة الأمريكية العالمية ..
مش بتسرق ميه والا خمسميه
لأ .. دى بتقشط شعوب م الانسانية
والسلاح ذرة وقنابل ميكروبيية

واللى يفضح جرايمها بتقتل
زى روزنبرج ومراته إتتل

الوليفة يقتلوها والوليسف
لجل ما يموت السلام فوق الرصيف
السلام حلم الشعوب كابوس مخيف
للى يبييعوا السلاح قبل الرغبة

والقضاء فى الخدمة يا ايزنهور
كلهم فى إيدين فخامتكم كور

يحكموا حسب القانون وأنت القانون
اللى حاكم ع البلاد تصبح سجون
الدولار يملا المحافظ والبطون

والدموع تملا الحناجر والعيون

والسلوك يتوهجوا مرة في مرة
لجل ما تموت نفس كانت عايشة حرة

الشعوب مشيت حزينة في الشوارع
والمكن نام جنب عمال المصانع
لما وقفوا للحداد بعد الفضائع
اللى روزنبرج شافها وهو راجع

للعدم .. فى نهاية الفصل النهائى
م الرواية .. على كرسى كهربائى

كل قوة فى الطبيعة يقتلوبها
كهربا وذره وغيرهسا يبتلوبها
الشعوب فى كل يوم ويمثلوبها
والشعوب قوتها مخزونة ف قلوبها

للسنابل والمناجل والزهور
لما يفنى الظلم والمكن يدور

المكن حايدور وحايدور بانتظام
لجل ما الانسان يعيش حر بسلام
والسما حايسدها جيش الحمام
فوق أراضى مصر وجبال فيتنام

وف أميركا نفسها والناس تقول
إن روزنبرج عايش على طول

سلم التطور

فى البدء خالص ، كنا سردين فى البحور ،
لقيناها بايخه ف حقنا .

صرنا سحالى ، بجناحات زى الطيور ،
دايرين نلقط رزقنا ،
طحلب ودود ..

ودود وطحلب ، كل يوم ف بقنا ،
شىء مش تمام !

طب نبقى إيه ؟ ... قال لك : قرود !
أصبحنا يا مبارك ، قرود ..

برضك زهقنا ، وقلنا : لأ ، نبقى بشر
وبشر بقينا ، وايه بأه ؟ ،

أهو ليل نهار غلب وشقا ..
أين المفر ؟ !

أنا عندى حل معتبر
نبقى غجر !



فزورة

حزر فزرر .. واحد "مستر
يصحى من النوم وشه مزهر ،
يشرب "فيتامين" قبل ما يفطر
يفطر زبده ، وفينو مقمر ،
ومربه ، وبيض كذا محمر ،
ثم القهوة - لجل يعمر -
ثم لبانه ، ثم يعفر ،
ثم يقوم لكل كده يتمخطر ،
يكبش أوراق - لونها أخضر -
أكوام أكوام ، آخر منظر
يملا جيوبه ، ويمشى يفنجر ،
يركب "كاديلاك" طالعه تزمجر ،
يشرب "ويسكى" ملو الأنجر
ولا عنده هموم ، ولا متعمر
وف حضرتنا شمم بيفكر ،

وان جت سيره ، لا يتذكر ،
أصله ف نفسه ، ومش متبحر ،
ولا يعجبوش اللون لاسمير ،
غير فى البدلة - لما بيسهر -
... إنما خفه ، ودمه سكر ،
مين بقى هوه ؟ مش راح أفسر ،
واضح جداً حزر .. فزر



فى الجنة

أبريق ذهب

ومخده من ريش النعام ..
تشرب سيادتك ، تنجص آخر غرام ،
ترفع عينيك تلاقى منجه مدلدله ،
وفاكهه ياما ، متلتله
أصناف من اللى الكيلو مش عارف بكام ،
منجه ، وفراولة ، وموز ، وتفاح ياوله ،
وخوخ وبرقوق م التمام
البرتقان ويا العنب ،
فى غصن واحد .. يا سلام !
جلا جلا ، يا محترم جلا جلا
كل المور متسهلة
تطلب حواجب نمل ، والا قلوب دبب ،
تحضر ، بسرعة مذهلة ،
نا عليكش إلا بس تفضل تستهى ،
تطلب وتطلب فى حاجات لا تنتهى
كله يجاب ،
ماهى جنة طبعا يا مهاب ..
لكن مفيش غير بس شىء واحد وحيد
لو تطلبه ، لا يستجاب ..
أنك تعوز تخرج من السور الحديد

فى النادى

أولادى ،
كان نفسى يتشقلبوا فى الشمس قصادى ،
وينا قاعد كده ومبلم ، فى مكان هادى ،
ومراتى معاها شنطة ، وفيها شطائر
آكل ، وارمى الفتافيت للطائر
وف حجر مراتى دماغى تميل ،
أحام لى حلم جميل ،
حلم بتاع أيها بنى آدم عادى ..
عندى صاحب ، جن ،
تنه يزن ،
النادى .. النادى .. النادى ..
حادى بادى ، سيدى محمد البغدادى ،
وانضمينا لنادى

يا ولادى ..

فين انتم ؟ ويا أصحابنا يا دادى !

فين ماما ؟

فاتت م الناحيادى !

واللحظة فين ؟

مقدرش يا فندم ..

فيه واحد جنبى ، كان بنكير ، وتأمم ،

ومصمم ،

يتكلم ،

فى الوضع الاقصادى ! ..



في ايطاليا

في ايطاليا "فينوس" بتبيع "يونبون"

في ايطاليا "جوبيتر" سواق تكس

في ايطاليا "ابوللو" واقف جون

في ايطاليا ملايكة .. وفيها العكس

في ايطاليا مستودع تماثيل ..

مرممر ، وبرونوز ، وبشـريه ..

كونتات ، بارونات من أصل نبيل ،

ماشيين ، بملامسح أثريـة ..

أعاجيب في ايطاليا كثير تلحس

بس الأعجب ايه تتصور ؟

في ايطاليا كمان "ملطة اليزابيث"

بس الملكة اليزابيث تايلر !!



فى دمشق

الست مرات البيه

دوبت الجزمة عليه

قال ايه ..

مايقاش بيحيب طلباتها جميعا ليه ؟

اشمعى ايفون ،

اللى ف لبنان

جوزها أنطون

إدتها "نرواه مليون"

علشان

سيارة ، وشبشب ، وجونلة ، ويخت ، وسوتبان

والست مرات البيه التانى كمان ،

لسه مناقشتهم ، بالليل ، فى البلكون

سايبه العلامات الزرقا تحت عينه

واتلم البيه ع البيه ،

وهمس بالخطه اليه ،

عملوا المشروع ، ونهوا الموشوع ، بأمان ..

وتمرد قال فى دمشق ، وزيطه ، وشغل جنان

وزمان ..

قالها خواجه نابليون

يا حبيبى ضرورى ضرورى تفتش ع النسوان !

لاجئ

حابس ضناه بين ضلوعه
يابس وحايموت بجوعه
قاعده ما يعملش حاجة
لابس هـدوم مش بتوعه

لاجئ قابلته فى غربة
وليه عيون مش منيرة

راحت فلسطين وراحت
البيارات لما لاحت
على التلال المدافع
وريحة الحرب فاحت

وف الصوف الطويل
جرجير عياله النحيل

شبيع جنازة الوطن
لحد لما اندفن
والقاتل الوغد ساقه
قدامه من غير كفن

ميت وقسبره الخلال
والغسل سبيل الفلال

الرميل يسخن ويبرد

وهو هـايم مشرد
مع الطابور اللي رايسح
"لى المصير المجرد

وفى الطابور ألسف أسره
وخمسميت ألسف حسرة

حسرة عذارى حزانى
ع الخوخسه والبرتقانىسه
"لى الشباب لم قطفها
والموت خطفهم خوانه

يا ويل كعوبك يا لميا
الرملة لسعتها حاميه

الرميل ساخن بيكوى
خالد يبصرخ ويعوى
مجنون فى أول حياته
يحرق سماه إيش بسوى"

وتستمر الجنـازة
وللجبال اهتزازة

الحرب سحقت أملهم
ما صبح فى خيالهم
رى الرمـال بيخوضوها
رى الطحين اللي جالهم

من الإيدين السـمينة

اللى رمستهم رهينة

على الرمال كموهم

تحت السيول نيموهم

وكمموا معين بسيو

من بعد ما كموهم

عشان معين المناضل

بيقول يا ويلك يا قاتل

يا معين يا صوت الضحايا

إرعد بصوتك معايا

إرعب عدوى وعدوك

راح ننتصر فى النهاية

خلى اللى حابس دموعه

يبكى بفرحة رجوعه

للبيارات الحبيبة

بعد الرمال الرهيبة

أصرخ فى شعبك وقول له

ساعة خلاصك قريبة

انهض وكافح وطهر

البرققال يزهـر

وقال يا بلد

نعم .. بورسعيد الفكرة والبرهان ،
في لمعة عيونه من ميدان لميدان ،
في برق انفجار الصخر ، في مصنع انفتح ،
في طلقة صاروخ ، أو في ارتفاع بنيان ..

حي العرب صامد ! ..

علم العر صاعد ،

يايدين عرب خلان

وجمال ..

وجمال بيتكلم ،

ويصحى ، ويعلم ،

ويسلم الفتيتان ،

وطن ، مالوش غالب ،

مايميلش على جانب ،

ويبادى بالاحسان ..

وطن بلا صحرا ،

وطن بلا فقرا ،




وقال : يا بلد ، خليني واحد من العدد

قالت له البلد : ما في سواك ريان

وقال : يا بلد : عاهديني ع الصبر والجلد

قالت له البلد : كفك يا بو الشجعان!





احنا الشعب

إحنا الشعب

إحنا الشعب

اخترناك من قلب الشعب

يا فاتح باب الحرية

يا ريس يا كبير القلب

يا حلاوة الشعب وهوو ييهتف باسم حبيبته

مبروك ع الشعب خلاص السعد هيبقى نصيبه

واحنا اخترناك

وح نشي وراك

إحنا الشعب

إحنا حياتك وابتساماتك وانت حياتنا

إحنا بتفرح وأنت بتفرح من فرحتنا

كل مانكبير قلبك يكبر بمحبتنا

واحنا اخترناك وح نمشي وراك

إحنا الشعب

يا للى بتسهر لجل ماتظهر شمس هانا

إحنا جنودك إيدنا فى ايدك مصر أمانه

بكره وطنناح يصبح جنبه وانست معانا

واحنا اخترناك وح نمشى وراك

إحنا الشعب

يا للى واعدنا بأيام عيدنا هل هلالك

بكره يا بكره مشتاق نظره لسحر جمالك

بكره بطلنا بجهد عملنا يحيى آمالك

واحنا اخترناك

وح نمشى وراك

إحنا الشعب



يا أهلا بالمعارك

يا أهلا بالمعارك

يا بخت مين يشارك
بنارها نسا نسا تبارك
ونطلع مع منصـورين
ملايين الشعب تدق الكعب
تقول كلنا جاهزين
فايت ساعة الصبحية
والناس رايجين جاين
خطـوتهم فكـرتني
بأبـام ستة وخمسين
راجـع في المغربية
شـوفت عيون الثوار
نظـرتهم فكـرتني
بالظباط الأحرار
شـفت اجتماع سياسي
كلماته نغم حماسي
ولا فيش على أده كراسي
من كتر ما فيه ملايين
وف لحظة نطل .. ويهدى الكل
ونسـمع فرحـانين

الأعمال الكاملة للشاعر

عبدالناصر حبيبنا

قاييم بيننا يخاطبنا

نجاوبه ويجاوبنا

قائد ومجندين

قوول ما بدالك

إحنا رجالك

ودراعك السيمين

عبدالناصر يقول:

الله اكبر ويوم الازهر في وجداني
ياشعب قمنا لقهر الصعب من تاني
وعود ما عنديش ما فيش إلا النضال عندي
وشقا ومعارك مريرة كثير كثير يا أخواني
اطلب تلاقى ثلاثين مليون فدائي
في جميع الميادين

عبدالناصر يقول:

على كل باب في الميثاق مصباح يهدينا
نشوف جهادنا العظيم على فين مودينا

للأفراح ياناصر وللرفاهية يا ناصر

للأفراح وللرفاهية
اسمه في الإشتراكية
بس نضاعف إنتاجنا
ح نمد طريق ع النيل
التصنيع الثقيل
أضعاف أضعاف أضعاف

وندبر مهما احتاجنا ونحارب الإسراف
وبقرش الإدخار نتحدى الاستعمار
ونقيم جدار جبار يحمي حياة العاملين
وادي نقطة بنقطة جميع الخطاة

وبالله نستعين

يا أهلاً بالمعـارك
يا بخـت مـين يشـارك
بنار هـنا نسـتبارك
ونطلـع منـصـورين
ملايـم الشـعب
تـدق الكـعب
تقول كلنا جاهزين

خطتنا خلاص في إيدنا وخلص متشميرين
وحزين ياللي تعاندنا بتعانده جبارين

جبل الجرانيت انشق ، انشال
وفبحر النيل انزق ، آمال
ما في حاجة تقولنا لأ إيش حال
يوم تحريرنا فلسطين

والتوبة التوبة التوبة نصبر على غدارين
وحياة الدم الغالي وحياة عرق الجبين

توبة ماعاد فيها مجاملة ، خلاص
ولا عاد ماالثورة الشاملة ، مناص
يا إيدنا العاملة ازرعني إخلاص
واحصدي والرب يعين

احصدي وانقضي واكشفي وارفضي

خاينين وانتهـازين

حاشق طريقنا بنور مبادئنا

ولنا النصر المبين

يا أهـلا بالمعـشارك

يا بخت مين يشارك

بنارهنـا نـسـتبارك

ونطلع منـصـورين

ملايين الشعب

تـدق الكعـب

تقول كلنا جاهزين

خلي هديرك بنظام

عين العدو مش حاتنام

جه دورك في التاريخ

مصرف عصر الصواريخ

قال جه دوري مانيش هاب

يا بحر الثورة يا هادر

من صوت المكن الدابر

وانت يا شبابنا اتقدم

بإديك لازم تتقدم

وشبابنا نهض يا حباب

يسلم لي الشعر الشايب والناس المخلصين

للمخلصين .. ألف سلام !
الاشتراكيين .. الف سلام !
الحقيقيين .. الف سلام !
لجمال واخوانه .. الف سلام !
يحيى لأوطانه .. الف سلام !
وانا وانت وهو .. بخير وسلام !
ألف سلام .. ألف سلام
وسلام مننا ، لمنى قلبنا !
الوحدة .. الكبرى ..
ونعيش ونحقق مستقبلنا
ونقول: كلنا جاهزين

يا أهلاً بالمعـارك
يا بخت مـين يشـارك
بنارهمـا نـسـتـبارك
ونظـاع منـصـورين
ملايـين الشـعب
تـدق الكـعب
تقول كلنا جاهزين

أغنية إلى أسوان

أعمل لنا مفتاح يا صنايعي يا فلاح نفتح ببيان الخير
أسوان ملانه حديد انهض ومد الأيد ما تمدهاش الغير

أسوان بنت بنت بنت

المجد خاطبها

لهام معاد مثبوت

توفي حبايبها

أسوان نشوانة

وقلبها يسدق

بزنود عرفانة

بين الصخور بتشق

النيل ما بين أسوان وبين حلوان

سافر وغنى غنوة المصنع

آه يا سما يا مغيمة دخان

مطرك عنيد منه الحديد زرع

ده مش حديد فى النار

ده عزمنا الجبار

عدو لاسـ تعمار

ده مش حديد مصهور

ده شعبنا المنصور

يسـابق التـيار

بيطير كأنه شرار

يبعث سلام م القلب

وبـا حديد والصلب



أجازة فى البحر الأحمر

- يا بحر يا .. أحمر وبعيد ،
وجينالك أهه فى أجازة العيد ..
أتويسنا يزمر : ديد ديد ديد ،
فرحان بسالبحر الأحمر ! ..
- والبحر الأحمر
- مالـــه ؟
- سمك الفسقية
- جاله
- يفرح له شويه ..
- ومالهـــه ؟
- والبحر الأحمر ،
- أحمر ليهـــه ؟
- أكمـــه اتهنى ،
- وحسنى ايديه
- عينه سخنة وعيننا ..
- باردة عليه

- و"عناقفة" أهو راح له
- وحن إليه ،
- غسل رجليه ...
يا ترى يا جبل فيه بعدك إيه ،
فى طريق البحر الأحمر؟ ..

سمكايه ، لابسة هدموم العيد ،
وأشكال ، وألوان ، وجديد فى جديد ..
سبحانك يا فنان يا مجيد ،
كل ده فى البحر الأحمر؟
أهو كده أهو كده تبقى الأجازات ،
شطبنا وقفلنا الدوسيهات ،
وفتحنا القمصان والبلوزات ،
لنسيم البحر الأحمر ..
أهو كده أهو كده تبقى الأعياد ،
عَيِّدوا ، ولا تتقيدوا يا ولاد ،
الضحك ، ما هواش بالعداد ،
على شطل البحر الأحمر !! ..

أحکم یا شعب

أحکمم یا شعب
أحکمم یا شعب
وخذ بنفسك مكانك
الأمر صعب
والنهى صعب
إمسك بيدك ميزانك
أحکمم وقول
يا بلادي كوني سعيدة
عيشى فى أيام مجيدة
وأحکمم وقول
يا بلادي كوني سعيدة
عيشى فى أيام مجيدة
وأحکمم یا شعب
ابن الغيطان
أبو الغيطان
كان حانى عوده على العيدان
رفسع قوامه
وقال كلامه
سمعنا صوته فى البرلمان
وأنا أقول وأقول

ففي مجلس الأمة قلبي
هو اللي عارف مطالبي
واحكمم يا شعب
إيدين بتزرع وتصنع
وإيدين بتبني وترفع
رفعت أسامي أسامي
يا نايب الشعب يومك
في كلمتك كل قومك
اخطب ودافع وحامي
ورينا منك عجب
واحكمم على شمس بكره
تجمع ولاد العسرب
على كلمة واحدة وفكره
عيوننا طالسه عليك
وقلبننا نفسه يفرح
ورينا قوّة إيديك
واحكمم على الصخر يطرح
وواننا أشوف وأقول
ففي مجلس الأمة قلبي
هو اللي عارف مطالبي
واحكمم يا شعب

أغنية ولد صغير

ح اجرى كأنى فوق حصان
وح أطير كأنى بأجنحة
جميلة جدا الغيطان
والفسحة فيها مفرحة
لو كنت رسام كنت جيت
ومعايا شمنطة فيها زيت
ورسمت كل غيط وبيت
لو كنت شاعر كنت أقول
عن الجدول والحقول
قصيدة فيها ألف بيت
لو كنت ده او كنت ده
مش ح أفرح أكثر من كده
ما فيش لزوم أقول يا ريت
والنسمة يتمر بخنان
والشمس حلوة مصححة
جميلة جدا الغيطان
والفسحة فيها مفرحة

اسكندرانى

إسكندرانى إسكندرانى
عيونيه حلوه ومحيرانى
أنا هويتيه لما لقيتيه
عيونيه خضرا وهو اسمرانى
يا زمرد يا فاروز
يا بخت إلى يفوز
فزنا بنظرة عين
ودتنا على فين ؟
ودتنا كرموز
البحر هادى .. والا إيه ؟
باحاول أفهم من عينيه
النن لاخضر
يحكم ويقدر
وانا اللى مما اقدرش عليه
لاسكندرانى
بحر الحب عميق
كان شويه غريق

أنا خدني التيار
تعالالي يا بحار
لو فيك قلب رقيق
لو قلبك أخضر لون عينيك
لا أخاف عليا ولا عليك
وإن كنت قاسي
يامساح أقاسي
وانا اللي روحى بين إيدك
بياسكندرانى ..

آه يا أطبا

آه م اللي بيا

ضيعت قلبى فى اسكندرية
راحت هناوه البال من حياتى
ساعة ما سلط عينيه عليا
لما انشبت قلبى .. ومال
ما بقاش فى صدرى على الشمال
بس المحبة
مالهاش أطبا
يشفونى من جرح الجمال
لاسكندرانى ..

من الشباك

أنا هنا يا بن الحلال

لا عابزه جاه ولا كتر مال

باحلم بعش أملاه أنا

سعد وهنا

مليت لكل القلة

عطشان تعالى يا جميل يا الله

مليت لك الأبريق

عطشان تعالى والسلامة طريق

أنا ورا الشباك

سهرانه باستناك

علمت قلبي هواك

من قبل ما تجينى ولا اتملى

وان جتنى يا مهنى

ندرن عليا العين والننى

وان جيت تدق الباب

ندرن عليا القلب شيله حجاب



الأعمال الكاملة للشاعر

فرشت لك رمشى
إخطر عليه وامشى
م الشوق ما بانامشى
باستنى .. حتى العمر مستنى

فى الغيب أنا شايفاك
قلبي انكشف عنه الحجاب ولقاك
فى الغيب أن شفتك
قلبي شاورلى عليك وعرفتك
أنت اسمراني جميل
لك غيه فى المواويل
والقلب لك بيميل
من قبل ما يكون لى نصيب وياك
وأنا هنا ...



أغنية هزار

كم أحسن "رتسينا" ، واسقينا ،

يا خبيبي يا بارمان ...

كرياكو "بيخب" كاتينا " ،

و "اسالورو" زعلان ...

أنا لازم ييجي سكران طينه ،

كلمتوا عربي يا أخينا ،

أنا عمري ما سافرتو " أتينا " ،

ولا رختوا اليونان



الله معك

يا صابر الصبر الجميل الله معك
ما أروعك يا شعبنا ما أشجعك
جرحك فلسطين يوجعك تزداد وجود
وتحول الأحزان بارود في مصنعك
والله معك .. الله معك .. الله معك

دلوقت في البساتين أوان عطور الزهور
لهفى عليه هناك مقيش من عشقه
إحننا ورا الأشواك وسبعين ألف سور
والعطر ما يرضى يسوانا ينشقه

تطلع زهور البرتقان
تشبه عيون فتیان عرب
تبص للأرض بحنان
وتبص للجاني بغضب

يفضب نسيم البحر والأمواج ثور
يا شعب يا منصور تعالى بمدفك
الله معك .. الله معك .. الله معك

يا أرضنا المسجونة سجنك راح يزول
شعبك على الأبواب مسلح بالأمل
كلمة فلسطين زى دقات الطبول

بتدوى وتحمس وتدفع للعمل
راجعين بقوة السلاح
راجعين في بحر من السدما
راجعين كما رجع الصباح
من بعد ليله معتمه
راجعين سيول .. من الصحارى للسهول
زي الرسول يا شعب نازل ينفعك
الله معك .. الله معك .. الله معك

يافا .. وشباك انفتح يوم الرجوع
طلوا من الشباك جميع أهل الوطن
احنا هنا يا شمس يا طير يا ربوع
عدنا وخذنا التار من عار الزمن

ده حلم .. لكن له معاد
شعب العروبة يحققه
وعدونا لسوزاد وعداد
قوة سلاحنا تسحقه

الفجر طالع من يحوشه من الطلوع
ويا شعب يا ممنوع يا ويل من يمنعك
الله معك .. الله معك .. الله معك

أغنية البنت أم صغيرة

آه .. بدك تعمل حيلة وتاخذ قلبي ؟

آه .. قلبي قليل الحيلة يانا يا غلبي

دنيا الحب كبيرة

وانا لسه بصغيرة

وان حسيت بالحيرة

آه يانا يا غلبي

أمي قالت لي : حسك عينك .. قلبك إوعيله

ضمي على قلبك دراعينك .. لا الحب يجيله

مرت نسمة قوية شوية

فيها قسوة على حنية

أعمل إيه فيك أنت وهيا

ده أنا متوصية

لا اكلم حد

هزار ولا جد

وطول السكة أمشي بمد

فاهم ؟

آه....

قلبي اندارى وقال أنا خايف .. أمشى الناحيادى

والناحيادى لمحت شفايف .. تهم وتتادى

تبكى تنهد وتغنى

وتقول لى كلام أكبر منى

لا فيه ولا كلمة تطمننى

تبعد عنى

لا تبسم

ولا تسلم

لا أحبك وارجع انألم

فاهم ؟

آه ...

بدك تعمل حيلة .. وتأخذ قلبي ؟



أغنية للقطن

يا معجباني يا أبيض يا معجباني
يا قطن يا للى مبيض وش الغيطاني
يا معجباني يا ابيض يسعد صباحك
يا قطن يا للى مبيض وش فلاحك
وبعوده الأيام يا حبايب قى سلام
وبلدنا عروشة لابسه التوب أبيضاني
يا معجباني يا أبيض يا معجباني
سهروا الجدعان ليالى على المراوى
مواويلهم والليالى تسقى التقاوى
كل الغناوى فيها طيب مداوى
والزرعة لم يجبهها كاني والاماني
فى عينين كل الناس .. يقفوا لك حراس
يا قطن لما تنور على العيداني
يا معجباني يا ابيض يا معجباني
الحلوة القطن نور ما بين أيديها
والسعد قمر مصور قايل عليها

شددت حزامها ورنست بخالخاليتها
جنت المحصول وغنت أحلى الأغاني
قطن يا قطن يا قطن .. تعال لي بالحضن
ولا احطك غير في عبي من فيض حناني
يا معجباني يا ابيض يا معجباني



اتنين

اتنين ولا قبلنا
ولا بعد منا اتنين
فمن زى حبي أنا
وزى حبيك فمين
اتنين ولا قبلنا
ولا بعد منا اتنين

اتنين روحين هيمانين
قلبين وشققايق
تفوت علينا السنين
وكانهمما دققايق
لايق علينا الهنا
وكانه توب عبايق
ولا فى القصص والغنا
فيه زينا حبيبين
اتنين ولا قبلنا
ولا بعد منا اتنين

قالوا ما فيش الهوى

لكن احنا قلنا : فيہ
يا ناس شو فونا سوا
رح تعرفوا معانيہ
الحبيب ده سرنا
لكن ولا نخبيہ
أهه أهه جنبنا
لا نخاف حسد ولا عين

اتنين ولا قبلنا
ولا بعد منا اتنين



باحب السلام

باحب السلام
باحبه .. كأنه وليدى
وباصحى وانام
وغصن الزيتون ملو إيدى
وقلبي مناه
ما يبقى على الأرض شر
باحب الحياة
باحب جميع البشر

باحب السلام وباحبك يا شابه
وباحلم كـتير بحياتنا سسوا
لكين فيه سحابة على الدنيا هابه
مانقدرش منها نشم الهوا
ولو قلنا بكره
مانعرفش بكره ح بجراننا ايه
وياما ح يجرى
ما دام فيه خطر واحنا ساكتين عليه
تعالوا يا كل الشعوب قربوا
تعالوا نقف صف واحد منيع
عشان الربيع ..
عشان شابه حلوة بيعشقها شاب
عشان يبقى للطفل أب
عشان يبقى للأم طفل رضيع

بالأحضان

بالأحضان .. بالأحضان .. بالأحضان
بالأحضان يا بلادنا يا حلوة بالأحضان ،
ففى معادك ، يتلموا ولادك ،
يا بلادمنسا ، وتعود أعيادك ،
والغاييب مسا يطسيقش بعادك ،
يرجع ياخسك بالأحضان
- بالأحضان يا حبيبتى يا أمى ،
يا بلادى يا غنيوه فدمى ،
على صدرك أرتاح من همى ،
وبأمرك أشعلها نيران
- ياماليفيت سواح متنرب ،
وأنادى بحبيبك متشرب ،
أبعد عنك ، قلبى يقرب ،
وبرفرف مع النيل عطشان
- ياماشفتك ع البعد عظيمه ،
يا بلادى يا حرة يا كريمه

وزعيمك خلاكى زعيمه ،
فى طريق الخير والعمران

اتقويت ورفعت السراس
وبكيت فرحة وشوق وحماس ،
وبكيت ماشى ف وسط الناس ،
متباهى بـ وطمى فرحان ...
بالأحضان يا مصانع .. يا مزارع ...
بالأحضان ...

يا حصاد الصورة يا حلم وعلم ...
بالأحضان يا جنائين .. يا مداين
بالأحضان ...

باللى أنت بترفع راية السلم ...
نور عينى وحبائى ،
وعزاز قوى على قلبى ،
باللى على الجرار ، وقصاد لهاليب الصلب
يا سواعد عربية ،
ونفوس حره أبه ،
يحميكم ، وتدوم الهمة ، ويحيا الشعب !
وبالأحضان ! ...

بستان الاشتراكية

افتح .. افتح ..
اقفل .. حول ..
نقعد نرتاح ؟ ..
لأ ، ح تكمل ،
ده السد العالى ، شهل ..

- على راس بستان الاشتراكية ،
واقفين بنهنذرع الميه ،
اممة أبطال ، علمنا ، وعمسال ،
ومعانا جمسال :
بنغنى غنوة فرايحيه
نده كلنا ، ندهه فلاح لأخواته ، ساعة الرى .
حاكم أرضنا ملكنا كلنا م السد العالى وجى
ننسهه كلنا ندهه قويه

افتح ...

- افتح ، على حوض والورد ، أبو تمانين مليون شجرايه
الورد العربى ، ورد السهل ، وورد الصحرايه
أهو كده ، وافتح صفحة ما تشبع فيها الدنيا قرايه
يا فاتح فى الصخر ده للجيل ، ويا النيل ، مجرايه

- اقفل ...

- واقفل ع الحيرة السيرة وهات شربات لكل

اقفل عينك، وافتحها، تلاقى الشوك بقى فل
وزهور ليمون، صابحه ف يافا بتضحك وتطل .
تقول : افتح صندوق العيد ، وادى الحلوة مرايه

موال

"يا حلم ، يا حلم ، يا ابو الليل ، يا متزوق .
ليلك سهرماه ، ونورناه .. بالمبدأ ،
فيه ناس تقول فى الصباح : حلمنا والله خير
واحنا ، الصباح بيحى يلقي الحلم متحقق ...

- حول ...

- حول ، وافرش مندليك لأخضر ، ع الرمله ،
حولها جداول ، ومعامل ، وحياه كامله ،
حولنا ، وطولنا أملنا بإيدنا العامله
حول على فوق ، زى السد ما طالع على فوق ،
الخير بيحيب الخير ، والفرحه دى كانت شوق
الشعب العربى رمى قيوده ، وخرج م الطوق ،
طالع ، طالع للقمه ، وبيزرع فيها الرايه ،
قولوا ورايا ..

- افتح .. افتح ...

اقفل .. حول ..

نقعد نرتاح ؟ ..

لأ ، ح تكمل ! ..

ح تكمل ! ..

البيانولا

أنا ديت وجزمتى نعلها داب
من كتر التدويرع الأجاب
يا سلملم لو أعترفى حبيب
ده أنا أرقص من كتر الإعجاب
كدههه ! كدههه كدههه !

أنا قلبى مزيكه بمفاتيح
من لمسه يغنى لك تفاريج
مع إنى ما فطرتش وجعان
ومعذب ومتيم وجريح
باننطط وانعفرت واترقص كدهه
كدههه ! كدههه ! كدههه !

بيانولا وألابنضه وحركات
أطلعى بقى يا نصاص يا فرنكات
أنا عازمك يا حبيبي لما الايك
على فسحة فى جميع الطرقات
نننطط ننعفرت نترقص كدهه
كدههه ! كدههه ! كدههه !

توسيع القنال

نداء :	أنت مين .. ؟
	ابن ابنه .. يعنى حفيده
نداء :	هو مين .. ؟
	اللى حفرها بإيده
نداء :	وجمال .. ؟
	أممها .. أممها .. أممها
مجموعة :	وسع يا جدع وسع للشبان المجدع وسع يا جدع وسع ده قنالنا بيتوسع الريس قال يالله كل الشعب اتطوع قوم .. شيل .. هات .. خد .. إرفع
تتابع :	علمك .. خدمك .. إدفع دينك .. فينك .. إطلع مجدك .. بلدك .. إنفع وسع يا جدع وسع للشبان المجدع

المجموع

ياما

المفرد

ياما ياما ياما

یاما	یاما یاما ویاما
یاما	مسین عنده شهامة
یاما	مسین عنده کرامته
یاما	کام نفسرا تطوع
یاما	کام قلب مولع
یاما	کام ایسه بتوسع
یاما	قیه کام عین شایفه
یاما	من حمص لحیفا
یاما	یاما یاما ویاما
یاما	یاما بکوره نفرح
یاما	والشجرة ح تطرح
یاما	والأملح ح تصبح
یاما	والخسیر ح یجینا
یاما	علی کمل سفینه
یاما	یاما یاما ویاما
یاما	بنحسب دراغنا
یاما	الللی بینفنا
یاما	ونقول وسعنا
یاما	غلا یسین ح تعدی
یاما	وتجیب وتودی
یاما	یاما یاما ویاما

الدينا ...

هــيـلا هـيـلا ،
ع النبي صلى ،
علي كتفي ،
هـنات وحملتي ،
علي رأسي ،
هـنات وكملتي ،
علي زندي ،
هـنات وتلتلتي ،

هـيلا هوبه ،
يالله يا خلي
الدينا
حلو ، وتملتي
لابسـالي
توب حريـر تـلتي
واخطبها ...
تجـري وتـولي
خزيانـه
والاعثمـالي ،

يا لمـونى

يا اللـى متسدلى ،

راح أطولـك ،

وأنـت متعلـى ،

هـيـلا هـيـلا ،

قـايـم باشـيـلة ،

وحـمـى ولى ...

أردب وكيـلـه ،

هـيـلا هـيـلا ،

عـن غـير هـيـلـه ،

فـى المـلـقـه ،

عـن غـير ضـلـيلـه ،

هـيـلا هـيـلا ،

ع النبـى صـلى

يـا صـديـقى ،

والنبـى قـولـى

أنـى ماشـى ،

والا فـى محـلى ؟

شوف

شوف ...

لا تقول مقدر ومكتوب
ولا تشتكى مر كاسك
عقللى فى راسك يا جوب
هو اللى يعرف خلاصك

شوف ...

أيام وعشناها بالعرض
وكله مردود الينا
ما فى خطوة نمشها فى الارض
الا وتمنهننا علينا

شوف ...

ما حد يعمل عمل خير
إلا ويلقاه بذاتيه
ولا شر بيمر من غير
ما صاحبه ياخذ جزائه

شوف ...

الشر والخير فرستين
طايرين يسابقهم بهمة
روح قل لهم هما لاتنين
الموت فى آخر المتممة

عصفورة

أنا زى ما أكون عصفورة وعاوزه تطير
واقفه وخايفه على جناحها
م الهوا لما يطوحها
والهوا طول عمره بينده للعصافير
وانا اما هواك نده
رديت باللحن ده
أوصيك .. أوصيك بيا

أنا شفت عيون حلوه ومتبسمة
أتارها عيون قادرة ومتحكمة
يا حبيبى أمانة عليك قلبى وروحى
ده أنا لسه يا دوب على أول سلمه
وحياة ما سحرتنى
وف يوم غيرتنى
أوصيك ...
أوصيك بيا

الأعمال الكاملة للشاعر

إعمل لي الحب جنيحة وفسحني
م الفجر اقطف لي الورد وفرحني
وان قلت كفاية الشمس خلاص غابت
والنبي نور لي السكة وروحني

يا بدر في السما

عمر ما قلبي اترمي

----+أوصيك ...

أوصيك يا .





أغنية : أحب الخيال

بنتى

أحب الخيال والكلام الخيالى
ولو كان جنونى ولو كان تسالى
عرفت الحقيقة ودقت الحقيقة
لعتت الحقيقة ما هياش مجالى
أنا صاحبتى شهزاد الليالى
لكن بنت خالى؟ دى فوق احتمالى
وما يهنش اللي ساكن قصادنا
أنا بيهنى أبوزيد الهلالى
أحب الخيال

سحابة بترقص باليه فى العلالى
تشد اهتمامى وتشغل لى ببالى
وأما الصخور اللي ماشية عليها
بتجرحنى لكن أنا لا أببالى

أحل الخيال

مفيش حد فى الدنيا غير لما جالى
وأنا واحدة مقتصرة دايم فى حالى
بتصدمنى أحلامهم الدينوية
ما حبش كده أنا طبعى مثالى

أحب الخيال

أنا مهما يحصل ومهما جالى
ح احب الحاجات الللى متياللى
ح احب الللى يقدر يصحها فى
ح احبه ح احبه عشان مكتوبة لى

أحب الخيال



دويتو : الشارع

- نيلى : أنت مودينى فين ؟
ثروت : مش بتحبى الجيلاتى
نيلى : وأنت تعرفنة مينين ؟
ثروت : ح افهمك يا حياتى
نيلى : فهمنى
ثروت : عدى الشارع
نيلى : طب نستنى الاشارة
النور الأحمر والع
ثروت : لكن ضربوا الصفارة
ياالله نجرى
نيلى : سيب إيدى
ثروت : لا تصدمك عربية
نيلى : شىء ما يهملكش يا سيدى
ثروت : لأ ده انتى غاليه عليا
من أول لحظة رأيتك
حسيت إنى حسيتك
كنت بادور عليكى
وما صدقت أنى لقينتك

- نيلى : احنا ف وسط المرور
ثروت : ده تيار الحياة
نيلى : ح تغرق يا مغرور
ثروت : وانتي طوق النجاة
نيلى : أما انت شخص غريب
عمرى ما صادفت مثالك
نازل فى تعذيب
مش عارفة ليه ساكنة لك
ثروت : أنتى اللى مضطهدانى
برموشك الطويلة
ومزودة أشجاني
بعيونك الجميلة
نيلى : وده وقته .. استنى استنى
العربيات عاجمين
ثروت : ح يخافوا ويبعدوا عنا
نيلى : وهم دول شايفين ؟
حاسب تاكسى .. حاسب ..
أوتوبيس .. عربية جيش ..
حاسب واحد راكب

على عجلة وشايل عيش

ثروت : دلوقت الشارع يهدا
خلينا كده واقفين
فى النص فى حنة واحدة
لا شمال نمشى ولا يمين

نبيللى : ودى ورطة إيه با خواتى ؟
أنا ذنبى بس إيه
إنى أخاطر بحياتى
واسمع كلامك ليه
"صفارة"

نبيللى : بقيت الإشارة خضرة
ثروت : وخلص الخطر أهه زال
نبيللى : أما حنة مغامرة
ثروت : ما كانت لناش ع البال

نبيللى : أنت مودينى فىن ؟
ثروت : مش بتحبى الجيلاتى ؟
نبيللى : وأنت تعرفنى منين ؟
ثروت : ح افهمك يا حياتى
نبيللى : فهمنى !!!

أحلى كلام

أحلى كلام

اللى الشفايف يقولوه من غير كلام
فى البوسة والكلام يتوه .. ولا ملام
بوسة منى للحياة
بوسة من قلبى وهناه
للسما والأرض وحببى الجميل
ولكل شىء صنعته الإله
بوسة بتقول ياسلام

أحلى كلام

بوسة من قلب انفطر
وانبدر طرح شجر
كل أزهاره شفايف دايبه دوب
فى بوسة من نور القمر
بوسة بتقول ياسلام

أحلى كلام

بوسة منى لجننا
من شفايف قلبنا
من شفايف روحنا بنبوس الأمل
يوم اللقاء .. يوم المنى
بوسة بتقول ياسلام

أحلى كلام

توت توت

قطر الفجریة عدى

وأنا لسه ع المخدة

فى منامى .. شفت الواد ده

ما ليلى يامه طاقتو توت

وتوت وتوت وتوت وتوت

قطر الفجریة عدى

قطر الفجریة عدى

جانى الحليوة وشفته

نادى عليها عرفته

من غير كسوف حلفته

تملى فى المنام يفسوت

وتوت وتوت وتوت وتوت

قطر الفجریة عدى

ليه يا امه صحتى

ليه عنده فرقتينى

معلشى بكره يجينى

ويدور شربانا ع البيوت

وتوت وتوت وتوت وتوت

قطر الفجریة عدى

خضرة

عايزينها تبقى خضرة
الأرض اللي فى الصحرا
وتقدمها لمصر هدية
حاجة جميلة ومعتبرة

هى إيه ؟

الصحرا

تبقى إيه ؟

خضرة

علشان إيه ؟

علشان مصر بلدنا الغالية

نسقى شبابنا للشجرة

تبقى خضرة

خضرة .. خضرة .. خضرة ..

بس لا يمكن نستنى

وتقول أماح ابقى جنة

بأيدين أصحابى الحلوين

النهها .. المتعلمين

لأحلامنا أكبر منا

الصحرا بتنادى علينا

وتقول أناح ابقى بساتين

بأيدين الشاب مع الشابة

وأحسن من كده إيه عايزين ؟

عايزينها تبقى خضرة

صلاح جاهين

يا شاطر وأنتى يا شاطرة
شمروا يا الله ويا الله معانا
مصر قليل فيها المطرة
مجهود إنسانى يا شباب
نحفر بير نحفر عشرة
ومعانا عزيمة جبارة
فى إيدنا موش راح يتجاب
تستاهل كل الإعجاب

وأحسن من كده إيه عايزين ؟

عايزينها تبقى خضرة

الرمال الأصفر عطشان
وأما نجيب له الميه الحلوة
طالب يشرب يا فتيات
ومفيش حاجة بالساھر
تتمايل فيع العيدان
وكفاحنا يوصل لنجاحنا
لكن مطلبنا عادل
ويفرحنا فرح هايل

وأحسن من كده إيه عايزين ؟

عايزينها تبقى خضرة

وسع يا صاحبى وسع
حقق ذاتك شوف قدراتك
والا تعالى واتطوع
والصحرا تخضر معاك
ح تلاقى عملك ينفع
وتشكر على إخلاصك
وبلادك كلها شايفاك
والمستقبل يمشى وراك

وأحسن من كده إيه عايزين ؟

عايزينها تبقى خضرة

لحن العيد

عيد وبشايره مالية الكون : الجميع

عيد فى الطعم وعيد فى اللون

عيد والفرحة هالة علينا

م الشباك ومن البلكون

عيد يا حبيبي عيد سعيد

افتح قلبك من جديد : نيللى

يحيا الحب ويحيا القرب

وتحيا الدنيا ويحيا العيد

يحيا الأطفال والبالون

عيد وبشايره مالية الكون الخ : الجميع

يا للى عيونك مهرجان : ثروت

أنا متوغشوش م الحنان

خايف لا يكون عيد ومعدي

ورمالي هدية إحسان

وأنا واحد من كذا مليون

لأ ما تخافشى كون الشجاع : الجميع

وامشى جنبكى بان دفاع : نيللى

ح ندوب فى العيد

زى السكر وعلينا شوية نعناع

نقى فى الحفظ وفى الصون ...

عيد وبشايره مالية الكون ... الخ : الجميع

- ثروت : الحريفة يا ابتسام أنا باعشقها
والسلام
العيد الجبار محاصرني
وأنا على وشك الاستسلام
وف ورطة ومحتاج للعون ...
الجميع : عيد وبشايره مالية الكون ... إلخ
نيلى : ونتسابق تحس البيت
نشتري غزل بنات وفريسكا
وحرب إيطاليا وبمب يا ريت
والابلاش خليه بونبون ...
الجميع : عيد وبشايره مالية الكون ... إلخ
ثروت : بعد العيد واجازته الحلوة
ألقى قفص وحرس ونظام
وولد بيدقوا له الهون
نيلى : كل مناسبة وأنت بخير
وانتى وأنا والدينا بخير
ثروت : كل اللي بينتهى على خير
نيلى : خير !!! بنعيد على كل الكون
بنعيد على كون الكون
ثروت : لابسين لبس جميل اللون
معاً : وبنحذف للناس الحلوى
م الشياك ومن البلكون
وأولهم المأذون !

زنقة الستات

- الجميع : فى زنقة الستات يا لفندى
داخل بصفتك إليه ؟
هنا بس للجماليات يا لفندى
وحضرتك هنا ليسه ؟
- الأفندى : أنا فايت فى المنشية
شميست ريحة البارفان
واللسى جابتنى رجلىا
على هنا . . هل أنا غلطان ؟
- المجموعة : عــــداك العيب
ح اشــــترى حلقــــان
الأفندى : عــــداك العيب
المجموعة : وبخــــور ولبــــان
الأفندى : عــــداك العيب
المجموعة : وفيونكــــة ســــاتان
الأفندى : عــــداك العيب
المجموعة : لو جيت السوق أشترى صندوق
ودهب مدقوق هل أنا محقوق ؟
- المجموعة : لالا لالا لا يا لفندى
المجموعة : فى زنقة الستات يا لفندى
داخل بصفتك إليه ؟
هنا بس بجماليات يا لفندى
وحضرتك هنا ليسه ؟

- الأفندي : والذتي بصراحة قال لي
نقى عروسة يا مرزوق
جيت زى ماما ما شارزت لي
على هنا هل أنا محقوق ؟
المجموعة : عــــداك العيب
الأفندي : ح اشرى حلقــــان
المجموعة : عــــداك العيب
الأفندي : وبخــــور ولبــــان
المجموعة : عــــداك العيب
الأفندي : وفيونكــــة ســــتان
المجموعة : عــــداك العيب
الأفندي : لو جيت السوق أشرى صندوق
ودهب مدقوق هل أنا محقوق ؟
واحدة ست : يوه !! "وتدق صدرها"
دى طالب القرب يا كتاكيتو
تسلم لنا عينه وعفيتو
وبكره نستقصى على مهيتو
نلقاها يا حرام ألف جنيه
المجموعة : بــس ؟
طب فى زنقة الستات يا لفندي
داخل بصفتك إليه ؟
هنا بس للجملات يا لفندي
وحضرتك هنا ليسه ؟

ستات البلدي

الأولة لا ... والثانية لا والثالثة لا
والرابعة لع

لع لعل لعل لع لع لع
أنا زى ما جيت ح ارجع
يا وابور الساعة اتناشر
راجعنى يا بوى رجع
من ستات البلدي
أنا عجلي حلاص ودع

الأولة يا بوى

سنيورة يا بوى مطيورة

دايرة ع الدكاكين

مشغولة وشغلانتها شارع 26

حرانة ومخها سايح

م الوجفة ع البتارين

ولا حد استنفع منها

فى الدنيا ب ولا ملين

إلا بتوع الجلاطة

وبتوع الأسبارين



والثانية يا بوى مناخيرها
لفوج جال يعنى ذوات
الناس من طين وهى
من تين وبلح أمهات
والخراط اللي خرطها
خرط واتمدد مات
طلعت جاهلة الطعمية
وتقول إيه دا دا كرات ؟
ومامتها كانت بتبيعه
جبل ما تبني العمارات
والثالثة صبية حليوة
ويا بوى باربع عيون
وسط الرجالة راجل
إيه يعنى المؤطلون
نتكلم فى السياسة
والفلسفة والجانون
إنما أول ما تدخل
عند الحلاج فى صالون
تشجلب لك يا عيني
جارية ف حريم هارون
والرابعة يا بوى دى فتوة



الأعمال الكاملة للشاعر

وعيونها مكحلين

وعيونها ما يملهاش

عنتر ولا جيمس دين

تشرب مغات وتضرب

روسية وسكاكين

يا بهية وخبريني

ع اللي جتل يا سين

والله ما جتله إلا هي

نواره العطارين

الأولة واستنيني

يا ام الخير في الصعيد

والثانية اتلجفييني

عند السكة الحديد

والثالثة وحياة ديني

جايب لك توب جديد

والرابعة اتجوزيني

ما تهملينيش وحيد

ما تهملينيش لع لع

أنا زي ما جيت ح ارجع

من ستات البلد دي

أنا عجلي يا بوع ودع



عجائب

اللى يعيش يا ما راح يشوف
واللى يلف يشوف عجب
شفنا العجائب بالألوف
واحننا ما يعجبنا العجب
عاشق ونساره مشعلله
وعينه خجولة مسبلة
أول ما طال ابن الحلال
نى عهدنا وقطع الصلة
نفضنا من حبه الكفوف
من غير ندامة ولا عتب
واللى يعيش

" المذهب "

وصادفنا عنتر فى الرجال
تقل وجمال وجاه ومال
شعلنا فيه وشغلنا بيه

أتأريه جناحه مالوش مثال
ده القطن لو يوم يبقى صوف
عمر الصفيح ما يكون ذهب
واللى يعيش

" المذهب "

وأنت يا جى لنا هنا
ولهان وطالب قربنا
إيه الدليل إنك أصل
ما تخونش أبداً جنبنا
أصل اللى آمن للظروف
يرجع يقول أنا السبب
واللى يعيش



فرقة عزت الآلاتى

يا اللى تحب الفن وعاوى
خد تذكرتك وادخل شوف
فرقة عزت الآلاتى
أستاذ الفن الفيلسوف
على كيفك روايات تراجيديا
تخرج تعصر فى المناديل
وتاريخى وعصرى وكوميديا
ومواعظ ما لهمش مثيل
وأغاني أماني وحب
وبسات ترقص هيلاهوب
ومنماظر حاجة جميلة
ولمون برساغ الشوب
يساللى تحب الفن
تعا شوف عنتر تعا شوف عبلة
شوف قصة روميو وجولييت
روايات صيتها زى الطلبة
وخصوصا صنف الأوبريست
مسرح مطرح ما يحط
الفن يقط يقط
اتفضيل خشش اتفرج
شوف لعب الفار والقط
اللى تحب الفن

كلبى

كلبى كلبى يا حبيب قلبى
تمشى ورايا وتعد جنبى
تعد هادى وتنام هادى
سارح فى الأحلام البمبى
لكن لما تلاقى فراشة
حوالين شجرة دقن الباشا
تعمل نفسك وحش الشاشة
وتزقق وتقول هو هو
يا فراشة انزلى فى التو
يا إما أطلع لك فى الجو
هو

دمك شربات يا كلب
لكن مرة حلمت بقطعة
جوه خيالك راحت ناطة
نطيت أنت حتة نطة
وقعدت تزمجر وتقول

قطعة فى عقلى موش معقول
وكمان ليها ست ديول؟
أما أنت ظريف يا كلبى
تسمع صوت الصحن يا افندم
على طسول تتلفت وتشمشم
أكلسك حالا راح يتقدم
بقى ضرورى تقول هو هو
ده موش أكل البسبس نو
ده أكسل السبع العوعو
لأ سبع صحيح يا كلبى
بس ارميلك كورة بعيدة
تجرى وراها بسرعة شديدة
متخيلها صبيدة عنيدة



كلام الليل

كلام الليل كده
جميل زى الندى
بيجى النهار ويروح
ما يعود إلا صدى
كلام الليل كله

الليل نجومه كلام
لولى ودهب يا سلام
ونسيمه همس غرام
والبدر سلطانة

الليل نجومه وعود
يا هنيا للموعود
والصبح كل العهود
ما كأنهم كانوا

الليل نجومه سطور
بيننا وبينه بحور
أول ما يجى النور
تهدد عمدانه

وينادي كروانه

كلام الليل كده

كلام الليل كده

جميل ذي الندى

يجي النهار ويروح

ما يعود إلا صدى



فيلسوف

أنا راجل فيلسوف
أفكارى بالألوف
كان ممكن أبقى حاجة
لكن بس الظروف

باكتب مذكراتى
صفحات كتير يومياتى
اسمع يا عم وشوف :

جالى النهاردة واحد
شبهه اليمين بيرقص
ساعتين ونص قاعد
ياكل فى فول وحمص
سألته أى خدمة
مأمأ زى الخروف
وقال ما هو أنت تعرف
لو كنت فيلسوف

ده راجل موش بي فهم
ده راجل موش تمام
ده راجل موش كويس
اتفرج يا سلام :

وقفت أشرب سيجارة
قام صاحب الشغل سألنى
نדה لى فى الإدارة
قال إيه يعنى اكتشفنى
خصم لى يوم وقال لى
بلسان زى الجاروف
اوعى الفلوس تهملك
لو كنت فليسوف

ده راجل موش بيْفهم
ده راجل موش تمام
ده راجل موش كويس
اتفرج ياسلام :

سرحت العصبيرة
أتمشى ع الخريطة
لقيت راجل بذرة
عامل لى زمبليطة
حذفها فوق دماغى
خلانى بقيت سفوف
وقال لى موت بسرعة
لو كنت فليسوف

الصبح دق الباب

الصبح دق الباب
أفتح .. ألقى جواب
مشوك في صحبة ورد يسأل
ويشرح الأسباب ..
ليه الغياب
ايه العذاب
من غير عتاب
رقصت م الفرحة
أصل الهوى غلاب

من قبل ده المرسال ..
مريست على أهسواك ..
وبقيت حالي حال

خاف الضلام منه

حيرانة مالي دليل
صابرة وصبرى قليل ..
عشان حبيبي جميل

وماليش غنى عنه

ملا عليا حياتي ..
وبقيت باشوفه يوماتي
وفجأة فجأة أختفى ..
إيه اللي جرى يا خواتي ..

لكن أقول الحق ..
يا ضنايا قلبك رق ..
والخير سبق .. والباب .. دق

الصبح دق الباب ..
أفتح ألقى جواب .. إلخ.

جانى ملانى حنان ..
وحنين ولهفة كمان ..
ورد ف ورق سـلوفان ..

أبيض على بمبى

الأبيض يقولى سماح
يواعدنى بالأفراح ..
والبمبى خدنى وراح ..

لحبيبى روح قلبى

الأعمال الكاملة للشاعر

أقول له أوعك تانى ..
تكون سبب أحزاني ..
ده أنا شفت يوم ما انساهوش ..
غلبنى موت . آه يانى ..

لكن أقول الحق
يا ضنايا قلبك رقى
والخير سيق .. والباب .. دق

الصبح دق الباب ..
أفتح .. ألقى جواب ..
مشبوك فى صحبة ورد يسأل ..
وبيشرح الأسباب ..
ليه الغياب ..
ليه العذاب ..
من غير عتاب ..
رقصت م الفرحة ..
أصل الهوى غلاب



صباح الخير يا مولاتى

أطفال : يا ماما .. يا أمه .. يا ماتي
كورال : سلاماتى .. احتراماتى .. قبلاتى
صولو : صباح الخير يا مولاتى
يا ماما .. يا أمه .. يا ماتي
أبوس الإيد وقلبي سعيد
يا أول حب فى حياتى
يا أمى

علشانك النهاردة
الدينا كانت معايدة
ملا الربيع أركانها
بمليون ألف وردة
والكون بقى جوة بيتك
وأنا قبل الكل جيتك
يساللى انتهيت لقيتك
أنا وأنتى حاجة واحدة
تحبينى .. وأنا .. أحبك
وأعيش بالقرب من قلبك
عيونى معجبة بكى

وروحى كلها ليكى ...
وتفضل تقول لك تقولك
ودايما وأبدأ ح أقول لك
صباح الخير يا مولاتى ..
يا .. إلخ

بساغنى للأمومة
ولليد الخدومة
وأقول الله يا أمى
ع الـدفاء والنعمومة
يا ست يا فدائية
ياللى قضيتها هى :
تجعل حياتى هنية
ولو تبات مهمومة
تعبتى كثير عشان خاطر
عشان أمشى عشان أجرى
ولما جريت بعيد خالص
فى عيدك جيت وفيت ندرى ..
أضمك بفرحة وأقول لك

صباح الخير يا مولاتي
يا .. إلخ

ما انشاش الابتسامة
ومش ح انسى يا ماما
الشخطة اللي تعلم
وما تهينش الكرامة
علمتيني المعاني
والصبرع الأماني
والضحك والأغاني
وكلمتيني يا ماما
باحيكي .. واهنيكي
وأقول يارب يحميكي
وكل ما اشوف أمل وحياة
أشوف صورتك وأناديكي ..
يا ماما يا أمه يا اماتي
صباح الخير يا مولاتي

دويتو : البحر والصحراء

- لأبقى بجد .. ما الذى
لك فى البحر من وطر
فكرة البحر موش قوى
وخصوصاً إذا غدر

- البحر يا روح قلبى
شاعر يقول عجبى
أوقات بيكون عصبى
ثم يصفوا ويعتذر

- البحر مالهدش أمان
بيطرطش ع الفستان
وف قلبه سمك بسنان
ياكل الصلب والحجر

- يعنى الصحرا هيا
اللى أمان يا عينيا ؟
دى زوابع رملية
وسراب يخدع النظر

- الصحرا أصح مكان
جوها يشبه حلوان
وقمرها لما بيان
النسيم يعشق السهر

- البحر يا بنت الناس
مزيكة وشوق وحماس
ومساحته تلات تخماس
كوكب الأرض والبشر

- بحر وصحرة إيه ؟ خلينا
قاعدين شوا بقلوب صافية
موش معقول نخسر بعضينا
عشان حبة جفرا فيا



أغاني مسلسل "رصاصه فى القلب"

مقدمة الحلقات

رصاصه (طو)

فى القلب جريمة غامضة

رصاصه (طو)

فى القلب مدينة فوضى

رصاصه (طو)

فى القلب رصاصه فضة

رصاصه ملبن

لذيذة جداً

رصاصه الحب

فالحب عبارة عن :

رصاصه فى القلب

الحلوة بيضة بيضة

هشام :

فتكت بيا

والحلوة يا واقعة بيضة

ابتسام :

عقلة شوية

الحب جنون فى جنون

هشام :

وعيونك أحلى عيون

أنا مغرم أنا مفتون

حاسبي عليا

ابتسام : طب ابعده عن عيوني

لا السلاح يطول

هشام : اللي يحصل يا عيوني

خليه يحصل

ابتسام : ذنك على جنبك (طو)

أدى واحدة في حاجبك (طو)

وآدى واحدة في قلبك (طو)

هشام : آهو كده أجمل

هب اخشوشني

ياالله ونشني

محللا رموشك

لما تنشني .. برصاصة الحب

ابتسام وهشام والمجموعة بالتبادل :

رصاصه (طو)

في القلب رصاصه ناعمة

رصاصه (طو)

في القلب يا روي طعمة

رصاصه (طو)

- رصاصة (طو)
رصاصُن ن ن ن
فى القلبى ى ى ى ى
نهاية الحلقات
وهكذا .. وهكذا
يحصل كذا وبعدين كذا
يحصل كذا وبعدين كذا
ورصاص عيونها منهمر
وف صدرى نازل غزغزة
أنا سامعة صوت عماليرن
يقولى ن ن ن ن
ده الحب ده ؟
لأ ده المطر
خليك يا بابا مطمئن
أصل الحاجات دى بتبتدى
بكهرباء يا سيدى
ثم انفجار
ورصاصة (طو) رصاصة (طو)
الكورال
رصاصــن ن ن ن
فى القلبى ى ى ى ى
- ابتسام :
ابتسام :
هشام :
ابتسام :
الأب :
هشام :
ابتسام :
هشام :
هشام :
ابتسام :
الكورال
ابتسام :
ابتسام :

ربنا

مين اللى كسور الكرة الأرضية ؟
مين اللى دورها كده بحنية ؟
مين اللى فى الفضا الكبير علقها
ما تقعش منها أى نقطة ميه ؟
مين اللى عمل البنى آدمين
مفكرين ومبـدعـين
مين اللى ادانا عقول وقلوب
وشفايف تسأل : هو مين ؟
مين اللى دايمما صاحى واخذ باله
وكلنا بنحبه ... جل جلاله ؟
ربنا

احنا بنحب ربنا وربنا بيحبنا
ويحبنا أكثر كمان لما نحب بعضنا

عمل الفراشة بأجنحة وزوقها
وكل فكرة مدهشة حققها
البحر حط له ملح لجل يعوم
وماسابش حاجة .. إلا لما خلقها
ربنا

مين لما بنطلب يسـمعنا

وف وقت الحزن يشجعنا
ولما بنفرح نشكر مين
على أنه بسطنا ومتعنا ؟
مين اللي قلبه علينا واحد واحد
وكلنا بنحبه ... هو الواحد
ربنا

احنا بنحب ربنا وربنا بيحبنا
ويحبنا أكثر كمان لما نحب بعضنا

سألتنى طفلة . قلت : هو ما بينا
موجود فى كل مكان ويبص لنا
يشوف بنسعد بعض والا لأه
ومن الخطر يحرسنا ويحوش عنا
فى كل مكان ربنا موجود
جنب الضعف وجنب المجهود
يا ربنا .. أنت جميل
ومفيش كمثلك فى الوجود
مين الصديق اللى مفيش غنى عنه
وكلنا بنحبه .. ونخاف منه ؟
ربنا

احنا بنحب ربنا وربنا بيحبنا
ويحبنا أكثر كمان لما نحب بعضنا

جنب الدفاية

جنب الدفاية
سهران وحدتى
والحب معايا
ذكرى وأمانى

يانار يانار
عندك أخبار
طيرى اللرى طار
وهجر أحضانى

ورمانى

سهران وحدانى جنب الدفاية ؟
جنب الدفاية
عارف لهايبها
إنها بكاية
من هجر حبيبها

مالك يالىالى
مالك ومالى
غيرتى حالى
وحببى جفانى

وخلانى

سهران وحدانى جنب الدفاية ؟
" المذهب "

جنب الدفاية
سهران وحدانى

الأعمال الكاملة للشاعر

جنب الدفاية
والبرد كاويني
محتاج لهنايا
من تاني يجينسي

واللي استخبي
يزورني حبه
ده أنا المحبة
هدت كساني

وفياتني

سهران وحداني جنب الدفاية
"المذهب"

جنب الدفاية
سهران وحداني ..
جنب الدفاية
ومعايا كتابي
وكبريايا
ونبض شبابي

وبقية غنوة
لساها حلوة
بتقولي أبوه
ح يعود لي تاني

يلقاني

سهران وحداني جنب الدفاية

وحداني ...

وحداني ...

أوبريت الليلة الكبيرة

قبة سيدنا الولي دول نوروها
ما أحلى البيادر والناس بيزروها
قبة سيدنا الولي دول نوروها
ما أحلى البيادر والناس بيزروها
قبة سيدنا الولي والقهوة عالية
ما احلى البيادر لما نوروها ..
ما احلى البيادر لما نوروها.....

بتاع الحمص يقول :

حمص حمص تل ما ينقص عالنار يرقص..
حمص حمص تل ما ينقص عالنار يرقص..
حمص حمص تل ما ينقص عالنار يرقص..
حمص حمص تل ما ينقص عالنار يرقص
يرقص يرقص ويقول الي شاف حمص ولا كلش
حب وأتلوع ولا ولا طلشي

تضحك الفتاة وتقول :

يسترك هات حبة بقرش
يضحك الاولاد
ها ها ها
حمص حمص حمص
حمص حمص حمص

الأعمال الكاملة للشاعر

أسعى أسعى أسعى
حمص حمص حمص
حمص حمص حمص
أسعى أسعى أسعى

مصوراتي يقول :

خدلك صورة ستة في تسعة
أسعى أسعى أسعى
خدلك صورة ستة في تسعة
أسعى أسعى
أسعى أسعى أسعى أسعى

الناس في المولد يقولون :

الله الله الله
عجمية باللوز .
الله الله
طعمية أراجوز
الله الله الله الله الله
أراجوز
الله الله.. الله الله

الاراجوز يقول :

الليلة الكبيرة يا عمي والعالم كثيرة
مالين الشوادر يابا من الريف والبغادر
الأولاد يردودون :



الليلة الكبيرة يا عمي والعالم كثيرة
مالين الشوارد يابا من الريف والبنادر
الاراجوز يقول :

دول فلاحين ودول صاعدية

دول من البلد ودول رشايده

الاولاد يردودون:

الليلة الكبيرة يا عمي والعالم كثيرة
مالين الشوارد يابا من الريف والبنادر

حوار بين الارجوز والعمدة

العمدة يا حضرة الارجوز قولي

الارجوز نعم يا عمدة عاوز ايه

العمدة منين يروحوا المتولي

الارجوز فتح يا اخينا وصلي عليه

العمدة اللهم صلي عليه

الارجوز تمشي كده على طول على طول لحد ما تلاقي عمارة

العمدة لحد ما الاقي عمارة

الارجوز تكسر يمين تلقى بتاع فول دكانته على ناصية حارة

العمدة دكانته على ناصية حارة

الارجوز تدخل يمينك وشمالك شارعين وفي القالت تكسر

العمدة شارعين وفي القالت اكسر

الارجوز على اليمين واخذ بالك وتمشي على طول تتمخطر

العمدة وامشي على طول واتمخطر

الارجوز تفضل كده تمشي وتلف وتخش من مطرح ما طلعت

الأعمال الكاملة للشاعر

العمدة واخش من مطرح ما طلعت
الاراجوز ولما تلقى مقلة لب تعرف بأنك تهت وضعت
العمدة اه دي وصفة سهلة ..
الاراجوز سهلة اوي
العمدة ودي وصفة هايلة
الاراجوز مع السلامة مع السلامة مع السلامة يا ابو عمه مايلة
الاطفال مع السلامة يا ابو عمه مايله مع السلامة يا ابو عمه مايله

رجل يدعو الاولاد للتصويب بالبندقية في المولد يقول :

فَتَحَ عَيْنِكَ تَاكُلْ مَلْبِن
فَيْنِكَ فَيْنِكَ تَاكُلْ مَلْبِن
فَتَحَ عَيْنِكَ تَاكُلْ مَلْبِن
فَيْنِكَ فَيْنِكَ تَاكُلْ مَلْبِن
أوعى لجيبك للعيب عيبك
قَرَبَ جَرَبَ نَشَن
وسطن ايدك وسطن اضرب

ضرب أحد الشباب بالبندقية واصاب الهدف

فقال له صاحب البندقية :

يحميك يا ابني تبقى غالبني

قَرَبَ خَدْلِكَ حَتَّةَ مَلْبِن

قَرَبَ خَدْلِكَ حَتَّةَ مَلْبِن ... قَرَبَ خَدْلِكَ حَتَّةَ مَلْبِن...

رجل يبيع العاب للأطفال يقول :

فوريرة للعيل

يا ابو العيال مَيَل
خدلك سبع فرارير
زَمارة..شخيلة
عصفورة يا حليلة
طراطير يا واد طراطير
الاولاد يردودون:
طراطير يا واد طراطير
طراطير يا واد طراطير
طراطير .. طراطير....
طراطير .. طراطير....

في السيرك رجل يقول :
الليلة اللية السيرك تعالو دي فرجة تساوي جنيه قولو هيه..
الاولاد يردودون:

هيه هيه هيه
بمناسبة هذا المولد يا واد زورنا يا واد
الليلة الليلة السيرك تعالو دي فرجة تساوي جنيه قولو هيه
هيه هيه هيه
بمناسبة هذا المولد يا واد زورنا يا واد قولو هيه
هيه هيه هيه
في السيرك شجيع يهجم على السبع ويركب دغري عليه قولو هيه
هيه هيه هيه
وبنات قمرات زي الشربات حلوين مش عارف ليه قولو هيه
هيه هيه هيه

الأعمال الكاملة للشاعر

وكمان بلياتشو تعالو اسمعو ناتشو
وشوفو حيعمل ايه قولو هيه
هيه هيه هيه
وكمان بلياتشو تعالو اسمعو ناتشو
وشوفو حيعمل ايه قولو هيه
هيه هيه هيه
هيه هيه هيه.....

رجل يستعرض عضلاته في السيرك يقول :

أنا شجيع السيما
أبو شنب بريمة
أنا شجيع السيما
أبو شنب بريمة
أول ما أقول علي هب
واصرخ لي صرخة
ها ها ها
السبع يتكهرب ويبقى فرخة
حالا بالا سأصارع أسد أنما ايه متوحش
وعخلي وجهه شوارع
تصقيفه يا ناس ميصحش
حالا بالا سأصارع أسد أنما ايه متوحش
وعخلي وجهه شوارع
تصقيفة يا ناس ميصحش
تصقيفة يا ناس ميصحش

الاسد وصل ويقول الرجل :

اهو جه اهو جه تصقيفه بقى

اهو جه اهو جه تصقيفه بقى

تصقيفه او مال تشجيعه او مال

تصقيفه او مال تشجيعه او مال

تعالى لالي اللاي اللالي يا حبيبي تعالى لالي

تصقيفه او مال تشجيعه او مال

تصقيفه او مال تشجيعه او مال

تعالى لالي اللاي اللالي يا حبيبي تعالى لالي

فرقة موسيقية عابرة يقول رجل فيها :

دقي يا مزيكا

بياع يقول :

السماك مقلي كل وبرقلي

صنف زي الفل

استخار واختار

فشة او منبار

يلا يلا سمي وكل.. يلا يلا سمي وكل

يلا يلا سمي وكل يلا يلا سمي وكل

فتاة تغني وتدعو الأمهات ليباركن أولادهن وتقول :

يا أم المطاهر رشي الملح سبع مرات

يا أم المطاهر رشي الملح سبع مرات

في مقامه الطاهر خشي وقيدي سبع شمعات



الأعمال الكاملة للشاعر

يا أم المطاهر رشي الملح سبع مرات
في مقامه الطاهر خشي وقيدي سبع شمعات
يا عريس يا صغير علقه تفوت ولا حد يموت
لابس ومغير وحتشرب مرقه كتكوت
يا عريس يا صغير علقه تفوت ولا حد يموت
لابس ومغير وحتشرب مرقه كتكوت
يا أم المطاهر رشي الملح سبع مرات
يا أم المطاهر رشي الملح سبع مرات
في مقامه الطاهر خشي وقيدي سبع شمعات.....

عالمقهوة

واحد مظلوط واتنين مصري
عالنار حاضر جايلك دغري

فنان يغني على القهوة ويقول :

مساء التماسي مساء التماسي

يا ورد قاعد على الكراسي

مسا التماسي مسا التماسي

يا ورد قاعد على الكراسي

رجل جالس على القهوة يقول :

هات شاي يا دقدق ..

دقدق رجل القهوة يقول :

عيني وراسي



سمعنا يا ريس حنتيرة
للصبح معاك السهيرة
سمعنا يا ريس حنتيرة
للصبح معاك السهيرة

الجالسون على القهوة يقولون :

سمعنا سمعنا سمعنا سمعنا

الريس حنتيرة يغني ويقول :

يا غزال يا غزال يا غزال العشق حلال دوبتني دوب خلتنى خيال
يا غزال يا غزال يا غزال العشق حلال دوبتني دوب خلتنى خيال
ياااااه يا شفتك فص فراولة ولا لا قوة ولا حول
ياااااه يا شفتك فص فراولة ولا لا قوة ولا حول
دوبتنى قلبى على لولاه اه يا غزال العشق حلال
يا غزال العشق حلال
يا غزال العشق حلال
يا ليل يا ليل
يارب يا عالم بالحال تهدي حبيبي ويصبح عال
يارب يا عالم بالحال تهدي حبيبي ويصبح عال
واغنى وارقع بالموال واقول يا غزال يا غزال
يا ليل

صاحب القهوة يقول بغضب :

وقف يا ريس حنتيرة

فيه ناس هنا قاعدة كتيرة

الأعمال الكاملة للشاعر

ولا حد قال هات تعميرة ولا واحد شاي
ولا حد قال هات تعميرة ولا واحد شاي
اه الي حيطلب راح يقعد ولا ما يطلبش يبعد
رجل جالس على القهوة يخرج بسبب ما قاله صاحب القهوة ويقول :
يلا بينا نخرج يا مسعد شارع التورماي

يكمل الرئيس حنتيرة غنائه ويقول

يــــــــاليل يــــــــاليل

يا غزال يا غزال العشق حلال دوبتني دوب خلتنني خيال خيال
يا غزال يا غزال العشق حلال دوبتني دوب خلتنني خيال خيال

رجل يريد القيام بلعبة اظهار القوة يقول :

ورينا القوة يا ابني انت وهو

مين عنده مروه وعاملي فتوة

مين عنده مروه وعاملي فتوة

يقدر بقادرة على زق الطارة ويفرقع بومة

رجل وقع في الفخ واعلن عن دخوله للعبة وقال :

وسع وسع وسع

أنا أزق الطارة وأضرب مية بومة

ده أنا الاسطى عمارة من ضرب شاكما

صيتي من القلعة للقلعة للسوق تلالة.....

أنا واخذ السمعة

صاحب اللعبة يقول :

طيب يلا تعالى

: الرجل

لا يا عم سعيدة

دي البدلة جديدة

صاحب اللعبة بسخرية

ها ها ها سعيدة يا ابو بدلة جديدة

: الاطفال يقولون ايضا بسخرية :

ها ها ها سعيدة يا ابو بدلة جديدة...

الرجل الذي ترك القهوة السابقة فارا من كلام صاحبها يقول وقد وجد

قهوة اخرى ومعه صديقه مسعد :

إوعد يارب إوعد إوعد يارب إوعد إوعد يارب إوعد يارب

إوعد ..

أدي كمان قهوة يلا بينا يا مسعد ندخل على سهوة ايوه على

سهوة

ودخلو القهوة وكانت هناك من تغني وتقول :

طار في الهوى شاشي وانت متدراشي ..يا جدع

طار في الهوى شاشي وانت متدراشي ..يا جدع

طرفه شاورلي شاورلي عليك حكم الهوى ماشي

حكم الهوى ماشي

: الرجال في القهوة يرددون :

الأعمال الكاملة للشاعر

يا حلاوة يا حلاوة يا حلاوة.....ايوه

هوى العصاري ياواد

على سطح جاري ياواد

هوى العصاري ياواد

على سطح جاري ياواد

خدني ورماني رماني عليك ولا انت داري

طار في الهوى شاشي وانت متدراشي يا جدع

طار في الهوى شاشي وانت متدراشي يا جدع

طرفه شاورلي شاورلي عليك حكم الهوى ماشي

حكم الهوى ماشي

الرجال في القهوة يرددون :

يا حلاوة يا حلاوة يا حلاوة.....ايوه

آه يا ناري يا ناري

منك يا جاري

آه يا ناري يا ناري

منك يا جاري

خدني ورماني رماني عليك هوى العصاري

طار في الهوى شاشي وانت متدراشي...يا جدع

طار في الهوى شاشي وانت متدراشي...يا جدع

طرفه شاورلي شاورلي عليك حكم الهوى ماشي

حكم الهوى ماشي

صاحب القهوة الجديدة يؤكد على الموجودين ويقول كصاحب

القهوة السابقة :

ماشي ماشي ماشي ماشي كلامك
آه الي حيطلب راح يقعدوالي ميطلبش يبعد

الرجل يقول لصاحبه مسعد :
يلا بينا نخرج يا مسعد شارع التورماي

تكمل الغنية وتقول :
طار في الهوى شاشي وانت متدراشي ...يا جدع
طرفه شاورلي شاورلي عليك حكم الهوى ماشي
حكم الهوى ماشي

مجموعة في المولد اكتشفو وجود اقارب لهم من نفس بلدتهم يقول
احدهم :

ناس من بلدنا هناك اهم
روح يا ابراهيم اندهلهم
سلامات سلامات سلامات على البلديات
سلامات سلامات سلامات على البلديات



منشدين دينيين يقول واحد منهم :
ليلتكم أنس وجلجلة جلجلة جلجلة ..
أنشد ولعلع يا ولة يا ولة يا ولة ..
ليلتكم أنس وجلجلة جلجلة جلجلة ..
أنشد ولعلع يا ولة يا ولة يا ولة ..
شفت في منام صاحب المقام ده اوبه اوبه اوبه
ويمامة حايمة عليه تسبح ربها

الأعمال الكاملة للشاعر

يا نور النبي يا نور النبي يا نور النبي
مَيّلت فوق.....

صحوني من النوم خدت بعضي وتني جي
وبعودة وبعودة وبعودة

أمرأة تبحث عن طفلتها التي تاهت في المولد وتقول :
يا أولاد الحلال بنتي تايهة طول كده
رجلها الشمال فيها خلخال زي ده
يا أولاد الحلال بنتي تايهة طول كده
رجلها الشمال فيها خلخال زي ده

رجل يقول :


زحمة يا ولداه كام عيّل تاه

وتقول الناس فى النهاية :

الليلة الكبيرة يا عمي والعالم كثيرة
مالين الشوادر يابا من الريف والبنادر
زحمة يا ولداه كام عيّل تاه
الليلة الكبيرة يا عمي والعالم كثيرة
مالين الشوادر يابا من الريف والبنادر
زحمة يا ولداه كام عيّل تاه

وفى النهاية يؤذن المؤذن

الله أكبر الله أكبر الله أكبر الله أكبر



مسرحية الشاطر حسن

المنظر الأول

"منظر حوش بيت ريفى . كبير نوعا ما . باب المنزل على يسار المتفرج وباب الحوش الذى يخرج إلى الطريق على يمينه . وسور الحوش يستمر من خلف الجزء الظاهر من المنزل . ويوجد ممر بين السور وبين المنزل يظهر فى الممر طرف مجموعة من عشب الضبور والدواجن"

فتح الستار على وقت طلوع النهار . وهناك ديك يقف على سطح العشب ويصيح"

كو كو كو كو طلع النهار "ينظر إلى أسفل ثم يرفع رأسه
قائلا" حياكلوكلو جابو الفطار
"يقفز من مكانه ويختفى ليأكل".

* نسمع ضوضاء صادرة من الممر تمثل دجاجا يأكل ويلقى إليه الحب
* يخرج مكمكينو الرجل الآلى من بين العشب متراجعا بظهره حتى يصل إلى وسط الحوش وهو يقول :

مكمكينو : كله يأكل من سكات .. مش ضرورى دربكات .. وز بط
فراخ حمام .. كله يسمع الكلام : النهاردة الجمعة والشاطر
حسن لسه نايم . مفهوم ؟ انت يا عفريت هناك .. بس !
وانتى يا غولة كمان .. هس ! "يعود إلى التراجع" هس ..
هس ..

* ينظر إلى ما حوله فى ارتياح ويقول وهو يتمتع

يوم جميل باين عليه .. نبتدى فى التمرينات .. واحد
اثنين ثلاثة أربعة .. واحد اثنين ثلاثة أربعة ..

بغنى"

نَن تَن تَن تَن تَن تَن تَن تَن تَن تَن تَن
 أنا اسمى مكمكينو
 كل جسمى من الممكن
 ياسلام تسلم يمينه
 الشاطر حسن ده سيدى
 يا حلولى يا حلولى
 صاحى ومصحح تملىلى
 آجى من أول نندا
 عندى قووة كركدن
 وأنا اسمى مكمكينو
 تَن تَن تَن تَن تَن تَن تَن تَن تَن تَن
 من عجائب الزمن
 صنعة الشاعر من
 وأنا اسمى مكمكينو
 وأنا خدامه الحديدى
 ياسلام عليه كللى
 لما يحتاج شئ بقوللى
 واشتغل مفيش كندا
 تَن تَن تَن تَن تَن تَن تَن تَن تَن تَن
 من عجائب الزمن

* فى هذه الأثناء يكون الشاطر حسن قد ظهر من فتحة باب المنزل ووقف يستمع إلى مكمكينو

الشاطر حسن : مكمكينو
 مكمكينو : شاطر حسن ؟ صباح النور
 الشاطر حسن : ازاي الصحة ؟ حديد ؟
 مكمكينو : "يضحك" ها ها ها ها . كويسة حديد دى الحمد لله !
 الشاطر حسن : حطيت أكل للفراخ ؟ والحاجات اللي جوه كلها ؟
 مكمكينو : أيوه
 الشاطر حسن : والسبع اللي أنا اصطدته فى الحدوته اللي قبل
 اللي فاتت. حطيت له أكل ؟
 مكمكينو : أيوه يا أفندم
 الشاطر حسن : وأبورجل مسلوخة ؟
 مكمكينو : فطر
 الشاطر حسن : وازاي رجله ؟
 مكمكينو : لسه مسلوخة بس بيتعالج

- الشاطر حسن : والباقي ؟
مكمكينو : العفريت الأحمر مزكوم
- لشاطر حسن : آه .. العفريت الأحمر ! .. ياه ده أنا كنت
ناسيه خالص . انده له نتفرج عليه !
مكمكينو : حاضر " يستدير ويتجه إلى الممر "
الشاطر حسن : آه .. آهو جه
- يدخل مكمكينو ومعاه العفريت الأحمر .. العفريت ينحنى ويسجد أمام الشاطر حسن
الشاطر حسن : لأ .. ما فيش لزوم .. انت فاكرنى الملك سليمان
بتاعكم ؟ لأ قوم اقف كويس .. قومه يا مكمكينو!
- مكمكينو يشده ليقف
مكمكينو : اقف كويس .. ما تخافش
- العفريت يقف بأدب أمام الشاطر حسن قريبا منه
الشاطر حسن : لأ ابعده شو به أحسن تعدينى زكام .. أيوه كده
كويس .. ما شاء الله ما شاء الله .. عظيم عظيم ..
- الشاطر حسن يتفرج على العفريت
مكمكينو : ده يا شاطر حسن . من أحسن المساجين عندنا ..
مؤدب وهادى ومنكسر !
- الشاطر حسن : يعنى كعفريت مش مشتاق للعفرتة ؟
مكمكينو : إلا مشتاق ؟ ودى عايزة كلام ؟ ما تنكفش قول !
- العفريت يهز رأسه بالإيجاب
مكمكينو والشاطر حسن يتبادلان النظرات
الشاطر حسن : طيب ممكن تتعفرت شو به هنا فى الحوش . بس
زى ما أقول لك أنا

الأعمال الكاملة للشاعر

* العفريت ينحنى ويرفع يديه إلى رأسه شاكرا

الشاطر حسن : نبتدى ! اتنطط ! "العفريت يتنطط ويرتفع فى

الهواء وينتفش وينزل"

اطول ! "العفريت يطول لفوق مثل بالونة طويلة"

اقصر ! "يقصر"

اطول كمان ! "يطول"

كمان ! "يطول كمان"

اقصر بقى ! "يقصر"

كمان ! "يقصر"

بس بس لاتخلص ! "يتوقف"

طيب كويس .. ارجع بقى زى ما كنت

"العفريت يرجع كما كان"

ممكنينو : مبسوط بقى يا عم ؟

* العفريت يهز رأسه شاكرا

الشاطر حسن : لسه شويه .. ارقص بقى .. رقصة عفاريتى .. روك

آند رول مثلا

* العفريت يقف ساكنا ويهز يديه حائرا

ممكنينو : الظاهر يا شاطر حسن انه عاوز واحدة ست يرقص

معاها!!

* العفريت يؤيد كلام ممكنينو بإشاراته

الشاطر حسن : واحدة ست ؟ واحدة ست ؟ "يفكر" وجدتها !

ممكنينو : مين ؟

الشاطر حسن : الغولة ! هاتها من القفص بتاعها !

* العفريت بمجرد سماع كلمة الغولة .. تركبه الرعدة والخوف

ممكنينو : الغولة ؟ ليه بس ؟

الشاطر حسن : إيه ؟ فيه إيه ؟ جرى إيه ؟

"تبيط حداية على السور وتأخذ فى الصباح

الحداية : فيه سر .. فيه سر .. ولا أقول ولا أقر

فيه سر .. فيه سر .. الطير حا يفر

الشاطر حسن : بتقول إيه الحداية دى ؟

مكمكينو : هس "تطير الحداية" بتقول فيه سر فيه سر ولا أقول

ولا أقر .. وحاجات كده تانية آخرها ار

الشاطر حسن : الحدايات كلامهم كثير .. اجرى بقى هات الغولة !

"عفريت تركبه الرعشة تانى

مكمكينو : أصل بقى فيه مشكلة بخصوص الغولة دى !

الشاطر حسن : مشكلة إيه ؟

مكمكينو : بقالها كام يوم مش راضية تاكل الخضار ..

وبتعتدى على زملاءها .. ما بلاش منها .. !

"عفريت يؤمن على كلام مكمكينو بهزات رأسه

الشاطر حسن : والله عال .. انا ما عنديش كلام من ده .. أنا قلت

الغولة حا ترقص روك آند رول مع العفريت الأحمر

يعنى الغولة حا ترقص روك آند رول مع العفريت

الأحمر.

"عفريت يرتعش بعنف

الشاطر حسن : مكمكينو ! هات الغولة دى هنا !

مكمكينو : حاضرى اقدم !

يذهب مكمكينو ويترك الشاطر حسن مع العفريت الأحمر

الشاطر حسن : عفريت جبان .. خايف من الغولة ؟ على رأى

المثل .. "خيال مآته قال إيه مخيف ، وهو قلبه

الأعمال الكاملة للشاعر

من جوده ليف!" "للجمهور" على فكرة المثل ده
أنا قابله دلوقت حالا بس! "للعفريت" ثم أنت
خايف منها قوى كده ليه؟ هي معنى كانت القبلة
الذرية ولا الهيدروجينية؟

* تسمع ضوضاء قادمة من خارج المسرح. مكمكينو قادم ومعه الغولة يسب ويلعن
الغولة: "من خارج المسرح" أوعى كده.. ما تحطش
إيدك على.. ما تلمسنيش يا ختى!! أوعى إيدك
دى كده!!
مكمكينو: "خارج المسرح" بس يا مجنونة انتي!

"يدخلان"

الغولة: مجنونة؟ جاك جن لما يلخبطك يا حنة حديد خردة
يا صفيحة الجبنة يا مصدى!!
مكمكينو: سامع يا شاطر حسن؟ سامع قلة الأدب بتاعتها؟
الغولة: اسم الله عليك أنت يا للى
الشاطر حسن: "يقاطعها" هس! ولا كلمة! تعالى هتا محرومة من
الأكل 24 ساعة!
الغولة: هو إيه ده!
الشاطر حسن: بس بلاش دوشة! قلبتي دماغنا.. شوفي مكمكينو
حا يقول لك إيه.. واعملنى زى ما يقول لك تمام
د!

"لمكمكينو" أنا داخل استعد لفسحة يوم الجمعة
العفريت الأحمر عندك أهه والغولة أهه شوف أنت
بقي حكاية الروك آند رول دى!

* الشاطر حسن يدخل المنزل. العفريت يرتعش ويتراجع طول الوقت إلى أن
بالحائط تماما. ثم يتسحب لكي يهرب إلى العش
مكمكينو: حيلك.. حيلك.. رايح فين؟.. استنى لما ترقص..!

العفريت يقف .. ويقصر ويقصر إلى أن يكاد يختفى
مكمكينو ينظر إلى الغولة وهي تولول على نفسها وإلى العفريت وهو يحاول الهرب ..

وينقل بصره بين الاثنين

مكمكينو: "لنفسه" مش حاقول لها ترقص .. مش معقول

حاتفهم ..! طب أعمل إيه؟ فكرة!!

"للغولة" يا غولة!

الغولة: "تلتفت إليه" عايز إيه يا علبة المسامير!

مكمكينو: "مشيرا إلى العفريت الأحمر" العفريت الأحمر ده

.. عمال يشتم فيكى من الصبح .. بسك عليه

الغولة تنمر للعفريت الأحمر وتدفع نحو بعنف وتهاجمه بوحشية بالغة وتمسك بتلابيه.

بمجرد ما تصل الغولة إلى العفريت الأحمر يبدأ أيقاع رقصة الروك آند رول .

مكمكينو يستغل طشطا مقلوبا فى الدق لحفظ التمبر

مكمكينو يغنى أثناء المعركة بين الغولة والعفريت

مكمكينو: يالله الروك ويالله الرول

اتشقلبوا يا ولاد بلا ذل

اتمرغوا بهدلوا فى هدومكم

بعد ما كانت زى الفل

وآدى حلاوة الروك آند رول

لحن معفرت لحن صاروخى

مخى دماغى عقلى نافوخى

دورى يا دنيا ولفى ودوخى

واتطربقى على راس الكل

وآدى حلاوة الروك آند رول

العفريت يقصر ويقصر والمعركة مستمرة وفى لحظة تستدير الغولة ... والعفريت غير موجود

مكمكينو: "لا يزال يغنى" يالله الروك .. ويالله الرو الله! آمال

فين العفريت الأحمر؟ .. فين زميلك فى الرقص؟ فين

الأعمال الكاملة للشاعر

الكافالييه ؟

الغولة : "بساطة" كلته !
مكمكينو : إيه وأقول للشاطر حسن إيه ؟ ده مديهولى عهدة ..
تاكلى العهدة ؟ .. وقتك سودة يا مفعوجة ! "يهم
بضربها"
الغولة : وإيه يعنى .. ده حتى طعمه وحش .. وحا يعمل لى
حموضة فى معدتى

* الشاطر حسن يخرج من الباب

* فى نفس الوقت

الحداية : فيه سر .. فيه سر .. ولا أقول ولا أقر ..
فيه سر .. فيه سر .. الطير حا يفر ..

* الغولة تنظر إلى الحداية وتضحك .. الحداية تنظر إلى الغولة .. الحداية تهز رأسها ..

الغولة تهز رأسها

الشاطر حسن : بتبصى لها قوى كده ليه ؟ عاوزة تاكلياها هي كمان ؟

مكمكينو : هش بقى .. احنا ناقصينك "يهش الحداية"

* الحداية لا تزال تهز رأسها للغولة والغولة تهز رأسها للحداية ..

مكمكينو : خارج يا شاطر حسن ؟

الشاطر حسن : أيوه !

الغولة : "تضحك" هي هي هي هي هي هي هي هي !

* الحداية تطير

* موسيقى حزينة وعاطفية ومعها من خارج المسرح صوت الحداية يقول "فيه سر"

مكمكينو : هش بقى .. "يلتفت إلى الحداية ليهشها" الله دى

طارت

* الموسيقى الحزينة تستمر

الغولة : "تضحك" هي هي هي هي هي هي هي هي !

مكمينو يدفع الغولة إلى الداخل ويستدير داخلا إلى الممر

الموسيقى الحزينة مستمرة

الشاطر حسن : معلش يا مكمينو .. ما ترعلش على العفريت الأحمر .. انت
كنت بتجبه صحيح لكن على رأى المثل .. "الجبان جبان ،
ولو حطوا عليه دادابان .." "يلتفت للجهور" برضه أنا
اللى قابل المثل ده

مكمينو يتجه ببطء مع الغولة إلى الممر .. ويهز رأسه بحزن والغولة تضحك

الشاطر حسن : أنا خارج بقى يا مكمينو .. خد بالك كويس المرة
دى !

مكمينو يهز رأسه بحزن ويستمر

ظل الشاطر حسن ناظرا إليه حتى يختفى ويستدير ليخرج من بوابة الحوش
الموسيقى الحزينة تتحول إلى نقرات بسيطة تعبر عن المشى أثناء خروجه فى أول
الطريق .. ثم لا يلبث أن ينبثق نحن مرح أخاد يعبر عن جمال المناظر الطبيعية التى يمر
بها الشاطر حسن

الشاطر حسن : "يعنى"

حاجرى كانى فوق حصان وحاطير كانى بأجنحة
جميلة جدا الغيطان والفسحة فيها مفرحة
لو كنت رسام كنت جيت ومعايا شنطة فيها زيت
ورسمت كل غيط وبيت
لو كنت شاعر كنت أقول عن الجداول والحقول
قصيدة فيها ألف بيت
لو كنت ده أو كنت ده مش حاج فرح أكثر من كده
ما فيش لزوم أقول ياريت
والنسة بتمر بحنان والشمس حلوة مفتحة
جميلة جدا الغيطان والفسحة فيها مفرحة
حاجرى كانى فوق حصان وحاطير كانى بأجنحة

الأعمال الكاملة للشاعر

* وتتابع المناظر الجميلة مع حركات تعبيرية من الشاطر حسن وهو يجرى ويقفز بالطبيعة.

* ثم تأتي الهداية طائفة نحوه

الهداية : الحق يا شاطر حسن .. الحق يا شاطر حسن
الشاطر حسن : مين بينادى ؟ .. الهداية ؟
الهداية : باللا بسرعة بسرعة ورايا .
الشاطر حسن : ها ها ها .. إيه .. فيه سر ؟
الهداية : ولا فيه سر .. ولا فيه مر .. عند النيل طفل بيغرق ..
وأمه بتصرخ وتزعق .. يالله بسرعة قوام الحق !
الشاطر حسن : فين هو قوليلي قوام
الهداية : قدام قدام قدام
الشاطر حسن : أما حكاية !
الهداية : يا لالا ورايا !

* تجرى الهداية طائفة والشاطر حسن يجرى من تحتها على الأرض

الهداية : يا لالا بسرعة بسرعة نط قناية واقرح ترعة
راس الواد أهى نازلة وطال عة يا حبيبي ياخويا
ياضايا
ياالله بسرعة بسرعة ورايا

* يصلان إلى مكان تبدو فيه الجنية مختبئة خلف بعض الشجيرات والأعشاب الطويلة شاطئ النيل.

* الشاطر حسن يتلفت

الشاطر حسن : فين ؟ مش شايف حد بيغرق ؟
الهداية : قرب حبة وبص وحقق قرب قرب قرب

* يقترب الشاطر حسن من مكان الجنية. الجنية تمسك به وتشده إلى أسفل .. يسقطان ويختفيان. نسمع فقط صوت سقوط جسم في الماء.

طب يا خويا خلاص وقعتك
ريحنا من الغلبة بتاعتك
أنا خدامة أمينة وفيه
ستي الغولة غالية على
من بعدها ماقيتش القوت
عشان حته واد هلقوت
جرجرته ووقعته فى خية
وأهو طب فى ايد الجنية
تحت المية تحت المية
كان فيه سر كان فيه سر .. دلوقت باقر

وتظل تدور فى المسرح وظلها الأسود يسود الأرض وجسمها الأزرق الداكن يظلم
السماء.



المنظر الثاني

* تحت سطح الماء فى قاع النيل. قارب غارق فى الصدر. وحوله الأعشاب المائية وبعض الأحجار. الجو معتم قليلا بسبب الظلمة. أشعة النور تنساب من السطح إلى القاع خضراء وزرقاء وبنفسجية. الأسماك تروح وتجيئ فى هدوء وصمت.

* تمر مجموعتان من الأسماك الصغيرة .. وسمكتان كبيرتان من نوع البلطى

ذكر وأنتى

ذكر البلطى : يا لله امال يا بلطية - خلينا عايمين فى حالنا .. دى

الحنة دى بيقولوا فيها بسم الله الرحمن الرحيم ..
الجنية .. ابعدى من هنا .. احنا مالنا.

أنتى البلطى: يوه يا بلطى ما أنا عارفة .. يعنى حا يحصل ايه ؟

الجنية طلعت من شوية تخطف واحد وزمانها جاياه
ونازله !

بلطى : يا نهار اسود .. عومى قدامى عومى .. وكمان

خاطفة واحد .. ؟ واحنا طيران من هنا !

بلطية : "تزوج منه" والنبي .. خلينا نتفرج ! نستخبي ! ما

حدش حاشوفنا.

بلطى : اعقلي يا بلطية يا حبيبتى احنا أصحاب عيال !

بلطية : اخص عليك .. لو كنت بتحبينى خلينا نتفرج !

بلطى : باحبك والله باحبك .. بس ما اقدرش اتوجد فى

مكان زى ده .. وفيه حاجات كده

بلطية : تعدمنى يا بلطى .. بلبل .. تعدمنى.

بلطى : "ساكت"

بلطية : تعدمنى عدم موت .. انشا لله تهمنى شبكة والا انشك

بسارة إن ما رضيت !

بلطى : بعد الشر بعد الشر .. يا شيخة ما تفرش ! هه .. خلينا

يا ستى !!

بلطية : يا حبيبي يا جوزى "تقبله" دمك خفيف ! "تلفت

حولها" أهه مكان كويس نستخبي فيه .. ورا الحجر

صالح جاهين

ده .. لأ .. فى وسط الأعشاب دى .. لأ هنا.

"مذكر ينظر إلى أعلا ويختبئ فجأة وينادى زوجته"

بلطى : فيه حاجة نازلة من فوق .. تعالى هنا .. بسرعة !!
"يختبان"

* المكان خالى لبضع ثوانى .. ثم يهبط الشاطر حسن مغمى عليه وأطرافه مسترخية .. يهبط
بطء فى الماء .. وأخيرا يستقر على القاع وظهره مرفوع على حافة القارب.
* يظهر رأس البلطية وتنظر نحوه من مخبئها ثم تختفى بسرعة
* الجنية تسبح نحو القاع برشاقة. تدور حول الشاطر حسن وفوق راسه تنزل وتقف على
ذيلها. تضع يسراها فى وسطها وتشير إليه يمينها
الجنية : "بلهجة السحر"

عام من عام ألفين عام
ألف قيام وألف منام
بحق الرنجة وكل سقنجة
والسمك المرعب أبو سنجة
نام نام نام
سحرى عليك حيطان حوالبك
ما تعرف راسك من رجلك
كلامسى قيو دحايب وحاعود
تكون مربوط هنا موجود
نام نام نام

* تقول الجنية هذا وتنظر إليه قليلا متأملة .. ثم تسبح إلى أعلا وهي لا تزال تردد "نام نام
نام"

* ترفع البلطية رأسها بحذر .. تنصت قليلا .. ثم تعوم نحو الشاطر حسن وتنظر فى وجهه
بلطية : هو دى بقى اللى خطفته ؟ .. ما شاء الله " تنادى
زوجها " بلطى .. بلطى ؟ بلطى !!
بلطى : "من مخبئه" إيه عابزة إيه من بلطى ؟
بلطية : تعال والنبي اتفرج.

الأعمال الكاملة للشاعر

- بلطى : "من مخبئه" مش عايز اتفرج ولا أتهبب .. الواحد دمه
نشف ..
- بلطية : لأ بس تعال !
- بلطى : يوووووو !! آدينى جيت "يخرج ويسبح إلى الشاطر
حسن وينظر فى وجهه" يا خبر!!! ده الشاطر حسن !!
- بلطية : انت تعرفه ؟
- بلطى : من زمان .. من قبل ما اتجوز ..
- بلطية : يا نضرى .. دى مغمى عليه .. نعمل إيه ؟
- بلطى : نرش على وشه شوية ميه !!
- بلطية : "بحزن" كويسة !
- بلطى : الله .. آمال نعمل إيه ؟
- بلطية : ده مسحور لازم نفك السحر عنه .. بس بسرعة بقى
قبل ما الجنية ترجع !
- بلطى : طيب .. فكى السحر .. تعرفى ؟
- بلطية : لأ ما أعرفش .. انت تعرف ؟
- بلطى : ما أعرفش .. لكن أحاول !
- بلطية : طيب يالله !
- بلطى : "يرجع للوراء قليلا" احم احم .. بس لازم مفك علشان
نفك السحر عنه
- بلطية : بايخة !

* الشاطر حسن يهتز وهو نائم فى ضحك مكتوم

- بلطية : الله ماله بيعمل كده ؟ .. ده بيضحك وهو نايم
- بلطى : طبعا .. واد شربات .. حتى يا ولداه وهو كده ..
- بيضحك على النكتة اللي باقولها .. مش زيك ما
تضحكيش على النكتة وانتي صاحبة إلا لما نفهمها لك
ميت مرة !
- بلطية : نكتة إيه انت كمان ؟. هو السمك بينكت ؟

* الشاطر حسن يرفح رأسه ويتكلم

- الشاطر حسن : آهي دي كمان نكتة !
 بلطية وبلطى : الله ده صحى !!
 بلطى : أمال مين فك السحر عنه ؟
 بلطية : أنا
 بلطى : لا أنا
 بلطية : باقولك أنا .. يا خى !!
 الشاطر حسن : شششش .. ولا انت ولا هي .. أنا ما كنتش مسحور
 وما كنتش نايم !
 بلطى وبلطية : إزاي
 بلطى : هي الجنية مش كانت عمالة تسحر فيك وبتقول ..
 بتقول إيه يا مدام ؟
 الشاطر حسن : تقول اللي تقوله . بس أنا ما اتأثرش .. قال على
 رأى المثل "اللى بيقر يقر..واللى بيسمع هو حر"
 أنا اللي قايل ده

* ينظر إلى الجمهور ويشير إلى نفسه إنه قائل المثل

- بلطية : بقى انت ما كنتش نايم ولا مغمى عليك خالص ؟
 الشاطر حسن : خالص .. بالأمانة حضرته قال إنه يعرفنى من قبل ما يتجوز !
 بلطى : إلا أعرفك ؟ طبعاً .. وهو أنت حد يتوه عنك ؟ .. وانت
 كمان تعرفنى .. حقق فى كده ؟ .. أنا مين ؟
 الشاطر حسن : "ينظر إليه بإمعان" بص يمين .. بص شمال . كمان بورقيل
 أكثر .. أنا شفت الشكل ده فين ؟. فين فين فين ؟. فى
 جنينة الأسماك ؟
 بلطى : "بدعز" بعد الشر بعد الشر ؟ إيه الكلام ده يا شاطر حسن!
 الشاطر حسن : فى كتاب علم الأحياء ؟ !
 بلطى : فين ؟

الأعمال الكاملة للشاعر

الشاطر حسن : في كتاب علم الأحياء تحت عنوان السمك البلطي من
الأسماء المصرية ويعيش في النيل والمجاري المائية ..
الخ الخ الخ

بلطى : اسم الله عليك .. أنا فعلا اسمى بلطى .. بس ما كنتش
أعرف انهم كتبوا عنى فى كتاب "يلتفت إلى زوجته" بقى
نشترى الكتاب ده علشان الولاد يتذكرونى بعد عمرن
طويل "للشاطر حسن" هو اسمه إيه الكتاب ده ؟

الشاطر حسن : علم الأحياء !
بلطى : علم .. الأحياء ! علم .. الأحياء ! خلاص حفظته

الشاطر حسن : هيه ما قلتيش احنا اتقابلنا فين ؟
بلطى : بقى يا سيدى الحكاية وما فيها إن انت مرة اصطدتنى !

الشاطر حسن : أنا اصطدت حضرتك ؟
بلطى : أبوه يا افندم .. وأنا صغير

الشاطر حسن : ازاي
بلطى : بالبرطمان ! حضرتك جبت برطمان وحطيت على فتحته

حثة قماشة مخرومة ودهنته دقيق .. وحطيته فى الميه ..
وبعدين ؟
الشاطر حسن : وبعدين أنا يعنى .. دخلت فى البرطمان

بلطى : وبعدين ؟
الشاطر حسن : بالاختصار أنت لقيتنى صغير وبابى لك من جوه البرطمان

بلطى : .. وكنت صراحة خايف .. فانت ما خلصكش .. وقلت
الشاطر حسن ما يصحش يتشطر على حثة سمكة صغيرة ..

ورميتنى تانى فى الميه.
يا خير .. ده أنقذ حياتك .. ده ادالك عمر جديد !!
بلطية : "بحماسة" واحنا كمان جزاء كده لازم ننقذ حياته

بلطى : من الجنية اللعينة اللي خطفته وسحرتة
بلطية : متشكر .. بس هى ما سحرتنيش

الشاطر حسن : آه صحيح .. انت ما كنتش نايم
بلطى :

صلاح جاهين

- الشاطر حسن : كنت عامل نفسى نايم بس .. علشان الاقى فرصة أفكر فيها
فى الهرب ..
- بلطية : إنما ازاي ما اتسحرتش .. انت معاك حجاب ؟
- الشاطر حسن : أبدا بس أنا ما أعتقدش فى السحر .. المشكلة مش فى
السحر المشكلة فى الأسماك الكهربائية ..
- بلطى وبلطية : إيه ؟
- الشاطر حسن : أسماك شابكة .. وأسماك كهربائية .. موقفاهم الجنية حوالينا
زى سور معسكر الأسرى .. أبو أسلاك شابكة وأسلاك
كهربائية
- بلطى : حلو !
- الشاطر حسن : ما فيش فرق بينهم غير اللام والميم .. الأسماك والأسلاك ..
- بلطية : يا لهوى !! واحنا كمان مأسورين دلوقت ؟
- الشاطر حسن : أبوه امال إيه ؟ أنا شايفها وهى بتقفل ورايا
- بلطية : يا ماما .. أنا خيفة ..
- بلطى : قلت لك الحكاية مش لعبة ما سمعتيش الكلام !!
- بلطية : طب نعمل إيه ؟
- بلطى : احنا ملزومين ننقد الشاطر حسن زى ما قلنا
- بلطية : أه صحيح !!
- الشاطر حسن : وتنقدوا نفسكم كمان !
- بلطى : "يندب" ما أنا قلت .. هو أنا ما قلتش ؟ .. أنا قلت الحنة
دى ما يصحش حد يعوم فيها ولا يقرب منها خالص .. إنما
أهه !! لنا قسمة نشوفك تانى ! الله مالك يا أبو على ؟

* رأس الشاطر حسن يميل قليلا

- الشاطر حسن : "يستجمع قواه" أصلى مش متعود أقعد مدة طويلة
تحت المية من غير هوا !
- بلطية : انت تعبت يا نضرى ؟

* الشاطر حسن يهز رأسه بالإيجاب

الأعمال الكاملة للشاعر

- بلطى : لازم يطلع من الميه حالا .. قبل ما تيجى الجنية
الشاطر حسن : والأسماك الكهربائية .. "بصوت ضعيف"
بلطى : وبعدين بقى ؟ لازم يتنفس !
بلطية : أنا عندي فكرة !
بلطى : إيه ؟
بلطية : نجيب له كمامة غطاس !!
أنا عارفة طريق واحدة .. كمامة غطاس شيك
شياكة ؟
ورا القارب ده .. غرقت معاه باين عليها !
بلطى : وعرفتى ازاي ؟
بلطية : شفتها وأنا بأدور على حطة نستخبى فيها
بلطى : ما تقولى م الصبح
بلطية : يقطعنى نسبت
الشاطر حسن : "يهب واقفا" تعالى ورينى مطرحها !
بلطية : آهه
الشاطر حسن : بس حط حطة حجر لون هدموى علشان تفتكرنى
الجنية لسه هنا
بلطى : "لنفسه" يا سلام .. يا ما انت كريم يارب .. الجدع
كان ح يروح فى شربة ميه ..

* من خارج المسرح يسمع صوت موسيقى نحاسية - بتاعة الأفراح ومعها صوت الجنية آتية
من بعيد

- الجنية : يا سمك يا لبيس .. هات لى فوانيس .. ياسمك يا شبار
.. هات لى أزهار .. يا سمك يا قراميط .. هات لى
زغاريط .. يا سمك يا مياس .. هات لى رقاص .. يا
سمك يا بنى .. هات لى مغنى

* الجنية تكتشف عدم وجود الشاطر حسن

- الجنية : "تسهق" هيبه .. بطل مزبكة .. العريس هرب
"المزبكة تتوقف فعلا" يا ندامتى .. راح فين ده ..

صلاح جاهين

زمانه شرق من الميه . لازم أنا ما سحرتوش كويس ..

راح فين ده بس ؟

الشاطر حسن : أنا أهه !

* الشاطر حسن يخرج من خلف القارب وهو يرتدى كمامة الغطاس

* الجنية تلتفت فتجده فتدعر من القناع الذى يلبسه

الجنية : مين ده ؟ غطاس ؟

الشاطر حسن : لأ ما تخافيش .. أنا الشاطر حسن

الجنية : الشاطر حسن مين ؟ ..

الشاطر حسن : اللى خطفتيه من شوية .. اللى سحرتيه وقتليه :

بحق الرنجة وكل سفنجة والسمك المرعب أبو سنجة
نام نام نام !

الجنية : آه صحيح .. وإيه اللى عامله فى نفسك ده ؟ لابس

كده ليه ؟

الشاطر حسن : علشان ما اشرقش وأفطس !

الجنية : هو فيه حاجة تخليك ما تشرقش وتفطس غير السحر ؟

الشاطر حسن : آه فيه .. الكمامة اللى أنا لابسها دى .. أجدع من

السحر !

الجنية : اقلع يا شيخ اقلع وتعال لما اسحرك تانى علشان تعرف

تعيش معايا تحت المية !

الشاطر حسن : وأعيش معاكى تحت المية بصفتى إيه ؟

الجنية : بصفتك جوزى !

الشاطر حسن : بس أنا مش جوزك

الجنية : أتجوزك .. ! أعمل لك فرح مافيش منه فى العالم

واتجوزك .. انت عريسى النهارده !

الشاطر حسن : كلام إيه ده ؟

الجنية : أمال .. وهو أنا خطفتك ليه وجبتك هنا ؟ مش علشان

أتجوزك ؟ ..

دقى يا مزبكة تانى .. لقينا العريس "تدق المزبكة

ثانى

- الشاطر حسن : حيلك حيلك .. استنى شوية !! بس بطل مزبحة
"تبطل" نتفاهم الأول !
الجنية : نتفاهم فى إيه ؟
الشاطر حسن : طبعا نتفاهم .. هو فيه جواز من غير تفاهم .. لازم
أفهمك وتفهمينى قبل ما نتجوز
الجنية : مين قال كده ؟
الشاطر حسن : كتاب الزواج المثالى !!
الجنية : طيب نتفاهم .. عاوز تفهم إيه وأنا أفهمهولك .. اقعد ..
اقعد..

* يجلس الشاطر حسن

- الشاطر حسن : أولا .. قوليلى يعنى إيه الكلمة الللى قلتها لى دلوقت
؟
الجنية : الكلمة بتاعة إيه ؟
الشاطر حسن : بتاعة .. أنت عريسى النهاردة .. هو انتى لكى كل يوم
عريس ؟
الجنية : أبدا والله .. انت بتصدق ؟
الشاطر حسن : أمال الللى بتخطفيهم دول إيه ؟
الجنية : مش كل يوم .. فىن وفىن على ما استفرد بواحد .
الشاطر حسن : نهايته .. انتى عايزة إيه دلوقتى ؟
الجنية : أتجوزك !!
الشاطر حسن : أنا ؟
الجنية : أيوه
الشاطر حسن : مش ممكن
الجنية : ليه ؟
الشاطر حسن : عمري أقل من تمتاشر سنة !
الجنية : وإيه يعنى ؟
الشاطر حسن : القانون يمنع !

- الجنية : أنا ضد القانون.
- الشاطر حسن : ما أنا عارف .. بتخطفى الناس وهو بيعاقب على جريمة الخطف . وتعملى جرايم تانية كمان !
- الجنية : جرايم تانية زى إيه ؟ .. انت حاتليخ ؟
- الشاطر حسن : حلمك .. جريمة مثلا زى : سرقة التيار الكهربائى !
- الجنية : سرقة الإيه .. إيه إيه ؟
- الشاطر حسن : قصدى الأسماك الكهربائية
- الجنية : مالهم ؟
- الشاطر حسن : جاية الكهربيا بتاعتهم منين ؟ عندك عداد من هيئة الكهرباء والغاز ؟
- الجنية : عداد يعنى إيه ؟ وهيئة إيه ؟ وغاز إيه ؟ إيه الأنغاز دى ؟
- الشاطر حسن : أنا باتهمك دلوقت بانك سارقة تيار كهربائى من غير ما تدفعى عنه فلوس .. علشان تستخدميه كسور للمعتقل اللي انتى عاملاه للأزواج والعمرسان .. مذنبه والا غير مذنبه؟
- الجنية : انت يا واد يا مفعوص انت لخبطت لى مخى قول م الأول..
- الشاطر حسن : انتى سارقة الكهربيا اللي فى الأسماك بتاعتك !
- الجنية : أبدا
- الشاطر حسن : وانتى زعلانة ليه من التهمة .. مش انتى بتقولى أنك ضد القانون ؟ ..
- الجنية : أيوه .. بس كله إلا التهم الكذب .. ما احبش حد يتهمنى وأنا بريئة بريئة "بصوت فائزة أحمد"
- الشاطر حسن : بقى انتى مش سارقة الكهربيا اللي حوالينا دى ؟
- الجنية : فشر .. دى الكهربيا دى فى أسماكى من الأول .
- الشاطر حسن : أمال انتى موقفاهم فى الحتة دى ما بيتحركوش .
- مش علشان الأسماك موصلة بالأسلاك اللي فى الكوبرى اللي جنبنا ؟ اطلعى من دول يا لنيمة !

الأعمال الكاملة للشاعر

- أبدا أبدا أبدا .. ما فيش توصيلة بينهم وبين الكوبري
الجنية :
- أثبتى .. لو كنتى بريئة .. اثبتى !
الشاطر حسن :
- أثبت لك .. ولو أثبت لك .. تتجوزنى ؟
الجنية :
- " بصوت منخفض " وجع فى بطنك .. قال اتجوزك
الشاطر حسن :
- قال .. " بصوت مرتفع " ربنا يتمم بخير .. بس اثبتلى
انتى ..
- " بفرح صبيانى " يالله معايا وانت تشوف بنفسك لما
الجنية :
- السمك يمشى كله .. هيه هيه ..
الشاطر حسن :
- عظيم .. على رأى المثل " الاثباتات فى النزاع ..
كالأسبرين فى الصداع "
- يا حلاوة .. ده مين اللي قال كده ؟
الجنية :
- مش أنا .. دى قاعدة قانونية !
الشاطر حسن :
- طيب يالله وأنا أثبت لك !!
الجنية :
- ياالله يا حبيبتى يالله !
الشاطر حسن :
- ياالله يا حبيب قلبى !
الجنية :

* يخرجان من المسرح بزأوية إلى أعلا

* نسمع صوت الجنية من خارج المسرح

- يا سمك يا كهربائى .. انصرف .. يا سمك يا كهربائى
الجنية :
- ابعد كلك بعيد .. يا سمك يا كهربائى .. ابعد كلك
بعيد ..

* ويتلاشى صوتها ويتعد .. بينما يخرج من خلف القارب بلطى وبلطية.

- ياالله يا ختى احنا كمان بقى على بيتنا .. قبل ما ترجع
بلطى :
- فى كلامها !
- أى والله .. ده الجدع دوخها بالكلام .. ربنا يستر.
بلطية :
- أمال بنى آدم مخه كبير يا الله بينا يا الله !
بلطى :

المنظر الثالث

انفس المنظر الأول. الوقت قبل الغروب. الحداية واقفة على السور. ومكمكينو واقف فى الحوش. وصوت الغولة من الممر يعلو وهى تنادى وتصيح. وتحاول تحطيم باب القفص "حا كسر القفص . حا كسر القفص" "الغولة تصيح"
أصوات الدواجن تعلو. وصوت مكمكينو من الداخل مع الدواجن.
الحداية :

شوف الروتين بتاع مكمكينو . برضه بعد الشاطر حسن ما غرق
وخطفته الجنية .. قال إيه بيوكل الفراخ .. والدواجن..

مكمكينو : "من الممر" بيتك بيتك بيتك ..

الحداية : ويبيتهم قال زى كل يوم

مكمكينو : بيتك بيتك بيتك

الحداية : بيتك بيتك ؟؟ ها ها ها .. كل الطيور حا تروح تنام إلا أبو

فصاده الغلباوى

مكمكينو : "من داخل الممر" أبو فصاده إيه يا أم قويق

الحداية : أبو فصاده .. الشاطر حسن سيدك يا مكمكينو .. مش حا يروح

بيته الليلة يا عينى !

مكمكينو : "خارجا إلى الحوش" أنا مكنة . أنا آلة .. فاهمة ؟ يعنى ما

تحاوليش تثيرى أعصابى .. علشان أفتح للغولة بتاعتك !

الحداية : انت حر .. هى حا تكسر القفص وتخرج !

مكمكينو : إذا خرجت حا تعرف شغلها ..

الحداية : من مين ؟

مكمكينو : من الشاطر حسن

الحداية : رجعتا تانى ؟ باقول لك غرق .. خطفته الجنية وشدته معاها

تحت الميه !

مكمكينو : مفهوم مفهوم !

الحداية : مش مصدق ؟ مخك حديد .. اعمل لك إيه ؟ على رأيك ما

يتأثرش .. معندكش دم

مكمكينو : عندى بنزين !

بصدر من صدره صوت موتور سيارة

يسمع من خارج المسرح صوت هبذ شديد والغولة تصيح من الممر

الغولة : "من خارج المسرح" هبذ هبذ هبذ ! "هبذ" هبذ هبذ !

الأعمال الكاملة للشاعر

"هبد"

الحداية : سامع ؟ حا تكسر الباب وتخرج .. افتح لها أحسن لك !
مكمكينو : مش حا تقدر

* تسمع هبدة جامدة .

الحداية : اديله ! هبدة كمان !

* مكمكينو .. يستدير بعصبية ويدخل الممر

مكمكينو : طيب أنا حا عرف شغلي !
الحداية : "تبعه وهو داخل" يعمل إيه ده ؟

* يسمع صوت تخبيط مثل دق الشاكوش

مكمكينو : "من الممر" أنا حا عرف شغلي !
الغولة : "من الممر" إن ما وريتك ؟ !! إن ما انتقمت منك ؟ !
برضه حا كسر القفص .
الحداية : "صوت الدق مستمر" الله ! الله !

* يعود مكمكينو بسرعة . والغولة من الداخل تصيح "حا كسره"

مكمكينو : "وهو خارج" خلاص صلحت الباب .. خليها تخبيط زى
ما هي عايزة .. كل ما يجى ينكسر .. حاصلحه ..
حاصلحه !

الحداية : يابابى على برودك .. ما عندكش دم !!

مكمكينو : عندى بنزين !! "يسمع صوت الموتور" ياللا من هنا بلا
هوسة !

الحداية : طاوعنى أحسن لك .. افتح لها من سكات واحنا والله
نديلك اللي أنت عاوزه .. حانبسطك

مكمكينو : ده أنا اللي حا ديلك ضرب دلوقت عمرك ما دقتيه ..
تعالى هنا !!

* الجو مشحون بأصوات التخبيط من عند الممر .. ثم تبدأ محاوراة بين مكمكينو والحداية
. مكمكينو يجرى من هنا لهننا قائلا "تعالى هنا تعالى هنا".

الحداية : "تحاوره" حاورينى يا مساكة !

مكمكينو : تعالى هنا .. تعالى هنا تعالى هنا .. ثم يحدث شئ
لحركته فتبطئ وتنقطع فى حركات قصيرة متباعدة "
ت .. عا .. لى .. ه .. "ثم تقف حركته"

* مكمكينو يقف جامدا وسط الحوش

الحداية : ها ها ها .. جرى إيه ؟ خالص البنزين ؟ والا فضى
الزمالك .. إلا انت بالبنزين والا الزمالك ؟ يا ست
غولة !!

* نفطس من الضحك

الغولة : "من خارج المسرح" إيه يا حداية ؟
الحداية : "وهي تضحك" تعرفى حصل إيه دلوقتى ؟
الغولة : "من خارج المسرح" إيه ؟
الحداية : مكمكينو
الغولة : "من خارج المسرح" ماله ؟
الحداية : فضى .. وقف الزمالك نهائى .. اعمل لك فيه إيه ؟
الغولة : "من خارج المسرح" ها أو أو أو .. سيهولى !
الحداية : طب همتك بقى يا ست الغيلان .. وانتى خبطتين ثلاثة
تخرجى بالسلامة !
الغولة : "من خارج المسرح" الله يسلمك يا روحى !
الحداية : أنا حاغنى لك أهه .. أسليكى وانتى بتشتغلى ..
الغولة : "من خارج المسرح" غنى يا حبيبتى .. ردوا عليها يا اولاد
.. يا بورجل مسلوخة يا نداهة .. يا سبع .. يا ديب ..
باسماوى .. ردوا ع الحداية .. غنى ياختى غنى !

* تغنى الحداية

الحداية : الشاطر حسن أبو على فى الميه مع الجنية
الرد : "من خارج المسرح" يا حلوة
الحداية : خطفته والنبي خطفته وارتحنا من الرزية
الرد : "من خارج المسرح" يا براوه
الحداية : "من خارج المسرح" أبو على فى الميه
الرد : "من خارج المسرح" ها ها ها
الحداية : "من خارج المسرح" خطفته جنية
الرد : "من خارج المسرح" ها ها ها
الحداية : "من خارج المسرح" كسروا الأقفاص
الرد : "من خارج المسرح" ها ها ها
الحداية : "من خارج المسرح" ما خلاص ما خلاص
الرد : "من خارج المسرح" ها ها ها

الأعمال الكاملة للشاعر

- الحداية : "من خارج المسرح" وكمان تخبيطة
الرد : "من خارج المسرح" ها ها ها
الحداية : "من خارج المسرح" تهدهد الحيطه
الرد : "من خارج المسرح" ها ها ها
- * يستمر اللحن والشمس تغيب والمسرح يظلم رويدا رويدا وممكنينو واقف كالتمثال راسيا
ايد ومادد رجل ولا يتحرك .. فى الظلام الدامس يزيد الهدثم نسمع صوت تكسير
الغولة : "من خارج المسرح" آدينى خرجت لك يا ممكنينو
الخردة انت .. إن ما خليت كل مسمار منك فى حته
.. ما إبقاش أنا الغولة المهولة اللي فى الشراسة طالعة
الأولى !!
الحداية : ألف نهار أبيض يا ست غولة !
أصوات : "من خارج المسرح" افتجيلنا احنا كمان
الحداية : ما تفتحوا لنفسكم إن كنتم شاطرين !
الغولة : تعالى هنا يا سى ممكنينو بقى !
الأصوات : افتجيلنا "ثم هبدا من الداخلى وصرخات شيطانية
وبكاء"
الغولة : أنا جيت لك يا ممكنينو .. أخيرا !
- * فجأة يضاء النور كله يسكت ويسهم .. الشاطر حسن واقف وأيده على زرار النور
ممكنينو واقف كما لو كان بلا حراك بالطبع .. والغولة مائلة عليه ورافعة يدها لكى تضره
الغولة : يا امه .. الشاطر حسن ؟ جه ؟
الحداية : ج ج ج ج ج ج ج ج ج ج ؟
الشاطر حسن : أأأ آه .. عملنا فراخ "بعابب عليها"
الحداية : "لنفسها فى اضطراب" أععمل إيه ؟ .. أروح فىن ؟ ما
باعرفش أطير بالليل !
الشاطر حسن : ما تخافيش .. حاببت معاكى وطواط بوصلك !
الغولة : بسم الله الرحمن الرحيم .. يا سلامو سلم !
الشاطر حسن : لولا سلامك سبق كلامك لكنت لحمك قبل عضامك !
الغولة : "تسجد أمامه" فى عرضك يا شاطر حسن .. أنا ماليش
دعوة .. أنا ما عملتش حاجة!! "وتظل ساجدة"
الشاطر حسن : "يتجه نحو ممكنينو" ياه الزمبلك فضى ؟ .. مسكين يا
ممكنينو .. لازم أجهدت نفسك كثير !!

* يبدأ فى ملء الزمبلك

الشاطر حسن .. يا شاطر حسن .. أنا ولية كبيرة يا شاطر
الغولة : حسن .. فى عرضك ما تئذينيش

* شاطر حسن يملأ الزمبلك صامتاً

الشاطر حسن : "للهداية" الولد اللي غرق فى النيل .. طلع يا حداية
هانم!

الهداية : فيه سررررر .. فيه سررررر !

الغولة : أتوسل إليك !!

* الشاطر حسن يملأ الزمبلك ثم نسمع تبتنة على نغمة "أنا اسمى مكمكينو" ويبدأ مكمكينو
فى الحركة ويتجه فوراً نحو الهداية مكملاً نفس الذى كان قد وقف عنده وهو محاولة
إمسائه الهداية

مكمكينو : "مكملاً" تعالى هنا .. تعالى هنا .. أنا لازم أنتف

ريشك .. ولما يرجع الشاطر حسن أفرجه عليكى يا
مجرمة !

الشاطر حسن : أنا رجعت يا مكمكينو ..

مكمكينو : "للهداية" شفتى .. أهو جه ..

الشاطر حسن : وراها

الهداية : "تجرى على السور إلى ما وراء المنزل"

مكمكينو : "يجرى خلفها" حالا حا اقشها !

الشاطر حسن : "للغولة" غريبة .. إيه المسكنة اللي حطت عليكى مرة

واحدة دى ؟ انتى مش كنتى متزبنة دلوقت

وحاتكرى مكمكينو .. وهربانة .. إيه الانقلاب اللي

حصل فى أخلاقك ده ؟ ..

* الغولة تنتفض من الداخل

الشاطر حسن : آه .. ده لازم العفريت الأحمر اللي بلغتيه عمل

مفعوله !

الغولة : أنا ولية عجوزة .. أنا غلبانة يا اختى "تنتفض

بشدة"

* تقف وفجأة بنتعه واحدة تطول .. وبتنعة أخرى تقصر .. ثم تطول بنتعات متقطعة و ..

وتقصر بنتعات متقطعة .. وتستمر كذلك فترة والشاطر حسن ينظر إليها ويضحك

الغولة : "مع كل نتعة" يا اختى !! يا اختى .. يا اختى ..

الاعمال الكاملة للشاعر

ياختى ..

- الشاطر حسن : ها ها ها .. ده العفريت الأحمر .. مش قلت لك ؟
 الغولة : يا لهوى .. حوش يا شاطر حسن .. "مع كل نعمة"
 حوش .. حوش ..
 الشاطر حسن : طيب خلاص .. كفاية يا أحمر .. سيبها شوية !

* تهدأ حركتها وتقف وهي تنهج من التعب

- الغولة : يا دى الليلة اللي مش فايئة .. هو أنا كنت ناقصه ده
 كمان ؟؟

- الشاطر حسن : بقى كنتى عاوزة تهربى ؟؟
 الغولة : "وهى تنهج" أنا .. أبدا .. دى الحداية .. هى اللي

الشاطر حسن : هى اللي إيه ؟

- الغولة : هى اللي .. كانت "تنهج" عايزانى .. أهرب ..

الشاطر حسن : ليه ؟

الغولة : أكل عيش "تنهج وتنهج"

الشاطر حسن : إزاي ؟

- الغولة : "لا تزال تنهج" أصلى كنت ستها .. وكانت .. بتاكل
 .. معايا ..

الشاطر حسن : أعود بالله .. واللى كنتى بتاكله ده اسمه عيش ؟

الغولة : "تنهد" ايه كانت .. أيام .. "وفجأة تعود التتعات

القصيرة المتقطعة" يا اختى .. يا اختى .. يا اختى ..

ايه ده .. حوش .. حوش ..

مكمكينو : "من خارج المسرح" مسكتها يا شاطر حسن !

الشاطر حسن : "يلتفت إلى الغولة" استنى شوية يا عفريت يا أحمر

* تقف الغولة عن الطول والقصر وتعود للنهجان

* الشاطر حسن يخاطب مكمكينو .. حطها طيب عندك .. لما بقى نحنطها ونعلقها فى أودة

الجلوس .. حطها فى قفص.

مكمكينو : "من خارج المسرح" حاضر !!

الغولة : "مدعورة" وأنا .. حا تعمل فى ايه ؟ . حاتحنطنى ؟

الشاطر حسن : انتى إيه رأيك ؟ .. تفضلى كده أحسن .. يعنى نحنطك

.. والا تفضلى نعملك دواصة قدام الكنبة الكبيرة اللي

في الفسحة ؟

"بخوف" لأ .. والنبي .. أحرم !!
الغولة :

* يخرج مكمكينو من الممر

مكمكينو : حمد الله ع السلامة يا شاطر حسن .. انفسحت

كويس ؟

الشاطر حسن : حمد الله ع السلامة انت !

* مكمكينو ينظر إلى الغولة .. فيندهش

مكمكينو : الله ! .. إيه اللي خرج دى من القفص بتاعها ؟ أنا ما

كنتش باحلم بقى والا إيه ؟

الشاطر حسن : تحلم بايه ؟

مكمكينو : اتهبأ لى انى حلمت أنها كسرت القفص وخرجت

ما هى فعلا عملت كده !

مكمكينو : وأنا كنت فين ساعتها ؟

الشاطر حسن : ساعتها ؟ كنت راكن ! "للمتفرجين" كويسة دى ؟

مكمكينو : الله ؟ فيه حاجة أنا مش فاهمها !

الشاطر حسن : معلش تعيش وتاخذ غيرها !

مكمكينو : "سارحا وواقفا فى وسط المسرح كمن يكلم نفسه" الله !

دول كانوا بيقولوا انهم وقعوك فى كمين .. وخطفتك

الجنية - يبقى ده راخر صحيح ؟

الشاطر حسن : أيوه صحيح !

مكمكينو : "يتنبه" وقعت صحيح وغرقت ؟

الشاطر حسن : وقعت .. بس طلعت تانى .. قال على رأى المثل

مكمكينو : إيه ؟

الشاطر حسن : لأ .. ما فيش مثل على الحكاية دى .. آهو طلعت

وخلص ..

مكمكينو : ازاي

الشاطر حسن : بالنباهة بتاعتى .. والفهلوة .. والحداقة ..

مكمكينو : ولاد الإيه !! "يستدير" أنا رايح أموت الحداية دى حالا..

الشاطر حسن : لأ استنى "يقف" خليها نبقي نحنطها زى ما قلنا .. المهم

فى شيخة المنصر دى "يشير إلى الغولة"

مكمكينو : دى ؟ .. دى ؟ .. نعمل فيها إيه دى ؟ .. "يعلو صوت

الموتور من داخله"

الأعمال الكاملة للشاعر

الغولة : يا امه !!
 الشاطر حسن : مغلش يا مكمكينو .. روق دمك .. قصدى كرر بترولك!!
 مكمكينو : "يضحك" ها ها ها .. كويسة .. طيب نعمل فيها إيه ؟
 الغولة : "بخوف" تحنيط لأ .. تحنيط لأ "نتعة من الداخل" يا
 اختى .. "تطول" يا اختى "تطول" حوش يا شاطر حسن
 "تقصر" يا اختى !!
 مكمكينو : الله .. هي جرالها إيه ؟
 الشاطر حسن : "بانساط" ده صاحبك .. العفريت الأحمر .. اللي بلعته
 الصبح !!
 الغولة : يا اختى "نتعة" يا اختى "نتعة" يا اختى
 مكمكينو : "بمرح شديد" حلاوتك يا أبو حمرة .. ورينى كده يا
 خويا .. "يغنى" يالله الروك ويالله الرول اتشقلبوا
 ياولاد بلاذل ..

* الغولة ترقص على أنغام أغنية الروك أند رول مع العفريت الأحمر الذى بداخلها
 الشاطر حسن : ستوب !!
 مكمكينو : "يقف الرقص" أيوه يا فندم !
 الشاطر حسن : ما قلتيش .. نعمل فيها إيه ؟ جزاء لها على محاولتها
 الهرب .. ومحاولتها اغتيالى .. فى حكاية النيل بتاعة
 الصبح دى ؟
 مكمكينو : أنا رأيى نموتها .. ونطلع العفريت الأحمر من جواها

* يركع على ركبة ونص أمام الشاطر حسن ويرجوه
 والنبي .. أنا عاوزه !
 الشاطر حسن : لأ يا سى مكمكينو !
 مكمكينو : "ينهض" طيب بلاش
 الشاطر حسن : أنا باقول بعد التعديلات اللي حصلت فيها دى ..
 خسارة نموتها !!
 الغولة : آمال حا تعملوا فى إيه ؟
 الشاطر حسن : نديها هدية لسيرك الحلو .. تشجعا لفن السيرك فى
 الجمهورية العربية المتحدة!! دخلها القفص !!
 مكمكينو : "يضحك" أحسن فكرة .. يالله .. آلى هاب !!
 "يدفعها أمامه نحو الممر ويأخذ فى الغناء" يالله

الروك ويالله الرول .. اتشقلبوا يا ولاد بلا ذل ..

* يدخلان إلى الممر على أنغام رقصة الروك آند رول

الشاطر حسن : "وحده" ياه !! كان الواحد خارج الصبح قال إيه

أجازة !! شوف دلوقت انتهى اليوم على إيه ؟.

حدوته جديدة من حواديت الشاطر حسن .. قال

على رأى المثل "بين البداية وبين النهاية لازم

ضرورى تحصل حكاية" .. المثل ده قاله راجل عظيم

. باحمل له فى قلبى أعظم تقدير هو أنا!! "

ينادى مكمكينو" !!

"يدخل الحوش" أيوه جاى !!

مكمكينو :

تعال بقى دلوقت نجيب الحاجة اللي أنا سايبها بره

الشاطر حسن :

لا أحد يلطشها !

* يتجه نحو باب الخروج .. ومكمكينو خلفه

حاضر.

مكمكينو :

"وهما يخرجان من المسرح" تعجبنى منك قوى قولة

الشاطر حسن :

حاضر دى !!

* المسرح فاضى فى هذا الوقت

"من خارج المسرح" ليه ؟

مكمكينو :

"من خارج المسرح" اسكت أنت !

الشاطر حسن :

"من خارج المسرح" حاضر ! "بدهشة" الله ! إيه دى ؟

مكمكينو :

حاجة عجيبة

"من خارج المسرح" زق انت من هنا وأنا حاسند من هنا

الشاطر حسن :

!

"من خارج المسرح" حاضر !

مكمكينو :

"من خارج المسرح" هات بقى على كده ؟

الشاطر حسن :

"من خارج المسرح" حاضر !

مكمكينو :

"من خارج المسرح" زق الناحية دى

الشاطر حسن :

"من خارج المسرح" حاضر

مكمكينو :

"من خارج المسرح" هات .. هات .. "يدخلان إلى

الشاطر حسن :

المسرح وهما يدفعان اناء للسملك به الجنية" هات ..

هات .. بس بقى هنا ..

- مكمكينو :
ليه .. مش حندخلها جوة مع بقية الشلة ؟
الشاطر حسن :
لأ .. نحطها هنا ..
مكمكينو :
ليه ؟ ما نخليها جوة .. علشان يبقى كله مع بعضه .. الجنية
ع الغولة فى الكانى ع المانى !!
الشاطر حسن :
لأ .. خليها هنا .. !
مكمكينو :
أنا باقول يعنى لو ندخلها جوه
الشاطر حسن :
يا سلام يا مكمكينو .. اسمع الكلام !! الحدوته اللى احنا
بنمثلها دى معناها إن كل شئ تحت أمر الإنسان .. اللى
هو أقوى من العقاريت والجبن والغيلان .. وكل
الخزعبلات دى .. وإن الإنسان اللى هو أنا .. مسيطر على
الآلات اللى هى حضرتك ..
مكمكينو :
متأسف !
الشاطر حسن :
تقوم الآلات عاوزه تمشى كلامها على الانسان ؟
مكمكينو :
لأ
الشاطر حسن :
طيب .. هات هنا ..
مكمكينو :
حاضر
الشاطر حسن :
كمان شويه
مكمكينو :
حاضر
الشاطر حسن :
اقف كويس
مكمكينو :
حاضر "يقف معتدلا"
الشاطر حسن :
اضررب سلام
مكمكينو :
حاضر "يضرب سلام"
الشاطر حسن :
"للجنية" وانتى يا جنية.
الجنية :
أيوه يا أفندم
الشاطر حسن :
اضرربى سلام
الجنية :
حاضر يا أفندم "تضرب سلام"
الشاطر حسن :
"يستدير إلى الجمهور ويرفع يديه إلى أعلا" قال على
رأى المثل !!

مسرحية حمار شهاب الدين

الفصل الأول

الوقت: في الصباح

المنظر: منزل الحطاب شهاب الدين

* الحطاب ومعه حماره محملا بالحطب في طريقه إلى الخروج - وابنته ريحانة تودعه.
الحمار يخرج أولا من الباب يبقى شهاب ليكمل حديثه مع ابنته.

ريحانة: طريق السلامة

شهاب: أفوتك بخير

ريحانة: ماتنساش يا بوبا الجماعة الليلا دي ح ييجوا

شهاب: (مقاطعا) في ساعة الغروب نهايته

حكاية ونقطع دا برها وخلص

ريحانة: عشان خاطر ك أنت يا بوبا.

حطاب يتجه نحو الباب ثم يعود إلى ابنته.

شهاب يدلل ابنته وتخرج كلمة (يا ألف نهار أبيض) كأنه يقول (تشجعي)

شهاب: (مدللا) بقيتي عروسة؟

يا ألف نهار أبيض

وجاي الليلا دي العريس؟

يا ألف نهار أبيض

وكتب الكتاب الخميس؟

يا ألف نهار أبيض

ريحانة: يو بابا .. أنا باتكسف!

شهاب: يا ألف نهار أبيض!!!

"حمار في الخارج يرفع عقيرته بالنهيق.

شباب يلتفت نحوه؟

صوت نهيق الحمار"

شهاب: "للحمار" ح نمشى .. ح نمشى.
"بحزن" بتستعجل المشى ليه أنت راخر
"لريحانة" حمار!
ما هوش عارف المشى إيه معنته
"برقة" يا عيني .. حمار .. قسمته
ريحانة:

* شهاب وريحانة يضحكان والحمار ينهق.

* شهاب يخرج للحمار ضاحكا ويسجبه.

"صوت نهيق الحمار"

شهاب: "ضاحكا" أفوتك يا بنتى بخير وسلام
ريحانة: "ضاحكة" طريق السلامة
تعال قوام

* المنظر: الطريق بين كوخ الحطاب وبين مدينة بغداد .. غابات .. مروج .. جبال ...
حقول

* شهاب والحمار ماشيان.

شهاب: حمارى العزيز. يا حمارى العزيز
يا سيد الحمير يا أمير يا لذيذ
عاشرتك سنين
لقيتك مؤذب وشهم وذكى
ولا تشكى
وتخدمنى زى العبيد اللى عند هارون الرشيد
وتصحنى زى الوزير جعفر البرمكى
تمام .. أنت فعلا وزيرى
فى مملكتى فى الغابة وسط الشجر
نهايته ..
حكايك معايا حكاية
لكين كل شئ له نهاية
ولايد من فرقة الأصدقاء
ودلوقت يا حمارى آن الأوان للفراق
ح ابيعك

* تظهر أسوار بغداد عن بعد.

أنا شخص حطاب فقير
وأحبيب مال منين للفرح والجهاز.
مفيش غير ابيعك .. سامعني؟
في بغداد .. في سوقها الكبير.

تبدأ الموسيقى المعبرة عن بغداد والتي تعتبر افتتاحية أو مقدمة أغنية بغداد .
* "حطاب والحمار يتجهان إلى بغداد.

أنا كبرت والبنت لازم تعيش جنب راجل سامحني
أنا كبرت والعمر قرب يفوت
وبغداد أهه! ح ابيعك .. وأتمم جميلي .. وأمورت

* الحطاب والحمار يختفيان وتظهر مشاهد معبرة عن الحياة في بغداد

"وزن جديد"

"أغنية بغداد"

كورس:
بغداد .. بغداد بغداد أهه يا ولاد
بغداد .. بغداد هنا هنا المزاد

"ضحكات"

* مناظر تعبر عن بغداد.

بغداد أم العجايب بغداد أم العجايب
حيطانها طوبه فضة وطوبه من ذهب
بغداد يا محلا ذوقها والشمس قبه فوقها
وشوارعها وطرقها مفروشة بالسجاد

"ضحكات"

بغداد

* مناظر تعبر عن بغداد حتى نصل إلى السوق .. مناظر الدكاكين والنصبات.

بغداد الألف ليلة حدوتة شهـرزاد
ياما فات منتحت بابها بلاد وبلاد وبلاد
كل العالم وكنوزه دكاكين بغداد تحوزه
واللي تعوزه وما تعوزه تلاقيه في سوق بغداد

الأعمال الكاملة للشاعر

"ضحكات"

بغداد

* دكان تجار حرير.

أنا نبيع الحرير تاجر:

* نصبة تاجر رقيق.

وأنا نبيع الجوار تاجر:

* دكان جواهر جي.

وأنا نبيع الجواهر تاجر:

* نصبة عطار.

وأنا نبيع البهار تاجر:

* بائع يحمل على رأسه حمل شمع.

وأنا نبيع الشموع تاجر:

* نصبة تاجر لوازم سفر.

وأنا نبيع القلوع تاجر:

* دكان تاجر أسلحة.

وأنا نبيع الدروع تاجر:

* شهاب يخرج من بين نصبتين ويمر بالسوق مناديا على حماره.

شهاب: وأنا أبيع الحمار!

مين يشتري الحمار ده

يا حضرات التجار

أنا محتاج النهاردة

لقرشين باختصار

مين يشتريه حمار

ياللى عاوز حمار

حمار .. حمار .. حمار

* التجار يتغامزون عليه.

"التجار يضحكون"

تاجر (1): أما راجل مغفل
تاجر (2): عقله بينه طار
تاجر (1): فيه حد فى الزمن ده
يقول العال يا حمار؟
تاجر (2): روح للدلال يا راجل
يعنى روح للسماز

"الأغنية"

شهاب يسحب الحمار إلى حيث أشار له التجار. على أنغام مذهب الأغنية.
شهاب يصل إلى كرسى فى الطريق العام وفوقه يافطة مكتوب عليها "حنجل الدلال".

"مذهب الأغنية"

بغداد بغداد
بغداد أهه يا اولاد
بغداد بغداد

حنجل: هنا هنا المزاد

"فنتهى الأغنية"

شهاب يتوجه إلى حنجل بالحديث.

شهاب: يا حنجل يا دلال
حنجل: عايز ايه يا شهاب الدين
شهاب: أنا لازمنى مال

وجيوبى منفضين
وحمارى معايا أهوا
فيه لسه بعض قوة
اعمل معروف ومره
بيعهولى بالحلال

حنجل يقف باهتمام ويدور حول الحمار والحطاب

حنجل: حلال والاحرام
شيل حطبك من عليه
يا الله اتحرك قوام

الأعمال الكاملة للشاعر

وربني شكله ايه.

كورس التجار: ياالله اتحرك قوام .. وربنا شكله ايه

* شهاب يبدأ فى إنزال الحطب من على الحمار، شهاب يسحب الحطب من على الحمار.

* الحطب يسقط على الأرض.

* حنجل يشير إلى الحمار بامتعاض واحتقار. الحمار نحيف جدا وفي حالة يرثى لها ..

شهاب: أهه

أهه

حنجل: "ممتعضا" عايز؟ .. تبيع؟ .. دهه؟

كورس التجار: هاها هاها هاها هاها

* شهاب يقف مرتبكا وحنجل يتجاهله.

* تاجر الرقيق ينادى على جارية.

التاجر: دى جارية شركسية

عينها عسلية

وأيديها مهلبية

وتغنى أمان أمان

الجارية: أمان أمان أمان أمان

* شهاب يترجى حنجل.

شهاب: يمكن ربك سهل

حنجل: ده نحيف خالص ومدهول

كورس التجار: هاها هاها هاها هاها

* شهاب يذهب خلفه راجيا حنجل يجلس على الكرسي باهمال.

شهاب: معلش إعملها خدمة

حنجل: ده جلده على عضمه

كورس التجار: هاها هاها هاها

* بائع الحرير ينادى على بضاعته.

تاجر: هنا حرير دمشقى

وخز اصفهانى

قيراط قيراط منقى
على زوق المعجباني
ست الملاح قربي وشوفي واستغربي

شهاب ينحنى أمام الدلال راجيا حنجل يستدير فى الكرسى ويعطيه ظهره.

شهاب: أعمل فيها الجميل ده
حنجل: ده عضمة على جلدة
كورس التجار: هاها هاها هاها هاها

شهاب يعتدل فى يأس ملقيا ذراعيه فى عتاب للزمن.

شهاب: "بحزن" وبعدين يازمن
حاجة تسم البدن
حتى الدلال مش راضى

حنجل يستدير إليه ويقف على قدميه رافعا يده - بشروط المبيع.

حنجل: "مقاطعا" إلا بنص الثمن!
شهاب: إزاي نص الثمن؟
حنجل: نص الثمن عمولة
علشان دى بيعة صعبة
عاويزة قوة مهولة
وإلا أنت فاكرها لعبة؟

شهاب يجلس على الحطب مستسلما.

شهاب: "بيأس" لعبة وإلا ما لعباشى
اللى ح تقوله ماشى

حنجل يقف فوق الكرسى ويبدأ عملية البيع ربما كان فى يده جرس فيبدأ فى قرعه ..

"وزن جديد"

أيوه يا شيخ العرب قرب وشوف
شوف جمال الوقفة شوف حسن القوام

المشترى: دى بكام؟
حنجل: صاحبه كان أصله شاربه بميت دينار!
المشترى: ميت دينار

الأعمال الكاملة للشاعر

* شهاب يقفز من مكانه إلى جوار حنجل.

* حنجل يزقه بعيدا ويوجه الكلام إلى المشتري.

شهاب: ميت دينار ازاي يا راجل

حنجل: اسكت انت

أيوه يا شيخ العرب .. بميت دينار

شهاب: ليه ؟ هو حد يشتري حمار زي ده بميت دينار؟

* شهاب يزق حنجل بعيدا ويوجه الكلام إلى المشتري.

* حنجل يطلع فوق الكرسي.

دول خمس دنانير ما يستاهلش غيرهم

حنجل: اسكت انت

شهاب: مش راح اسكت!

تشتريه بخمسة يا شيخ العرب؟

المشتري: لا .. ماليش غرض خلاص ..

يفتح الله

شهاب: ليه كده.

* المشتري ينصرف ..

* حنجل يتزل من على الكرسي.

* حنجل ينظر بغيظ إلى شهاب.

المشتري: اللي بيخس حق حاجته .. تبقى لازم مش بتاعته

شهاب: يعني إيه؟

المشتري: يعني بالعربي سارقها!!

"صمت"

* حنجل يذهب إلى شهاب بغيظ مكتوم

حنجل: شفت يا سخام البرك عملت إيه؟

يعني لازم تسجلي من لسانك؟

* شهاب يحاول شرح موقفه ورأيه.

شهاب: الحقيقة يا حنجل الدلال حقيقة..

* حنجل يجن جنونه.

حنجل: انكتم .. فلقتنى.

شهاب يحاول إقناعه بالاشارات .

شهاب: "يشير بيديه إشارات صامتة"

التجار: راجل عبيط .. راجل حمار .. ضيع عليك شغل النهار

حنجل يذهب ويجلس على كرسيه.

حنجل: "بهدهوء" هات بقى عمولتى .. وغور من خلقتى

شهاب: وانت بعث عشان ما تستاهل عمولة؟

حنجل ينهض مصمما على أخذ الحطب.

حنجل: أنا قلت كلام بيع سبعين حسان

مش حمار واللى ضاع من وقتى كان يسوى ذهب

وعشان ما يضيعش غيره باختصار

"ينهض" أنا ح أخذ الحطب

التجار: أيوه ياخذ الحطب .. هى فوضى؟

شهاب يعترض طريقه.

شهاب: يعنى إيه تاخذ الحطب يا أونطجى

حنجل يوقفه من طريقه.

حنجل: علشان ما معاكش غيره بافقرجى

شهاب يعترض طريقه مرة أخرى.

شهاب: الاتفاق كان العمولة من التمن

حنجل يزيحه ويستولى على الحطب.

حنجل: هو دى شئ عمره يتباع يا بجم؟

أنا ح اخذ الحطب

يعنى ح اخذ الحطب

ضحكات التجار عالية تختفى شينا فسينا.

ويخفت الضوء وينعزل شهاب بالضوء.

التجار: هاها هاها هاها هاها

الأعمال الكاملة للشاعر

* شهاب يتحرك بضع خطوات حتى يخرج من ديكور حنجل ثم يقف مع الحمام ويقلع
ناحية حنجل.
"صمت"

شهاب: امرنا لله .. ح نعمل ايه بقى ..
اتخلقنا للشقا

روح يا حنجل
ربنا يؤاخذك يسامحك هو حر

* شهاب يشكو للسماء.

* يتلفت حوله والظلام يخيم على السوق.

* الظلام يخيم بالتدريج.

إنما أنا اتظلمت
"للسماء"

ياسماء .. أنا اتظلمت

بعده .. مالك ياسما

ليه بقيتى معتمة

الظلام خيم وليل الويل دخل

وأدى سوق بغداد قفل

ما بقاش نقطة أمل

* شهاب يمشى ببطء عائداً إلى منزله.

ياالله يا حمارى العزيز نرجع سوا

واحدة واحدة فى الهوا

لسه برضه لينا قسمة نمشى تانى واحدة واحدة فى الهوا

* مناظر الطريق فى الليل.

* شهاب يتوقف كثيرا ويتلکأ.

أمرى يا صاحبي عجيب

نص قلبى فيه فرح علشان ما حدش اشتراك

أما نصه التانى فيه حزن وألم

حزن على ربحانة بنتى

العريس وأمه زمانهم عندنا

فى انتظارى بالفلوس

والفلوس آدى انت شايف عندها
زى ماتكون حالفة ماتجيش ناحيتى

* حمار يخاطب شهاب لأول مرة.

"وزن جديد"

الحمار: معلش يا عم شهاب

* شهاب لم يلاحظ أن الحمار كلمه يستمر فى الحديث ثم يتنبه فجأة.

شهاب: بلا معلش بلا هباب

حاجة ترهق وت

إيه ده؟

مين اللى اتكلم دلوقتى؟

* شهاب يرتد مدعورا.

الحمار: ما تخافش يا عم شهاب

ده حمارك بس اللى اتكلم

شهاب: انت حمارى؟

الحمار: أيوه يا أفندم

شهاب: وبتكلم؟

الحمار: أيوه يا عم

* شهاب يرتعش ويلف المسرح متفهما والحمار يتبعه ويحاول تهدئته.

شهاب: بسم ال .. بسم ال .. بسم ال

الحمار: ما تخافش يا عم شهاب الدين

شهاب: بسم ال .. بسم ال ..

الحمار: يا ابو عقل رزين

شهاب: بسم ال .. بسم ال ..

الحمار: اركز حبة ..

شهاب: ابعده عنى .. عفريت .. النجدة.

الحمار: بس اسمع بس يا عم شهاب واهدأ

* شهاب مستمر فى التفهق والحمار يتابعه . شهاب يقطع النفس والحمار يزنقه فى شجرة.

شهاب: النجدة

الأعمال الكاملة للشاعر

الحمار: دهنه .. ما تهدأ

شهاب: عفريت يا ولاد.

* الحمار يندفع فى الكلام متأثراً .. إلى درجة أنه يبكى ..

* الحمار يستدير ويبكى بعيداً عن شهاب .

* شهاب يلتقط أنفاسه ويقرب من الحمار مواسياً.

الحمار: اسكت لا يحونا بتوع بغداد

اسمعى ..

دانا ليا حكاية تبكى يا عم شهاب

لو أقولها لك "يبكى"

"يبكى"

* شهاب يطبطب على الحمار.

شهاب: طب .. ما تعيظش خلاص مش خايف منك .. قول

"لنفسه" ولو أن ده برضه مش معقول!

* الحمار يقفز فوق صخرة عالية ويحدث شهاب الدين.

الحمار: أنا أصلى يا عم شهاب بنى آدم شاب وزى الورد

شهاب: بنى آدم؟ .. شاب؟ .. وزى الورد؟

الحمار: أمال .. ومعنى كمان

شهاب: أنت معنى؟

الحمار: أيوه معنى

واسمى الفنى

حسونة حسن سنن حسان

والشهرة حسن كروان

والاسم الرسمى حسن

شهاب: الله الله الله الله

الحمار: "يغنى" ياليل ياليلى يا عينى ياليل ياليل يا عين

* شهاب يجلس على الحشائش لسمع الغناء.

شهاب: لأ والله معنى ياواد

صلاح جاهين

* الحمار واقف فوق الصخرة وفرعان من النباتات المتسلقة يحفان به من كلتا الناحيتين بحيث تبدو الصخرة كالمسرح.

* الحمار يغنى ويتخذ أوضاعاً مثل المغنيين المعروفين .

الحمار: " يغنى "

حسن المغنى أنا وايش غيرك يا زمان
من بعد غمز الوتر والدق ع العيدان
صبحت حالى عدم يصعب على الكافر
صدق اللى قال يا زمن انك مالکش أمان

* شهاب يضحك ويهيب واقفا من الانفعال.

* شهاب يضحك ويدور حول نفسه بهرج ومرج شديدين ثم يلتفت إلى الحمار ويسأله بحنان عن سبب وكسته.

شهاب: الله! " يضحك "

أى والله وعشنا وشفنا حمار كمان بيغنى

ها أو مع أن الواحد طول عمره

بيشوف فى مغنيين أصلها لا مؤاخذه حمير!

"إلى الحمار"

وانت اللى جراك ده من إيه يا حسن يا بنى ؟

الحمار: من ظلم الناس

شهاب: ما تفكر نيش بالناس

* الحمار يبدأ فى رواية قصته.

الحمار: ناس جولى يا عم شهاب ونادولى عشان حفلة

قال تاجر بيجوز بنته

فى بلد غير بلدى بعيد

وقالولى

أجرك عارفينه ومضمون فى الإيد.

وأنا أجرى كبير

شهاب: طبعا طبعا

الحمار: لا قاوت ولا اتكلمت وقمت سافرت

أتاربيهم إيه

شهاب: إيه؟

الأعمال الكاملة للشاعر

الحمار: ولا تجار ولا حاجة .. وجماعة غجر
شهاب: يا خبر!!
الحمار: م اللي بتسرق وتشوف البخت وتسحر وتحضر عفاريت
شهاب: يا حفيظ يا مغيث

* فقرة "غنيت غنيت فن ما خليت"

تلحن بطريقة مغنيين زمان وتعبر مع الصورة الخلفية عن وضع المغنى حسن فى القصة باختصار

الحمار: غنيت غنيت
فن ما خليت
وف آخر الليلة رمولى دينار
شهاب: قلت لهم إيه ؟

* ردود شهاب يستحسن أن تكون على طريقة ردود الكورس فى أغانى عبد الحلليم حافظ الحديثة. فيكون المشهد بمثابة مداعبة لهذه الأغانى فى نفس الوقت.

الحمار: قلت لهم عيب
شهاب: الكذب حرام .. والظلم حرام
شهاب: معلوم
الحمار: الكذب كدبتو عليا وقتلنوح نديلك أجرك
وعملتو عليا من التجار
وانتو حرامية لصوص أشرار
والظلم ظلمتوني ف فنى
وأنا قاعد ليل طوله بغنى
فن ما خليت
ورفعت ف وسط بلدكو مقام البيت
ترمولى دينار
يا سفلة يا دون يا بتوع الزار ؟
شهاب: يسلم فمك!

* مناظر فى الخلفية مع موسيقى تصويرية مرعبة.

الحمار: أنا قلت كده
واتلموا عليا يا عم شهاب

واقفل الباب

شهاب: يا مـي

* على مقدمة المسرح الأمامية ظهر ساحر طويل القامة وساحرة فى الناحية المقابلة وهما
يمدان أيديهما إلى الأمام مع الموسيقى المرعبة.

الحمار: ووقف لى عجوز منهم شايب

وولية عجوزة معاه

وعنيهم هم الجوز بتطق شرار

قال السحار

* إلى أن تسكت ويرتفع صوت الساحرة.

* الساحر يخرج دخانا من فمه وصوته أجوف.

الساحر: يا حسن يا مغنى

ياللى بتشتم وتقول الكذب حرام والظلم حرام

اسمع دول منى

واندم طول اللى فاضل لك من سود ليام

* هذه الفقرة عليها تركيز خاص.

يا حسن يا مغنى

اخرج م الصورة البشرية

وادخل فى الصورة الحمارية

* الساحرة تبدأ فى الكلام.

* النور يركز عليها

الساحرة: يا حسن يا مغنى

أنكر أصوات دلوقت ح تخرج من حنجرتك

حاول .. هاها .. جرب حنجرتك كده ورينا شطارتك

* الساحر يتكلم "النور عليه".

الساحر: مكتوب لك كده تفضل على طول حيوان أبكم ولا يمكن

أبدأ ترجح تتكلم

* الساحرة تتكلم "النور عليها".

الساحرة: غير بس بهذا الشرط

الأعمال الكاملة للشاعر

لو كان ياخذك واحد صادق ما يقولش الكذب
واحد يتكلم صدق ولو صدقه يضره

* النور على الساحر

الساحر:

ولا يمكن أبدا ترجع هيئة بنى آدم

* النور على الساحرة

الساحرة:

غير بس بهذا الشرط

لو تتقابل مع قاضى يكون يحكم بالعدل
قاضى يحكم بالعدل ولو مرة ف كل حياته

* هذه الفقرة لها أهمية خاصة.

الساحر: والصدق محال

والعدل محال

خليك فى الصورة الحمارية . !!

* تنطفى الأنوار على مقدمة المسرح ويختفى الساحر والساحرة.

كورس:

خليك فى الصورة الحمارية.!!

العدل محال .. والصدق محال

خليك فى الصورة الحمارية!?

* تضاء الأنوار كاملة على المسرح ويستأنف الحمار حكايته مع شهاب.

الحمار:

وقضت ياعم شهاب فى الصورة الحمارية

أخرس

ما نطقتش غير بس على ايديك

لما انت صدقت مع الدلال

والصدق بتاعك ضرك

أنا دغرى لسانى أتحرك

يا سلام .. أما حكاية عجيبة!

شهاب:

الدنيا لسه بخير

الحمار:

فين هو الخير يا بنى

شهاب:

البنيت جوازها مغلبنى

وأنا ح أعمل إيه ..

الحمار: أنا أقول لك

رجعنى لصورتى البشرية

شهاب: إزاي؟

الحمار: ودينى لقاضى يكون عادل

يحكم بالعدل ولو مرة ف كل حياته أرجع إنسان ..

ومغنى شهير وأديلك مال يغنيك

شهاب: فكرك ينفع؟

* الحمار تتابه حالة من المرح والرقص والغناء - ويؤدى هذه الفقرة كلها راقصا مغنيا.

الحمار: أمال

مش أول شرط اتحقق؟

وبقيت أتكلم وأنطق؟

من بعد ما كنت بانهب؟

الشرط الثانى كمان يحصل .. ليه لأ.؟ خلاص أنا

عندى أمل .. أنا عندى أمل

وأنت اللي فتحت الباب

يا حبيبي يا عم شهاب

ميت فل عليك

شهاب: تشكر

بس أنا راح أجيب لك قاضى منين

وكمان يحكم بالعدل

ده احنا فى القرن التاسع .. الهجرى

فيه قاضى ف وقتنا هذا بهذا الشكل؟

* الحمار يتخذ هيئة الجد والتصميم.

الحمار: تخلق واحد من تحت الأرض

شهاب: إزاي؟

الحمار: اسمع .. جنجل مش واخذ منك حطبك من غير حق

قيم بكرة قضية عليه

والقاضى نشوف شغلنا وباه

لازم يحكم بالعدل

الأعمال الكاملة للشاعر

* شهاب يرحب برأى الحمار ويرقص حوله فرحا.

شهاب: حسونة حسن سنسن حسان

والشهرة حسن كروان

والاسم الرسمي حسن

ماشى كلام الجدعان

* يقتربان من المنزل.

* شهاب والحمار ماشيان في الطريق إلى المنزل.

الحمار: قربنا البيت .. خد بالك كتم ع الموضوع

والصبح نشوف تدبير

شهاب: السرف بير

الحمار: أنا برضه حمار وبانهق زى العادة مفيش تغيير

شهاب: مفهوم

الحمار: "حالما" ومنايا شوية تبين وفول وشعير

طعمين ..

تدلقيهم ربحانة قصادي

بأيديها ال

* يختفيان في منعطف أو يظلم المسرح ومنتقل إلى مشهد آخر.

شهاب: "ينظر مستغربا"

الحمار: "مستدركا" بأيديها لتنين!!!



الفصل الثانى

* المنظر: منزل الخطاب شهاب الدين ولكن الوقت ليل. على أحد المقاعد تجلس أم العريس.

ريحانة تنظر من النافذة العريس يحوم حولها .. العريس يلتصق بريحانة.

أم العريس : الدلعدى مش غاب قوى؟

ريحانة : قلقانة والله عليه ياخالتي .. أصل مش عادته الغياب

العريس : مين هو يامه ؟

أم العريس : الدلعدى .. عمك شهاب

العريس : غاب غاب هئى هئى .. أدحنا قاعدين مبسوطين

* ريحانة تبتعد عن العريس.

ريحانة : بعدين معاك ..

اقعد هناك

* ريحانة تذهب إلى النافذة وتنظر منها ثانية.

العريس : ريحانة .. بس تعالى .. عندى كلمة سر

ريحانة : استنى قلها لما نكتب الكتاب

العريس : أمى

أم العريس : نعم

العريس : امتى ح نكتب الكتاب ؟

أم العريس : لما الأوان يؤون ح نكتب الكتاب.

العريس : ليه ؟ .. هو مش يوم الخميس ؟

* ريحانة تلتفت من النافذة يدخل شهاب الدين.

ريحانة : أبويا جه !

شهاب : مسيكو بالخير يا عريس بنتى وست أم العريس ..

ريحانة .. كيف حالك.

الأعمال الكاملة للشاعر

ريحانة : بخير

أم العريس : أهلا يا عم شهاب تعال قل لنا

ريحانة : إزاي حال السوق ؟

* صوت تنهيق الحمار ثم يطل الحمار برأسه فقط من الباب.

"يسمع تنهيق الحمار من الخارج"

الجميع : ما بعش الحمار ؟!

* أم العريس تهب واقفة بغضب.

أم العريس : يا مصيبي ياختي علادى خيبة متلثة !

طب والعمل

وفلوس جواز بنتك و .. وصندوق الفرخ

ونحاسها .. والذى منه .. وقيمبها الحرير

شهاب : صبرك ياست الناس وبكره نعلها

* أم العريس تندفع نحو الباب.

أم العريس : ما اصبرش أكثر من كده

دى جوازة باينة مسددة

قوم يابنى قوم

* العريس يندفع نحو ريحانة ويشبط فيها.

العريس : ونمالى هه .. أنا عايز أتجوز قوام

* الحمار يراه شابطا فى ريحانة فيغار مكانه عند الباب ويدخل المكان مندفعاً وهو

"يقمص" ويدخل بين العريس وريحانة.

العريس : يامى

* الحمار يختص أم العريس أيضا ببعض المعاكسات.

أم العريس : ياباى !

تعال ياروح قلبى أنا
يا خونا ما تحوشوا الحمار ده من هنا
ده زى ما يكون راكبه قرد

* الأم تحمى ابنها الذى يختبئ وراء ظهرها.
شهاب : لازم جعان
خديه ياريحانة اربطيه
حطى له ميه ووكلية

* ريحانة تدفع الحمار أمامها إلى باب الزريبة وتدخله فيها برقة.
* عندما يمر من أمام أم العريس تجفل منه.
* العريس واقف مبلم وناظر إلى الباب الذى دخلت منه ريحانة مع الحمار إلى الزريبة
وهى تحتل جزءاً من المسرح يظهر فيه الحمار وهو يتمسح فى ريحانة ويشمشم فيها
بحنان.

أم العريس : جت ده البلا "شهاب"
مش كنت بعته وجبت حقه نهينا بيه المسألة
شهاب : معلش
أم العريس : والا عليه .. تعال ياوله
الله .. تعال ياوله

* العريس يستدير ويمضى مع أمه.
شهاب : أنا جاى وياكم .. ونتكلم شوية فى الطريق

* العريس وأمه وشهاب يخرجون وتسمع صوتهم وهو يتعد.
* ريحانة تخرج من الزريبة وتقف على بابها. الحمار يخرج من الزريبة فيجدهم خرجوا
فيذهب إلى الباب ويطل برأسه خارجا
* الحمار يدير رأسه ناظرا من فتحة الباب كمن يقول فى سره "الله يلعن أبوكم ياولية انتى
وابنك".

ريحانة : قال آيه رضينا بالهموم
وهي مش راضية بنا ..
آه م الفلوس

"أصوات"

العريس : ونمالي هه .. أنا عايز أتجوز بأه
أم العريس : ح أجوزك .. ح أجوزك
العريس : ونمالي هه .. ياتجوزيني يامش
قاعد لك .. بس هه
أم العريس : ح أجوزك .. ح أجوزك
العريس : ونمالي هه
شهاب : الصبر طيب يا عريس
العريس : ونمالي هه ..

"تختلفى الأصوات"

* الحمار يظل ناظرا برهة بعد اختفاء الأصوات ثم يستدير في بطاء عائدا إلى الزريبة على
أصوات مقدمة الأغنية التي ستغنيها ريحانة .. الحمار يمر بريحانة فلا تعيره التفاتا وتظل
واقفة وقفها الحزينة الثابتة.

* الحمار يدخل الزريبة ويبقى فيها بينما تبدأ ريحانة في الغناء.
* ريحانة تغنى.

ريحانة : يا بختك المايل يا ريحانة
يا حزينة من دون البنات يانا
لو كان أبويا إيدته دقيانة
مش كان زمان الفرحة ملو الدار

* الحمار يرد عليها من الزريبة ريحانة تبحث في أنحاء المكان دون أن يخطر ببالها أنه هو
الذي يغنى.

الحمار	بوجودك انتى الفرحة ملو الدار
ريحانة :	"لنفسها" ده بس قال بيقول كده وكده
الحمار :	الفرحة رايحة لحد سابع جار
ريحانة :	"لنفسها" حسه جميل .. ده مين ده ياختى ده ؟

* ريحانة تفتح باب المنزل وتخرج لتبحث فى الخارج.

الحمار :	يا أجمل الأزهار يا ريحانة
	ماتدبليش يا أجمل الأزهار

* ريحانة تدخل إلى المنزل جارية فى خجل.

ريحانة :	يامى أنت مين يامى
	واش عرفك اسمى

* الحمار من الزريبة فى حالة من الهيام الشديد.

الحمار	اسمك يا ريحانة
	مكتوب على جيبنى
	يا أحلى إنسانة
	أنا شفتها بعينى

* ريحانة تعاود بحثها بلا جدوى تحدث بعض الخدع أول الحيل بحيث تلتقى به وجها

لوجه ولكنها لا تعرف أنه هو الذى يعنى.

ريحانة :	طب انت مين ؟
الحمار	خادم أمين
ريحانة :	طب انت فين ؟
الحمار	على خطوتين
ريحانة :	على خطوتين لكن مانيش شايفك
الحمار	"لنفسه" انشا لله ياختى ما تشوفيش وحش
ريحانة :	مش شايفة غير الضلمة م الشباك

الأعمال الكاملة للشاعر

الحمار "لنفسه" الحمد لله مش ح نتقفش

* ريحانة تنظر من النافذة وهى سرحانة.

ريحانة : كان فيه قمر .. واتدارى عنى هناك.

ورا سحابة ثقيلة كسلانة

* الحمار يدخل رأسه من باب الزريبة إلى داخل المنزل ويقول جملتيه.

الحمار بكرة القمر يطلع

يا حلوة وبللع

* ريحانة تلتفت من النافذة.

* الحمار يسحب رأسه بسرعة فلا تجد ريحانة شيئاً.

ريحانة : يطلع منين يا غريب

الحمار : من ضحكنتك انتى

ريحانة : واضحك منين يا غريب

الحمار : من كتر ما حزننتى

* ريحانة تعاود البحث مرة أخرى.

ريحانة : طب انت مين ؟

الحمار : خادم أمين

ريحانة : طب أنت فين ؟

الحمار : على خطوتين

* ريحانة تجلس فى المنزل وتكف عن البحث.

ريحانة : حسك جميل وعاجبني مهما تكون

غنى لى غنى يابو حس حنون

لولا الغنا عمر الزعل ما يهون

غنى لى أحسن لسه زعلانة

* الحمار يطبل لها على قطعة خشب في الزريبة أو أى شئ يؤدي الغرض ويعنى لها.
* ريحانة جالسة في المنزل وسرحانة

الحمار: ريحانة يا فلة وريحانة

يا مسهمة دايمًا وسرحانة

يا ريتنى أخوكى كنت أسليكى

والا أبوكى كنت أواليكى

والا حبيبك كنت اخليكى

يا حلوة طول العمر فرحانة

* ريحانة تقفز فجأة.

ريحانة : يوه يقطعك نسيتنى أحط الأكل قدام الحمار

مسكين جعان طول النهار.

* ريحانة في الداخل والحمار في الخارج مشغولة بإحضار الطعام للحمار ..

* ممكن أن تغيب في غرفة داخلية ونسمع صوت ملء الماء في الجردل ثم تخرج حاملة
الأكل والشرب.

الحمار: ريحانة !

ريحانة : ريحانة سببها في حالها شقيانة

الحمار: ريحانة !

ريحانة : مالك ومالها بس ريحانة

الحمار أنا بأحبك

ريحانة : بس مخطوبة

الحمار: برضه بأحبك

ريحانة : يوه يادى العيبة

الحمار لو كل أهل الدنيا حبوكى

أكثر محبيتك يكون .. أنا.

* ريحانة تخرج إلى الحمار في الزريبة.

ريحانة : خد .. كل .. ولا تزعل .. وخذ .. اشرب كمان
اشرب .. اصفر لك .. كمان اشرب .. كمان

* الحمار متيم جدا ويتمسح بها في حركات معينة يراعى فيها أن تكون واضحة لكي يتذكرها المتفرج إذ أنها ستكرر بصورة أخرى في نهاية القصة.
"موسيقى مرحة فكاهية"

ريحانة : إيه ياختي ده ؟
هو الحمار ده جراه إيه ؟

* تدخل .. ثم تخرج .. باحثة.
وباللى بتغنى انت راخر .. رحى فين وسكت ليه ؟
* الحمار يأكل.

* ريحانة تدخل إلى المنزل.
* ريحانة تدور في المنزل بكسل ثم تنام.
الحمار "صوت مضغ التبن والقول"
ريحانة : "تثاءب"

أبويا غاب ويا الولية وابنها
ح ادخل أنام.

* الحمار يظل برأسه فيجدها بدأت تنام فيغنى لها بصوت حالم.
الحمار ريحانة يا فلانة وريحانة
الخ

* الحمار يمد رأسه فيجدها نامت. يدخل ويمشى إليها ويتأملها قليلا ثم يعود إلى الزريبة
وينام هو الآخر
* يدخل شهاب الدين من الخارج وهو طهقان جدا من الولية وابنها.
* يقف في وسط المسرح ويرفع يديه إلى أعلا ويتركهما تسقطان.
شهاب : "يحدث نفسه"

طيب عشان خاطرى وعشان سنى الكبير؟

"يقلد أم العريس"

آخر كلام

يومين ياسى شهاب بالحكاية تنتهى

يا ألف واحدة تستمنى وتشتهى

* شهاب يعبر بالإشارة عن غيظه من أم العريس.

شهاب : الأمر لله .. الغرض

الصبح بكرة نروح نشوف المحكمة

* شهاب يذهب إلى الزريبة فيجد الحمار نائما.

* نسمع صوت الكروان فى السماء. شهاب يرفع رأسه نحو السماء

شهاب : يا حلو .. يا حامى الحما

ولا خمسميت كروان

ادعوكمان وكمان

منكم لبوابة السما

الفصل الثالث

* المنظر - محكمة في بغداد .. الحوش الداخلي حيث تعقد الجلسات.
* منصة على اليمين عليها باب إلى غرفة القاضي - وإلى اليسار الباب الخارجي عند بدء
الفصل الثالث القاضي لا يكون موجوداً ولكن كاتب الجلسة موجود وجالس على حرف
المنصة "ومدلّدل" رجليه "وشايل" دفتره .. وعلى الباب الخارجي واقف الحاجب
"وسادد" الباب برجله ..

* يندفع شهاب والحمار داخلين من الخارج.

* شهاب والحمار يندفعان نحو كاتب الجلسة.

الحاجب : تعال .. استنى .. رايح فين

شهاب : ثلاث تيام يا حضرة كاتب الجلسة

ثلاث تيام بلياليهم

وأنا ع الباب هناك ملطوع

وقاعد بالعطش والجوع

ثلاث تيام ؟

الكاتب : خلاص .. بعد القضية الجاية نندهلك

شهاب : يارب يا شيخ

* الكاتب يقوم على حيله مؤنبا لشهاب.

يارب إزاي

هنا بالدور .. هنا أرقام

هنا ماشى العمل بنظام

هنا فيه كشف .. وانت نمرتك في الكشف ستاشر

شهاب : أكن بقى القضية الجاية نمرتها خمستاشر ؟

الكاتب : خمستاشر .. عشرناشر

ح تنصب لى محاكمة كمان ؟

شهاب : ما ترعلشى

* القاضي يدخل من الباب الأيمن.

الكاتب : سعادة القاضي

الحاجب : محكمة .. هس

* القاضي يجلس على المنصة.

الكاتب : "شهاب" يا شيخ اتدارى بحمارك كده شوية قوام امشى

* شهاب يذهب مع الحمار ويتوارى خلف العمود.

شهاب : مشينا واتدارينا وأمرنا الله

الحمار : يا عم شهاب ما تقلقى

شهاب : يا قول لك الولية ممهلانى يومين

وادينا بقينا فى الثالث

الحمار : ولا يهملك .. ح تندير

* من هنا يبدأ الجزء الغنائى فى المحكمة.

الحاجب : سعادة القاضى محكمة هس

القاضى : بلاش رغى إنت ياللى هناك

* القاضى يخبط على المنصة.

الحاجب : كلام ممنوع

* القاضى يلتفت إلى الكاتب .

القاضى : احم يا كاتب الجلسة ..

* الكاتب ينهض وينحنى أمام القاضى

الكاتب : احم .. يا سيدى القاضى

القاضى : ناديلنا ع القضية نمرة 49 أموال

الكاتب : قضية نمرة 49 أموال

رافعها مسعد الجمال

يخش لنا هنا فى الحال

ويتقدم بما عنده من الأقوال

* يدخل مسعد الجمال وهو رجل يرتدى ملابس بدوية ويحمل فى يده ورقة مختوم عليها بأختام حمراء.

القاضى : جه المذكور ؟

الكاتب : جه المذكور

القاضى : نعم .. اسمك ؟

مسعد : أنا مسعد

القاضى : وما عملك ؟

مسعد : أنا جمال

الإعمال الكاملة للشاعر

- القاضي : وعنوانك ؟
مسعد : حسب ما تصادف الأحوال
القاضي : ده شئ مضحك
ومين اللي عليه الدعوى مرفوعة
مسعد : على التاجر أبو الدنانير
القاضي : ينادى عليه .. فلو موجود
ح ننظر فى القضية اليوم
الحاجب : أبو الدنانير !!
- * القاضي يخبط على المنصة
القاضي : يا حاجب عيب
جناب التاجر المفضل أبو الدنانير
كده تنقال ..
الحاجب : جناب التاجر المفضل أبو الدنانير
- * التاجر أبو الدنانير يخرج من الباب الأيمن إلى الباب الذى خرج منه القاضي.
أبو الدنانير نعم موجود
- * شهاب خلف العمود يميل على أذن الحمار.
شهاب : "هامسا للحمار"
يا سيدنا الحسين .. خارج من الأوضة
الحمار ولسه .. آمال
- * القاضي ينهض احتراماً للتاجر.
القاضي : تفضل استرح يا حضرة التاجر أبو الدنانير
- * التاجر يجلس على حرف مكتب القاضي تقريبا بينه وبين المتقاضين . بحيث يتحتم على
القاضي أن يميل برأسه كده وكده ليرى الواقفين أمام المنصة.
القاضي : نجيب قهوة ؟
أبو الدنانير كده كويس
القاضي : نجيب شلثة عشان ترتاح
أبو الدنانير كده مرتاح
القاضي : كما تهوى "لمسعد"
- * القاضي يميل برأسه ليكلم مسعد.

وأما أنت فما دعواك ؟

* مسعد يبدأ مرافعته ، القاضي يميل برأسه كده وكده ليرى مسعد. ولكن كلما مال إلى ناحية يكون أبو الدنانير قد مال إليها.

مسعد : دخلنا شركة من مدة ثلاث سنوات
نقلت تجارته بجمالي في ثلاث نقلات
بشرط يكونلي حصة من ثلاث تلات
نقلت ولسه بيماطل لحد الآن ..
في حين أنه كسب منها تلات ألوقات

* القاضي ينهض ويميل على التاجر أبو الدنانير ويكلمه .. أبو الدنانير يرد دون أن يلتفت.
القاضي : كلامه ده .. صحيح يا حضرة التاجر أبو الدنانير ؟
أبو الدنانير "بثبات" كلام تخريف

* القاضي يجلس ويميل إلى ناحية ويوجه الحديث إلى مسعد.
القاضي : سمعت السيد المفضل ؟
كلامك ده طلع تخريف
مسعد : كلامي ده .. كلام مضبوط بدون تخريف
وفيه إثبات .. بمستندات
معاي عقد مختوم فيه تلات ختومات
شوقوه اقروه

* مسعد يعرض العقد على القاضي والكاتب .. والحاضرين ومنهم شهاب والحمار أيضا وكلهم ينظرون فيه ويهزون رؤوسهم
شوقوه .. اقروه
أهه .. شايقين

* وأخيرا يتكلم القاضي ولكن بالطريقة التي يحتمها عليه إنسان جالس أمامه على المنصة وسادد المنظر أمامه .. فهو يميل يمينا ويسارا ليتكلم .
القاضي : لكين السيد المفضل
"مشيراً إلى أبو الدنانير"
بينكر أصلا الدعوى
فبالتالي
حكما يرفض تخاريفها

الأعمال الكاملة للشاعر

والزأمك بمصاريغها

* مسعد يجن جنونه.

مسعد :

يا خلق ياهوه

معايا عقد يثبت كل أقوالى

وهو ما معاهوش إثبات

أقوم أطلع أنا كداب

وهو يتعمل لكلامه ألف حساب ؟

"ضاحكا" ياراجل عيب

القاضى :

ياراجل ده انت قايل صنعتك جمال

عايزنا إيه ؟

عايزنا نصدقك ؟ .. علشان معاك ورقة ؟

"بجنون" ده عقد ياناس !

مسعد :

"ضاحكا" نصدق عقد .. وتكذب جناب التاجر

القاضى :

المفضل ؟

ده أمر محال !

* مسعد يسقط على الأرض لاهثا.

مسعد :

"يلهث" ياناس .. ياملايكة .. يا أبالسة هنا أغراض ..

هنا موالسة

* القاضى ينتفض واقفا فى غضب.

القاضى :

"غاضبا" بتتهجم على الجلسة ؟

حكمننا عليك

بتلاتين مقرعة تنزل على رجلك

* الحاجب ينقض على مسعد ويسحبه خارجا ..

مسعد :

ياناس ده حرام فيه ورقة

هاتوله حالا الفلقة

القاضى :

ويأخذ أجرته علقه

عشر تلاتات

* يسمع صراخ مسعد من الخارج .

مسعد :

"من الخارج" فلوسى ياهوه

القاضى : خذوه مدوه
وحلقه بالتراب سدوه

* نسمع من الخارج أصوات ضربات وصراخ. شهاب الدين ينتفض كما لو كان الضرب عليه هو.

* ضربة ثم صرخة .. ثم انتفاضة.

شهاب : "متألما" يا حول الله .. ياربى
الحاجب : كلام ممنوع !

"صمت"

* التاجر أبو الدنانير يتحرك للخروج. القاضى يهب واقفا لوداعه.

أبو الدنانير : سلامو عليكمو .. أستأذن
القاضى : فى حفظ الله .. أنت المحكمة وشرفت
بألف سلامة ياسيد أبو الدنانير

* الكاتب يهب واقفا وينفض ملابس أبو الدنانير كما يفعل صبي المزين.
الكاتب : فى حفظ الله فى حفظ الله

* تتابع أصوات الضربات والصراخ وشهاب يرتجف.

* شهاب يرتجف والحمار يشجعه.

شهاب : "هامسا" يا عم أنا ماشى .. مش عايز
الحمار : ما تركز اخص عيب أمال
شهاب : ما شفتش مسعد الجمال
ومش سامع ؟
الحمار : ولا يهملك .. ح تدبر

* القاضى يلتفت إلى الكاتب.

القاضى : احم يا كاتب الجلسة
الكاتب : احم يا سيدى القاضى
القاضى : قضايا إيه كمان عندك ؟
الكاتب : قضية نمرة 16 مبيع حيوان
القاضى : ناخذها والسلام هاتها

* شهاب يرتعد زيادة عند سماع رقم قضيته.

الأعمال الكاملة للشاعر

- الكاتب : "مناديا" قضية نمره 16 مبيع حيوان
شهاب : "مرتجفا" قضيتنا .. قضيتنا
الكاتب : ومرفوعة من الخطاب شهاب الدين
الحمار : "هامسا" تشجع . خشي
الكاتب : ييجي لنا الآن
ويتقدم بما عنده من البرهان

* الكاتب يشير إلى المكان الواقف فيه شهاب.

- القاضي : جه المذكور ؟
الكاتب : أهه .. واقف هناك مزقور
القاضي : تعال ياراجل انت قوام

* شهاب خائف.

* الحمارة يزقه من ظهره نحو المنصة.

- الحمار : خلاص بقي روح ياعم شهاب
أنا وياك

- شهاب : نعم
الكاتب : سيب الحمارة ده هناك
القاضي : تعالي أنت
قوام .. اسمك ؟

- شهاب : شهاب الدين
القاضي : وما عملك ؟
شهاب : أنا خطاب
القاضي : وعنوانك ؟

* شهاب يتذكر علاقة مسعد عند ذكر العنوان .. لأن مسعد لم يكن له عنوان.

- شهاب : ضروري أمال
أنا العنوان
القاضي : ما تتكلم
شهاب : أنا عنوان .. في الكوخ اللي جنب الغاب
القاضي : ومين اللي عليه الدعوى مرفوعة ؟
شهاب : جدع في السوق
القاضي : يسمى إيه

شهاب :
يشمى حنجل الدلال
القاضى :
ينادى

* الحاجب يعود إلى مكانه بعد أن ضرب مسعد العلقة المطلوبة.

الحاجب :
حنجل الدلال ؟
شهاب :
ده فى السوق اللي برة المحكمة على طول
القاضى :
ينادى عليه .. فلو موجود ..

* حنجل يدخل من باب المحكمة كالقذيفة وبخطوة واحدة يصبح أمام القاضى.

حنجل :
"مقاطعا" أنا موجود
وامتى كنت مش موجود ؟
طلبتو شهود ؟
فى خدمتكم !
فى أى قضية عايزنى أكون شاهد ؟
القاضى :
شهادة مقبش
يا حنجل أنت مرفوعة عليك دعوى

* حنجل بيدى الاندهاش الشديد. يتلفت حوله فيرى شهاب الدين والحمار فيستدير منهما

ويكمل التلفت فى أماكن أخرى بعيدا عنهما.
حنجل :
أنا ؟ دعوى ؟ أنا ؟ من مين ؟
القاضى :
من الحطاب شهاب الدين
حنجل :
سببها إيه لا سمح الله ؟
القاضى :
شهاب الدين يقول دعواه

* شهاب يتكلم ويوجه كلامه إلى كل الموجودين حتى الحمار يوجه إليه الكلام أيضا.

شهاب :
بكل صراحة حنجل ده .. لا يمكن حد ياتمنه
وعدنى بيع حمارى والعمولة ياخذها من تمنه
فما اتباعشى الحمار يومها
ح نعمل إيه ؟

وكان ويايا حمل من الحطب عاينه
عشان ناكل بحقه عيش أنا وبنتى
يتيمه .. أمها ماتت وهى صغيرة جدا
يقوم الظالم الجبار دهه ياخده
يخلصكم .. يا محترمين .. يخلصكم ؟

الأعمال الكاملة للشاعر

الكاتب : كلامك يبقى للقاضي

* شهاب يلتفت أخيرا للقاضي ويكلمه ..

شهاب : نعم .. حاضر

"للقاضي"

سعادة القاضي يرضيه إن ده يحصل ؟

القاضي : نشوف حنجل

* شهاب ينظر بتحد إلى حنجل.

ترد بإيه يا حنجل ع اللي بيقوله شهاب الدين ؟

* حنجل يعتدل في وقفته وينفش نفسه جيدا ثم يتكلم.

حنجل : يا سيدنا القاضي .. ده كداب ؟

ومن كدبه

ما هوش خطاب

ولا اسمه شهاب !

شهاب : أنا ما اسميش شهاب ؟ .. إزاي ؟

حنجل : ولا حتى الحمار ده حماره بالمره

شهاب : حمارى .. مش حمارى إزاي ؟

حنجل : ده سارقه من ولية فقيرة فى البصرة

* شهاب يرتبك جدا ويذهب إلى الحمار يحتضنه .

شهاب : "مرتبكا" أنا .. البصرة الحمار اسمى فقيرة شهاب

حمارى. لأ

الحمار : "هامسا" ولا يهملك .. أنا وياك

* القاضي يخبط على المنصة.

القاضي : بلاش رعى انت ياللى هناك

* حنجل يتقدم من المنصة ويميل على القاضي.

حنجل : سعادة القاضي لو يسمح

يفضى قاعة الجلسة

القاضي : وما الأسباب ؟

* حنجل يتكلم ويشخشخ جيبه.

حنجل : كلام سرى "شخشة"
يغير خط سير المسألة دوغرى "شخشة"
ويكشف عنها كل حجاب

* القاضى يلتفت إلى الكاتب.

القاضى : اذن يا كاتب الجلسة

خد الحطاب

وكل الموجودين واخرج

وسك الباب

* الكاتب يخرج الناس من الغرفة

الكاتب : جميعا يالله على برة

* القاضى يستوقف الكاتب.

القاضى : لكن سيبوا الحمار محجوز

لأنه لسه حوله نزاع

وأخذه من هنا لا يجوز

* القاضى منفرد بحنجل فى قاعة الجلسة.

* الحمار واقف وسامع كل شئ ومن حين لآخر يهز رأسه وراء العمود كمن يكتشف بلاوى.

القاضى : احم يا حنجل الدلال

حنجل : احم يا سيدى القاضى

بقى الموضوع .. شهاب الدين ده شخص رزيل

ويمشى يقول هنا وهناك كلام تهيبيل

ولو سبناه .. يخسر سمعتى فى السوق

فأحسن شئ .. سعادتك تحبسه ونروق

وويانا الدليل موجود .. حمار مسروق

القاضى : خلاص كل الكلام

حنجل : لسه كلام موثوق

سعادتك ح تلاقيه متعبى فى المنديل

* حنجل يناول القاضى المنديل.

القاضى : وده يطلع له كام كله

حنجل : يادوبك .. اللى فى القسمة

الأعمال الكاملة للشاعر

القاضي : احم .. طيب

حنجل : احم شكرا

* القاضي يصفق لاستدعاء الكاتب. حنجل يبتعد عنه ويقف في مكانه الأول.

القاضي : تعالوا كلكم تانى

نعاود جلسة المذكور

* الكاتب يدفع الناس إلى داخل القاعة.

الكاتب : جميعا ياالله على جوه .. نعاود جلسة المذكور

* شهاب عند الباب فيناديه القاضي. يدخل شهاب مرتبكا.

القاضي : تعال ادخل .. ياراجل يالى مش حطاب ولا اسمه

شهاب.

شهاب : "مرتبكا" أنا الحطاب .. نعم معلوم أنا الحطاب

شهاب الدين

الحاجب : سكوت عندك

* الكاتب ينحنى أمام القاضي.

الكاتب : احم يا سيدى القاضي

القاضي : احم يا كاتب الجلسة

الكاتب : سعادتك .. انتهيت إلى إيه ؟

* القاضي يشير إلى شهاب بالاتهام. شهاب ينتفض من الخوف.

القاضي : توجه تهمة السرقة إلى المجرم

شهاب : أنا ؟ .. مجرم ؟

* الحمار يتكلم من مكانه بجوار العمود ولا يلاحظه أحد

* القاضي يتلفت على مصدر الصوت

* الحمار يتقدم إلى المنصة

الحمار : أنا أحتج. عم شهاب ما هوش مجرم !

القاضي : وده .. بسلامته يطلع مين ؟

الحمار : أنا حاضر مع الحطاب شهاب الدين

أنا يا حضرة القاضي.

* القاضي وحنجل والكاتب والحاجب والحاضرون يصابون جميعا بحالة من الدوخة والدعر.

القاضى والجميع يتكلم ؟ .. حمار ؟ .. معقول ؟
بينطق ؟ .. مستحيل .. عفريت
ياهو .. حيوان .. يتكلم

* القاضى يسقط فى مقعده من الخوف.

* الحمار يقف هادنا بجوار صاحبه حتى تنتهى الضجة.

حمار فى المحكمة .. واقف يتكلم بترافع ..

ويبدافع .. عن الحطاب

عجائب .. يستحيل .. شوفوا .. حمار بصحيح

يتكلم .. غريبة .. معجزة .. أوهام

شطان .. نكته

* أخيرا يتكلم الحمار بصوت مرتفع ليغطى على الضجة ثم يهدأ صوته ويتكلم بهدوء.

الحمار : أنا لا شطان ولا نكته

أنا مجرد حمار مسكين

باشوف بعينيا .. وودانى الطوال سامعين

حاجات تفلق

حاجات منها الحجر ينطق

فباتكلم !!

* حنجل يحاول أن يتسلل هاربا من المحكمة.

حنجل : يادى الداھية

الحمار : ما حدش يتنقل .. وقف

يا حنجل واسمع الباقي

* شهاب فى آخر المحكمة. ويبدأ يتقدم ويتشجع خطوة خطوة.

شهاب : حلاوتك .. قول

* الحمار يخاطب القاضى.

الحمار : سعادة القاضى لو يسمح يفوق حبة

* القاضى يفيق من ذهوله ويحاول أن يسترد هيئته.

القاضى : أنا فايق .. أنا سامع ..

"لنفسه" ده غير معقول !!

الأعمال الكاملة للشاعر

* الحمار يحمل على القاضى بهدوء.

الحمار : وإيه فى القاعة دى معقول ؟

حكاية التاجر المفضل ؟

نهاية مسعد الجمال ؟

أو السر اللي قاله حنجل الدلال ؟

* القاضى يصرخ فى الحمار محاولا اسكاته.

* صوت القاضى عالى جدا ومجلجل فى القاعة.

القاضى : "غاضبا" عما فى عينك .. حقير .. اخرس !

* الحمار صوته يرتفع أكثر من جملته السابقة ويهجم على مجلس القاضى خطوة.

الحمار : مانيش خارس

كفاية خرس عمر طويل

* القاضى يتضاءل قليلا وصوته ينخفض قليلا.

القاضى : باقول لك هس

* الحمار صوته يرتفع أكثر ويهجم على مجلس القاضى خطوة أخرى

الحمار : مانيش راح أهس

وطول ما لسانى فيه قوة راح أتكلم وأقول الحق

لحد ما أموت

* شهاب يتشجع أكثر ويتقدم إلى جوار الحمار.

* القاضى فى الناظر وشهاب والحمار فى الطالع.

شهاب : سلامتك م الممات يا بنى

ولا يهملك .. وتتك قول

* القاضى يفقد هيئته وينادى الحاجب.

القاضى : يا حاجب .. إيه ؟ . ما تتحرك

* الحاجب يصرخ صرخة ضعيفة.

الحاجب : كلام ممنوع !

* شهاب يتشجع أكثر وأكثر ويصرخ فى وسط المحكمة.

شهاب : مافيش حاجة اسمها ممنوع

كلامنا كله فى الموضوع

ولينأ حق رآح نآخذة

* القاضى ينهر شهاب نهرة ضعيفة.

القاضى : وحتى أنت كمان لك صوت ؟ !

* الحمار يهجم على مكتب القاضى ويضع رجليه الأماميتين عليه .. ويجلجل صوته فى القاعة صارخا.

الحمار : يادى الجبروت

بتستكتر على الإنسان كمان ينطق

مش أنا بس ؟؟

ما بيتمتش ودنك غير حاجات ثانية

حاجات .. جمادات .. لهم رنة

* القاضى يتخادل وصوته يخفت عن الأول.

القاضى : باقول لك .. بس !

* الحمار يقفز إلى جوار القاضى على المنصة.

الحمار : مانيش رآح ابس

وحكم العدل لازم ينحكم فورا

"بسرعة" أنا شاهد على حنجل

وشاهد ع الحطب (ببطء) وكمان على المنديل !

* القاضى يفرع ويصرخ

القاضى : "فزعا وصارخا"

ما تتكلمش

* الحمار صوته ملئ بالقوة والسلطة.

* الحمار يرفس القاضى ويتكلم. القاضى يتكعور وهو يرتعش.

الحمار : ح اتكلم وح اتكلم وح اتكلم

"يرفس القاضى" وح افضل ليل نهار طول عمرى

أتكلم

لحد ما ينحكم بالعدل

* القاضى متكعورا يرفع يديه إلى السماء.

القاضى : مصيبة يا ربى .. أعمل إيه ؟

الأعمال الكاملة للشاعر

* الحمار بكل ثبات يأمره.

الحمار : بسيطة يا أخى .. احكم بحكم العدل

* شهاب من تحت يتعاون مع الحمار.

* القاضى يبدأ فى النهوض ببطء من الكعورة.

شهاب : ودى شغله ؟

الحمار : دى أسهل حاجة فى الدنيا ..

* القاضى يعتدل ببطء ليقول الحكم.

* الحمار وشهاب يشجعانه .. القاضى يرفع يده ويتأهب.

* بعض حركات تدل على أن القاضى يعانى صعوبة فى النطق بحكم العدل ..

شهاب : تشجع !

الحمار : يا لله !

شهاب : هه !

الحمار : احكم !

* القاضى أخيرا يحكم.

القاضى : حكمنا .. بالحطب .. لشهاب

وأما حنجل الدلال

حكمنا عليه .. بأقى عقاب

"يجرى إلى غرفته"

* القاضى بمجرد ما ينتهى من الحكم يجرى إلى غرفته.

* يحدث برق ورعد ودخان فى القاعة دلالة على حدوث حدث سحري.

أصوات : ليحيا العدل !

ليحيا العدل !

الختام

* خارج المحكمة فى السوق الجماهير تحيط بحسن المعنى وهى فرحانة به .. ومن

شهاب .. يغنون له نشيدا مرحا.

"لحن الختام"

الجماهير : يا حلاوتك يا بنى آدم

يا جمالك يا إنسان

يا ظريف يا لطيف يا ابو دم خفيف يا بو عقل نضيف
ولسان
بكمال وأدب .. العدل غلب .. والشر هرب طفشان
يا حلاوتك يا بنى آدم
يا جمالك يا إنسان

* حسن يقفز إلى مكان مرتفع مرتفع ويخاطب المجتمعين حوله.

* شهاب ينزوي في مكان ويراقب حسن وهو سعيد جدا.

حسن :
كتر خيركم على مشاعركم .. أشكركم يا خلان
العدل ده كان الحلم زمان .. والآن علم وعرقان
لكن وحياة الحرية ..
وحياة الصورة البشرية
العدل عنيد .. وبابه حديد .. تفتحه إيد الجدعان
الجماهير :
يا حلاوتك يا بنى آدم
يا جمالك يا إنسان

* حسن يقفز من مكانه المرتفع ويرقص بفرح شديد ويدور حول نفسه ..

* المجموعة توسع له مكانا في وسطها وتصاحبه بالتصفيق.

حسن :
قلبي مزقظت وبيتنطط .. وباعيط وأنا فرحان

* يبحث عن عم شهاب ويناديه ويأخذه معه في وسط الحلقة.

* الناس يحبون عم شهاب. عم شهاب يضرب لهم سلامات الشكر.

الجماهير :
فين الخطاب فين عم شهاب .. يا شباب هنوه ده كمان
ده عم شهاب البنى آدم
ده أطيب راجل في العالم
راجل صادق .. عنده مبادئ .. وبيادئ بالإحسان
الجماهير :
يا حلاوتك يا بنى آدم
يا جمالك يا إنسان

* حسن يمشى إلى جانب عم شهاب والموكب كله خلفهم.

حسن :
لألألاً .. قولوا ورايا

يا عم شهاب يا بنى آدم
يا أطيب راجل في العالم
الصدق بخير والعدل بخير

طول ما فى الدنيا ناس شجعان

* المنظر يتحرك إلى اليسار فيختفى المهنئون وحسن وشهاب ونرى ريحانة وحدها قاعدة وهى تحمل على رأسها حملا من الحطب ..

* أصوات الفناء والتهاتف لعم شهاب تصل الينا من خارج المسرح.

"من خارج المسرح"

الجماهير : يا عم شهاب يا بنى آدم

يا أطيب راجل فى العالم

* ريحانة تتوقف وتنصت وتتطلع إلى المكان الذى تأتى منه الأصوات.

ريحانة : أبويــــــــــــــــــــ اسمــــــــــــــــــــه بيتــــــــــــــــــــادى ؟

أبويا عنه بيغنوا ؟

هوه .. ما هوش هوه .. هوه

أروح له واتأكد منه

* ريحانة تتحرك نحو مصدر الصوت فى الوقت الذى تدخل فيه المجموعة إلى المسرح -

فتلتقى بأبيها شهاب ..

* ريحانة وشهاب يندفعان إلى بعضهما بشوق ولهفة.

ريحانة أبويا آبا ..

شهاب : مين ؟

ريحانة بنتى ؟

ريحانة : أنا كنت فاكراك بعد الشر

شهاب : يا بنتى ربنا نجانا

ريحانة : الحمد لله قلبى انسر

شهاب : وازيك انتى يا ريحانة

* ريحانة تواجه الجمهور وتقص قصة عذابها وانتظارها لأبيها طول الثلاث ليالى السابقة.

ريحانة : ثلاث ليالى طوال ما فاتوش

خايفة وقلبي عليك منتوش

وعربسى وأمه راحو ماجوش

* ريحانة تندفع نحو حسن وحسن يندفع نحو ريحانة

ريحانة : "متذكرة" هو أنت ؟

حسن : ... أيوه

* شهاب واقف مذهول من هذا التعارف.

شهاب : هالا هالته .. هالته هالته هالته

دى حكاية لكن باين لافه

قال كنت فاكر روحى اسم الله

طلعت أنا الأطرش فى الزفة

* ريحانة وحسن ينظران إلى بعض فى صمت.

ريحانة : "لحسن" إيه الحكاية ؟

* حسن يوشوش ريحانة

حسن : شوفى ياستى

"يوشوشها"

* أثناء ما حسن بيوشوش ريحانة الكورس يغنى هامسا ..

الكورس : ح يقول لها .. فى ودنها

أصل الحكاية وفصلها

استعجبت .. استغربت

كلامه شقلب عقلها

* تنتهى الوشوشة.

حسن : آدى الحكاية وآدى العبارة

ريحانة : أما عجيبة

حسن : وبالأمارة

* حسن يقلد لريحانة بعض الحركات التى كان يقوم بها معها وهو فى شكل حمار ريحانة تضحك.

"ضحكات ريحانة"

* ريحانة وحسن فى جو آخر .. شهاب واقف يراقبهما فى صمت.

* ريحانة تميل على حسن.

* حسن يميل على ريحانة.

* يغنيان معا فى صوت واحد.

ريحانة : يوه يقطعك ضحكتنى

حسن : انشالله ياختى ما تحزنى

وأنا وانت يجمعنا الهوى

ونعيش سوا العمر الهنى

الأعمال الكاملة للشاعر

ريحانة : حسونة !

حسن : ريحانة !

الاثنين : ياهنانا

* على امتداد صوت الحبيبين وهما يقولان "ياهنانا"

* يغنى شهاب

شهاب :

الله يبارك عمركم

من صغركم لكبركم

ويكبروا ولادكم

فى عدل وخير

يعوض صبركم

* الموكب يسير والجماهير خلف عم شهاب وحسن وريحانة.

الجماهير : يا حلاوتك يا بنى آدم

يا جمالك يا إنسان

يا ظريف يا لطيف يا بوم خفيف يا بوم عقل نضيف

ولسان بكمال وأجب .. العدل غلب .. والشر هرب

طفشان

يا حلاوتك يا بنى آدم

يا جمالك يا إنسان.

* قدمتها فرقة الماريونيت على مسرح القاهرة للتراث فى موسم 62 - 1963 وكتبها صلاح جاهين وأخرجها ناجى شاكرو إبراهيم سالم .



مسرحية صحصح لما ينجح

* المسرح خال تماما

* تتوسط المسرح دائرة من الورق مكتوب عليها اسم المسرحية

"صحصح" بخط كبير

و "لما ينجح" بخط صغير.

* تذاع أغنية عن صحصح ..

* الجمهور يردد كلمة "يا صحصح"

الاغنية : صحصح يا مصحصح يا صحصح
يا ورد مفتح يا صحصح
يا لذيذ ومملح يا صحصح
يا نبيه ومدردح يا صحصح
اطلع ع المسرح يا صحصح
اطلع من فضلك يا صحصح
ورينا عمالك يا صحصح
عيب لما نحايك يا صحصح
عيب ده احنا زمايلك يا صحصح

اطلع امال خليك شغال

خلي الأطفال كلها تفرح

اطلع ع المسرح يا صحصح

* صحصح ينطح الدائرة الورقية ويظهر أمام الجمهور ويتحدث اليه.

* أثناء كلام صحصح، تظهر الأشياء التي يذكرها على التوالي .. سرير .. مكتب ..

شباك .. سفره .. كرسيان كبيران.

صحصح : شبيكو لبيكو صحصحكو بين ايديكو .. انا صحصح ! ..

وده بيتي .. هنا بانام .. وهنا باذاكر جنب الشباك ..

وعندنا صالة يابني .. كبيرة .. قاد كده فيها السفرة ..

وفيه اودة الجلوس .. وهناك ده المطبخ .. ممنوع ألعب فيه

ممنوع خالص .. خالص خالص خالص .. ولا ألعب فيه

ولا ألعب في أودة بابا وماما أصلها دا بما متساوية ..

* يظهر الأب ويجلس على كرسي ويقرأ في الجريدة .. ثم الأم وتجلس تخطئ بعض الملابس .. والاثنان صامتان.

وإدما يبسيبوها .. ويقعدوا هنا .. أهم .. آدى بابا ..
وآدى ماما ..

* صحصح يتسلل إلى الخارج

* الوالدان وحدهما على المسرح ومازالا صامتين ..

* صحصح يعود مرة أخرى متسللا ويوشوش الجمهور.

صحصح : "متسللا" وأنا بقي .. "يضحك" فى الشارع.

صحصح : "هامسا" على فكرة .. أنا ليا حكاية

انتو مش بتحبوا الحكايات ؟ ..

أصل أنا بقي ح اثقلب قصدى ح انقلب "يقف على رأسه"

لأ .. لأ .. مش ح انقلب

اسمها ح اتعدل "يعتدل"

أصل أنا كنت فى الأول "يتردد" يعنى

* الأم تكلم نفسها .. فيهرب صحصح بسرعة.

الأم : "لنفسها" واد زى القرد .. هدومه ما تقعدش سليمة أبدا

لازم يجيلى بيها ممزوعة فى حاجة .. فى أكرة باب .. فى

شجرة .. قال ايه "تقلده" معلش ياماما .. كنت مستعجل يا

ماما ..

* الأب يضع الجريدة التى يقرأ فيها على حجره.

الأب : "لنفسه أيضا" الواحد عينيه تعبت .. النصارة دى بقت

قديمة.

الأم : طب ما تغيرها ..

الأب : مش وقته.

الأم : الحمد لله انت اشتغلت كام ساعة زيادة .. ولك متحوش

دلوقت ..

الأب : "مقاطعا" لأ كله إلا القلوس دى .. أنا حاجز القلوس دى

عشان أجيّب هدية لصحصح لما ينجح

* إلى هنا الوالدان يتكلمان بهدوء

الأم : تعيش ياخويا وتجب له.

* فترة صمت قصيرة ثم يبدأ الأب في الشكوى من الولد.

* طريقة كلام الوالدين تبدأ في العنف شيئاً فشيئاً

الأب : ولوانه ولد متعب ..

الأم : مضبوط

الأب : أنا بصراحة مش مبسوط من عميله ..

الأم : ما هو انت ياخويا اللي

الأب : "مقاطعا بغضب" أنا اللي ايه بقى ؟

الأم : انت اللي معلمه العفرتة.

الأب : العفرتة ؟ .. الرياضة ومحبة الطبيعة والغيطان .. اسمها عفرتة ؟

الأم : أمال اسمها ايه ؟ .. وتقطع الهدوم اسمه ايه ؟

الأب : لأ ياستى .. اللي أنا معلمه شئى .. وده شئى تانى .. ده

مش منى.

الأم : يعنى منى انا ..

* إلى هنا تبلغ المناقشة أقصى عنف.

الأب : انتى اللي مدلعا .. عشان كده مهرجل .. كله منك انتى.

الأم : الله يسامحك.

الأب : انتى طول الوقت معاه .. لو كنتى ريبتيه على الن

* مناقشه متأرجحة بين الوالدين مبنية على عدم فهم الأم لكلام الأب ..

الأم : "مقاطعة" انا ماربيتهوش ؟ .. ليه ؟ .. هو قليل التربية ؟ .. لأ !

كله إلا كده ده احنا ابننا أدب ولد فى كل البلد ..

الأب : أنا قصدى أقول ..

الأم : "فى نفس التأثر" لأ يا ابو صحصح .. كله إلا كده .. ده احنا

ابننا أذوق ولد فى كل البلد.

الأب : "محاولا تهدئتها" ياستى أنا قصدى أقول ..

الأم : "بلا توقف" لأ ياخويا .. كله إلا كده .. ده احنا ابننا أرق

ولد فى كل البلد.

* الأب يصرخ لكى تسمح له الأم بإبداء رأيه ..

الأعمال الكاملة للشاعر

* الاثنان يعودان هادئين جدا

- الأب : " يصرخ " يوه .. خلليني أتكلم
الأم : "كأن شيئاً لم يحدث" ياختي ؟ .. ماتتكلم يا بوه صحصح ..
اتفضل.
الأب : احنا كنا بنقول في ايه ؟
الأم : في صحصح.

* الأب والأم يتحدثان عن صحصح بحنان .. وصوتهما أشبه بالغناء ..

- الأب : آه .. فعلا .. هو صحصح شقى ومهرجل .. لكن الشهاده لله ..
واد مؤدب.
الأم : وشاطر في المدرسة ..

* الوالدان يتمايلان معاً في نشوة لذيذة وهما يصفان صحصح بالأوصاف الجميلة.

- الأب : ونبه
الأم : وظريف
الأب : وشجاع
الأم : وقمور
الأب : وحبوب
الأم : وننوس
الأب : وقطقوط
الأم : وكتكوت

* تدخل كرة من النافذة فتضرب الأب في رأسه وتسقط نظارته.

* الوالدان ينهضان غاضبين.

الأب : و إيه ده ؟

الأم : يا مصيبي النضارة أتكسرت.

والوالدا : "معا" صحصح .. مفيش غيره

* تنقلب نغمة كل منهما عن الولد إلى العكس .. فتصبح قصيرة وسريعة وأشبه بطلقات الرصاص.

* حركتهما تتغير .. تصبح انتفاضات واحد طالع وواحد نازل .

* الأم تناد صحصح من النافذة.

الأب : قليل الأدب

الأم : قليل الحيا
 الأب : الغبي
 الأم : الرزيل
 الأب : اندهيله
 الأم : "من النافذة" انت ياولد.

* الأب يبحث عن النظارة ..

الأب : دى عمله يعملها ؟ .. هى النظارة راحت فين ؟
 "يبحث"
 الأم : اطلع بسرعة "تعود من النافذة"
 الأب : وقعته سودة ..
 الأم : دلوقت يشوف.
 الأب : أنا ح اوريله.
 الأم : يستاهل قطع رقبتة.

* الوالدان فى انتظار صحصح .. يهددان بالويل والثبور.

الأب : أنا ح اكسر دماغه.
 الأم : ولد وحش.

* تسمع من الخارج دربكة هائلة .. الوالدان يفزعان

الأب : ولد "دربكة" ايه ده كمان ؟
 الأم : ياحتى ؟!!

* يدخل صحصح مندفاعا.

* يلبس على نصفه الأعلى جردلا مقلوبا .. والماء يتساقط من كل جسمه وملابسه.

الأب : اتفضلى ياستى ..
 الأم : "تشهق"

الأب : بقى دى بنى آدم ؟
 الأم : ايه ده ياولد ده ؟

* صحصح يتكلم من داخل الجردل

* الأب يضع أذنه على حائط الجردل من الخارج ليسمع ما يقوله الولد.

* الوالدان يشدان صحصح من الجردل .. الأب يمسك الجردل من ناحية ..

والأم رجلين صحصح

الأعمال الكاملة للشاعر

* الوالدان يشدان

- صحصح : "يهمهم من داخل الجردل"
الوالدان : ايه بتقول ايه ؟
صحصح : "يهمهم من داخل الجردل"
الوالدان : بيقول ايه ده ؟
الأب : شدى الجردل ده.
الأم : شدى قصادي
الوالدان : هيلاه .. هوب
صحصح : "يهمهم من داخل الجردل"
الوالدان : بيقول ايه ؟ .. هيلاه .. هوب ..

* الجردل يذهب في ناحية .. وصحصح في ناحية.

- صحصح : "يخرج من الجردل وهو يتكلم" معلش .. غصبن عنى ..
أصلى كنت مستعجل .. عايز آجى لكم قوام .. نزلت فيه
بدماعى ..
الأم : "الأم تمسك صحصح بعنف وتبدأ فى تنشيفه"
انت غرقان ميه .. تعال اما انشفك. تعال ..
الأب : أعوذ بالله ! .. أعوذ بالله من ده ولد ..
صحصح : معلش بابا .. معلش ياماما ..
الأب : أهو قال معلش .. اتفضلى ياستى.
الأم : كل حاجة يابنى معلش .. أنت عارف انت عملت ايه ؟
صحصح : وقعت فى الجردل
الأم : لأ .. قبل كده.

* الأب يجلس على كرسية بينما تقوم الأم بتنشيف صحصح وتغيير ملابسه

- الأب : "مقاطعا" لأ .. سيبك من الحكاية دى. احنا فى الجردل
.... ازاي يمشى من غير مخ كده .. ويقع فى الجردل ..
زى ال الجردل.
صحصح : أصل الدنيا ضلمة .. أصل احنا بالليل.

* الأب يقفز من على كرسية ويظل يروح ويجئ بعصبية. وهو يؤنب صحصح.

- الأب : "صارخا" آه ! .. قلت لى بالليل ! .. الحمد لله انك اعترفت

صالح جاهين

على نفسك بالهرجلة وقللة النظام .. كل شئ له وقت ..
اللعب له وقت، والشغل له وقت .. البيت له وقت .. والشارع
له وقت ..

الأم : مضبوط

الأب : ولو كنت فاهم كده .. ما كانتش تلعب فى الشارع بالليل ..

الأم : مضبوط

الأب : لكن انت مش فاهم حاجة .. لسه ما كبرتش

الأم : مضبوط

الأب : لسه ما عقلتش

الأم : مضبوط

* الأب يخرج

الأب : وانا قال كنت فاكرك بقيت راجل .. وناوى أجيب لك

حاجة بتاعة رجالة كبار .. لكن انت ماتستاهلش

* الأم تحمل صحصح إلى سريره وتلقيه فيه.

الأم : يالله .. اتخمد نام .. احنا الاثنين زعلانين منك.

صحصح : معلش.

الأم : مفيش معلش .. نام

صحصح : حاضر .. تصبى على خير ياماما.

"صمت"

* الأم تطفى النور

الأم : "بعد تردد" وانت من أهله .. يالله نام ..

* الأم تخرج من غرفة صحصح إلى الصالة.

* الأب فى الصالة زعلان جدا .. ويدخن بعصبية ..

الأب : الحمد لله النضارة ما اتكسرتش كلها

لسه فيها عين واحدة سليمة. أدى اللى نابنا من العيال.

الأم : فداك

الأب : "بعد برهة" هو نام ؟

الأم : نام

الأعمال الكاملة للشاعر

"صمت"

* الأب يستمر في التدخين بعصبية ثم يقف ساكنا للحظة.

* الأب ينظر إلى ناحية غرفة صحصح

الأب : "بعد تفكير" اتعشى ؟! والا نام من غير أكل ؟ ..

الأم : واكل من شوية

الأب : هاه ..

"صمت"

* الأب يتمشى قليلا بهدوء

الأب : "نفسه" يكسر لى النضارة معلش .. إنما يبجى لى مبهدل

ولابس لى جردل . وغرقان ميه وحالته تغم .. ده ياخذ

التهاب رئوى بالشكل ده .

الأم : بعد الشر .. انا نشفته كويس وغيرت له

* الأب يقف فجأة وينظر إلى ناحية غرفة صحصح

الأب : "بعد تفكير" أوعى يكون فيه شباك مفتوح والا حاجة.

الأم : مفيش

الأب : متدفي كويس ؟

الأم : أيوه

الأب : تعالى نشوف

* الأم تحمل شمعة .. يذهبان إلى سرير صحصح .. الأب يصلح الغطاء .. ويتأمل

الولد قليلا.

* الأب يميل على صحصح ويقبله وهو نائم. ثم تقبله الأم.

* يتحدثان بجانب السرير.

الأم : أهه متغطى كويس.

الأب : برضه طفل .. شو فى نايم أزاى .. زى الملاك

"يقبله".

الأم : ربنا يخليه .. ويطرح البركة فيه "تقبله"

الأب : هو كويس .. مافيهوش عيب الا الهرجلة بس .. عشان كده

لازم أجيب له الهدية الللى فى بالى.

الأم : بلاش هدية بقى .. هات لك نضارة بدال الللى اتكسرت ..

دى ضرورية.

الأب : لأ .. بعدين .. هدية صحصح ضرورية أكثر
الأم : هي ايه ؟
الأب : ساعة ..
الأم : ساعة ؟ .. مرة واحدة ؟
الأب : تنفعه
الأم : شكلها أيه ؟
الأب : حلوة قوى .. ساعة يد
الأم : الله ! .. يلبسها فى ايده ؟
الأب : لما ينجح

* الأم تميل لتقبل صحصح.

الأم : انشاء الله ح ينجح
الأب : باذن الله
الأم : يا حبيبي يا صحصح .. ح تجيلك ساعة.
الأب : هس س س ... احسن يصحى

* يلقيان عليه نظرة أخيرة

الأم : "هامسة" يا حبيبي ..
الأب : شوفى نايم ازاي ؟ ..
الأم : زى الملاك.

* يخرجان

* صحصح يقفز واقفا فى سريره كالشيطان .. ثم يتشقلب

* صحصح يتنطط فى السرير

صحصح : يا وعدى ! .. ساعة يد مرة واحدة ؟ .. هيه !! ياحلوللى
ياحلوللى .. ح تجيلى ساعة !! هاهاها .. سمعت كل حاجة
.. ساعة .. ساعة .. هيه ..

* صحصح يقفز بملابس النوم على أرض الغرفة ويأخذ فى الرقص والتنطيط
والتصفيق ..

صحصح : "يغنى" يا وعدى !

بابا ح يجيب لى ساعة يا سلمم ع البداعة
عقبال ما يجيب لى خاتم وسلسلة وولاعة

الاعمال الكاملة للشاعر

وابقى اكثر ولد
متعاقب في البلد
يا وعدى !

* صحصح يتمشى في الغرفة بخيلاء . وينظر في معصمه كما لو كانت معه ساعة حقيقية.

صحصح : "يفنى"

ألبس ساعتى واتشمر واعمل قال يعنى قال
اشخط وانطر واتأمر على كل العيال
بيجولى خمسة سنة فى غاية الاحترام
والواد ابوسكلتة يسألنى الساعة كام
ما اقوللوش مهما يسأل يتغاظ .. يمضغ زلط
والا أحسن وأجمل أقول له بالغلط
والاحرام .. ح اقول له بصحيح .. لا يقول بخيل
وانا واد فى القطر كله ماليش أبدا مثيل
يا وعدى

* صحصح يتشقلب

* صحصح يرقص بعنف

* ثم يهدأ شيئا فشيئا

صحصح : بابا ح يجيب لى ساعة

ياسلملم ع البداعة

عقبال الخ

* يتمشى بهدوء

لكين اسمع يا صحصح ده كله مش مضمون

استنى لما تنجح الامتحان بيخون

"بعنف"

* يجلس على السرير

انا كاتب كل كلمة مذبوط فى الامتحان

* ينهض بعنف

والابله ادتنى نجمة وباستنى ف خدى كمان

* يجلس مرة أخرى

ده انا صحصح الجيب ناجح مية فى المية

* يستند إلى كوعه على السرير

والساعة جاية جاية ضرورى. عن قريب

"يتشاءب"

* يستلقى على السرير

يا ساعتى يا حبيبتى يا الله تعالى قوام

* يسحب عليه الغطاء

وان ماجيتيش .. وغبتى أشوفك فى المنام

"يتشاءب"

* يروح فى النوم

يا .. و ع .. دى .. ي

* الإضاءة تتغير فى المسرح وتخلق جوا من الحلم .. كل شئ يختفى ويبقى السرير فقط ..

* السرير يتأرجح كالأرجوحة على نعمات الأغنية .. التى تعزف بأسلوب حالم. "موسيقى حالمة"

"الحلم"

* فى الظلام تظهر نسخة من جريدة الأهرام وهى تسير وحدها كأن يد البائع تلوح بها ..

* على رأس الجريدة عنوان ضخم : "نجاح صحصح فى الامتحان"

صوت بائع اقرأ الجرنال .. آخر الأنباء .. الخير المهم .. نجاح صحصح الصحف : فى الامتحان

وفى صدر الجريدة صورة لصحصح على أربعة أعمدة وهو يتسم

"تختفى الجريدة"

اقرأ الجرنال ..

"الصوت يتعد"

- * السرير يتأرجح على الموسيقى الحاملة
* يدخل جهاز راديو ونواره تضى وتنطقى باستمرار.
* تخرج من الراديو صفاير اشارات مورس
* الراديو يختفى.
- الراديو: "مكملا نشرة الأخبار".... والحالة بوجه عام هادئة.. ومن
القاهرة اذاعت وكالات الأنباء، أن الطفل صحصح، قد
نجح فى الامتحان، وكانت درجاته كلها عالية، وقد نقل
سيادته إلى السنة التى بعدها.. "يتابع" أما من برلين فقد
صرحت الدوائر المطلعة بأن.. الخ الخ.. "الصوت يتعد"
- * السرير يتأرجح على الموسيقى
* يدخل جهاز التلفزيون
* الجهاز يذيع احتفالا علميا..
* صحصح فى التلفزيون يرتدى روبا لامعا محلى بالشرائط... يتجه إلى منصا
عالية فيصافح يدا ممدودة إليه.
* مئات الأيدي تصفق.
- صوت المعلق: الطفل صحصح.. شهادة الانتقال إلى السنة التى
بعدها.. مع تقدير صح جدا.. "يتابع الأسماء" الدكتور
محمد محمد احمد شهادة الدكتوراه فى العلوم ال
.. الخ الخ
- "الصوت يتعد"
* التلفزيون يستدير ويختفى.
* السرير يختفى.
* دقائق ساعة الجامعة.
* ترتفع دقائق قلب..
* صحصح يظهر عائنا فى الفراغ.
* صحصح يتأرجح بلا سرير على نفس الأنغام الحاملة..
هو يضع يده على صدره..
* تظهر فى الظلام ساعة صغيرة مضيئة بالفوسفور يجرى نحوها
* الساعة تهرب وتختفى

صحصح : قلبي .. قلبي بيدق بشكل . خايف بطرشق
انا ناجح .. ناجح .. ناجح ..
والساعة جاياالى خلاص ..
أهه ! .. ياوعدى ! ..
تعاليلي ياختي تعاليلي ..
ياوعدى
الله ؟ .. الساعة راحت فين .. باساعة .. باساعة ..

* تعود الساعة إلى الظهور. أكبر قليلا .. وشكلها مختلف.
* يجرى نحوها .. فتهرب منه وتختفي
* صحصح يطاردها بلا كلاله.

صحصح : "في المطاردة" أنا أحب لعبة المسافة
ياساعتي يا حلوة .. ح امسكك ..
مهما كان شكلك .. ح امسكك ..
أخص هربتي تاني ؟ .. دلوقت تيجي تاني. اقفش !
امسك ! .. بيه ..
ياوعدى ! .. امسكوها .. آه ياهرابة
ماتستني بقي .. خليليني أمسكك. أخص عليكى ..
ماتبقيش بايخة ..

* صحصح يظهر عليه الإعياء بالتدريج ويلهث
* عند آخر اختفاء للساعة يقف بنظر إلى اتجاه اختفائها وهو يلهث
كل دي ساعة ؟ .. ح امسكها برضه ..
استنى .. والنبي تستنى .. "يلهث" مش قادر.
أرجوكى .. خليليني امسكك .. "يلهث"
من فضلك "يلهث"
غابت قوى المرة دي .. مشيت خالص ؟ "يلهث"
* بعد غياب طويل نسبيا تأتي الساعة ببطاء من خلف صحصح وتقف خلفه ..
وهي كبيرة جدا
الساعة : "بهدوء" نعم ..

* صحصح يلتفت فيصطدم بالساعة الضخمة ويسقط ثم ينهض ويتأملها مشدوها.

الاعمال الكاملة للشاعر

- صحح : "لنفسه" يا وعدى .. أيه ده كله ؟
 الساعة : "تخطت" يا قول لك نعم ..
 صحح : "بفرغ" أيوه .. أهلا وسهلا ..
 الساعة : أنت عايز إيه ؟ ..
 صحح : "مذهولا" عايز إيه ؟ . عايز كباية ميه . ح يغمى عليا .
 الساعة : اهدأ شوية .. كنت عايز إيه قبل دلوقت .. وانت عمال
 تجرى وتزعى ..
 صحح : "متذكرا" آه .. والله كنت عايز ساعة.
 الساعة : ليه ؟
 صحح : عشان نجحت فى الامتحان.
 الساعة : افهم السؤال كويس . ليه عايز يكون عندك ساعة ؟

* صحح يحرك يديه باستمرار مع كلمة عشان كما لو كان سيقول سببا ولكنه لا يقول شيئا

* الساعة تضربه بعقر بها ضربة خفيفة

صحح : "بحيرة" ليه ؟؟ .. عشان .. عشان .. عشان .. عشان .. عشان

الساعة : اتكلم يا ولد .. عشان إيه ؟

صحح : بس ماتضربيش

الساعة : "ملاطفة" طب قول .. عشان إيه ؟

صحح : ع .. ع .. ع .. عشان البسها ف ايدى

الساعة : ليه ؟

صحح : اتعاقب بيها

الساعة : يا أخى اتكسف على دمك . هيا الساعة للعيافة ؟

* صحح يستدير للجمهور ويخاطبه.

صحح : أمال ليه ؟ "للجمهور" يا ناس .. الساعة معموله ليه بالذمة ؟

مش للعيافة ؟ .. "للساعة" أهم .. فيه ناس كتير يقولوا
 أيوه .

* الساعة تستدير للجمهور وتخاطبه.

الساعة : لو كانت الساعات للعيافة ماكانش فيه لزوم يحطوا جواها

مكن .. ولا يقسموا المينا بتاعتها من برة إلى اتناشر خانة

كبيرة. وستين خانة صغيرة .. ولا كانوا يحطوا فيها عقربين.
ويعملوهم بيلفوا ويشاوروا .. ولا كانوا

* صحصح ينشط ويرفع يده كأنه يريد أن يجيب في الفصل.

صحصح : "مقاطعا" خلاص .. خلاص .. عرفت ..

الساعة : آيه ؟

صحصح : عشان أبص فيها

* الساعة تهتز إلى اليمين واليسار مثل البندول وهي تقول .. لأ ..

الساعة : "تهتز" لأ ..

صحصح : عشان أحطها على ودنى

الساعة : "تهتز" لأ ..

صحصح : عشان الناس تسألنى الساعة كام.

الساعة : "تهتز" لأ

صحصح : طب عشان أقول للناس الساعة كام.

* يظهر السرير طائرا فى الفضاء وهو يتمرجح

الساعة : "تهتز" لأ .. لأ ..

صحصح : "يبأس" طب عشان أملاها ..

* صحصح يجلس عليه فيقف السرير ساكتاً

الساعة : "تهتز" لأ .. لأ ..

صحصح : "يتشاءب" طب عشان أظبطها كل شوية

الساعة : "تهتز" لأ .. لأ .. لأ .. لأ .. لأ ..

* صحصح يستند ثم يستلقى ثم يسحب الغطاء ثم يروح فى النوم.

صحصح : "نصف نائم" طب أمال ليه ب بقى ؟

الساعة : "تهتز باستمرار" لأ .. لأ .. لأ .. لأ .. لأ ..

* الساعة تكف عن الاهتزاز.

* صحصح فى نوم عميق.

* الساعة واجهتها تضى وينبعث من داخلها موسيقى وأزيز تروس وجنازير.

* عند رقم سبعة تنفتح فتحة.

* يخرج منها شعاع أصفر قوى.

الأعمال الكاملة للشاعر

* الشعاع يتسلط على وجه صحصح
* صحصح يتململ ويحاول الاستدارة
* يخرج من الفتحة ذراع رقيق فى نهايتها كف صغير يهز صحصح ويدغدغه
ويسحب الغطاء.

صحصح : مين

* يقوم صحصح نصف قومة
* يخرج من الفتحة وجه الشمس وفى وسطه عين كأعين قدماء المصريين ينبعث
منها الضوء.

الوجه : أنا ..

صحصح : انت مين ..

الوجه : الشمس .. شمس الصباح.

* صحصح يضع يده على عينيه.

صحصح : "بتدمر" بيبه .. مين اللي فتح الشباك ؟

الشمس : أنا ماجيتش م الشباك .. أنا جيت من هنا ..

صحصح : من الساعة الكبيرة ؟ .. هى لسه هنا ؟ ..

الشمس : من الساعة .. من عند خانة السبعة .. ده مطرحى ..

"للجمهور" الساعة سبعة .. الساعة الذهب .. كل يوم

أضرب شعاعى فى الوشوش .. واخلى الكسالى مايناموش

"تشير إلى صحصح"

* صحصح يجلس فى الفراش

صحصح : "بكسل" طيب !!

الشمس : بسرعة يالله قوم .. ماتبقاش خم نوم

صحصح : حاضر ..

* يدلدل رجله من على السرير

* ينزل من على السرير ويقف ساكنا

الشمس : كل يوم الساعة سبعة .. لازم تكون واقف على رجلك ..

وكمان مفتح عينيك.

صحصح : طيب.

الشمس : يالله بلاش تربية. الحق معاد المدرسة.

* يمشى خطوة ويقف

* الشمس وملحقاتها ترجع مكانها

صحصح : حاضر

الشمس : حضر لك الخير.

* صحصح يتلفت حوله. ثم يعود إلى الفراش .. ويتمطى

صحصح : أما أنام لى حبة صغيرين كمان ..

* الفتحة تنفتح بعنف .. وتخرج منها الشمس فى منتهى الغضب فتضرب صحصح بشدة.

الشمس : كده ؟ .. طب خد .. خد .. خد .. هه . هه

* وينهض ويلبس القميص والبنطلون يغيب لحظة ويرجع قال يعنى غسل وجهه.

صحصح "مفزعاً" حاضر طيب .. حاضر .. طيب .. قايم أهه .. قمت

أهه .. القميص ؟ .. أهه .. البنطلون ؟ .. البنطلون ؟ .. أهه

وشى ؟ .. أغسله .. أهه .. !!

ايه بقى ؟ .. فاضل ايه ؟ .. الجزمة اليمين ؟ .. أهه ..

الكتب ؟ .. أهه .. هم فين ؟ .. أهه .. لأ مش أهه .. أمال

فين ؟ .. آدى كتاب .. أهه .. وآدى التانى .. لأ .. ده مش

التانى .. دى فردة الجزمة الثانية .. أهه بس .. خلاص ..

ولا متأخر ولا حاجة .. "يخرج"

* ينزل إلى الشارع

صحصح : "باستعجال"

انا نزلت فى الشارع خلاص .. مشيت فى الشارع

خلاص .. أهه .. أهه .. خطوتين وابقى فى المدرسة

.. رجليا زى الفريرة .. "ينظر إلى رجله" الله ؟ .. ايه

ده ؟ .. فين الشراب ؟ .. نسيت ألبس الشراب من لبختى.

* يعود إلى الغرفة

معلش .. أرجع البسه هوا .. طيران. مسافة غمضة عين ..

* يجلس ليلبس الشراب

فبين الشراب .. الشراب .. أهه .. وكمان أهه.
ياالله .. البس يا صحصح.
"للجمهور" أصعب حاجة فى الدنيا لبس الشراب

* ينجح فى لبس الشراب فيعرضه على الجمهور فى زهو وفخار
لأ .. برضه لأ .. مش أصعب حاجة فى الدنيا .. ليه ؟ ..
عشان ولا فيه شمال ولا فيه يمين .. آدينى لبسته مش باين
حاجة.
إنما بقى الصعب صحيح هو الجزمة .. حاجة صعب
خالص.

* يأتى دور الجزمة فيضرب لخرة أمامها.

اليمين فى اليمين .. والا اليمين فى الشمال .. هذا هو
السؤال "مثل هاملت" على رأى اللى قال ..
ايه الجزمة دى ؟ .. أنا كنت لابسها قبل كده.
ازاى ؟ .. مش عارف ..
بتيجى صدف ..

* صحصح يشير إلى اليمين وإلى الشمال والعكس

صحصح : والا أنا دلوقت مستعجل أكثر ؟ .. عشان كده مش قادر
أعرف .. اليمين فى اليمين ..
والا اليمين فى الشمال .. الشمين فى اليمال ..
والا اليمال فى ال ..

* مكان الساعة الثامنة يفتح ويخرج منه جرس المدرسة وينقض على رأس
صحصح فيجرى حافيا نحو المدرسة.

الجرس : تالالم .. ياالله قوام .. تالالم .. ياالله قوام ..
صحصح : جرس المدرسة ؟ .. جه منين ؟ .. من الساعة.
بيه .. دى حكاية.
الجرس : تالالم .. ياالله قوام
صحصح : حاضر .. حاضر ..

* الجزمة تجرى وراء صحصح تناديه

الجزمة : يا صحصح .. يا صحصح .. استناني

* كلما أراد انتظارها يطارده الجرس بعنف

الجرس : تالالم .. يالله قوام ..

صحصح : جزمتى .. نسيت ألبسها ..

الجرس : تالالم .. يالله قوام ..

صحصح : يعنى أروح المدرسة حافى ؟

الجرس : تالالم .. يالله قوام ..

الجزمة : يا صحصح .. استنى قطعت قلبى من الجرى

* الجزمة تدخل فى رجلين صحصح

* وهو يجرى

صحصح : مش قادر أقف .. الجرس مش عايز يسكت

الجرس : تالالم .. يالله قوام

الجزمة : معلش .. ح احصلك .. حصلتك .. دخلت فى رجلك ..

أهه .. وأهه .. اربط أنت بقى الرباط.

* يحاول الانحناء ليربط الرباط

صحصح : "يجرى" حاضر.

الجزمة : الرباط يا صحصح

صحصح : حاضر "ينحنى ليربط الرباط"

* الجرس ينقض عليه ..

الجرس : تالالم .. يالله قوام

صحصح : يعنى ما اربطش الرباط ؟

* صحصح يجرى برباطه المفكوك

الجرس : تالالم .. يالله قوام.

صحصح : "بتذمر" ييه .. بلاش ..

* يصل إلى الفصل .. يدوس على الرباط .. يقع فوق الكرة الأرضية وهى تدور

فيدور معها.

* الجرس يدخل فى الساعة مرة أخرى

الجرس : تالالم .. يالله قوام.

صحح : آى .. "يقع" دست على الرباط
صوت ده قانون الجاذبية الأرضية .. وكمان كلنا عارفين ان
المدرس: الأرض بتدور "بغنى"
بتدور .. بتدور .. بتدور .. بتدور
زى النحلة .. عمالة تدور والبنى آدم فوقها صغيور ..
قد النملة .. لكن مغسورور
أيام وشهور وسنين ودهور

* الكرة الأرضية تسرع فى دورانها

عمالة تدور وتدور
وعليها افيال وحمير وغزال
وقرود وأسود ونمور
وقطط وكلاب وفراخ ودياب ..
وسمك عايم فى بحور

* الكرة الأرضية تسرع أكثر

بتدور .. بتدور .. بتدور .. بتدور .. والبنى آدم
منصوب مجبور.
عمال بيدور .. زعلان .. مسرور
غير لو وقفت .. ح يروح منطور

"انتهت الأغنية"

* فجأة تقف مرة واحدة

* صحح يقع من عليها دائخا.

المدرس : الدرس أنتهى ..

* صحح نائم ولا يستطيع الوقوف

* يحس كأن احدا داس على رجله وهو نائم ..

* يقف ويمسك رجله ويتنطط

صحح : آه مش عارف راسى من رجليا .. فين راسى ؟ .. أهه ..

بتدور بتدور ! .. "يضحك" .. وفين رجلى ! .. "يصرخ"

آى .. هى دى رجلى .. واحد داس عليها .. قمت عرفتها

.. آى .. آى بييه .. ورباط الحزمة مفكوك .. أربطه بقى ..

دى أحسن قرصة ..

* ينحنى ليربط رباط الجزمة ..

* يقف فجأة ويضع يديه على بطنه.

"يمسك بطنه" آى .. بطنى .. ايه ده ؟ بيبه .. أنا نسيت
فى البيت أعمل حاجة .. مهمة جدا.. حاجة البنى آدم
لازم يعملها كل يوم الصبح ..

* يظهر أمامه سهم مكتوب عليه "إلى دورة المياه" .. فيجربى ..

* يفتتح مكان الساعة التاسعة ويخرج منه عنق جمل ..

الجمل : اخرجوا كتب المحفوظات. هل أنتم جميعا حافظون ؟ ..
انه درس جميل .. درس الشعر العربى القديم .. ولكن
أين الولد صحصح ؟ .. إنه دائم التأخر مع أنه ولد نبیه ..
ياصحصح .. ياصحصح ..

* صحصح يظهر فى استعجال كبير ينظر إلى قدميه. ينحنى ليربط الرباط .. يسمع
اسمه فينهض دون أن يربطه. ويجرى نحو الفصل.

صحصح : حاضر .. جاى .. "لنفسه" أما أربط رباط الجزمة بقى
بالمرة.
الجمل : ياصحصح ..

* يدوس مرة ثانية على الرباط.

صحصح : "مفزوعا" حاضر .. جاى "يقع" آى .. آى "لنفسه" دست
على رباط الجزمة تانى ؟ ..

* الجمل يحمل صحصح بضمه ويهزه

الجمل : انهض ياولد .. لماذا تأخرت ؟. أين كنت ؟

صحصح : كنت فى ال ..

الجمل : لا يهمنا اين كنت .. ولكن هل تعرف البيت الذى أوله :

دقات قلب المرء ..

* الجمل يطوح صحصح من هنا إلى هنا.

صحصح : "بفرح" أيوه ..

دقات قلب المرء قائلة له إن الحياة دقائق وثوانى

- الجمل : "متعجبا" عجبا .. إنى أتعجب .. كيف أن ولدا مثلك
يعرف هذا البيت ..
صحصح : أيوه أعرفه
الجمل : إذن كرره ..
صحصح : "يككرر البيت"
الجمل : مرة أخرى
صحصح : "يككرر البيت"
الجمل : وهل تعرف معناه ؟
صحصح : أيوه
الجمل : إذن اشرحه.
صحصح : يعنى البنى آدم فى قلبه زمبلك
كانه ساعة جت له بالمجانى
ولما قلبه يدق قصده يفهمه
ان الحياة دى دقائق وثنوانى

* الجمل يضع صحصح. ثم يدخل.

- الجمل : حسنا .. أنتهى الدرس ..
صحصح : "لنفسه" الحمد لله .. حصة المحفوظات خلصت ..
ريقى ناشف من كتر التسميع .. أما أروح أشرب.

* صحصح عند الحوض

"بقرف" بيبه .. الحوض مسدود .. أنا عارف ايه الأولاد
دول اللى بيرموا حاجات فى الحوض يسدوه ؟

مش يعرفوا إن فيه ناس غيرهم كمان عاوزين يستعملوه ؟
حاجة وحشة قوى .. لأ .. حاجة

* يضع مركب ورق فى الحوض

* ينفخ فى المركب فيمشى

كويسة قوى. الواحد يعمل مركبة ورق .. ويعومها فيه ..
يأنته. أوعى المركبة البحرية .. ياوعدى .. شوف عايمه
ازاى والقلع ده معمول عشان يمشى المركبة .. الهوا يزقه

.. تقوم المركبة تمشى .. كدهه .. "ينفخ" كدهه. وتروح
بعيد .. بعيد .. تسافر .. فى البحر الكبير.

* يخفى صحصح والحوض والمركب.

* يظهر صحصح آخر فى هيئة بحار بقائلة مخططة وهو يركب سفينة شراعية كبيرة
ويصطاد سمكة كبيرة.

"بصوت حاله" انا بحار .. ومسافر يابنى بلاد الله لخلق
الله .. والسما واسعة .. وزرقا خالص خالص خالص ..
والبحر غويط .. وكبير خالص خالص خالص .. ومليان
سمك .. سمك ملون .. أحمر وأخضر وأصفر وأزرق ..
وكل حاجة .. وسمك كبير .. أنا باصطاد بالسنارة .. أجدع
سمكة يابنى. أروح رامى عليها بالسنارة .. والسنارة تروح
ماسكاها .. ولا يهمنى .. انشالله تكون طولها .. الف
سبعميت مليون دشليون ايه.

* من عند خانة الساعة العاشرة تفتح فتحة ويخرج منها أبو الهول

أبو الهول : كتب التاريخ .. كراسات التاريخ .. فين صحصح ??
ياصحصح .. ياصحصح ..

* عند سماع نداء أبو الهول .. تخفى السفينة الشراعية
وصحصح البحار معها، إلى تحت ونسمع صوت بقللة مياه كما لو كانت السفينة
غرقت. ثم يظهر صحصح العادى

صحصح : أيوه .. حاضر جاى "لنفسه" الواحد سرح. عندنا تاريخ
دلوقت .. "ينظر إلى أسفل" رباط الجزمة أنت لسة لحد
دلوقت مفكوك ياحضرة رباط الجزمة ؟

* "ينحنى"

أبو الهول : يا صحصح .. وبعدين فى الولد ده. دايمتا متأخر.
صحصح : "مفروعا" أفندم . "يقع" آى .. ثالث مرة .. دست ع
الرباط.

* عقرب الساعة الكبير يمسك صحصح من ملابسه ويرفعه إلى أعلا .. إلى مكان أبو
الهول ليتحدث معه.

أبو الهول : يا صحصح يا ابني .. انت ولد كويس .. إنما أنا زعلان
منك برضه .. تعال .. اطلع لي .. دي حصة التاريخ ..
يعنى حصة الزمن .. تعرف يعنى إيه الزمن ؟ .. أنا أعرف ..
يعنى إيه الزمن .. الزمن مش واقف .. الزمن بيدور
يا صحصح .. بيدور .. بيدور ..

* يدخل أبو الهول ويأخذ عقرب الساعة فى الدوران وصحصح معلق فيه حتى
تصبح الساعة الثالثة فيضعه على الأرض.

* يخرج من مكان الساعة الثالثة وجه عم جمعة البواب الصعيدى ويودع صحصح
لكى يعود إلى المنزل.

عم جمعة : خلاص كل الدروسات .. الحمد لله. مع السلامة ..
ما تقطعوش عنا الجوابات. مع السلامة ياسى صحصح
أفندى .. روح داركم عاد ..

* ولكن من مكان الساعة الواحدة يخرج وجه زهرة حنك السبع.
حنك السبع : لأ يا عم جمعة. الولد ده متذنب ساعة بعد الحصص.
عم جمعة : واه .. معلش سماح النوبة يا أستاذ حنك السبع
حنك السبع : مفيش فايدة. ده دخل حصة النبات متأخر دقيقة ..
"لصحصح" .. يالله .. وشك فى الحيط يا ولد ..

* صحصح يضع وجهه فى الحائط

* ثم يحاول أن يستسمح

* يدخل حنك السبع

صحصح : حاضر .. "يلتفت" معلش ..

حنك السبع : مفيش معلش ...

ياالله وشك فى الحيط.

صحصح : حاضر

* البواب يوبخ صحصح

* البواب يدخل

عم جمعة : تستاهل ! .. اللي ما يدخلش الحصة فى الميعاد .. على

شان إيه يخرج من المدرسة فى الميعاد يالله .. وشك فى

الحيط .. لطح .. "يدخل"

* صحصح وحده ..

* تأتي فراشة ملونة وتحوم حوله .. يحاول أن يقوم ليلعب معها .. ولكن الفتحة عند الساعة الواحدة تفتح ويخرج منها حنك السبع ويخرجه. ويدخل.

حنك السبع : "مزجرا" هاه !

صحصح : "مدعورا" لأ .. أبدا .. مفيش ..

* الفراشة تدور حول صحصح وتغنى كأنها تريد أن تغنيها

الفراشة : "تغنى"

أنا فراشة حرة وطيقة

في الجو بالعب ألعاب جريئة

اكنن الواجب اللي عليا

بالثانية عملته وبالديقة

* صحصح يفتاظ

* يحاول أن يقوم إليها ولكن حنك السبع يخرج إليه مرة بعد مرة ويعيده معاقبا كما كان.

أنا كنت بيضة ، وكان لازم افسس

في معادي بالضبط رحمت فاقسة

صبحت دودة لازم تشرنق

الساعة خمسة ونص إلا خمسة

دخلت شرقتي في الميعاد

وخرجت بالضبط في الميعاد

وبقيت فراشة .. حرة وطيقة

في الجو بالعب .. ألعاب جريئة

واكنن الواجب اللي عليا ..

بالثانية عملته .. وبالديقة

* صحصح يكاد يجن .. ويضرب الحائط بقبضتيه

صحصح : ايه يعني ؟ .. بتغيظيني .. بس بقى .. بس .. بس .. بس

الفراشة : "مستمرة"

* صحصح ينهار إلى جوار الحائط ويبكي

الأعمال الكاملة للشاعر

صحح : بس .. "يبكى" مش قادر استحمل ..

* من مكان الساعة الرابعة .. تفتح فتحة وتخرج منها الشوكة وتذهب إلى صحح.

* الشوكة تتصرف وتتحدث كما لو كانت خادمة بلدية متوسطة السن

* الشوكة تططبخ على صحح

الشوكة : ياالله ياسى صحح .. الأكل برد .. الله ؟ .. أنت بتعيط ؟

صحح : انتى مين ؟

الشوكة : اسم الله على عينيك خدامتك الشوكة اللي بتاكل بيها ..

قوم ياالله .. ميعاد الأكل فات.. أنت دوختنى على ما

جيت لك ..

صحح : جيتى منين ؟ ..

الشوكة : من خانة الأربعة والسلام .. كنت جياالك من خانة الثلاثة

.. لما كان معاد الأكل المظبوط .. البواب مارضيش

يفوتنى .. بيقول إنك أنت اسم الله على مقامك .. قال ..

* صحح ينهض بحنق

صحح : "بغيط" متدنب ياستى .. متدنب .. "يبكى"

الشوكة : يانضرى ؟ .. بتعيط ؟ ماتعيطشى ..

صحح : عايز أعب .. زى الفراشة دى .. اشمعنى هى "بنادى" يا

أستاذ حنك السبع !!

* حنك السبع يخرج ويصرح له بالانصراف.

حنك السبع : خلاص .. روح بيتكم .. وتانى مرة ماتتأخرش.

الشوكة : ياالله يا حبيبي بقى ع البيت.

* الفراشة تعاكس صحح

الفراشة : "تحوم وتغنى"

* صحح فى منتهى الغيظ

صحح : وأنا كمان عاوز العب . ح العب .. هه .. هه ..

* يجرى من الشوكة هنا وهناك.

الشوكة : ويمين النبي لأكون قابلة للست. أمشى قدامى ع البيت
بلا لكاعة.

صحصح : طب ألب بس شوية هنا.

الشوكة : لأ .. يالله.

صحصح : طب اتفرج على الشجرة دى ..

الشوكة : لأ .. يالله امشى قدامى.

صحصح : طب اسلم على واحد صاحى.

الشوكة : انشالله تبقى تسلم " تزغده" يالله.

* صحصح يتظاهر بأنه يريد أن يربط رباط الجزمة ولكنه يهرب من الشوكة.

صحصح : طب .. "بخبث" أربط رباط الجزمة ..

الشوكة : "باستسلام" اتفضل .. اربطه ..

* يحاول أن يقلد الفراشة ولكنه يسقط.

صحصح : "يجرى" هيه .. وضحكت عليكى .. "يغنى"

انا فراشة .. حرة وطيقة .. "يقع" أى .. ولا فراشة ولا

حاجة .. برضه دست ع الرباط.

* الشوكة تنغزه نغزة شديدة وترفع جسمه إلى أعلا.

* يمتثل لأمرها.

الشوكة : انت الظاهر ماينفesch معاك الذوق .. قوم !

أنا عرفه اللكاعة دى جايبها منين ؟ .. أبوك وأمك كويسين

.. امشى.

صحصح : حاضر

* الشوكة تغرس أصابعها فى ظهره.

الشوكة : ارفع ايديك.

* صحصح يرفع ايديه ويمشى مثل المقبوض عليه.

صحصح : حاضر ..

الشوكة : امشى على طول.

صحصح : حاضر ..

* نشعر أنه دخل البيت وصعد السلالم وجلس على السفارة.

الاعمال الكاملة للشاعر

- الشوكة : ادخل البيت.
صحصح : حاضر ..
الشوكة : اطلع السلاهم.
صحصح : حاضر ..
الشوكة : اقعدع السفرة.
صحصح : حاضر
الشوكة : كل
صحصح : الأكل بارد
الشوكة : بارد بارد
صحصح : سخنيه
الشوكة : لأ ..
صحصح : يعنى آكله وهو بارد ؟
الشوكة : مادام ماينتكلش فى الميعاد. طبعا تاكله وهو بارد.
صحصح : معلهش بقى ..
الشوكة : أنا مش ح ارد عليك
صحصح : يعنى آكل.

* الشوكة تعطيه ظهرها.

- الشوكة : "لا ترد"
صحصح : أنا جعان "لنفسه" أمرى نئه .. أما آكل بقى هه.

* صحصح يبدأ فى الإمساك بلقمة من الأكل.

* فجأة يفتح مكان الساعة الخامسة من الساعة

* تخرج منه كراسه الواجب.

الكراسه : بس !

صحصح : ايه ؟

الكراسه : بطل أكل.

صحصح : ليه ؟

* الكراسه تقرب من صحصح شينا فشيناً.

الكراسه : مش معاده

صحصح : أمال معاد ايه ؟

الكراسة : معادى أنا

* صحصح يحاول الابتعاد بالتطبيق عن هجوم الكراسة.

صحصح : انت ؟

* الكراسية تقرب بلا توقف.

الكراسة : أنا .. الواجب ؟!

صحصح : الواجب ؟

الكراسة : اعملنى

* الكراسية تطارد صحصح من طرف السفارة إلى الطرف الآخر.

صحصح : "بدعمر" طب لما آكل

الكراسة : مش وقته

صحصح : جعان

الكراسة : مالناش دعوة. ابتدى واجب الحساب.

* كلما مد صحصح يده إلى الطعام تضربه الكراسية على يده.

صحصح : يعنى ما أكلش ؟ ..

* الشوكة تستدير وتضحك منه .. ثم تنصرف ..

الشوكة : "تدخل" وانت زعلان ليه ؟ مش الأكل بارد ومش

عاجبك "تضحك"

صحصح : بارد بارد .. بس آكل .. جعان ياناس ..

الكراسة : فرقة .. ابتدى

* تخرج من الكراسية علامات الحساب. الجمع والطرح والقسمة والضرب ..

* تدور حول صحصح وهى تغنى

العلامات : "تغنى"

احنا علامات الحساب

فى الكراسية وفى الكتاب

نضرب نقسم نجمع نطرح

ونقوى زى الألعاب

* العلامات تحمل السفارة من أمامه وتحضر له المكتب.

الأعمال الكاملة للشاعر

صحح : معلش والنبى .. آكل لقمتين .. طب لقمة واحدة. طب

نص لقمة ..

العلامات : "تغنى"

شيل السفره حط المكتب

اجمع اطرح اقسّم اضرب

كام فى كام يطلع كام

احسب واكتب بالارقام

* علامة الجمع تحضر أربع برتقالات. ثم أربع برتقالات.

علامة الجمع : عندك أربع برتقانات

وكمان أربع برتقانات

* علامة الطرح تطرح منها ثلاثة.

علامة الطرح : كلت ثلاثة

الجميع : يفضل كام ؟

* المسألة تظل معروضة أمام صحصح وهو لا يريد أن يحلها ..

صحح : أنا كلت ثلاثة ؟ .. يا اخوانا ؟

هو انتم سبتونى .. اتهنى

الجميع : مش قايل لأ .. يفضل كام.

صحح : وأنا مالى ..

الجميع : لأ يالله قوام

علامة الجمع : عندك أربع برتقانات

وكمان أربع برتقانات

علامة الطرح : كلت ثلاثة ..

الجميع : يفضل كام ؟

صحح : يفضل خمسة .. ياناس ده حرام

* العلامات تدور حول صحصح.

الجميع : شاطر شاطر شاطر شاطر يا صحصح وثناءنا العاطر

* صحصح يحاول أن يأكل يأكل برتقالة من البرتقالات الثماني.

صحح : طب آكل واحدة.

* العلامات تمنعه وتدور حوله .. وتربكه.

الجميع : شيل ايديك احسن تاكل ضرب مساطر

"يدورون حوله"

احنا علامات الحساب ..

* صحصح يجدا امامه فجأة رجلا واقفا يرتدى معطفا وجليابا وطربوشا وكوفية

الرجل : السلام عليكم .. ياسى صحصح أفندي

صحصح : وعليكم السلام .. انت طلعت منين ؟

الرجل : من كتاب الحساب.

صحصح : ومنين بقى فى كتاب الحساب ؟

الرجل : من المسألة نمرة ثلاثة وعشرين

صحصح : أهلا وسهلا

الرجل : مش بيقول لك .. اشترى رجل .. ابصر ايه .. مدرك ايه ..

كذا كذا .. فما مكسبه ؟

صحصح : أيوه

* الرجل يقترب من صحصح

* صحصح فى منتهى الدهشة

* الرجل يسحب كرسيه ويجلس

* الرجل يتصرف ويتكلم كما لو كان معلما كبيرا فى المديح أو فى سوق الفاكهة.

الرجل : أهو محسوبك .. الراجل اللى اشترى فما مكسبه ؟

صحصح : أهلا وسهلا

الرجل : أهلا بيك .. يالله بقى .. خلصنى.

صحصح : أخلصك من ايه ؟

الرجل : خلص لى شغلانتي .. "يجلس" .. حاكم بقى ياسيدى

الحكاية وما فيها .. ان انا عقبال أملتك اتقدم لى عريس.

صحصح : اتقدم لك انت ؟

الرجل : يطلب بنتى .. صليت بناع النبي ؟

صحصح : اللهم صلى عليه

الرجل : ولقيتهولك جدع كده كويس وابن حلال .. قول ايه ؟

صحصح : ايه ؟

الاعمال الكاملة للشاعر

- الرجل : يعنى عجبىسى .. "يعتدل فى جلسته"
فأنا لما لقيته عجبىسى .. قلت له إيه ؟
صحح : إيه .
- الرجل : قلت له وجب .. قال لى تشكر يا عم الراجل اللى اشترى
فما إيه؟ ..
صحح : إيه ؟
- الرجل : فما مكسبه ؟ .. صليت بنا ع النبي ؟ ..
صحح : اللهم صلى عليه ..
- الرجل : امتى بقى الفرح ؟ .. ده الجدع اللى بيقول .. قلت له
اسمع .. قال لى هيه .. قلت له أنا أصلى شارى بضاعة كدة
.. وبعثها بحسبة كدة ومستنى مسألة كدة .. لما تنحل ..
أبقى إيه؟
صحح : إيه ؟
- الرجل : أبقى أجوز البنت .. واشترى إيه ؟
صحح : إيه ..
- الرجل : تلفزيون ..

* صحح يحاول الانسحاب بهدوء

- صحح : "يرتفع صوت برنامج ماما سميحة فى التلفزيون"
التلفزيون .. ماما سميحة ..
الرجل : واخذ لى بالك .. ياسى صحح أفندى
- صحح : "يحاول الانسحاب" ماما سميحة .. عن إذتك .. دى جنة
الأطفال فى التلفزيون.
- الرجل : عليك نور .. أجيب تلفزيون .. وتلاجة كمان بس لما
المسألة تنحل وربنا يسهل "ينزعج" على فين ياسيدنا ؟

* الرجل يستوقفه بشدة.

- صحح : "بمسكنة" ماما سميحة ..
الرجل : الله ؟ .. ما تسترجل كده وتكلمنى زى ما باكلمك ..
ياقول لك أنا مستعجل على المسألة ..

* الرجل يمسك صحح من ملابسه ..

- صحح : مسألة إيه ؟
الرجل : انت ح تستعبط ؟ .. نمرة ثلاثة وعشرين ؟ ..
صحح : طب بعد ما اتفرج.
- * يعلقه على عقرب الساعة الكبير.
الرجل : هو أنا لعبة ياواد فى ايديك ؟ .. شغلانتي الأول ..
الواجب بتاعك الأول .. " يعلقه على عقرب الساعة "
اتزع هنا .. أنا ما ابقاش الراجل اللي اشتري فما مكسبه
.. إن ما كنتش أخليك تشتغل زى الإيه ؟
صحح : " بخوف " الإيه ؟
- * عقرب الساعة يظل يدور ويدور و صحصح معلق عليه.
الرجل : البابور ! .. آه .. اشتغل .. اشتغل .. اشتغل .. " يخفت
صوته "
- * عند الساعة التاسعة يضح العقرب صحصح.
* من خانة التسعة تخرج صينية عليها زجاجة لبن. يشرب منها بسرور.
* صحصح يتذكر اللعب فجأة
* يخطف كرتة ويجرى للشارع
* تسمع دربكة هائلة ..
- صحح : يا قوة الله .. ده انا ح اموت م الجوع .. ياسلام .. العشا
أهه .. الله ؟ .. اللين " يشرب " " يتذكر فجأة " .. لكن
اللعب اللعب .. لازم ألعب .. أنا ما لعبتش النهاردة
خالص .. ده يوم إيه ده ؟ .. كل ما أعوز ألعب .. ما ألعبش
لازم ألعب .. فين الكورة .. أهه ع الشارع طوالى ..
لازم ألعب .. أنا لازم ألعب .. أنا مالى .. أنا لازم ألعب ..
- * يدخل صحصح وهو يلبس الجردل على نصفه الأعلى والماء يسيل من كل
جسمه وملابسه.
* يظل يمشى حتى يصطدم بالساعة.
الساعة : " تهق " إيه ده يا ولد ؟
صحح : " بهمهم من داخل الجردل "
الساعة : بتقول إيه ؟

الأعمال الكاملة للشاعر

صحصح : "يهمهم من داخل الجردل"

* الساعة تمسك الجردل

* صحصح يشد نفسه.

الساعة : شد نفسك

صحصح : "يهمهم"

الساعة : يقول ايه ده ؟

صحصح : "خارجا من الجردل" .. باقول متأسف ..

معلش .. غصبت عني. أصل الدنيا كانت ضلمة .. دست
على رباط الجزمة .. نزلت في الجردل بدماعى .. معلش

الساعة : كل حاجة معلش .. معلش .. تعالى هنا اما انشفك.
"تمسكه وتعصره في الجردل"

* الساعة تعصره في الجردل وتنشفه بالمكوة.

صحصح : أصل الوقت متأخر .. والدنيا ضلمة .. الساعة تسعة بالليل.

* تحمله إلى سريره وتضعه فيه.

الساعة : آه ؟ .. بالليل ؟ ! .. قلت لي بالليل اعترفت على
نفسك بالهرجلة وقلة النظام ..

صحصح : "لنفسه" أنا سمعت الكلام ده فين قبل كده ؟

الساعة : لو كنت فاهم إن كل شئ له وقت .. ماكنتش تلعب في
الشارع بالليل.

صحصح : أنا سمعت الكلام ده فين قبل كده ؟

الساعة : يالله اتخمد نام .. قال كانوا فاكرينك .. كبرت وعقلت ..
وانت ولا كبرت .. ولا عقلت .. ولا تستحق حاجة ..

صحصح : "بخوف" انتي مين ؟

* صحصح يتطلع من السرير إلى الساعة

* الساعة تتراجع إلى الخلف ببطء.

الساعة : وانت مالك.

صحصح : انتي الساعة اللي بابا اشتراها لي على التجاح ؟

الساعة : "تهتز" لأ
صحح : ليه ؟ هو بابا ما اشترايش ساعة على النجاح ؟

* الساعة تهتز وتقول لأ .. لأ

الساعة : "تهتز" لأ
صحح : ليه ؟ هو انا ما نجحتش فى الامتحان ؟

الساعة : "تهتز" فى الامتحان اللي أعرفه أنا .. لأ ..
صحح : ونتيجة الامتحان ما ظهرتش فى الجرنال

الساعة : "تهتز" لأ ..

صحح : ولا فى الراديو

الساعة : "تهتز" لأ ..

* الساعة تبعد إلى أقصى مكان

* موسيقى حاملة ..

* الظلام داس وصمت

صحح : ولا فى ال

الساعة : "تهتز" لأ .. لأ .. لأ ..

* النور الصباحى يغمر المسرح

* الوالدان عند سرير صحح

* يوقظانه

الأب : صحيه ..

الأم : صحيه انت ..

الأب : نصحيه سوا

الاثنان : صحح .. ياصحح .. صحح

* الأب والأم يقبلان صحح ويهنانه

صحح : مين ؟ .. بابا ؟ .. ماما ؟ .. صباح الخير

الأم : صباح النور ياصحوصحتي . مبروك .. نجحت "تقبله"

صحح : نجحت ؟

* الأب يعطى صحح الساعة

الأب : ومبروك .. جيت لك ساعة هدية "تقبله" ساعتى

الأعمال الكاملة للشاعر

صحح : ساعة ؟ "يتناولها" .. الساعة ؟ .. ساعتى
والوالدان : هيه ؟ ازاي الحال ؟ ..

* دقات قلب صحح ترتفع

صحح : ياسلام ياابا .. ياسلام ياماما .. مش قادر اوصف .. الدنيا
مش سايعانى .. وقلبي بيدق .. زيها .. زى الساعة .. بيدق ..
.. بيدق ..

* صحح يقف فى السرير ويتجه إلى والديه لسمعوا قلبه

الأب : طب حيلك شوية .. ماحدثت له ساعة الا انت ؟
صحح : لأ صحیح يا بابا .. مش فيه بيت شعر بيقول :
دقات قلب المرء قائلة له
الأب : إن الحياة دقائق وثوانى .. أيوه ياسيدى
الأم : اسم الله عليك ياروح قلبى .. "تقبله"

* الأب يجلس على الكرسي

* صحح فى وسط الغرفة يمشى برزانة

الأب : هيه .. قل لنا .. ح تعمل ايه بالساعة دى ؟

صحح :

دى مسئولية كبيرة قوى يا بابا .. مش عياقة .. ولا فطنزية
.. دى ح اضبط بيها مواعيدى. بدل الهرجلة وقلة النظام

الأب : ما شاء الله.

صحح : أصل اللي ما يعملش كل حاجة فى وقتها .. ما يلاقيش
وقت يعمل أى حاجة.

الأم : "تزغرد"

صحح : لازم انظم بيها الأوقات .. الصحيان له وقت. والنوم له
وقت .. اللعب له وقت .. والشغل له وقت .. حتى رباط
الجزمة .. له وقت.

* الأب والأم يتجهان للانصراف.

الأم : "تزغرد"

الأب : مبروك يا حبيبى .. عقبال كل سنة ..

* صحصح يتنطط فرحانا

* بسمع من حوله موسيقى آلاف الساعات وهي تقترب منه.

صحصح : "للجمهور"

أنا مش فاهم جرابي ايه ؟ .. مش قلت لكم ؟ .. ح اتقلب

"بتشقلب" قصدي ح اتعدل "يعتدل" إيه دول ؟

يا وعدى !

* صحصح لا يصدق عينيه

* ساعات من جميع الأشكال تلف حول صحصح.

* الجميع يرقصون.

الساعات : "تغنى"

تك تك تك تك

احنا احنا الساعات بننظم الأوقات

كبيرنا وصغيرنا يعمل نفس الحاجات

اللى فوق الحيطان واللى ف وسط الميدان

واللى فى إيد فلان أولسه فى الدكان

كلنا بنقول تكتك تكتك

تكتك ثانية تكتك ثانية ودقيقة تفوت بعد الثانية

تكتك تكتك تصبح أيام تكتك تكتك تصبح أعوام

تكتك تكتك تصبح تواريخ بين الصواريخ وبين الأهرام

وآدى الدنيا

كلها ماشية تكتك تكتك

قولوا معنا تحيا الدنيا

وتعيش يا نظام

وليحيا التكتك تك تكتك

* قدمتها فرقة المدارس لعرائس العضا والقفاز فى موسم 63 - 1964 وأخرجها صلاح السقا.

مسرحية الفيل النونو الغلباوي

البرولوج

* مقدمة موسيقية من جو المسرحية تعبر عن أحداثها.

* يملأ مقدمة المسرح طاووس وذيله مفرد على شكل مروحة.

* تنتهي المقدمة الموسيقية بصيحات افتتاحية من الطاووس.

الطاووس : آ آ آ

* يفتح ذيل الطاووس من الوسط على شكل رقم 7 ويظهر من هذه الفتحة مقدم البرنامج "بلبل اللبلاية".

البلبل : أنا بلبل اللبلاية مديع في راديو الغابة
صوتي بديع في الأغنيات
أخبار أذيع ومباريات
وصديق جميع الحيوانات
في الغابة

أصوات : في الغابة في الغابة في الغابة.

البلبل : أنا بلبل اللبلاية مليت ورقها كتابة
على كل لون أعرف حاجات
من كل لون عندي حكايات
عن كل لون م المخلوقات
ففي الغابة

أصوات : في الغابة في الغابة في الغابة.

* فتحة ذيل الطاووس تزداد اتساعا.

* البلبيل يقدم بعض شخصيات المسرحية التي تظهر تباعا ومع كل شخصية جملة موسيقية ستلازمها طول المسرحية لتعبر عنها.

* مرور القرد

البلبل : مثلاً حكاية عم قرد إल्ली الشقاوة وأخذها جد.

* مرور الزرافة

البلبل : وحكاية عن زرافة رأسها فوق ومش عاجبها حد

* مرور الأرنبة

البلبل : وأرنبة مؤدبة بودانها تلعب ثنى مد

* مرور الحمار المخطط الذى لم يعد مخططاً.

البلبل : وحمار مخطط بالإختصار ما بقاش مخطط وفضل

حمار.

* توليفة موسيقية من الجمل الأربع السابقة يتحرك عليها القرد مع الزرافة والأرنبة والحمار

* ثم اختفاء مفاجئ.

* فى ظلام المسرح الأسود يبدأ تقديم عنوان المسرحية بالأسلوب المناسب.



المشهد الأول

* يظهر من الظلام بلبل اللبلاية.

البلبل : حكايات ياما وياما حكاوى أكثر من مناديل الحاوى ..
بس النهاردة ح نقدم الفيل النونو الغلباوى إللى يسأل
صبحه وليلسه والأسئلة دي هوايته وميله.
خدوا بالكو ..

* مع تأثير صوت عصافير

* يظهر من الظلام ديكور من أشجار الموز وفيه يجلس الفيل .. بزلومة صغيرة جداً.
البلبل : أهو قاعد أهه !

* الفيل يحدث نفسه بصوت مسموع ويهز رأسه بوقار.

* مع هزات رأس الفيل يتحرك البلبل فى طريق الخروج
الفيل : ليه ؟ مين ؟ فين ؟ إمتى ؟ عشان إيه ؟ وازاى ؟ وده إيه ده ؟
ووده إيه ؟
البلبل : ده الفيل إللى بنحكى عليه فى الأسئلة شادد قوى
حيله.

* قبل أن يخرج البلبل يعود مرة أخرى ويخاطب الجمهور

* ثم يطير خارجاً من المسرح

البلبل : شوقوا مناخيره كمان طول إيه ؟ تقريباً أقصر من ديله
يعنى مالوش مناخير "يخرج".

* يتحرك الفيل نحو مقدمة المسرح سائلاً.

الفيل : طيب ليه ؟
معناها إيه ؟ ودى تعمل إيه ؟ وازاى ؟ وده إيه
ده ؟ ووده إيه ؟

* يسمع المؤثر الموسيقى المعبر عن القرد.

* يظهر القرد خارجاً من بين أشجار الموز لابسا قبعة ونظارة أمريكانى . ويدخن سيجاراً
بعظمة . ينط فوق شجرة الموز ويقطع موزة ويلتهمها.

القرد : أنا أطلع فوق شجر الموز زى القرد.

الأعمال الكاملة للشاعر

* ينهنه الفيل قليلاً ثم ينصرف إلى أعلى الشجرة.
الفيل : "ينهنه".

* يختفى جزء من ديكور الموز وتبقى أجزاء قليلة.
* صوت من خارج المسرح "توت فش فش فش".
* يدخل طابور من الأرناب الصغيرة كأنهم يلعبون لعبة قطار السكة الحديد.
الأرناب : توت فش فش فش يا وابور يا مولع حط
الفحم وياقول لك ولع حط الفحم.

* تمشى بجوارهم الأرنبة الأم وهي تحمل أرنباً صغيراً مولوداً.
* الأم تحرك أذنيها على إيقاع المشى. وتصفق بهما لأن يديها مشغولتان بحمل الأرنب الصغير.

حط الفحم	واحد اثنين الأرناب :	الأم :
حط الفحم	شمال يمين	
حط الفحم	ثنى فرد	
حط الفحم	يا لله يا ورد	
حط الفحم	ثنى مد	
حط الفحم	شدوا جد	

* يتضح أن الأرناب يشدون حبلاً وراءهم.
* ويخرجون من المسرح ويتركون الجبل مشدوداً دون أن يظهر الشئ الذى يشدونه به.
* أصواتهم لا تزال تصل من خارج المسرح.
أصوات الأرناب: هيلاهوب هيلاهوب.

* يدخل الفيل وينظر إلى الجبل المشدود ويلعب عليه حركات بهلوانية .. وبعد لحظة ينتهي الجبل ويظهر الشئ المشدود بالجبل فإذا به فرن أسود له مدخنة تخرج دخاناً رمادياً.

* يقع الفيل على هذا الفرن فيلسعه فيهب صارخاً من اللسعة.
الفيل : آى .. إيه ده ؟ مين ؟ عشان إيه ؟
وإزاي ده ؟ يحصل ليه ؟

* ترجع الأرناب الصغار وأمهم دفعة واحدة وينظرون إلى الفيل ويضحكون.
الأرناب : هاهاهاهاهاهاها.

الأم : عيب يا ولاد.

* الفيل يتأمل الفرن باهتمام.

* تتجمع الأرناب الصغار حول بعض في جانب المسرح.

الفيل : ده إيه ده يا جماعة ده ؟

الأرناب : ده واياور ومولع مليون فحم وتملى مولع مليون فحم.

الأم : بس يا ولاد .. "الفيل" ده يا حبيبي يبقى قرن .. جايينه نشوى فيه بطاطا.

الأرناب : وح نشوى بطاطا .. بنار الفرن .. طعم الشوكالاطة .. بنار الفرن

الأم : يالله يا حبايبي

* الأرناب الصغار يمسون بالحبل ويبدأون في الشد مرة أخرى.

* الأم تبدأ في التحرك معهم وهى تصفق لهم على الواحدة.

الأرناب : هيلاهوب

الأم : ح اديكم نايبى ..

الأرناب : هيلاهوب

* الفيل واقف مبلم وسارح يلاحظ أنهم بدأوا فى الإنصراف فيسرع خلفهم وينادى.

الفيل : خالة يا خالة

* الأم تتوقف بملل ومضايقة معها كل الموكب.

الأم : نعم. ؟

الفيل : ده فرن ؟

الأم : "بسخرية" لأ تلاجة

الفيل : "بجدية" لأ ده مش تلاجة

الأم : بلاش ده حوت ..

الفيل : حوت ده لأ مش حوت ..

* الأم تصرخ بعصبية فتفزع الأرناب ويتجمعون حول الفرن فى جانب المسرح.

الأم : ولما انت عارف انه مش تلاجة

ولما انت عارف انه مش حوت

الأعمال الكاملة للشاعر

ولما أنا باقول لك من الصبح إنه فرن بتقلب دماغى ليه
بالأسئلة دى كلها "الأولادها" يا الله يا حبابى

* يبدأون فى الشد مرة أخرى ويتحرك الجميع.

الأرانب : هيلاً هوب

* الفيل يجرى خلف الأرنبة الأم ويستوقفها.

الفيل : معلش يا خالة ما تزعليش منى بس الفرن ده

الفرن بيعملوا بيه إيه كمان ؟

الأم : يخبزوا فيه.

الفيل : إيه مثلاً ؟

الأم : فطير.

الفيل : وبسكويت ؟

الأم : مثلاً

الفيل : وبتجيبوا منين البسكويت عشان تخبزوه ؟

الأم : بنعجن له عجينة.

الفيل : وازاى بتنعجن العجينة ؟

* يظهر أمامها ماجور.

الأم : سهل قوى تستعمل المقادير الآتية :

* يظهر أمامها فنجانان

* تضع الطفل على الأرض وتأخذ الفنجانان وتصبهما فى الماجور.

* الطفل يبدأ فى البكاء.

* الأم تحمل الطفل فيسكت.

الأم : فنجالين دقيق.

الطفل : و ا ا ا ا ا

* يظهر فنجانان آخران.

* الأم تضع الطفل على الأرض لتصبهما فى الماجور.

الأم : وفنجالين لبن ..

* الطفل يعود إلى البكاء

الطفل : و ا ا ا ا ا ا ا ا ا

* الأم تحمل الطفل فيسكت.

* تظهر ثلاث بيضات.

* تضع الطفل على الأرض فيعود إلى البكاء ولكنها تتركه حتى تكسر البيضات الثلاث في الماجور. الطفل يكاد يخنق من البكاء فتحمله الأم بيد وتلقى بالبيضة دون كسر في الماجور.

الأم : وثلاث بيضات آدى واحدة
الطفل : و ۱۱۱۱۱۱ ء
الأم : والثانية
الطفل : و ۱۱۱۱۱۱ ء و ۱ ء .. و ۱ ء "يكاد يخنق"
الأم : والثالثة.

* الأم تحاول تهين الطفل وتهزه ليسكت ولكنه لا يسكت ويظل يصرخ بصوت مرتفع.
* الفيل يحاول أن ينتظر حتى يسكت الطفل وتعود الأم إلى كلامها ولكن الطفل لا يسكت.

الطفل : و ۱۱۱۱ ء

و ۱۱۱۱ ء

و ۱۱۱۱ ء

* الفيل يستزيد الأم من الكلام.

* الأم ترد بصوت منخفض بلهجة أبله نظيرة في الراديو.

* طول الفقرة التالية المناقشة دائرة بين الأم والفيل والطفل يبكى بلا انقطاع والأم تهزه وهي تتكلم بلا فائدة.

الفيل : وبعدين

ولكن الفيل لا يسمعها بسبب ارتفاع بكاء الطفل.

الأم : تخلط الكميات جيداً

الفيل : "بصوت عال" بتقولى إيه ؟

الأم : "بصوت عال" تخلط الكميات جيداً وعشان العجينة

تنفش وتبقى حلوة .. لازم نضيف عليها شوية بيكرينات

الفيل : "بصوت عال" وده يبقى ايه البيكرينات ده ؟

الأم : "بصوت عال" أ ووووووه .. مسحوق أبيض كده.

الفيل : "بصوت عال" ويعنى إيه مسحوق أبيض ؟

"وأخيراً".

الأم: "بصوت عالٍ اللهم طولك يا روح .. مسحوق أبيض
اسمه بيكربونات .. ويستمعلوه دوا كمان.

* الطفل يهدأ قليلاً قليلاً.

* الفيل سارح في مسألة الدواء.

* يخرج الفيل من سرحانه كالقنبلة.

الفيل: "بصوت مرتفع" هو الدواء بيتحط في البسكويت ؟

الأم: الأم تسكته خوفاً من إزعاج الطفل .

هس

الفيل: "هامساً" هو الدواء بيتحط في البسكويت كمان ؟

الأم: "هامسة" يا سلام عليك .. ده عشان العجينة تطلع كويسة.

الفيل: "هامساً ومفكراً" آه .. وتطلع إيه العجينة دي ؟

* الأم تنفجر غاضبة وتنسى الهمس .. وتلقى بالطفل على الأرض وتهجم على الفيل.

* زبطة فظيعة من الأم والأرانب والطفل.

الأم: "بغضب وزعيق" ما أنا لسه قايلالك يا فيل يا رزبل يا

سنبل إنها من الدقيق واللبن والبيض.

الفيل: "متقهراً أمامها" والبيكربونات ؟

* يظهر الماجور مرة أخرى.

* تحمله الأم وتقلبه فوق رأس الفيل.

الأم: آه يا نارى .. ده انت تفرس .. العجينة أهه. خد .. عشان

تبطل الغلبة الغاضبة بتاعتك.

* الأطفال يصيحون "توت".

الأرانب: توت

* ينطلق الفرن مثل قطار حقيقى ومن خلفه عربات صغيرة يقفز فيها الأرانب وأمهم

وينطلقون بسرعة إلى خارج المسرح.

الأرانب: يا وأبور يا مولع

حط الفحم

وباقول لك ولع

حط الفحم

- "يتلاشى صوتهم وصوت القطار"
 * الفيل وحده .. مع صوت نفخ وذرات دقيق تتطاير حوله ..
 * الفيل يكح .. ويبكى.
 * يظهر ديكور من أشجار البرتقال.
 * تدخل الزرافة.
 * الزرافة عبارة عن رقبة طويلة تكملها أيد بشرية تحمل راديو ترانزستور.
 * الزرافة تستمع إلى أغنية عاطفية بانسجام وهيام.
 الراديو: "يعنى" آه.

خلاص اموت
 قربت اموت
 أنا ايه باموت
 أنا مت فعلاً
 أنا مت جداً
 جداً جداً
 من كتر الحب ..

- * مع تأوهات الزرافة ينهض الفيل ويذهب إليها ويتأملها قليلاً.
 الزرافة: "تأوه"
 الفيل: انتى ليه .. رقتك طويلة كده ؟
 الراديو: "مغنياً" من كتر ظرفك يا ظرافة ..

- * الزرافة تفتح حقيبتها وتخرج منها مرآة تنظر فيها لنفسها بدلال وهي تعدل شعرها.
 الزرافة: وشى بيحمر
 الراديو: "يعنى" ح ينقلونى ع القرافة.
 الزرافة: لأ..... بعد الشر.
 الراديو: "يعنى" ميت م الحب

- * الزرافة تنهد وتدندن بههمة مع لازمة الأغنية.
 * الفيل ناظر إلى أعلى يتأمل رأسها.
 الزرافة: "تنهدات تأوهات همهمات"
 الفيل: وليه بقى كمان راسك

الأعمال الكاملة للشاعر

- الزرافة : "دندنة وهمهمة"
 الفيل : صغيرة قوى قوى بالشكل ده ؟ هه ؟ هه ؟ هه ؟ ..
 الزرافة : أرجوك .. ما تزعجنيش .. لأنى سرحانة فى المزيكة
 "تهمهم".
 الفيل : مزيكة نوعها إيه ؟
 الزرافة : لحن عاطفى
 الفيل : هو اللحن العاطفى ببقى حاجة تانية غير اللحن
 الحزائى ؟. والا هم الاتنين نفس الشئ ؟

* الزرافة تغلق الراديو بعصية ورقبتها تنقلص وتقصر وتطول من الغضب.

- الزرافة : دى غباوة إيه دى ؟
 الفيل : طب لو سمحتى قوليلى .. تعرفى التمساح بياكل إيه ع
 العشا؟
 الزرافة : بقى كده ..
 بقى انت مصمم تفور دى ..
 لازم أوريك ..
 الفيل : خلاص خلاص ما تزعليش .. بس قوليلى باختصار
 ليه رقبتك طويلة قوى قوى كده ؟

* الزرافة تنفعل على الفيل وتفقد صوابها

* تضربه على رأسه بالراديو الترانزستور فيفتح الراديو على مذهب الأغنية العاطفية
 وتنصرف.

- الزرافة : رقبتي ؟ رقبتي ؟
 أصل انت ولد مش كويس واحد مش مؤدب
 و .. و .. وفظيع كمان .. خد
 الفيل : آآ خ

* صوت الراديو يبتعد ولا يبقى إلا الفيل وحده وهو ينهه من أثر الضربة.

- الراديو : آآآ
 الفيل والراديو : خلاص ح اموت
 قربت اموت
 أنا اهه باموت

الفيل : "وحده" أنا مت فعلاً
أنا مت جداً
جداً جداً
من كتر الضرب

* تدخل النعامة راكبة بسكليتة.

* الفيل يتنبه لها ويكف عن البكاء ويتجه إليها كي تقف.

الفيل : استنى حاسبى

* النعامة تفرمل مرة واحدة وتقف دون أن تنزل من مكانها.

* أوضاع أشجار البرتقال تتغير.

ال معناه إيه ده ؟ .. يا مضحكة

ال معرفش

ال هيصة ؟

النعامة : معرفش

الفيل : زبطة ؟

النعامة : معرفش

الفيل : زمبليطة

النعامة : معرفش معرفش معرفش

الفيل : طب تعرفى إيه ؟ تعرفى تحطى رجل على رجل ؟

النعامة : "تشق" بقى موقفنى عشان تتمسخر على رجلى أنا ح

أوريلك ..

الفيل : خلاص خلاص بلاش دى تعرفى التمساح

يباكل إيه ع العشا ؟

* النعامة تصدمه بالسكليتة وتمر فوقه مرة واثنين وثلاثة ثم تنصرف.

* الفيل ينهه قليلاً.

النعامة : إيه اللى يياكله ع العشا ؟ .. خد آدى اللى يياكله .. خد

خد

الفيل : "بكاء ونهية"

* تحدث حركة ذهاب وإياب شديدة من الحيوانات التي تمر راكبة على كل أنواع وسائل

الركوب التي تجرى في شتى الاتجاهات ، من سيارات وقوارب وهليكوبتر.

الأعمال الكاملة للشاعر

* يقسم المسرح إلى ثلاثة كادرات. في الأوسط منها يظهر الهليكوبتر يركبها القرد وعلى أحد الجوانب الأرنبة في قارب طويل ومعها أبنائها وفي الآخر الزرافة وهي تركب سيارة فاخرة.

* الفيل النونو الغلباوى يجرى بينهم من هنا إلى هنا وهو لا يكف عن توجيه الأسئلة إليهم.

الفيل : ليه القمر مدور ؟

الزرافة : إزاي تتجراً وتوقف عربية فخمة بتجرى بأخر سرعة عشان

تسأل أسئلة زى دى إيه يا اخوانى قلة التربية دى ..

* الفيل يجرى إلى القرد سائلاً.

الفيل : الدبان بيروح فين لما يطير ؟

القرد : حوشوه من قدامى .. أنا ح أعمل مصيبة

* الفيل يجرى إلى الأرنبة.

الفيل : امتى المطرة بتكون أقوى ؟. بالليل والا بالنهار ؟

الأرنبة : أه .. برج من عقلى ح يطير .. كفاية أسئلة الله يخليك ..

انت ح تفرسنى ..

ح تفرسنى .. ح تفرسنى "تبكى"

* النعامة تقفز مارة في مقدمة المسرح.

النعامة : ها ها ها ها ها

* تخفت الاضاءة على الجميع ما عدا الفيل الذى يفاجئها بسؤال فتفزع وتخرج هاربة.

الفيل : فيه كام عود قش فى المقشة ؟

النعامة : معرفش .. معرفش .. معرفش .

* يحدث ذهاب وإياب فى المسرح وأسئلة وأجوبة سريعة.

الفيل : ليه ؟

الزرافة : أه

الفيل : فين ؟

القرد : هو هو هو هو هو

الفيل : امتى ؟

الأرنبة : ح تفرسنى ح تفرسنى ح تفرسنى ..

الفيل : كام ؟

النعامة : معرفش معرفش معرفش

* تزداد الحركة عنفاً مع صوت زحام .. وضجة أصوات الجميع.
أصوات الجميع: "ضجة"

* يهدأ كل هذا مرة واحدة.

* الفيل وحده في مقدمة المسرح مع مؤثر موسيقى سنسمعه في كل مرة يردد فيها سؤاله
عن التمساح.

الفيل : عاوز أعرف التمساح بياكل إيه ع العشا ؟

* يظهر بلبل اللبابة - في مقدمة المسرح

البلبل : يا مسكين رجعت تسأل أسئلة تاني ؟

الفيل : عاوز أعرف التمساح . بياكل إيه ع العشا ؟

* لحن ملئ بالحنين إلى المغامرة لتشجيع الفيل على اقتحامه للحصول على المعرفة.

البلبل : أظن أحسن حاجة تعملها إنك تروح تسأله هو.

الفيل : هو مين ؟

البلبل : التمساح

الفيل : والتمساح ده ساكن بعيد ؟

البلبل : "يعنى" بعيد قوى ف قلب المجاهل

هناك ورا الجبل الكبير

بيجرى نهر عظيم وهائل

وعايمة فيه طواير طواير

تماسيح بتبرق وتلعلط ما بين عيدان هايشة ونامية

في المية تلعب وتبليط

وتكشف أسنانها الحامية

الفيل : "مفكراً" تماسيح بتبرق وتلعلط

ما بين عيدان هايشة ونامية

في المية تلعب ؟ .. وتبليط ؟

ها ها ها "يضحك"

البلبل : "محدراً" وتكشف أسنانها الحامية ..

الفيل : ويتاكل إيه ع العشا ؟

البلبل : أظن ما الواحد منها

بياكل له في اليوم كذا مرة

لحد ما العشا يتجهز

ووقتها تهل القمره

"سارحاً"

الفيل :

تهل القمره ؟

وبكل رقة ونعومية

البلبل :

تنور الليل الكحلى

وتنتظر .. لما آخرهم

يخلص العشا ويحلى

"مفكراً" آه وبياكلوا إيه ع العشا ؟

الفيل :

ده عليك لوحذك تعرفه ..

البلبل :

مستنى إيه ؟

لازم تكون دلوقتى فى السكة

وخذ معاك مخلة

تحط فيها الزاد والزواد ..

* الفيل يحضر مخلة.

أحط إيه يا بلبل اللبلاية ؟

الفيل :

سندوتش كبدة وعلبة فول بزبدة

البلبل :

وحتة جينة بيضة ومعاهم كام بيضة

ورغيفين ثلاثة وكراملة وشكولاتة

"يردد معه نفس الكلمات وهو يعبئ المخلة".

الفيل :

* بعد أن ينتهى الفيل من ملء المخلة يحملها ويبدأ فى الإنصراف.

البلبل : "مكماً" وشوية نصايح خدهم وانت رايح

* الفيل يمشى والبلبل يطير فوقه ويزوده بالنصائح.

* الفيل يردد ما يقوله البلبل ليحفظه.

* الحوار بينهما "مرتوم" البلبل صوته مرتفع وكلماته أقل سرعة من كلمات الفيل

يردد الكلام بهمهمة كأنه يحفظ نفسه.

* موسيقى إيقاعية فى خلفية الحوار

البلبل : خليك عاقل طول السكة وبلاش ترمى ورق ع الأرض

صلاح جاهين

- الفيل : خلىنى عاقل طول السكة وبلاش أرمى ورق ع الأرض
 البلبل : اغسل إيدك قبل الأكل وبعده كويس واتمضمض
 الفيل : أغسل إيدى قبل الأكل وبعده كويس واتمضمض
 البلبل : اوعى تشرب من كباية حد
 الفيل : اوعى أشرب من كباية حد
 البلبل : اوعى تأجل عمل اليوم للغد
 الفيل : أوعى أأجل عمل اليوم للغد
 البلبل : قول من فضلك قبل ما تطلب
 الفيل : وأقول متشكر أبقي مؤدب ؟
 البلبل : طبعاً .. أمال
 الفيل : خليك شهيم وساعد غيرك وانجد كل اللى يقول آى
 البلبل : خلىنى شهيم وأساعد غيرى وانجد كل اللى يقول آى
 البلبل : بس خلاص دلوقت يا فيل يا عزيزى ح أقول لك باى
 باى
 الفيل : باى باى يا بلبل باى باى
 الإثنان معاً : باى باى باى باى باى باى باى.

* يخرج الفيل.

* الحيوانات تخرج وهى ترقص وتغنى فى حركات عنيفة مرحة جنونية.

الحيوانات : "تغنى" الفيل المتعب أهو راح

يا حبايب قيموا الأفراح

الفيل النونو الغلباوى

راح ودماغنا خلاص ارتاح

راح راح راح راح

* بعض فقرات من موعات راقصة وموسيقية فى اللحظة التى أقيمت ابتهاجاً بالتخلص من الفيل.

القرد : ودلوقت نقدر نتسلى على راحتنا !

* أخيراً تهدأ حالة المرح والصخب ويبدو على الحيوانات خيبة الأمل

* القرد يلعب فى الهواء بشئ ثم لا يلبث أن يمل فيلقيه بعيداً.

القرد : أوووف

الإعمال الكاملة للشاعر

* الزرافة تدير مفاتيح الراديو على محطات كثيرة ولا تجد ما يعجبها.
الراديو: فإن متوسط ارتفاع الأمواج في المحيط الأطلسي
"محطة ثانية" وهل كل الرجال مستعدون للكفاح يا أيها
المفضال .. "محطة تالته" شيخ ببخ شيخ ببخ شرم برم
"كلام صيني" "كلام لاوندى"

* الزرافة تغلق الراديو بغيظ.

الزرافة: ايه القرف ده

* الأرنب المولود حديثاً ينفجر باكياً وأمه تحاول أن تسكته.

النعامة: بيتهيألى إن حاجة ناقصانى.

الطفل: و!!!!!! ء

* الأم ترقص التويست وتصفق بأذنيها لتلهي الطفل عن البكاء

الأم: بس يا حبيبي بس "واء" سد يا توتوسد "واء" مين

شطور ياخذ البرازة؟

هيه .. "واء" طب نام ننه . هوو هوو "واء" طب بص

بص بص .. "ترقص" واحد اثنين .. تويست تويست.

ننه هوو تويست تويست

ننوس عينه تويست تويست

متعب خالص تويست تويست

النعامة: متعب ازاي؟ .. يسأل أسئلة

* تفر الأرنبة وهي ترقص.

الأم: "ترقص" اهه يا ختى .. تويست تويست

ما بيعرفش .. تويست تويست

يتكلم أبدأ تويست تويست

ده صغنى خالص تويست تويست

* القرد يحاول أن يغنى ولكن بلا مزاج.

القرد: الفيل .. النونو .. الغلباوى ..

راح ودماغنا خلاص ارتاح

راح راح ر!!!!!! ح .

* يدخل بلبل اللبلاية طائراً بسرعة.

يا بلبل اللبلاية	: الجميع
نعم يا أهل الغابة	: البلبل
هو راح فين ؟	: النعام
مين ؟	: البلبل
الفيل النونو الغلباوى	: الجميع

* بلبل اللبلاية يغنى.

* للحن هذه المرة والأداء يختلفان عن المرة السابقة ففيهما لوم وعتاب للحيوانات وشادة بالفيل وبشجاعته ومغامرته الخطرة.

* يختفى الجميع تدريجياً.

* يحل المساء.

* قمر مكتمل.

* بقعة لامعة من الماء.

* قلق.

البلبل : "يغنى" بعيد قوى ف قلب المجاهل

هناك ورا الجبل الكبير

بيجرى نهر عظيم وهائل

وعايمة فيه طواير طواير

تماسيح بتبرق وتلعلط

ما بين عيدان هايشة ونامية

فى المية تلعب وتلببط

تماسيح بتبرق وتلعلط

: الجميع

ما بين عيدان هايشة ونامية

فى المية تلعب وتلببط ؟

"بحزن" وتكشف أسنانها الحامية.

: البلبل



المشهد الثاني

* بعد انتهاء المشهد الأول يكون الكادر مظلماً ..

* يظهر الفيل ويفتح أمامه ديكور جبل يبدأ فى الصعود عليه مع أغنية.

الفيل : "فوق إحدى القمم"

محلا السفر ويا سعد اللي يسافر

الله أكبر .. أما منظر مدهش

عجبنى تحت .. وفوق عجبنى زيادة ..

يا سلام لو أقدر أرسمه "وقفه قصيرة"

أيوه صحيح لكن بقى التماسح بياكل إيه ع العشا ؟

* ينزل من القمة ويبدأ فى تسلق الجبل الثانى الذى يفتح أمامه مثل الأول.

الفيل : صعب الطلوع .. عاوز جسم رقيق أما النزول ده لعبة

بالنسبة لى.

* يتدحرج من الناحية الأخرى.

* يظهر ديكور الجبل الثالث بنفس الطريقة.

* الفيل يجلس ويخرج بالوناً من المخلة وينفخه.

الفيل : مين اللى قال إن النزول أسهل حتى النزول يا أخوانا

مش لعبة

* البالون ينتفخ ويرفع الفيل إلى القمة الثالثة على أغنية التماسيح فيعبر من القمة ويخرج من المسح.

الفيل : والآن إلى الأمام

"يقنى"

بعيد قوى ف قلب المجاهل

هناك ورا الجبل الكبير

بيجرى نهر عظيم وهابل

وعايمة فيه طوابير طوابير

صراح جاهين

تماسيح بتبرق وتلعلط ما بين عيدان هابشة ونامية في
المية تلعب وتلبط

* ديكور أشجار جميز .. وبجوارها بحيرة صافية.

الفيل : أنا جعت بعد المشى ده كله ح اقعد هنا آكل وارتاح

* يشرع فى الجلوس ويستعد للأكل.

* يسمع صوت من بعيد على هيئة صدى.

الصوت : اغسل ايدك قبل الأكل .. وبعده كويس واتمضمض ...

* فيذهب إلى البحيرة ويغسل يديه مخرجاً رغاوى صابون كثيرة تملأ منطقة البحيرة.

الفيل : أيوه الأول اغسل ايدى

وآدى بحيرة جميلة يا سيدى

اغسل اغسل اغسل اغسل

نشف ... نشف نشف نشف ...

اقعد بقى كل هم هم هم

* "يفتح المخلة".

* ثم يجلس وياكل.

سندوتش كبدة .. هم هم

وعلبة فول بزبدة هم هم

وحتة جبنة "بيضة" هم هم

ومعاهم كام بيضة هم هم

ورغيفين تلاتة هم هم

* يذهب إلى البحيرة مرة أخرى ويغسل يده وينشفا.

الفيل : "بطفولة" كلت خلاص يا حلولى

ح اغسل ايدى واحلى

اغسل .. اغسل .. اغسل .. اغسل ..

نشف نشف نشف نشف

* يعود إلى المتخلة ويأكل الكراملة والشكولاتة ويرمى الورق على الأرض وينصرف.

الفيل : الكراملة هم هم هم
والشكولاتة هم هم هم
ويا لله يا عم.

* يمشى قليلاً ولكنه يرى سلة مهملات مكتوب عليها "حافظوا على نظافة غابتكم".

* يقرأ .. ويتذكر صوت البلبل وهو ينصحه .. الصوت يأتي من بعيد.
* يحود فيجمع الأوراق ويرميها في السلة.

الصوت : خليك عاقل طول السكة وبلاش ترمى ورق ع الأرض.
الفيل : أيوه صحيح

خليني عاقل طول السكة
وبلاش أرمى ورق ع الأرض

* الفيل يتوقف قليلاً.

* ثم ينصرف.

الفيل : "وقفة صغيرة"

بس التمساح

أيوه التمساح

يباكل إيه ع العشا ؟

* ديكور لسهل ملئ بالأزهار يدخل الفيل . فيعجب بالأزهار.

* يجد رشاشة فيحملها ويبدأ في سقى الأزهار.

الفيل : بسعد صباحكوا يا وردايات يا جبايبي

يا مفتحين وكلكم حلوين

ح اسقيكو بالرشاشة " يرشهم" واشرب حبة

* يقرب الرشاشة من فمه ولكنه يسمع الصوت.

الصوت : اوعى تشرب من كباية حد

* يبدأ فى اللعب.

أيوه فعلاً .. دى كباية الورد
أشرب أنا بقى من كبايتى
وألعب هنا جنبكم حبة
والصبح أروح للتمساح.

* ولكنه يسمع الصوت.

الصوت : اوعى تأجل عمل اليوم للغد

* يحمل مخلته ويبدأ فى التحرك.

الفيل : مش راح أأجل عمل اليوم للغد
إلى اللقاء يا ورداتى العزاز
وإلى الأمام يا فيل تقدم
شوف التمساح
أيوه التمساح
بياكل إيه ع العشا

* مزيد من الجبال التى تردد الصدى ..

الصدى : بياكل إيه

بياكل إيه

إيه

إيه



المشهد الثالث

* ديكور النهر يتلألاً في صدر القمر بجواره لافتة مكتوب عليها "النهر العظيم".
* الأسد ممسكاً بساندوز رياضي وهو يقوم بتمرينات المساء.
الأسد : "يغنى"

عضلاتي يا عضلاتي
يا حبيبتي يا أحلى صفاتي
يا لله اتمرني واتقوى
واكبرى كده كده واحلوى
في الدنيا زئيري يدوي
وامشي ف جوي وبطولاتي

* يشبك الساندوز ويلعب عليه لحنا عاطفياً كأنه آلة وترية.
* ثم يعود للتمرين بعنف.

الأسد : "بحنان"

أكل خضاري ولحمتي
وضروري أخلص لقمتي
واشرب لبن .. ما اقولش لأ.
صبرت حقة بدمتي
"بقوة" أسد
وآدي عضلاتي

* ينتهي من التمرين ويسترخي على ظهره واضعاً يديه خلف رأسه وأيضاً رجل على رجل
* عند نومه يسمع زئير أسد يليه شخير نوم.

الأسد : وف آخر تمريناتي

لازم أعمل الآتي :
أخذ أجازة رسمي
وارخخ كل جسمي
وأنسى كمان حتى اسمي
ده مفيد
علشان عضلاتي

صالح جاهين

* يدخل الفيل مثل المسافر الذى أجهده السفر وتلفت حوله فيلاحظ وجود الأسد.
* الفيل يقترب من الأسد بأدب.

الفيل : مساء الخير
الأسد : ششت
الفيل : أنا ما قلتش حاجة غير مساء الخير
الأسد : ششت
الفيل : أنا قلت حاجة غلط
الأسد : ششت "وزنير خفيف"

* الفيل يتذكر صوت بلبل اللبابة.

الصوت : قول من فضلك قبل ما تطلب
الفيل : من فضلك ... حاجة واحدة بس هو ده النهر العظيم ؟
الأسد : مش بتعرف تقرأ ؟

* يذهب الفيل إلى اللافطة ويقرأها ثم يعود للأسد.

الفيل : أيوه صحيح طب من فضلك ما شفتش التمساح ؟
الأسد : ما شاء الله ... وإيه كمان ؟ بعد كده ح تسألنى عن إيه كمان ؟
الفيل : عن التمساح .. يياكل إيه ع العشا ؟
الأسد : "بيرطم بكلام غير مفهوم"
الفيل : من فضلك.

* الأسد يحرك ذيله بعد أن بقى المدة السابقة كلها لا يحرك أى جزء منه.

الأسد : شوف يا بابا أولاً ما يصحش الصغيرين يزعجوا
الكبار .. ثانياً أنت عبيط والاشكلك كده ثالثاً
خد ده كإندار اولانى

* وأخيراً يضرب الفيل بذيله ضربة قوية كنوه من الانذار.

* الفيل تبعد عنا باكياً.

الفيل : آى "يبكى"
الأسد : وبعدها ... على روحك انت الجانى

* يتحرك الفيل نحو النهر ويقف على الشاطئ.

الاعمال الكاملة للشاعر

الفيل : إبه الحكاية بس إبه المسألة الكل نازل فيا ضرب وبهدلة
أنا لازم استاهل ده كله عشان لمض كلامنجى غلباوى
كثير الأسئلة

* يتفحص الأماكن فيلاحظ وجود جزيرة خضراء بالقرب من الشاطئ : يضع إحدى قدميه
فوقها بحذر شديد.

* وفي هذه اللحظة يخرج التمساح كله من الماء ويتضح ان الفيل واضع رجله على
التمساح.

الفيل : لكن ده إبه ده كمان ؟

* الفيل يصاب بذعر ويطلق صرخة صغيرة.

الفيل : يا خير مساء الخير

لا مؤخده أزعتك ..

ما اقصدش لأ أقصد

أنا كنت عاوز أطلب

بالطبع من فضلك

خدمة ما تعرفليش

أقدر ألقى فين

هنا فى النواحيدي

... تمساح ؟

* التمساح يضحك ضحكة مكتومة.

التمساح : تمساح ؟

الفيل : تمساح

التمساح : قرب عليا شوية

وقوللى بتي يا عنيا

ليه النبي حارسك

عاوز تلاقى تمساح ؟

الفيل : عاوزه عشان أسأله

بياكل إبه ع العشا ؟

* التمساح يضحك ضحكة خبيثة ثم يخاطب الفيل برزانة.

التمساح : طيب تعال عليا

وكم ان شوية لهن
عظيم بقى التمساح
يا سيدى يبقى انا
"ضحكة مشنومة"

* الفيل يفاجأ ويفرح بالخبر ويقرب أكثر من التمساح.

الفيل : بصحيح ؟

وانته ؟

شخصياً ؟

يا سلام

يا حلاوة

طب قل لى

طمنى

بتاكل إيه ع العشا ؟

* التمساح يلتقط مناخير الفيل بين أسنانه فجأة.

التمساح : الليلة مثلاً أنا ناوى أكل لى فيل نونو غلباوى
"صوت عضة التمساح"

* الفيل يصرخ مدعوراً

الفيل : آى سبنى آى آى سبب

* الأسد يرفع رأسه فقط.

الأسد : يا حول الله الفيل فى خطر

* فترة من الشد والجذب بين الفيل والتمساح

* الموسيقى وإيقاع الكلام متلاحقان بين الأسد والفيل.

الأسد : أجمد يا ولد تريس جامد

الفيل : ما بقتش خلاص

الأسد : ثبت رجلك

الفيل : أبداً حاقد

الأسد : حاسب ياخذك

الفيل : التماسيح دول

الأعمال الكاملة للشاعر

الأسد : أوعى يشدك
الفيل : ليهم أسنان
الأسد : أوعى المية
الفيل : أسنان حاميين
الأسد : طب ما تخافشى
الفيل : حاميين خالص "يبكى".
الأسد : أنا راح أساعدك

* الأسد يمسك برجلين الفيل ويشده ضد التمساح.

* التمساح يشد بقوة أكثر

التمساح : فيل نونو غلباوى كده لازم يكون طعمه لذيد خالص

* الفيل والأسد يشدان بقوة أكثر.

الفيل : أنا مانيش عاوز

أبقى طعمى لذيد

سيب يالله يا عضاض

أنا ما انفعش اناكل أبداً

* وفى النهاية ينجحان وينزل التمساح فى النهر محدثاً دوامات.

الأسد : بس غلبناه

أيو طويلة الهايف ده

* الفيل يتذكر بلبل اللبابة بعد المعركة نلاحظ الفيل أصبحت له زلومة كبيرة استطالت

فى اللحظة الأخيرة من صراعه مع التمساح.

الصوت : قول متشكر تبقى مؤدب

الفيل : أنا متشكر جداً

* الفيل يئن ويغمر زلومته فى الماء عدة مرات.

الأسد : يا ابنى العفو

اهى كلها تمارين تنفعنا

* الفيل يئن ويغمر زلومته فى الماء عدة مرات.

الأسد : انت بتعمل إيه عندك ؟

* الفيل ينظر إلى شكله فى الماء.

الفيل : مناخيرى مال شكلها

بقى وحش كده ليه ؟
دلوقت ح اعمل إيه ؟
لازم أطول بالى
لحد ما تخف وترجع
جميلة زى الأول

* الأسد يفحص زلومة الفيل.

الأسد :
ورينى كده وأنا أشوفها لك
(يفحصها)

لأ .. الانتظار مش ح يصغرها
وانا لو مكانك كنت افرح بأى
حاجة تريد فربما دى تلاقى
فيها مزايا كتير.

* تدخل ذبابة وتقف على قفا الفيل.

* يبعدها بزلومته.

* يقلع حزمة من الأعشاب ويدسها فى فمه.

* يشفط ماء من النهر ويرش به نفسه.

الفيل :
(ضاحكاً)

ده صحيح صحيح . بص اتفرج
طلع كلامك كله صحيح
جميل ها ها
مدهش ها ايل
ها هاه بديع
حاجة عظيمة

* الأسد يضحك.

الأسد :
مش قلت لك ؟

كل تجربة الواحد يدخل فيها لازم يخرج بحاجة مفيدة ..

* الفيل يلعب بزلومته ألعاباً مختلفة.

الفيل :
(يغنى)

زلومتى الشطورة

الأعمال الكاملة للشاعر

زلومتى القمورة
معلقتى وكبايتى
وعصائتى المسحورة
أمرها تهاودنى
م الليلة تعودنى
تكس لى وتفرش لى
وتهرش لى ورا ودنى
عضلاتها فولاذية
زلومتى الرياضية
مين عاوز يقابلها
فى مباراة حبية ؟

* الأسد يلعب مع زلومة الفيل لعبة برا .. دى .. فير.
* الأسد مرة يغلب والفيل مرة يغلب وهما يضحكان.

الأسد : زلومتك رياضية
عضلاتها فولاذية
يسعدنى أقابلها
فى مباراة حبية
الفيل : مناخيرى مفيش طولها
فى الدنيا دى بطولها
والحاجة اللى ف نفسى
من دلوقتى ح اطولها

* الأسد يبارك للفيل.

الأسد : مبروك مبروك
مع السلامة

* الفيل يتحرك للخروج.

* التماسح يخرج من الماء فاتحاً فمه ولكن الفيل يستدير ويضع له بزلومته عصاية فى فمه المفتوح.

* التماسح يتقلب فى الماء ويغوص تحت الماء حيث تضحك عليه الضفادع والأسماك.

المشهد الرابع

العودة

* فى طريق العودة. الفيل يلف زلومته فى دوائر مثل الطاحونة ثم يقطف له موزة من شجرة الموز.

* يأكلها فرحاً ويحدث نفسه.

الفيل : يا عم قرد آه

لو تعرف قد إيه

أنا باحب الموز (يضحك)

الموز ماعادش بعيد

أطولُه وقت ما اريد

ده أنا عندى زلومة

تقطف هلال العيد

* يسمع بكاء واستغاثة مثل تنهيق الحمير.

صوت : آى .. آى .. (تنهيق) آآ .. آى .. آآ .. آى ..

* الفيل يتذكر نوائح بلبل اللبلاية.

الفيل : خلينى شهيم وأساعد غيرى وأنجد كل اللى يقول آى

* يظهر الحمار المخطط الذى لم يعد مخططاً.

الحمار : آآ .. آى .. آآ .. آى ..

الفيل : مالك ؟ بتقول آى ليه ؟ حاجة فيك متعورة ؟ حاجة

مكسورة ؟

* الحمار يغنى موالاً حزيناً.

الحمار : نفسى اللى مكسورة .. أيوه نفسى مكسورة

أنا أصلى مولود مخطط شوف آدى الصورة

الشمس لحست خطوطى .. أيوه كان لى خطوط

وكنت مشهور بها وكانتبى مشهورة.

الأعمال الكاملة للشاعر

* الفيل يطبطب على الحمار مواسياً.
الفيل : يا سلام ؟ بس كده ؟ أنا ح اساعدك في انك ترجع زى ما كنت.

* الفيل يغمس زلومته فى بعض الألوان ويرسم للحمار خطوط.
الفيل : (بغنى) زلومتى الشطورة
زلومتى القمورة
فرشائتى ودوائتى
وعصائتى المسحورة

* الحمار ينظر لنفسه فى المستنقع بفرح.
الحمار : كتر خيرك كتر خيرك
وكمان كتر خير مناخيرك
والدى كان بيقول لى زمان
كلمة حكمة
"طولة المناخير للحيوان أكبر نعمة"

* الفيل يرفع زلومته ويشم.
الفيل : الله ريحة سميط مقرمش فين يا ترى بيتباع ؟

* يظهر النمر وهو يحمل شوية سميط فى ديله.
النمر : أنا نمر بسيط ياولاد ونشيط ..
وهوايتى انى أشتري فى سميط
لو عايز حد يدوق طعمه ..
يتفضل يلاعبنى التشقيط
الفيل : أنا عاوز
النمر : اتفضل قرب

* الفيل يقترب منه فيدهش النمر من منظر زلومته.

النمر : يا حلاوة
الفيل : على إيه مستغرب ؟

صراح جاهين

النمر : عمرى ما شفتش واحد قبلك ديله طالعه فى وسط عينيه
الفيل : ده مش ديلى دى مناخيرى يالله العب آلى هب
آليه

* النمر والفيل يلعبان لعبة مثل ألعاب السيرك. النمر يلقي السميط بديله فيسقطها الفيل بزومته والعكس.

* يرددان معاً "آلى هب" مثل لاعبى السيرك.

النمر : هب

الفيل : آلى

النمر : هب

* الفيل يلعب ويغنى لزومته.

الفيل : زلومتى الشطورة

زلومتى القمورة

مطوايتى ولمبايتى

وعصايتى المسحورة

آلى هب

* يلعبان معاً.

النمر والفيل : آلى هب آلى هب آلى هب

* تبقى سميطه واحده فى زلومة الفيل قبل أن يرميها للنمر
* يوقفه النمر.

النمر : ستوب

خليها لزومتك

من عندى أنا هدية

اكنها زلومة

شطورة وذكية

* الفيل يمشى وهو يقضم السميطه.

الفيل : متشكر .. شفتوا يا جدعان هى الكلمة

الأعمال الكاملة للشاعر

"طولة المناخير للحيوان أكبر نعمة"

* يواصل طريقه حتى يعود إلى النقطة التي انطلق منها فيجد الشخصيات الأولى : النعامه والزرافة والقرد والأرنبه الأم.

* تحدث ضجة مضايقة عند قدومه.

الحيوانات : أف يا باى أف يا باى

أهوراجع أف يا باى

الأرنبه الأم : مين هوه ؟

الحيوانات : الفيل النونو

الأم : مين هوه ؟

الحيوانات : الفيل الرغاي

* الفيل يحييهم برفع زلومته.

الفيل : يا صباح الخير يا صباح الخير

ما تردوا.

الجميع : صباح المناخير "يكررونها"

ها ها ها ها ها ها ها ها

* الفيل بغضب ويقتلع بعض الأشجار بزلومته.

الفيل : بتضحكوا على مناخيري

مناخيري الشطوره

مناخيري القموره

معلقتى وكبايتى

وعصايتى المسحورة ؟

* الحيوانات تسخر منه.

الأرنبه الأم : ودى مناخير دى دى زى مدخنة الفرن بتاعنا ..

ومش عاوزنا نضحك كمان ؟

* الفيل يزغزغ الأرنبه بزلومته.

الفيل : طب اضحكى يا سنى .. اضحكى "يزغزغها"

* الأرنبة الأم تخرج هاربة وهو خلفها.

الأرنبة الأم : هي هي هي .. اخص عليك

* يعود الفيل إلى الحيوانات المجتمعة.

الفيل : من هنا ورايح أنا ما اسمحش لحد يهزأني أبداً ..

الزرافة : إيه المخلوق ده حاطط مناخيره في السما ليه ؟

* الفيل يبخها بالماء من فوق في وجهها.

الفيل : عشان كده "يضحك"

* الزرافة تجرى هاربة.

الزرافة : باي ..

* الحيوانات تصاب بالذعر من أعمال الفيل.

النعام : لكن دي اسمها وقا .. قا .. قا . قاحة

القرد : "من فوق الشجرة" طب يوريني أنا إذا كان يقدر يعملها

معاً .. أنا .. أنا ..

* الفيل يختطفه بالزلومة من على الشجرة ويطوحه في الهواء.

* يلاعبه مثل مروض الحيوانات مع صوت فرقة الزلومة.

القرد : "مكماً" أنا أنا أنا ف عرضك

* الحيوانات كلها تجرى في ذعر.

* الفيل يضحك ضحكة الانتصار.

الحيوانات : النجدة النجدة النجدة

* يظهر بلبل اللبابة طائراً.

* الفيل يقف ويأخذ وضعاً نابوليونياً ..

* تبدأ أفيال كثيرة بدون زلومة تدخل المسرح وتقف حوله.

بلبل اللبابة : أنا بلبل اللبابة

طاير كآني سحابة

وياقول لكم الفيل خلاص

مناخيره أخذت شكل خاص

الأعمال الكاملة للشاعر

وفرح بها وزأطط وهاص في الغابة

أصوات : في الغابة في الغابة ... في الغابة

* الأفيال تتأمل زلومة الفيل النونو الغلباوى.

الأفيال : "يتناقشون"

واحد : مدهشة جداً.

الثانى : موضة جديدة

الثالث : مضحكة جداً

* الفيل يقوم بحركات زلومية وهم يتناقشون.

الرابع : لأدى مفيدة

الخامس : فائدة أكيدة

* الجميع يهزون رؤوسهم.

* تبدأ تظهر لهم زلايم طويلة حسب المقاسات المختلفة.

* ويختفون بالتدريج خلف ستارة الأشجار

الجميع : واحنا كمان عاوزين زيها

زلومة عظيمة ووجهه

احنا كمان

احنا كمان

* بلبل اللبلاية وحده.

بلبل اللبلاية : من يومها نلقى الأفيال

زلايمها مرفوعة سماوى

ترمز أجيال ورا أجيال

للفيل النونو الغلباوى

* الفيل يخرج برأسه من خلف الستار.

* يمشى إلى منتصف المسرح.

الفيل : أنا عندى .. "حب استطلاع"

ليه يا كبار بقى تزعلوا منى ؟

بيقولوا عملت لنا صداع
آسف جداً غصين عنى
أنا عايز أعرف عايز أتعلم
ولا بد أعرف مهما أتألم
وأدى زلومتى اسم الله عليها
خدتها جائزة لأنى مصمم !

بلبل اللبلاية : وأنا بلبل اللبلاية

صديق جميع الحيوانات فى الغابة
أكبر مؤلف لحكايات جذابة
خيالية يمكن بس مش كدابة
ح اقول لكم واحدة ثانية

الفيل : واحدة إيه ؟

بلبل اللبلاية : واحدة حكاية

الفيل : حكاية إيه ؟

بلبل اللبلاية : خيالية يمكن بس مش كدابة

الفيل : امتى تقولها ؟

بلبل اللبلاية : مرة ثانية

الفيل : ثانية ليه ؟

بلبل اللبلاية : عشان مش تالته

الفيل : طب ليه ؟

هه ؟ ليه ؟

هه ؟ ليه ؟

ليه ؟ ليه ؟ "صدى الصوت"



مسرحية قاهر الأباليس الشخصيات

عسكري، فى المعاش	قدور ثابت :
طالب، شاعر، قطاع طريق، عاشق.	بهير
اسمها ناميسة، حبيبة بهير، بنت السلطان.	البرنيسة :
وصيفة البرنيسة.	بطة :
زاهد، مشعوذ، فاتح كنوز، وخلافه.	كراماتو :
شيطان درجة أولى، خريج أكاديمية جهنم، يحضر رسالة للماجستير.	فهلوانتش :
عميد أكاديمية جهنم، فيلسوف، محلل نظرى.	الدكتور خنزورور :
باشيطان جهنم.	ابليس :
شيطان قروى، يسكن الطاحونة.	برابند :
شيطان قروى، يسكن الطاحونة.	كركر :
صياد خصوصى لمطبخ السلطان.	جودة :
مارلين مونرو، النجمة السينمائية الأمريكية.	مارلين مونرو :
الراقصة اللولبية، لولا مهلبية.	لولا :
طفلة صغيرة حاملة ذيل فستان البرنيسة.	البنيت التى لا تتكلم :
عامل بوفيه، وساعى، وسكرتير، ومعاون الدار، فى جهنم وشياطين آخرون.	"غيرهم" :
صيادون، وخيول، وأرنب برى.	

الافتتاحية

* يدخل الزاهد كراماتو وهو يحمل مبخرة وسبحة طويلة جدا.

كراماتو: دستور بكرة تفرج .. حيث لا تعلمون .. ما تعملش حاجة

.. ده العمل جنون وأقعد زى مانتة .. كالبغل الحرون ..

شمهورش بجيبلك .. كل مال قارون

"يخرج من المسرح".

"ثم يعود بسرعة ويكمل كلامه"

وإن ما جابش برضك .. كل شئ يهون .. انجذب وهلوس

.. وامنع الصابون وبلاش أكل خالص .. ولا جينة وزنون ..

أحسن فى النهاية .. تنسل الصحون مهبوب مهبوب ..

شمعون كلكتون ..

"يخرج مهلوسا" دستووووور.

* تدخل الوصيصة بطة إلى المسرح وتغنى.

بطة: إنشالله يكون جزمجى.

إنشالله يكون أجزجى.

حلوانى صياد

فكهانى حداد

إنشالله يكون زبال.

والا يكون م الألاتية.

صراف والاشيال.

بس يكون ييموت فيا.

* تخرج من المسرح

* تدخل البرنيسة "ناميسة"

البرنيسة: موش مستنية أمير ذو مقام.

أنا مستنية أمير أحلام.

صاحب وصديق .. حساس ورقيق.

وجميل ورشيق .. ويقوللى كلام.

ياحبيبي حرام .. تعالالى قوام.

وكفاية كفاية كفاية.

لعبة لا استغماية

أحسن خايفة .. والدنيا ضلام "تخرج"

* يدخل بهير / وفى يده ورقة وقلم .. يحاول كتابة قصيدة، ولكنه لا يجد الكلمات.

أحبك .. بهير :

ولو أنى أصبحت فى الغابة مجرم .. قليل الأدب.

وفاتت عليا السنين فى السكك، ورأيت العجب.

أحبك وأنا ؟ بشنب.

"يستكر الكلمة" - غلط .. لأ .. "وأنا بشنب" مش كويس

- أحبك .. فى وسط السحب.

- فى وسط السحب هاييلة جدا ..

حبيبتى ؟ .. أنا ؟ .. لا، لا يمكن أقول من تكون.

ح أموت مع سر غرامى .. بصمت وسكون ..

"يكسر السطرين"

ألا ياله من سكون مهول.

سمعت به صوت قلبى يقول :

تتك تك .. حبيبتى .. تتك تك .. سمعتى ؟

تتك تك .. فعولن فعولن فعولن.

أحبك / تتك تك / ياروحى / فعولن / تتك تك / حياتى

فعولن / تعالى / ياقلبي / فعولن / "الخ

"الخ" "يخرج وهو يؤلف".

المنظر الأول

"غابة .. شجرة كبيرة .. مخبأ في الشجرة .. صوت العسكري من خارج المسرح".

العسكري : استنى استنى استنى .. هربان على فين ؟

* يظهر أرنب برى وهو يهرب

قطاع الطريق : "من داخل الشجرة" مين اللي جاى .. "نفسه"

دى ح تبقى صيدة عال "يظهر العسكري وهو يطارده الأرنب البرى".

العسكري : آه، ماقدرتش أفضك .. ياخسارة ! .. ده العسكري

الجعان، فى عرض أى حاجة .. غراب، غزالة، أرنب برى، تمساح.

قطاع الطريق : "يخرج بالمسدس" أوعى تتحرك ! .. لا أفرغ الرصاص

فى بطنك.

العسكري : وحياة والدك تنلهى ياسى فرقع لوز انت، ياخيال المآة

.. تطلع إيه إنت ؟ .. غفير ؟ .. حارس الغابة .. والا صاحب الأرض ؟ ..

قطاع الطريق : أنا زمجور، قطاع الطريق المشهور .. اسمى معروف على

بعد أربعين جبل، وعشرات البحور .. قدامى كل الحيين يتقلبوا ميتين، والأموات يترعشوا منى فى القبور ! ..

العسكري : آه .. لأ، بسيطة، كنت فاكرك يا شيخ صاحب الأرض ..

إنما قطاع طريق دى ماتخوفنيش ..

قطاع الطريق : مابتخافش منى ؟ .. مابتخافش منى ؟ .. طب دلوقت

تشوف .. "ينادى على أسماء أعوان وهميين ليرعبه"

يا أفراد العصاة .. يابجور، ياكعبور، ياخنشور، حلاح تموت، فوراً ! .. ها ؟ .. خفت ؟ ..

العسكري : لا يا فندم .. أنا عسكري، ما أعرفش مسألة الخوف دى.

قطاع الطريق : ومسألة الخضة ؟ .. ما اتخضيتش أبدا ؟ ..

العسكري : لا يافندم .. أبدا.

- قطاع الطريق : "يبكى" طب مش تقول م الأول ؟ .. مبسوط كده لما
 قريفتنى ؟ .. "بلهجة رسمية" هاه ؟ ومعاك منقولات ؟
 العسكرى : إيه ؟ ..
- قطاع الطريق : "بلهجة الجمارك" أى حاجة ؟ .. فلوس، مجوهرات،
 أحجار كريمه، ساعات.
 العسكرى : أسف يا فندم .. مامعايش.
- قطاع الطريق : طب معاك إيه، ورينى.
 العسكرى : نفير، تذكار من الخدمة العسكرية، كنت بروجى الفرقة ..
 ولما كنت أضرب النوبة كان كل بروجية الفرق الثانية
 يجاوبونى .. تحب تسمع ؟
- قطاع الطريق : بلا هوسة وقلب دماغ ما احبش، أنا قطاع طريق ماليش
 فى المزازيك، أعمل إيه معاك ؟ .. لا أنت بتعرف
 الخوف، ولا حيلتك حاجة تسرق .. تشتغلش قطاع
 طريق ؟ .. أنا بادور على واحد.
- العسكرى : ما باشتغلش أنا شغلانات هايفة .. ماتعرفليش عمل
 كويس ؟!
- قطاع الطريق : عمل ؟
 العسكرى : أه عمل ؟ عمرك ماسمعت عن حاجة اسمها عمل ؟
 قطاع الطريق : انت ح تهزر معايا والا إيه ؟ فيه يا أخى عمل.
 العسكرى : طب لايمنى عليه ! ..
- قطاع الطريق : فيه .. هناك النواحيدي، طاحونة قديمة مهجورة، الناس
 بيخافوا منها .. أصلها مسكونة، فيها شياطين، يلعبوا
 كوتشينة بالليل، يسرقوا اللي فايبتين وياخدوا فلوسهم،
 ويطحنوهم فى الآخر.
- العسكرى : دى مش أصول
- قطاع الطريق : حاجة فظيعة .. للأسف أنا قطاع طريق، تنفيذ الأصول
 مش شغلتي، ومادام انت ما بتعرفش الخوف وخالى
 شغل، تروح الطاحونة، تطرد الشياطين، وتصلحها

وتطحن الحبوب للناس.

العسكري : صح آهي دي شغلانة كويسة تناسبني .. يروحولها منين الطاحونة دي ؟.

قطاع الطريق : تمشى في السكة دي لحد ما توصل للقنطرة الصغيرة، اللي عليها شارة السلطان.

* من بعيد يسمع غناء فهلوانتش.

قطاع الطريق : استنى .. فيه زبون جاى .. اتدأرى كده ما تعطلنيش .. اتدأرى.

* العسكري وقطاع الطريق يختبئان.

* فهلوانتش يدخل وفي يده ورقة عنوان، وفي يده الأخرى عصا جميلة وهو يغنى.

فهلوانتش : على طول على طول على طول على طول وخروج

ودخول وطلوع ونزول ويمين وشمال وسهول وجبال

وسحاب ورمال وحشيش مبلول عنوان مجهول في

طريق معقول في مكان معزول لا مش معقول مجهول

معقول معزول معقول ؟ .. ده ما هوش عنوان إنسان

ولا غول عنوان الزاهد كراماتو .. آدى وصفاته آدى

أماراته إمشى عليهم توصل على طول.

قنطرة وتعدي وتمشى تلاقى هناك شجرة بلوط قنطرة

عدينا عليها مشينا لقينا أهه شجرة بلوط ووراها شوية

رمل أصفر باخضر بابيض باحمر مخلوط وف لمح

البرق اتوجه شرق وقيس الفرق ومد خطوط على بعد

تمام ثلاثين خطوة من سكة أزهار العجوة احسب

مضبوط توصل مضبوط عنوان الزاهد كراماتو.

" يتأفف " إيه العناوين المناوشى دي ؟ .. هو كنز

الملك سليمان يعنى ؟ .. يقعدوا يحسبوا له الخطوات

؟ ده ماكانش زاهد رايعين نفسه ..

قطاع الطريق : فلوسك أو حياتك ! .

فهلوانتش : لا يا شيخ ! خوفتني .. شانك امانكا .. بزر بجر .. حالا
تكون حنة حجر.

* قطاع الطريق يصبح قطعة من الحجر.

العسكري : "يخرج من الشجرة" دنيا ! .. كان قطاع طريق زى الوحش
بص لقي نفسه حنة دبش.

فهلوانتش : أقدر أعرف شخصية جنابك ؟.

العسكري : قدور ثابت عسكرى فى المعاش.

فهلوانتش : ورايح فين ؟.

العسكري : طاحونة الشيطان.

فهلوانتش : مش بتخاف من الشياطين ؟ ..

العسكري : لا يا افندم.

فهلوانتش : طيب على كدة ما تتفضل تيجى معايا.

العسكري : معاك ؟.

فهلوانتش : طبعا .. قال ليه على الحصر تنام، وفيه سراير ريش نعام، ولزومه

إيه أكل البصل، وفيه زلاية بالعل.

العسكري : صح، ده مطبوط ..

فهلوانتش : اسمح لى أعزمك .. شرم برم "يظهر طبق وفرخة محمرة" هاه

كوبسة دى ؟.

العسكري : "يشمشم" حلوة جدا .. آخر مرة شفت فيها فرخة بالحلاوة دى

كان يوم - لا مؤاخدة - ماطاهرونى .. إلا قوللى من فضلك:

الفرخة دى محمرة فى أنهى مطبخ ؟.

فهلوانتش : على نار جهنم.

العسكري : يا سلام ! .. بالدمة جهنم مش بطالة، إذا كانوا بيحمررو الفراخ

هايل كدة .. وهناك فيه بيرة ؟.

فهلوانتش : زى ما أنت عايز.

العسكري : ماجبتش معاك شوية ؟.

فهلوانتش : البيرة ماتخرجش برة .. ح أديلك العنوان، ده مش بعيد.

- العسكري : مرة ثانية أبقي أروح هناك .. دلوقت أنا رايح طاحونة الشيطان، يقولوا فيها شغل.
- فهلوانتش : ودنك متين يا جحا ؟ .. ولزومه إيه تلف من الطاحونة، مادام تقدر تروح دوغرى!
- العسكري : فين.
- فهلوانتش : هناك .. ح تكون هناك مبسوط جدا، وفرحان، وسكران .. ودفيان.
- العسكري : يا سلام
- فهلوانتش : أمال ياييه ! .. اكتب إنت ورقة صغيرة بس وكل حاجة تتم.
- العسكري : متأسف .. ماباعرفش أكتب ولا أقرأ، إلا يسادوب أقول : أعود بالله من ال
- فهلوانتش : "مقاطعا" حاسب ! .. ده مش مناسب !.
- العسكري : طب أنا ح أروح الطاحونة .. بس ياخسارة، ما أعرفش السكة، قطاع الطريق كان ح يقوللى، بس يا خسارة، مالحقش.
- فهلوانتش : يا سلام ؟ .. أساعدك أنا، مادام ماقدرتش أخدمك خدمة كبيرة، أخدمك ولو خدمة صغيرة .
- فهلوانتش : "يقترّب من قطاع الطريق"
- فهلوانتش : شانكامانكا .. اتكلمى ياراس ..
- قطاع الطريق : "يحرك رأسه" آخ .. آخ .. رقبتي منملة.
- فهلوانتش : أوصف لنا السكة، باختصار، لطاحونة الشيطان.
- قطاع الطريق : سكة ضيقة على طول عل طول على طول ..
- فهلوانتش : باقول لك باختصار .. فين السكة.
- قطاع الطريق : "سرعة" على طول لحد ما تحصل قنطرة عليها شارة السلطان تحورع اليمين تلاقى الطاحونة .. هه !.
- العسكري : فكه يا أفندم .. ده قطاع طريق ابن حلال، لا أذاني ولا أذاك..
- فهلوانتش : عشان خاطر ك يا جناب العسكري، بكل سرور .. شانكامانكا، أرجع زى ما كنت "قطاع الطريق يتحرك"، تانى مرة تبقى تفتح كويس .. قطاع الطريق لازم يميز بين إنسان وإنسان.

- قطاع الطريق : إنت إنسان إنت ؟ ده إنت تلميذ إبليس.
 فهلوانتش : عليك نور .. آديك جبت التايهة.
 قطاع الطريق : حتروح جهنم وبئس المصير.
 فهلوانتش : قديمة .. ماتجددوا بقى، مافيش خيال ؟ "للعسكرى" آه يا جناب
 العسكري، ح نفترق فى طريقنا، لكن أتعشم إنى أشوفك فى
 طاحونة الشيطان.
 العسكري : يحصل لى الشرف . "يخرج من المسرح وهو يغنى أغنية
 عسكرية".
 أول ما تلقى عسكري وتحت باطه النفير
 لا بد تعرف إن ده ولد بروجى خطير
 ولد بروجى فرقته .. الجيش يلبي زعقته
 الموت يخاف من خلقته وشجاعته مالهاش نظير
 "يخرج"
 قطاع الطريق : يا للهول .. يوم بطوله مفيش إلا عسكري كحيان، وحتة شيطان
 .. دى الظاهر شغلة الأغنيا بس. اللي يقدروا يعملوا فيها .. دى
 شغلة الاغنيا .. أنا ماليش فيها عيش.

* يخرج الورقة والقلم ويبدأ فى كتابة الشعر

دى شغلة الأغنيا تكتك تك تك تكتك
 مستفعلن فاعلن أنا ماليش فيها عيش
 الصبر أحسن دوا مستفعلن فاعلن
 للى جفاه الحبيب مستفعلن فاعلن
 تك تك تكتك تك تكتك جيبتي فين ضحكك
 مسكين وحالى عدم "السخ"



المنظر الثاني

* سكن الزاهد كراماتو .. أحجار وطوب .. كراماتو جالس على حجر يقرأ وقد وضع الكتاب على حجر آخر وسبحة كبيرة معلقة على الحيطان بكرات.

كراماتو: "رافعا رأسه عن الكتاب" دستووور، بكره تفرج ..
يامههوب كله مكتوب .. أهه مكتوب "يقرأ" على بعد
تمام ثلاثين خطوة من سكة أزهار العجوة "لنفسه"
عديتهم عشر تلاف مرة

ال ياسيدى "يشير بأصبعه فى الكتاب" كنز مظموور من
عجوة، على شكل بستان، حصاوية لولى وحصاوية
مرجان، والأشجار ألماظ، وعلى كل شجرة بغبغان، ريشة
ياقوت وريشة كهرمان والينابيع أشكال على ألوان، ينبوع
ميه ذهب ونبوع عصير برتقان .. "يصرخ" دستووور
"يقرأ" دفنه الملك سليمان وحط عليه عشر تلاف من
الحراس، وعشر تلاف باب نحاس من جوة باب نحاس
"يصرخ" دستور "يقرأ" وصاحب النصيب يعيش كما
الزهاد، يأكل الأعشاب والجراد، "لنفسه" آدى الأعشاب،
وأدى الجراد "يقرأ" ويقيم جنب الكنز عشر تلاف ليل
ونهار، "لنفسه" النهاردة يبقوا 9999 يوم "يقرأ" ويمتنع
عن الحموم وتغيير الهدوم، "يهرش ويتفلى" "يمسك
بشئ من صدره ويرميه أو يأكله مافيش مانع" ولا يلتفت
للمغريبات فراخ ولاستات، مايبصلهمش ولا يسمع
المزيكات، ويفضل يقول ماهو أنت: مههوب مههوب
شمعون كلكعون عشر تلاف مرة كل يوم "لنفسه" بنقول،
"يقرأ" يفتح له باب من بعد باب "لنفسه" النهارده يبقى
انفتح عشر تلاف باب إلا باب ونص باب .. دستووور، بكرة
تفرج. "يقرأ" ولكن "لنفسه" أخ خ من "ولكن" دى ! ..
ولكن إيه ياسيدى ؟ "يقرأ" يبطل كل شئ بفعل الجن
الأشرار، اللى هم الشياطين، اللى سيدنا سليمان -
دستووور - غضبان عليهم بيشاغلوا ويخايلوا بحكاية
المغريبات حتى لا تتم المرات المطلوبة للدعوات . ويفسد

كل شئ " يصرخ " فشر ! .. أدى دفتر الحسابات " يمسك
السبحة " مههبوب مههب شمعون كلكعون 4998 ،
مههبوب مههب شمعون كلكعون 4999 مههبوب مههب
شمعون كلكعون ، خمستلاف . "سمع ساعة تدق اثنين
من بعيد" كويس مضبوط، وقفت فى حنة مناسبة. ساعة
صديقى السلطان. دقت فى اثنين عشان أتغدا. "يمسك
طبق الجراد".

- فهلوانتش : يتصرف فى وقته كويس، يقرأ ويكتب ويتثقف .. ويأكل
إيه ده ؟ جراد، جراد حاف ؟ سك ! .. لا صلصة ولا تقلية ..
أكلة الزهاد التقليدية .. طيب التمرين الأول، نحاول
نقدم لـه حاجة أطعم ..
"يرفع صوته" إحم إحم ..
كراماتو : مادام مولود، أبقى موجود.
فهلوانتش : أقدر أجيك ؟
كراماتو : إذا كنت جايب خير.
فهلوانتش : خير أهه .. طبق مليون، سيدى باعتهولك.
كراماتو : انت من الجن بتاع سليمان ؟
فهلوانتش : تقريبا.
كراماتو : "ينظر إلى الطبق" إيه ده ؟ متهيالى دى تبقى فرخة.
فهلوانتش : برافو عليك .. فرخة محمرة.
كراماتو : "يشم الفرخة بتلذذ ثم يرميها" اللعبة دى مش عليا أنا، أنا
بقالى 9999 يوم عايش فى الجبل عيشة مستقيمة.
فهلوانتش : عارف عارف يامولانا .. جراد مشوى، وأعشاب، وحاجات
كده .. دى أصناف مش ولا بد.
كراماتو : دى أرزاق بتبعتها لى السما، ياحضرة.
فهلوانتش : بقوا ضحكوا عليك .. الزهاد التانيين بتجيلهم لحوم
وفواكه ولبن .. أمال إيه !.. لازم تطلب.
كراماتو : "بتمثيل" حاشالله، "لنفسه" فهمت، ده بيمتحنى.
فهلوانتش : تحب الويسكى ؟ "يخرج زجاجة ويسكى جون هيج"
كراماتو : أستغفر الله .. إبعدها إبعدها .. "فهلوانتش يضعها بعيدا"

- بعيد .. بعيد .. هناك بعيد...
- فهلوانتش : تحب الستات ؟
كراماتو : آآه .. إيه ؟ .. الستات ؟ .. لأ . لأ . لأ .
- فهلوانتش : أظن سمعتك بتقول آه
كراماتو : إخرس ! .. أنا بتاع ستات أنا ؟ !
- فهلوانتش : معقول برضه. بالغذا ده ... شوف، إن كنت عاوز ثواب لازم تكون قدامك حاجات كثير. علشان ترفضها، يعنى لازم تلعب بوكر، وتعرف ستات، وترقص، وتدخل كباريهات، تقوم ساعتها تبقى زاهد مودرن .. مغريات يا أفندم مغريات
- كراماتو : "يتذكر" مغريات ؟ "يصرخ" عرفتك ! الجن الأشرار ! .. ياللا يا ابن الشيطان.

* يسمح صوت البرنيسة ناميسة.

- البرنيسة : يا سيدنا الزاهد ..
فهلوانتش : آخ .. بيجولك بنات ؟ ! .. آيبياه ! ..
كراماتو : دى البرنيسة ناميسة.
البرنيسة : ياسيدنا الزاهد ..
فهلوانتش : أما حته صوت جميل !!
كراماتو : بتجلى عشان أنصحها .. ياللا.
فهلوانتش : مش ماشى، أنا كمان معجب بالبرنيسة.
كراماتو : ياللا بقى ! ..
فهلوانتش : خلاص .. ماتزقش .. ماشى ..
كراماتو : مصايب إيه دى ؟ .. أعوذ بالله من الشيطان الرجيم.
فهلوانتش : إخرس ! .. "تنفتح الأرض تحته ويختفى".
كراماتو : معجزة ! .. أنا عملت معجزة من غير ما أحس .. دستووور !

* تظهر البرنيسة لابسة ثوب له ذيل طويل تحمل طرفه طفلة صغيرة تلازمها دائما فى صمت.

- البرنيسة : آها آها آه .. ياسيدنا الزاهد.
كراماتو : "يغطى يده بجزء من ملابسه ويصافحها" أهلا .. مالك ؟
متضايقة من إيه ؟

* يكلمها وهو ناظر إلى الأرض.

البرنسية :

الحقنى ياعم كراماتو .. عاوزين يجوزونى للقرد الأزعر،
لابو جلمبو المبعجر، للجعران المبعع المجنر.

كراماتو : إيه الحيوانات العجيبه دى كلها يابنتى ؟.

البرنسية : لو كنت عايش وسط الناس، كنت تفهم بأن ده الوحش
اللى خطبنى النهاردة

كراماتو : مين هو ؟ ..

البرنسية : التماسح الجربان اللى اسمه الأمير كشمير.

كراماتو : "بفرع" إزاي يابنتى تتجرأى، وتسمى حاكم بلاد نهر باد
بالأسامى دى ؟.

البرنسية : وصيفتى بطة هى اللى مسمياه كده !.

كراماتو : بتعلمى الشتيمة من الخدامين ؟. عيب يا ناميسة.

البرنسية : اطلب منهم يسبونى فى حالى وما يجوزونيش.

كراماتو : الأمير كشمير يابنتى عريس كويس.

البرنسية : ما يتجوزنيش ما يتجوزنيش، ما يتجوزنيش ..

* تدبذب برجلها على الأرض.

كراماتو : ده واجب عليه، علشان يحتفظ بسلالة أسرته.

البرنسية : ودى حاجة يحتفظ بيها ؟ خدت بالك ودانه طول إيه ؟

وقرعتة ؟ لازم تساعدنى، إنت عارف إنى باحب بهير
وحافظ أحبه للأبد.

كراماتو : ودى حاجة حد يفضل يجبها للأبد ؟ .. بهير مش أمير، ده

واد تلميذ خيان.

البرنسية : لكن جميل زى الملاك.

كراماتو : ماتكفرش، ده كلام يودى جهنم.

البرنسية : جهنم أحسن من الدنيا اللى يتجوزنى فيها إنسان غير
بهير.

كراماتو : جهنم ؟ .. عشان عيل صغير ؟.

البرنسية : صغير وحلو، زى مانا صغيرة وحلوة، باص فى الأرض ليه

- ؟ بص لى .. شوف حلوة قد إيه؟
 كراماتو : مفيش لزوم.
- البرنيسة : حلوة، عيونى زى النجوم، خدودى زى الورد، شفايفى
 زى الفراولة عودى زى غصن البان .. بص لى "تذهب
 اليه وترفع ذقنه".
- كراماتو : "يرفع بصره لأول مرة ويسقط على الأرض" لأ! .. "ينمى
 عليه".
- فهلوانتش : "طالعا من تحت الأرض" إزيك ؟
 البرنيسة : مين ؟ ..
- فهلوانتش : اسمحيلي أقدم لك نفسى .. فهلوانتش، علاقات عامة،
 ابن أخت الزاهد ده . ما تتجيبش لو عمل نفسه ما
 يعرفنيش .. هو صحيح اتجنن شوية لكن والدتى بقى
 دائما تقوللى : روح لخالك، هو الوحيد من العيلة الللى
 لقاله شغلانة كويسة.
- البرنيسة : مالك بتتكلم بسرعة كدة زى ما تكون، كلاب بتجرى
 وراك.
- فهلوانتش : بسرعة ؟ .. زى ما بافكر، بالظبط، الكلمات بتجرى ورا
 الأفكار، والأفكار بتجرى قدام الكلمات، والكلاب بتجرى
 ورا دول ودول، والعيلة كلها كدة .. مش مذبوظ ياخالى
 ؟.
- كراماتو : "يفيق" عليك اللعنة ..
- فهلوانتش : "لبرنيسة" سامعاه بيشتمنى إزاي ؟ .. دائما كده الراجل
 ده، "لكراماتو" خالى .. من فضلك ده مش وقت
 العلاقات العائلية : أمال فين صينية الفراخ الللى بالسلك
 والخنزير ؟ .. "لبرنيسة" أكلة عائلية، احنا يادوب كنا
 سكرنا، وفي نفس اللحظة سموك
- كراماتو : "صارخا" إزاي تقول كدة ياسافل ؟.
- فهلوانتش : خالى، البرنيسة مش ح تقول لحد.
- البرنيسة : طبعا، ده أنا أتبسط حتى لما أعرف إن الصالحين كمان
 بيحبوا ياكلوا كويس، دى حاجات تقرينا منهم.

الاعمال الكاملة للشاعر

فهلوانتش : أما عجائب عليك يا خالي، ح تفضل قفل كده لحد إمتى ؟!
لازم تساعد البرنيسة.. "البرنيسة" ده حتى ما بيرضاش يتكلم مع ماما "لكراماتو" آه آه منك يا خالي
خليت رقبتنا قد السمسة .. "البرنيسة" أنا يا أفندم اللي ح أساعدك في جواز بهير.

البرنيسة : دى تبقى معجزة.

كراماتو : "يتذكر" معجزة ؟ .. أعود بالله من الشيطان الرجيم.

فهلوانتش : إخرس .. "تبلعه الأرض".

البرنيسة : إمتى ح تساعدنى بقى ؟ "تلف" أمال فين الأستاذ

فهلوانتش ؟.

كراماتو : مطرح مالازم يكون، فى جهنم وبنس المصير.

البرنيسة : إنت خال قاسى قوى .. ليه بتزعل ابن أختك ؟.

كراماتو : ماخاله غير إبليس .. دستووور.

* كراماتو يتركها ويجلس فى موضعه الذى يقرأ فيه ويبدأ فى مبهوب.

البرنيسة : إنت ظالم ما عندكش إنسانية، وعجوز مليون أنانية،

روحك بقت زى الجراد المشوية. "تخرج وتنادى"

فهلوانتش، يا أستاذ فهلوانتش.

كراماتو : باستار من الجن الأشرار .. يعطلونا عن فتح الكنوز،

ويخلوا المغريات يقولولنا يا عجوز .. "يغنى" ياراجل

يا عجوز .. مناخيرك قد الكوز .. وودانك ليها بوز .. زى

ودان الأراجوز .. "يقوم ويشرب من زجاجة الويسكى" إيه

ده ؟ ويسكى ؟ .. جون هيج ؟ نسيت وشربت ! "يشرب

كمان جرعة كبيرة " دستووور .. بكرة تفرج ! "السبحة

تكركل الحبايات" حيس لا تعلمون "ينظر للسبحة

وهى تكرر حباتها راجعة إلى الوراء" اشتغلى اشتغلى .. أنا

ح استريح شوية .. "يرقد سكرانا" دستور بكرة .. هق ..

تفرج .. حيس هق .. لا تع ع ع ع ع ع هق "ينام".

المنظر الثالث

* فنظرة صغيرة عليها شارة السلطان، بطة جالسة تغنى.

بطة :

ياريت ياريت لو كان يعنى ...

بالصدفة ماشى ويسمعنى ..

عريس حمش بس حنين ..

يحبنى .. ويدلغنى.

ياريت يبجبنى

هنا بلاغينى

ويقوللى كلمة تمتعنى.

ياريت ياريت.

"تتلفت" مولاتى غابت قوى، راحت دقيقة للزاهد، ودلوقتى
فات نص ساعة .. يا عينى عليها، بتحب سى بهير، والسلطان
مخرج عليها الحب، وانا إللى ماحدث مخرج عليا، مش لاقية
حد أحبه، ياترى ممكن ألقى فى السراية واحد يكون مناسب ؟
.. قال يا جحا عد غنماتك .. الوزير المجنون اللى بيعاكسنى،
والقموندان السكران .. خلينى أنا كده أقابل جدع صغير،
بحبوح، هلهلى شغال شوف أنا ازاي ح احبه .. ح اهرب من
السراية، واروح معاه آخر بلاد البنى آدمين، إنشالله يكون صياد،
ملاحظ كلاب ملاحظ حصنة، والا مساعد ملاحظ حصنة، شيطان
والا مساعد شيطان ...

فهلوانتش : "يظهر لها" سعيدة.

بطة : مين ده ؟

فهلوانتش : طلبك.

بطة : إيه ؟

فهلوانتش : عريسك !

الأعمال الكاملة للشاعر

- بطة : ملاحظ حصنة ؟
 فهلوانتش : بعيدة .. عريسك
 بطة : ملاحظ كلاب ؟
 فهلوانتش : قربتي .. عريسك ...
 بطة : صياد ؟
 فهلوانتش : قربتي خالص .. عريسك
 بطة : شيطان ؟
 فهلوانتش : صح ! تحت أمرك.
 بطة : دي لعبة عيال صغيرين .. إنت صغير قوى.
 فهلوانتش : السن عندنا مالوش قيمة.
 بطة : أنا عايزه واحد أبقى مراته، مش دادته ؟!
 فهلوانتش : بلاش .. لو أنا مش عاجبك، عندنا عرسان كثير فى المستودع،
 أكوام تلاقهم هناك من كله، أبو شعر إسود، والأشقر والتخان
 والرفيعين، والطوال، والصلح، والسكرانين، واللى مايبشربوش
 قهوة ولا شاي، واللى ييمشوا وهم نايمين، كله كله، رسامين
 عطارين، ناس فجعانين، طبالين، بتوع مطاقي، حرامية
 بطة : بس .. بس كل العرسان دول على عروسة واحدة ؟ .. اسمع
 إنت شيطان بحق وحقيق ؟
 فهلوانتش : ليه لأ ؟ .. "يضحك".
- * من بعيد يسمع صوت البرنيسة تنادى يا أستاذ فهلوانتش.
 بطة : بتضحك ؟
 البرنيسة : "تنادى" يا أستاذ فهلوانتش
 بطة : ده صوت مولانى .. بس إيه فهلوانتش دي ! أنا اسمى
 بطة.
 فهلوانتش : لا يا بطة .. إنتى غلطانة، ده مش صوت البرنيسة، دي
 واحدة من صاحباتى بتندهلى، استخبي لحظة، أحسن
 بتزعل لما بتشوفنى مع حد تانى.
 بطة : كل الرجالة زى بعض .. حتى الشياطين !

* نختفى بطة وتسمع البرنيسة تنادى على فهلوانتش.

فهلوانتش : إيه العمل دلوقتي ؟ .. لو البنتين اتقابلوا ح يضيعوا

منى هم الاثنين ؟ ست واحدة تقدر تلعب بعشر

شياطين فى نفس الوقت، لكن يستحيل شيطان واحد

يقدر على اثنين ستات فى لحظة واحدة .. يعنى

أعمل إيه أنا دلوقتي ؟ يعنى أقطع نفسى نصين ؟ ما

قدرش ! "يلتفت" مين قال إنى ما اقدرش ؟ .. أما أنا

صحيح ما عنديش تقدير لمواهبى .. هوب !! ..

"فهلوانتش ينقسم إلى اثنين فهلوانتش."

فهلوانتش (1) : آمال إيه ؟ مش شيطان ؟

* يمشى الفهلوانتشان فيصطدمان. يرفعان القبعات ينحنيان.

فهلوانتش (2) : لا مؤاخذة .. "ينحنى".

فهلوانتش (1) : باردون .. "ينحنى".

فهلوانتش (2) : اتفضل .. "يشير إليه ليمر".

فهلوانتش (1) : اتفضل .. "يشير إليه ليمر".

فهلوانتش (2) : سعيدة

فهلوانتش (1) : إلى اللقاء

الفهلوانتشان : "يصيحان معا" يا آنسة .. يا آنسة ..

بطة والبرنيسة : "معا" يا أستاذ فهلوانتش.

الفهلوانتشان : "معا" آه أخيرا يا آنسى احنا لوحدين

فهلوانتش (1) : إنتى بتحبى بهير وعاويزة تنجوزيه .. جميل جدا، أنا

ح اساعدك "يخرج مع البرنيسة".

فهلوانتش (2) : ما تقلقيش باحلوة، أى عريس إنت عاوزاه ح يجيلك.

* يخرج مع بطة.

* يسمع أغنية العسكرية ويظهر العسكري.

العسكري : أدى القنطرة الصغيرة، وشارة السلطان .. تبقى الطاحونة

مش بعيد .. طيب، ألاقى فين كوتشينة جديدة لنج ؟

الأعمال الكاملة للشاعر

قين، فين؟؟ ما هو أنا لا يمكن ألاعبهم إلا بالكوتشينة
بتاعتى.. أرجع البلد.

* يخرج ومعه أغنيته.

* تدخل البرنيسة ومعها فهلوانتش.

البرنيسة : آه يا أستاذ فهلوانتش، على السنين والسنين اللي

فاتت من يوم ما طردوه من البلد.. يا حرام يا مسكين ..
اتجرأ وطلب إيدي من السلطان وطرده من السراية،
وسلطوا عليه الكلاب السعراة آه يانا .. آه يا أستاذ
فهلوانتش، ياما أنا حزينة وتعيسة ..

فهلوانتش (1) : بالعكس يا برنيسة، عمرك ما كنتي أقرب للسعادة من
النهاردة

البرنيسة : يقولوا إنه مات من الحب.

فهلوانتش (1) : بس الأيامدى، حتى فى الروايات ما حدش ييموت
بالحكاية دى .. بهير يا ستى عايش.

البرنيسة : آه يا أستاذ فهلوانتش

فهلوانتش (1) : أمال !! .. كلمة واحدة منك بس، وبهير ح يكون
تحت رجلكي.

البرنيسة : وإيه الكلمة دى اللي لازم أقولها ؟ ..

فهلوانتش (1) : لازم تكتبيها.

البرنيسة : بس مافيش قلم ولا حبر.

فهلوانتش (1) : مش حبر ياماما .. دم نقطة من دمك.

البرنيسة : ياي ! .. دى توجع !.

فهلوانتش (1) : آه منكم ياستات .. ما عندكوش قدرة تستحملوا الألم

عشان حبيب القلب، لأ يا برنيسة .. تبقى ما بتحبش
بهير. أنا كنت عايز أساعدك من غير مقابل، لكن يظهر
مساعدتى مش ضرورية، أنا آسف على الوقت اللي
ضاع مع سموك عن إذن سموك.

البرنيسة : استنى يامولاي، استنى عشان بهير أنا أستحمل

صراح جاهين

- أى ألم إذا كان صحيح مش مؤلم.
 فهلوانتش (1) : نقطة دم واحدة ... ما عليكى إلا إنك تكتبى ورقة،
 إنك عاوزة تتجوزى بهير بس بالدم .. وبالظبط الساعة
 12 بالليل، هاتى الورقة دى فى طاحونة الشيطان.
 البرنيسة : يمامى .. إيه ده ؟ حاجة تخوف.
 فهلوانتش : حد يامولاتى، فى الزمان ده يعتقد فى الشياطين ؟ ها
 ها ..

- بصرف فهلوانتش (1) والبرنيسة إلى الغابة.
 فهلوانتش (2) : طب ياست بطة، قلتى عاوزه إيه ؟ ياور للسلطان ؟ ..
 والا برنس ؟ .. والا شماسرجى ؟ والا مهمندار ؟
 بطة : أنا عايزة واحد يكون طيب، يشرب خفيف، يلعب
 كوتشينة بسيط.
 فهلوانتش (2) : طبعا عايزاه جسمه كويس، وشعره ثقيل
 أنا كنت باقول برضه، ابو شعر ثقيل أحسن من
 الأصلع، لكن لو الأصلع مخلص عن أبو شعر ثقيل،
 زى بعضه، أصلع أصلع.
 فهلوانتش (2) : البقاء للأصلع ! هاهاها ..
 بطة : بتقول إيه ؟
 فهلوانتش (2) : بقول خلاص كله واضح، بكرة الصبح يا بطة ح
 تكونى مخطوبة.
 بطة : اطلع يا نمس، أنت بتضحك عليا.
 فهلوانتش (2) : عيب أنا أضحك عليكى ؟ .. يا حلوة يا طعمة يا مرببة
 إنتى ..
 بطة : طيب، وانت بقى يا شيطان عاوز إيه ؟
 فهلوانتش (2) : لا، أبدا، ولا حاجة .. بس تكتبى ورقة صغيرة.
 بطة : بس ؟
 فهلوانتش (2) : بس .. وتكتبها بالدم، يعنى.
 بطة : غيره، عايز حاجة كمان ؟

الأعمال الكاملة للشاعر

فهلوانتش (2) : أيوه يابطة تكتبها بالدم، وتجيبيها لي 12 بالليل تمام
في الطاحونة القديمة.

بطة : "تشهق" يامصيتي ! .. ده أنا أقعد كده بنت بنوت،
لما يبقى عمري تسعين سنة .. ولا إنيش أعتب طاحونة
الشيطان "تجري".

فهلوانتش (2) : بس استنى أما أقولك .. دي مش حاجة فضيحة
بالدرجة دي "يجري خلفها".
بطة : مش كاتبة أنا ورق بالدم ! .. "تجري".

* تسمع أغنية العسكري.

العسكري : مش عارف أوصل طاحونة الشيطان. أما استريحلي
شوية في حته.
"يخرج"

* يدخل الزاهد كراماتو ومعه جوال ويصطاد الجراد.

كراماتو : دستووور بكرة تفرج، بس مالها معاكسة قرب الآخر ؟
.. الجراد يخلص النهارده بالذات ؟ .. طب ليه .. وأنا
أشتغل بإيه ؟ .. أدبسي يصطاد لي كام جرادة يسدو
النسومين دول .. آدى واحدة .. يقبوا 78 جرادة
"يصطاد ويضع في الجوال" 79 جرادة .. "يصطاد"
80 جرادة، 81، 82، 83

قطاع الطريق : "يتخرج بالمسدس" فلوسك أو حياتك ! ..
كراماتو : "يرتعب" يانهار أسود .. الحقونى .. خد .. خد .. خد ..
كل حاجة "يعطيه الجوال ويجري".

قطاع الطريق : "يزن الجوال" باين عليها صيدة عال .. "يفتحه
وينظر فيه" "يبكى" "جراد؟ .. لا!!!!!! ه، دي شغلة
الأغنية .. مستفعلن فاعلن .. أنا ما ليش فيها عيش ..
مستفعلن فاعلن .. إهني إهني إهني .. مستفعلن فاعلن
"يبكى على الوزن" "يدخل العسكري".

- العسكري : إيه يا صاحبي ؟ .. لسه برضة بتسرق ؟
- قطاع الطريق : يوم بطوله مفيش إلا عسكري كحيان، وحتة شيطان و .. و .. حشرا !! "بيكى" أنا ح أموم الجوع يا عسكري "بيكى على كتف العسكري".
- العسكري : "يطبطب عليه" تعالى معايا أحسن، ورينى ياللا طاحونة الشيطان.
- قطاع الطريق : ياللا بينا "يخرجان" ح أوريها لك
- * من طرفى المسرح يدخل فهلوانتش (1) ومعه البرنسية وفهلوانتش (2) ومعه بطة. وهم لا يرون بعضهم.
- الفهلوانتشان : "معاً" اتفقنا .. تمام فى نص الليل.
- بطة والبرنسية : "معاً" تمام فى نص الليل.
- الفهلوانتشان : "معاً" فى الطاحونة إياها.
- بطة والبرنسية : "معاً" فى الطاحونة إياها.
- الفهلوانتشان : "معاً" عال .. بس أوعى تقولى لحد .. هس !
- "يخرجان" "بطة والبرنسية تيران بظهرهما نحو بعضهما البعض وتلاقيان".
- البرنسية : بطة ؟.
- بطة : البرنسية.
- البرنسية : كنتى فين يا بطة ؟.
- بطة : كنت قاعدة هنا طول الوقت.
- البرنسية : كدابة !.
- بطة : وانتى ماقلتيش بالحق.
- البرنسية : أنا صليت عند الزاهد كراماتو، وشفت اتنين من كراماته.
- بطة : وأنا نمت تحت الشجرة وجالى هاتف، لابس أبيض فى أبيض قاللى اروح بالليل أولع شمعة، حتى كمان قاللى إن جدتى عيانة .. اسمحيلى يا مولاتى أروح

الأعمال الكاملة للشاعر

اللييلة.

البرنيسة : طبعاً، روحى أنا مش محتاجاكى النهاردة. أنا ناوية
أصلى طول الليل عند الزاهد كراماتو

"تخرجان"

* يظهر الفهلوانتشان من جانبي المسرح يقتربان من بعضهما، ينحنيان لبعضهما ثم يندمجان
شخصاً واحداً.

فهلوانتش : عشرة على عشرة، برفكت، ولو إني متضايق من الغلظة
اللى غلظتها دى تنقصنى ربع نمرة. ما كانش يصح
إنى أدى البنتين نفس المعاد فى الطاحونة ما كانش
يصح "يضرب نفسه قلماً" بس أنا ذنبى إيه ؟ نصى
الييمين مش عارف اللى عمله نصى الشمال. طب
والعمل ؟ إيه الحل ساعة التنفيذ؟

الحل إنى ما انقسمش "يهبط الظلام، وتظهر
الكواكب والهلال. فهلوانتش يشعل سيجارة ويدخن"
أعمل إيه ؟ استنى الليل "يجلس على القنطرة ويلقى
شعراً"

بخصوص نميسة ومصيرها الأليم
بعثوا الليلاى مذكرة من الجحيم
أقراها .. وأعلن فى سكون الليل
أن البشر يشوقوا لسه الويل
وبرضه بخصوص بطة فيه كلمتين
أكلك منين يا بطة أكلك منين ؟.



المنظر الرابع

* ليل، الطريق إلى الطاحونة، بطة وفى يدها فانوس.

بطة : الدنيا ضلمة كحل، الواحدة ماتآمش على نفسها فى

الساعة دى ! "تجفل" الله ؟ مين اللى جاى ده؟

* تظهر البرنيسة وفى يدها فانوس.

البرنيسة : ياى .. يامامى .. باين فيه حاجة م اللى بتخوف . أنا ..

أنا مش ح اخاف، أنا مش خايفة ..

بطة : البرنيسة ؟!

البرنيسة : "تصرخ مفروعة" ياى يى يى ! ..

يامامى يى يى ! ..

بطة : ماتخافيش .. ده أنا بطة.

البرنيسة : "بأمارة" بطة ! .. إنتى علشان إيه هنا ؟ .. بتتجسى

عليا؟!

بطة : أنا، كنت عند جدى .. أصله عيان.

البرنيسة : جدك كمان عيان ؟ مش قلتى إنها جدتك.

بطة :

هم الاثنين عيانيين .. جدتى الأول عيت، وبعدين

جدى كمان عيبى اتعدت منه .. إيه .. اتعدا منها .. هم

الاثنين اتعدوا من بعض .. وإيه اللى جابك هنا يا

مولاتى ؟ ..

البرنيسة : أنا .. أنا صليت شوية، وبعدين جالى صداع ! .. خرجت

أشم الهواء.

بطة : وبعد الشمال صباغك ؟!

البرنيسة : ماله ؟!

بطة : رابطاه ليه بمنديل ؟!

البرنيسة : فين ؟!

بطة : أهه ! ..

البرنيسة : أنا حلفت عمرى ما أتجوز، ورابطة عقدة علشان ما

أنساش .. وانتى ؟ .. ليه رابطة .. كوعك ؟!

- البرنيسة : أمال فين صاحبك ! ..
- العسكري : صاحبي ؟ ماليش أصحاب النواحيدي.
- بطة : العايق .. أبو جزمه لميح أجلسيه.
- العسكري : إنتي بتدوري عليه بقي ؟.
- بطة : ده مستنينا في طاحونة الشيطان.
- البرنيسة : عشان يأخذ منا الورق.
- بطة : على الجواز يعني. "تخجل"
- العسكري : آه .. أبوه .. طب أشوف أنا اللي عاوزه صاحبي، وروني كده كتبتوا مطبوط ؟.
- البرنيسة : أنا كتبت اني ياحب بهير.
- بطة : وأنا كتبت أني ضروري ح احب .. بة.
- العسكري : وريني يا شاطرة ؟.
- بطة : صح، مفيش غلط.
- العسكري : "يفحص الورق" كده ؟ . وليه كاتبين بالأحمر ؟ .. مفش حبر أزرق ؟ ..
- بطة : ده مش حبر ! ..
- البرنيسة : ده د م م م !.
- العسكري : ما شاء الله ما شاء الله ! .. ده انتو عملتوا حاجات كتير "لبطة" نوريلي يا شابة .. "يقرأ" جدع صغير، بحبوح، شغال. الوصيفة بطة.
- بطة : ده أنا
- العسكري : "يقرأ" .. وهنا، بهير، حبيبي.
- بطة : دي البرنيسة ناميسة.
- البرنيسة : هس يا بطة ده سر
- العسكري : عارف كل حاجة .. مفيش أسرار .. أنا عندي أمر آخذ منكم الورق ده
- البرنيسة : مين اللي أمرك ؟.
- العسكري : أي واحد.
- بطة : يعني إنت كمان شيطان ؟.
- العسكري : طبعا "يأخذ الورق".
- بطة : ماكتش أحسب أن فيه شياطين حلوين كدة ! ..

الأعمال الكاملة للشاعر

- فهلوانتش : "يظهر" قفشتك يانصاب ! ..
العسكري :
- قفشك سماوى ! .. "للبنات" روحوا انتو يابنات ع البيت
... اجرؤوا يالله ! .. وماتبصوش وراكم .. ح تتجوزوا
- البرنسية : أنا شاكره جدا
بطة : إيدك أبوسها ياسيد الشياطين.
- العسكري : العفو العفو .. "تنصرفان" أما صحيح كتاكيت لكن عفاريت
.. طالعيلى م البيضة، وطيران ع الجو .. بس حظكم
بمب، وقتوا مع عسكري مش مع مخبر!؟
- فهلوانتش : مساء الخير، جناب العسكري.
- العسكري : آه .. صاحى القديم ؟، .. رايح برضه ع الطاحونة ؟.
- فهلوانتش : أبدا، يا جناب العسكري، مش رايح أى حته .. أنا مستنى.
- العسكري : مين ؟.
- فهلوانتش : ورق.
- العسكري : ورق إيه ؟.
- فهلوانتش : نفس الورق اللي جنابك خدته من البنات .. علشان
تديهولى طبعاً.
- العسكري : جناب الشيطان .. ماتضعش وقتك، روح شوف شغلك.
- فهلوانتش : والورق ؟.
- العسكري : لا .. مانعطلكش.
- فهلوانتش : عاوز تتخانق مع شيطان، يا جناب العسكري ؟
- العسكري : لأ .. يا جناب الشيطان.
- فهلوانتش : طب يا إبنى ليه تئدى نفسك ؟ مش عارف إنك بالطريقة
دى، دماغك تطير ؟
- العسكري : على ما أتذكر .. الكلمة دى اتقالت لى جملة مرات،
وأديك شايف دماغى قاعدة زى ما هى، وفوقها كمان
طاقية.
- فهلوانتش : آه .. طب لماح تفقدها، ح تتذكرنى أنا، يا جناب
العسكري.
- العسكري : صحيح ؟ ..

- فهلوانتش : عن إذتك ..
 العسكرى : عجائب ! إيش أدخل الشيطان في دماغ العسكرى ؟!
 فهلوانتش : "ينتجى جانبنا ويتلو سحرا". شانكا بانكا، طيرى يادماغ
 من فوق الجسم.
 العسكرى : "وحده" ح اخبى الورق فى الطاقية، أحسن حاجة،
 عشان ماياخدوش.
 فهلوانتش : ماطارتش ؟! .. شانكا مانكا، يا جسم طير من تحت
 الدماغ.
 العسكرى : "يخبى الورق" كويس كده قوى.
 فهلوانتش : بلاوى إيه دى ؟ ماجرالوش حاجة ؟ .. طب، شانكا مانكا
 بزر بجر حالا تكون حنة حجر. "يظل يكررها".
 العسكرى : بس ! .. جه وقت الطاحونة .. "يخرج وهو يغنى".
 العسكرى : "يلحن أول ماتلقى عسكرى"
 إلى الامام يا عسكرى
 إلى الأمام يا سمكرى
 يا مصلحاتى يا فنجرى
 صلح كتير كتير كتير
 بخطوة عسكرية دوس
 وسط الظلام من غير فانوس
 ومادام مقيش قولة فلوس
 من إيه بقى يخاف الفقير
 فهلوانتش : مشى ؟ .. والسحر ما حوقش فيه ؟ ده الظاهر تقبل قوى ! ..
 ده مشكلة ! .. أعمل إيه ؟ أعمل إيه ؟ أعمل إيه ؟ .. بسرعة
 على الطاحونة، لازم أكون هناك قبل العسكرى.



المنظر الخامس

* طاحونة قديمة مهجورة شيطانان قرويان نائمان يشخران.

فهلوانتش : "يدخل ويتفحص الطاحونة" بقى ده فرع من جهنم ده ؟ ..

مستوقد على خرابة على مزبلة ؟ .. والأنتكت ما فيش حد

خالص .. "ينادى" ايبويه .. ياللى هنا ! .. "يسمع الشخير"

برافو برافو .. اصحوا يا بلاوى ! .. تكونوش فاكرين ده فرع

من الجنة ؟ .. انتو يا عرة الشياطين !.

برابند : "يستيقظ" مى .. مى .. مى .. مى .. مى ..

كركر : "يستيقظ" مين ؟.

فهلوانتش : اصحوا ! ..

برابند : فا .. فا .. فا .. فا

كركر : فاضل لسه كتير على الساعة اتناشر.

فهلوانتش : مانيش فاهم بتقول إيه ؟.

برابند : سى .. سى .. سى .. سى .. سى ..

كركر : سيبنا فى راحتنا .. شغلنا يبتدى اتناشر.

فهلوانتش : فز قوم إنت وهو .. اصحوا "لا يتحركان" بالأمر ! ..

برابند : صول .. صول .. صول .. صول ..

كركر : سلطتك إيه إنت ؟ ..

فهلوانتش : أنا من المركز الرئيسى.

برابند : بيه ! .. دو .. دو .. دو .. دو ..

فهلوانتش : هو إيه هو ده ؟ .. السلم الموسيقى ؟ ..

برابند : لا لا لا .. دودو .. دو .. دو .. دو .. "يزودها حبتين".

فهلوانتش : "لكركر" انطق بقى ف عرض إبليس !.

كركر : دول هرونا مفتشين يا عالم !

فهلوانتش : أنا مش مفتش .. أنا فهلوانتش، شيطان من الدرجة الأولى ..
 لسه متخرج من أكاديمية جهنم بتقدير: اتش آى طان ..
 وباحضر ماجستير بعنوان شراء الأرواح بالأوراق المكتوبة
 بالدم، وإفساد أحد الزهاد بطريق الفم والشم والخم .. ودى
 مستوحاة من قصة فاوست ومفستوفوليس، اللي

برابند : مى .. مى .. مى .. مى ..

فهلوانتش : تانى ؟ .. السلم ؟ ..

برابند : مى .. مى ..

كر كر مش فاهمين يعنى.

فهلوانتش : ستوبيد انتم .. حمير انتم .. مغفلين انتم .. انكتاموس !.

برابند : هه " يتطلعان إليه بغباء".

فهلوانتش : يعنى .. انكتموا يا أغبيا، ياللى مابتفهموش حاجة.

كر كر : " يتنهد" عدم المواخذه ياسيدنا البيه، على أيامنا ماکانش

حدانا البتاعة الكادوميا دى .. رموناع الأرض وخالص،

وآديحنا بنفسد فيها والسلامو عليكو عليكو السلام، آدى اللي

نعرفه .. أهلاً اتش آى طان بيه درجة أولى، شحوالك ؟.

فهلوانتش : افهموا .. أنا مش مفتش أنا - ح افهمها لكم إزاي دى ؟ -

خدوا بالكم معايا .. أنا زى ماتقولوا كدة ..

برابند : خا .. خا .. خا .. خا ..

فهلوانتش : خا، مش فى السلم الموسيقى يا جاهل.

كر كر : عايز يقول، خطوة عزيزة.

برابند : لا لا .. خا .. خا .. خا ..

فهلوانتش : ايه بقى ؟ !! .. خلصنا ! ..

برابند : آهى هى هى هيا دى ! .. خلصنا.

فهلوانتش : انت بتتكلم إزاي انت ؟ !

برابند : باتهته.

كر كر: لم لسانك الطويل ده ياواد يا برابند . "فهلوانتش" يعنى طلبات سعادتك . ؟ يلزم خدمة يعنى ؟!

فهلوانتش : مع انكم حثالة الأبالسة .. اسمعوا، فيه عسكري ح يبجى هنا لازم تاخذوا منه ورقتين، ح يتسببوا فى اننا ناخذ أرواح بنتين .

كر كر: حریم ؟ .. لأ .. احنا هنا للرجال فأت !.

فهلوانتش : إيه ؟ ..

برابند : أفهمك .. هنا بس ن .. ن .. ن

كر كر: نخوف الرجالة .. ونلاعيبهم كوشتينة .. ونأخذ لا مؤاخذة روحهم .

فهلوانتش : عال خالص .. ولعبتو على كام روح ؟ ..

برابند : يا اااا ه "يشير بيده يعنى ياما" مع .. س .. س .. س .. س ..

فهلوانتش : سبعمية ؟!

برابند : لا .. س .. س .. س .. س ..

فهلوانتش : ستمية ؟!

برابند : لأ .. سو .. سو ..

كر كر: مع سرماتى لا مؤاخذة .. سرماتى ده لعبنا مع نص روحه والنص التانى وقع فى رجليه، ما عرفناش نجيبه .

برابند : "معا" بس كده .

كر كر:

فهلوانتش : لأ .. عظيم أنا ح أقول للدكتور خنزورور على الشطار اللي قاعدين فى الفرع ده .

برابند : تش .. تش .. تش ..

كر كر: تشكر .. "يهتف" فليعيش البيه !.

برابند : فل .. فل .. فل ..

فهلوانتش : هس يامخلول انت وهو .. دلوقت ح ييجى هنا واحد
عسكري، واحد إيه ؟!

برابند : عسعس ..

كر كر : كرى ..

فهلوانتش : ومعاه ورق خاص بينات .. لازم تلاعبوه على الورق ده،
وتسلبوه منه، وتسلبوا روحه كمان، فاهمين ؟ وأنا اللي ح
اطلب ترفيتكم بنفسى.

كر كر : على عيوننا وقرونا.

برابند : طب .. بق .. بق .. بق ..

فهلوانتش : إيه ؟ !!

برابند : بق .. بق .. بقشيش ..

فهلوانتش : بعدين .. ولو هو اللي غلبكم ؟ ..

برابند : فا .. فا .. فا ..

كر كر : فشر

فهلوانتش : طيب خلاص. "يدير لهما ظهره ويتجول فى الطاحونة، ينظر
فى الساعة"

برابند : آى .. آى .. آى .. آى ..

كر كر : إيه ؟!

برابند : آى .. آى .. آى .. آى ..

كر كر : هيه يا مسهل !

برابند : آى .. آى .. آى ..

كر كر : انطق فلقتنا.

برابند : ماتصبر يا أخى، العجلة م الشيطان، دهدى ! .. آى .. آى ..
آى .. آى ..

كر كر : أقول بدالك آنى ؟ .. خلى عنك.

الأعمال الكاملة للشاعر

- برابند : لا ياسيدى ماتقولش بدالى .. هو إيه ياخويا ده ؟! آنى اللى
 حقول .. وشرفت انت ما حد قايل إلا آنى .. آى .. آى ..
 كركر : شد حيلك ..
 برابند : آى .. آى ..
 كركر : خلاص طالعة آهه.
 برابند : أصل .. أصل حاكم احنا عندنا كوتشينه مغشوشة ! .. قلتها.
 كركر : ياسلام .. هى دى ؟ .. طب ما البيه عارف .. يعنى البيه مش
 عارف .. ما هو عارف ..
 فهلوانتش : هوه هوه ! .. هس ! .. اتفوه عليكم. "تسمع أغنية العسكرى"
 أهه .. سامعينه؟ .. حضروا نفسكم .. اربعوه، اغبوه، اكسبوه،
 انهبوه، "يختبئ" وانا ح استخبئ هنا.
 كركر : هات عدة التخويف.
 العسكرى : "يدخل" هى دى بقى الطاحونة ! .. عايزه شغل كثير، لكن
 مغلش، نصلح أبوها .. والشياطين دول ينظردوا إزاي ؟ ..
 نشوف

* تظهر الشياطين لابسين جرادل، وقرع مجوف من الذى يستعمل فى التعويم، ويصنعون
 ضجة كبيرة لإخافة العسكرى الذى يجلس هادنا يتفرج عليهم إلى أن يتعبوا ويكفوا عن
 العفرتة.

- برابند : عامعم .. عامعم .. عامعم .. عم هامهم .. هامهم .. هامهم
 .. هم ..
 وكركر : عامعم .. عم .. عم .. هامهم .. هم .. عاوعو .. عاوعو ..
 عاوزين دم
 بخبخ .. بخبخ .. بخبوخاه آنى .. أبورجل مسلوخاه
 يالله .. خاف .. يالله يا عم .. مش بتخاف ؟ .. طب

صراح جاهين

- عمعم .. خوف .. خوف .. خووفاه آنى شعري زى
 اللوفاه يانته خاف .. يانته ياعم .. مش ح تخاف ؟ طب
 عمعم دربك .. دربك دربوگاه ديربجم ..
 ديري ديري .. جم تونكل .. تونكل .. ليتل اصطار
 آنى عينيا تطق شرار بخ بخ يانته خاف ..
 بخ بخ همهم هم ..
- إيه ؟ .. تعبتم ؟ .. : العسكى
 طأ .. طأ .. : برابند
 طبعاً تعبتنا. : كركر
 مح .. مح .. مح .. : برابند
 ما حناش حديد .. : كركر
 "لكركر" ليه .. ليه ؟ . مش خايف مننا زى المعتاد ؟ : برابند
 "للعسكى" يانته .. يانته خاف مننا .. عاعام م م م ..
 بس بلا لعب عيال .. مش حخاف بأى حال من : العسكى
 الأحوال.
 "لكركر" يا كركر .. ده ده ده ده .. "يشير إالى العسكى : برابند
 بيأس".
 حداك الورق ؟ : كركر
 ورق إيه ؟ : العسكى
 ورق البنات. : كركر
 وانتو إيه شغلکوا ؟ : العسكى
 يانته نل .. نل .. نل .. : برابند
 يانته نلعب عليه كوتشينة. إحنا نلعب وحش. : كركر
 ما بالعبش قمار على حاجات كبيرة. : العسكى
 "فهلوا تش" مش عاو .. عاو .. مش عاوز يلعب. : برابند
 طب لاعبوه على روحه. : فهلوا تش

الأعمال الكاملة للشاعر

- برابند : "للعسكري" طب .. طب نلعب على روحك.
 كركو : إيه رأيك ؟ .. فكرة !
 العسكري : روحى، أنا عاوزها، العسكري من غير روح يبقى جلاذ
 مش عسكري.
 برابند : "فهلوانتش" بر .. بر .. برضه مش عاوز يلعب.
 فهلوانتش : لاعبوه على فلوس، خليه يسخن فى اللعب.
 برابند : "للعسكري" نلعب على فلوس، عشان نخليك تسخن
 فى اللعب.
 كركو : إيه رأيك ؟ .. فكرة !
 العسكري : مامعايش فلوس.
 برابند : "فهلوانتش" مام .. مام .. مامعاهوش فلوس.
 فهلوانتش : سلفوه فلوس.
 برابند : عا .. عالحساب ؟
 فهلوانتش : على أى حاجة.
 برابند : ح نديلك ع الحساب يا عسكري.
 كركو : ح نسلفك اتنين جنيه .. إيه رأيك ؟
 العسكري : "يقبل" فكرة !
 برابند : "بدون تهته" يالله بقى نلعب، اقعد هنا يا عسكري
 "العسكري يقعد" وكركو يقعد هنا، وأنا هنا. واللى
 حداه ورقه أكبر يستفتح اللعب.
 العسكري : جرى إيه يا حراميه ؟ .. إيه ده اللى ع الورق.
 برابند : فين ؟
 العسكري : أهه !
 برابند : معلهشى .. ده بس الورق دايب.
 العسكري : "يضره بالورق" طب خد ورقك الدايب ده ورق متعلم
 يا غجر مش ممكن العب بيه .. اتفضلوا، آدى الكوتشينة

- بتاعتى، جديدة لنج، لسه بورقتها.
 مش لاعبين .. احنا ما نعرفش فى الكوتشينة دى. : كر كر
- مش لاعبين .. دى لسه بورقتها.
 بلاش. : برابند
- بلاشين. : العسكرى
- "يضرب برابند" إيه اللى بتقوله ده ؟ .. يا غبى.
 موافقين يا عسكرى .. كوتشيتك كويسة، ولسه جديدة، : برابند
- وموافقين "يفرق الورق".
 جالك إيه ؟ : العسكرى
- سبعة بسطونى. : برابند
- نص جنيه. : العسكرى
- أوكيه. : كر كر
- أهه .. كسبتكم، الفلوس ليه. : العسكرى
- إيه اللى يتهبوه ده ؟ "يجرى إلى التليفون" جامادوية
 كابرأفويه .. جهنم ؟ يا جهنم ادبنى الدكتور خنزؤور .. : فهلوانتش
- مش على مكتبه. : عاملة التليفون
- دورى عليه. : فهلوانتش
- اضرب له كمان ساعة.. : عاملة التليفون
- ولعه .. ولاليعو .. عيعى عاعا .. اخص عليكى .. أحبك : فهلوانتش
- يوه .. طيب "برقة" بادور عليه. : عاملة التليفون
- جالك إيه ؟ : العسكرى
- سته بسطونى. : برابند
- العب .. : كر كر
- دكتور خنزؤور .. أنا فهلوانتش .. : فهلوانتش
- فهلوانتش مين ؟ : خنزؤور

- فهلوانتش : نمره 13 على ألف ومية ثلاثة وثلاثين .. فيه ورق خاص
بينتين موجود مع العسكري قدور ثابت والشياطين
بتوعنا بيلعبوه كوتشينة، ويبخسروا، ضروري حضورك.
خنزؤور : شوية هدوء أعصاب، وخذوا بالكم في اللعب .. ولو
عوزتوني اضربولي تاني.
- العسكري : "للشياطين" انت بتخبى الولد فين ؟ .. حطه ع
الطرايزة، أحسن أخليها لكو ضلمة.
- برابند : عيب يا أفندم ما تعلقش حسك .. آدى الولد بتاعك.
العسكري : كسبتكم يا حضرات .. هات خمسين قرش، وانت هات
ميت قرش .. باين عليكم ما بتعرفوش تحسبوا كويس.
برابند : وأنت باين عليك بتعرف تلعب لعب ؟ !!
كركر : ده بيلعب لعب ؟ !
- فهلوانتش : جرابيع "يجرى للتليفون" جاما دوية كابرافوية،
يادى الداھية، مشغولة
العسكري : نكمل اللعب.
برابند : ماعناش فلوس فوق عن كده.
العسكري : العبوع الطاحونة.
برابند : كركر !
كركر : إيه بربر ؟
برابند : مش بتاعتنا.
كركر : ياعم زريح، العيامر .. نلعب عليها.
برابند : اللعبة حميت يا وله.
- فهلوانتش : "في التليفون" جاما دوية كابرافوية .. دكتور خنزؤور،
الشياطين خسروا كل فلوسهم، ودلوقت بيلعبوا على
الطاحونة.
خنزؤور : جاي حالا.

- برابند : ما تندلقش يا كر كر .. على مهلك.
- العسكري : واحد .. اتنين .. ثلاثة .. هوب ! الطاحونة كسبتها.
- برابند : أنا كنت عارف ! .. " يلطم".
- فهلوانتش : البنك فلس.
- * رعد وبرق، وطرقعات، ونيران - يخرج الدكتور خنزور من تحت الأرض على موتوسيكل. ينزل مرتديا رداء أحمر وقبعة عالية ومعه سوط.
- فهلوانتش : "متنهذا" أخيرا الدكتور خنزور ! .. "لخنزور" دكتور ! ..
- الحقنى !! أنا وقعت مع شوية مهايليل.
- خنزور : انت اللي شيخ المهايليل .. انت ليه هنا ؟ ..
- فهلوانتش : مستنى آخذ ورق البنتين، وروح العسكري.
- خنزور : كان واجب عليك تخلص عملية الزاهد كراماتو.
- فهلوانتش : أصله ملا بطنه جراد، قام نام، وأنا عشان ما اضيعش الوقت ..
- خنزور : "يضربه بالكامية" ما تخسرش النظام .. روح للزاهد وما تسيبوش دقيقة واحدة.
- فهلوانتش : "يجرى ويبرطم" هو إيه ده ؟ .. راجل متعلم .. وينضرب كمان ؟ ..
- برابند وكر كر : "معاً" ناظر الكادوميا .. يضرب تلميذ الكادوميا.
- "يضحكان"
- خنزور : "يضرب الشيطانين" امشوا انجروا من هنا.
- "يجريان".
- العسكري : تسمح لى يا جناب الدكتور، أعرف انت بتضربهم ليه ؟
- خنزور : لأ .. لأ .. ما تدافعش عنهم يا جناب العسكري.
- العسكري : أنا مش بادافع عنهم.
- خنزور : أنا آسف جدا، لأنك ضيعت وقتك، مع الأوباش دول، ما

الأعمال الكاملة للشاعر

- تصورش أنا متضايق لك قد إيه ؟
العسكري : شياطين زي باقي الشياطين .. هم الحقيقة ابتدوا الأول
يسرقوا فى اللعب، لكن أنا بسرعة عدلتهم.
خنزور : أنا مندهش لصبرك، ومعجب بيك، تلاعب مخابيل زي
دول .. اتعشم إنك ما ترفض تلعب دور معايا .
العسكري : اتفضل.
خنزور : اتفضل اقعد "يشير بيده فتظهر مائدة عليها شموع وأوراق
لعب وكرسين فوتيل"
العسكري : إيه ده .. ألعب ليه ؟ .. أنا كسبت الطاحونة ومش عاوز
ألعب تانى.
خنزور : إيه الطاحونة دي ؟ ! دي خرابانة.
العسكري : ح أصلحها، أنا باحب الشغل.
خنزور : ممكن ألعبك على سراية العائلة.
العسكري : أنا مش محتاج سراية.
خنزور : على كيفك .. طيب نلعب على أن اللي يكسب، يطلب من
التانى اللي عاوزه.
العسكري : أنت مش عايز منى حاجة، وأنا مش عايز منك حاجة
خنزور : ده أنت صعب قوى .. خلاص، نلعب إذن بحاجة بسيطة
كده، لمجرد الذكرى بتاعة الليلا دي.
العسكري : فعلا مش كل ليلة الشياطين بيلعبوا كوتشينة.
خنزور : إيه رأيك .. أنا ألعب على البرنيطة، وانت على الطاقة.
العسكري : كويس برضه .. "نفسه" أنا عمرى مالبت برنيطة !
خنزور : بوكر وإلا 31.
العسكري : 31
خنزور : مين ح يفرق ؟!
العسكري : اللي ورقه أكبر.

- خنزؤور : ولد.
- العسكرى : كومى.
- خنزؤور : انت اللى تفرق.
- العسكرى : اقسام.
- خنزؤور : اتفضل.
- العسكرى : واحدة ليا، ووحدة ليك ..
- خنزؤور : اتنين كارت كمان.
- العسكرى : اتفضل.
- خنزؤور : خد لنفسك.
- العسكرى : "يقلب الورقتين" عشرة .. وعشرة .. وخمسة.
- خنزؤور : خمسة وعشرين.
- العسكرى : خمسة وعشرين ؟ .. ح آخذ كمان "ياخذ" تلاتين !.
- خنزؤور : واحد وتلاتين !.
- العسكرى : تكسب.
- * خنزؤور يتناول الطاقيه، يخرج منها ورق البنات، يأخذهم لنفسه، ويرمى الطاقيه للعسكرى.
- خنزؤور : خد القرعة بتاعتك يا دهل، الورق أهه، ألف شكر بنتين جداد النهاردة ح يشرفوا جهنم ! .. مع تحياتى.
- العسكرى : الورق ! .. هات الورق ! .. أنا لعبت على الطاقيه مش على الورق ! .. ده مش شرف !
- خنزؤور : بتقول إيه ؟ مش شرف ؟ ضحكتنى يا عسكرى.
- العسكرى : خد كل الفلوس اللى كسبتها، ورجع الورق.
- خنزؤور : فلوس إيه ؟
- العسكرى : دى ! "ينظر فيجدها فخار مكسر" شقف ؟ كله غش فى غش.
- خنزؤور : على كل حال تقدر تحوش وتلعب معنا مرة تانية .. بس

لازم تجيلنا جهنم، إذا ما كنتش تخاف .. اتفضل، أدى
الكارت فيزيت بتاعى، ترميه على الأرض وتقول :
جامادوية كابر افوية، تنفتح الأرض فورا، وى قدامك
الطريق لجهنم وخليتك بعافية .. هاهاهاهاه.

* رعد، نار، يختفى خنزور فى قلب الأرض.

العسكرى : إيه اللي أنا عملته ده ؟ .. اتخميت فى الشياطين
ولاعتهم قمار ؟! ... بنتين يا عسكرى حيروحوا جهنم
بــــــــــــــــيبك ! .. اخــــــــص عليك !!
آه الشياطين الحرامية الملاعين .. ده أنا أموت، وأخلص
البنات من ضوافرهم .. وأضحى بحياتى، ولا إنهم
يلمسوا شعرة من شعورهم!...



المنظر السادس

* ديكور المنظر الأول - قاطع الطريق جالس على جذع شجرة مقطوعة يعزف على آلة وترية.

قطاع الطريق :

"يعنى"

أنا باغنى غنوتى لنور عينيا حلوتى
وطظ فمسى العالم بقا البحر هوا والرمال
الغابة هي راجبال متهميش مطريقة
أنا باغنى غنوتى

م الحسب آه .. م الحسب آه ناعنى طول عمرى وراه
يلاعبنى طول مانافى الحياة وقد إيه لعبه خشن
وقد إيه لعبه فظيع شنيع شنيع .. مريع مريع
يا حسرة ده أنا قبل الربيع يمكن ح اموت وح اندفن
وأنا باغنى غنوتى

* يسمع وقع حوافر حصان، يلبس القناع على وجهه، يمسك حبل ويربط طرفيه فى الشجرة
هى الجذع المقطوع، ثم يختبئ.

* يظهر صيادون، يمر أحدهم راكبا حصانا من أمام الشجرة وحده، بينما ينظر الآخرون
خلفها، يتعثر حصانه فى الحبل، فيقع الصياد ويهرب الحصان.

جودة : استنوا .. استنوا .. اقفوا .. بطلوا جرى .. تعالولى حالا، لا

اقطع رقبتكم .. أنتم عارفينى، الهزار معايا وحش.

قطاع الطريق : "يهدده بالمسدس" فلوسك أو حياتك !

جودة : "يرتعد" إيه إيه إيه ؟

قطاع الطريق : فلوسك أو حياتك.

جودة : آه .. "يعنى عليه".

قطاع الطريق : يخرب عقلى. أنا باين خوفته قوى "يصب عليه ماء".

جودة : "يستفيق" إيه ده ؟. أنا فين ؟

قطاع الطريق : هدى نفسك .. هدى نفسك "يكلمه بلطف" فلوسك .. أو

حياتك.

- جودة : فلوسى ؟ .. فلوسى طبعاً تأخذ زى ما انت عايز .. بس
تسيبنى بسرعة أرجوك .. أحسن قبل الغرور لازم نجيب
لمطبخ الملك 200 غزالة وألف وذن أرنب، وعشر تلاف
ديك برى.
- قطاع الطريق : وليه ده كله ؟ .. حد مات ؟ ..
جودة : أحسن من كده.
- قطاع الطريق : حد أتولد ؟ ..
جودة : أحسن من كده.
- قطاع الطريق : حرب ؟ ..
جودة : أحسن من كده.
- قطاع الطريق : فرح ؟ ..
جودة : البرنيسة ناميسة ووصيفتها بطة ح يتجوزوا.
- قطاع الطريق : آه .. "يغمى عليه".
جودة : دهده دهده دهده .. "ينفخ بوق الصيد فى أذنه".
- قطاع الطريق : "يفيق" .. أنا فين ؟ ..
جودة : فقت ؟ .. القلوس أهه .. خد فلوسى خلىنى أمشى.
- قطاع الطريق : أنهى فلوس ؟ ..
جودة : فلوسى .. أو حياتى .. "يقدم له النقود".
- قطاع الطريق : لأ .. مش عايز .. ح تتجوز مين ناميسة ؟.
جودة : أمر.
- قطاع الطريق : آه .. "يغمى عليه".
جودة : أما قطاع طريق مش طبعى أبدا. "ينفخ فى البوق، يقوم
قاطع الطريق".
- قطاع الطريق : أنت بتكذب !
جودة : لأ .. ده صحيح. الصبح ضربوا مزبكة، وقالوا جه عريس
جديد اسمه الأمير بنزهير، والبرنيسة مش عايزة تبص فى

وشه .. لكن أول ما شافته قالت له. تعال لى يا حبيبى، هو
أنت .. والملك شاف 33 حصان محملين ذهب ورا الأمير،
قام عيط بالدموع .. ووافق.

قطاع الطريق :

"يبكى".

وأنت بتعيط ليه ؟ .. خايف لا يشنقوك ؟ .. ما تخافش الملك
سامح كل اللى خارجين ع القانون، عشان المناسبة السعيدة
.. أبقى تعال لى الفرحة يكون فيه لصوص كتير ! .. مش ح
تأخذ الفلوس ؟ ..

جودة :

مش عايز أنا فلوس.

قطاع الطريق :

راجل مثالى .. "يحضر باقى الصيادين فيصرخ فيهم" أنا ح
أوريكو .. بالله دلوقتى ع الصيد .. فكوا الكلاب.
"ينصرفون"

جودة :

كفاية .. كل شئ له نهاية .. فين الجبل ؟ .. آدى الجبل ..
وفين الشجرة ؟ .. آدى الشجرة .. وفين الفرع ؟ .. آدى الفرع
.. حاجة شاعرية جدا "صمت" .. أن الواحد يتشنق ..
"صمت" .. على شجرة البلوط "تعجبه" .. مستفعلن فعلن ..

قطاع الطريق :

* يصنع خية، يلف الجبل على فرع الشجرة، ويتسلقها، ويدخل رأسه فى الخية، وبمسك
بقية الجبل
ويبدأ فى إلقاء الشعر.

على شجرة البلوط ..

قطاع طريق مربوط ..

بجبل كتان جديد ..

عشق ..

طهق ..

مات شهيد ! ..

"يدخل العسكرى"

"ينادى" يا قطاع الطريق .. أنت فين ؟!

العسكرى :

الأعمال الكاملة للشاعر

- هنا. : قطاع الطريق :
العسكري : بتعمل إيه ؟ ..
قطاع الطريق : باشق نفسي.
العسكري : طب اسمحلي أعطلك شوية عن عملك .. أنا عايز
أعرف عنوان الزاهد كراماتو.
قطاع الطريق : عشان إيه ؟ ..
العسكري : عشان أنقد اتنين بنات .. وإلا ح يروحوا جهنم.
قطاع الطريق : فى مكانهم الطبيعي ! ..
العسكري : لأ، البنسى آدمين مكانهم الطبيعي مش جهنم،
خصوصا البنات اللي زى بطة وناميسة.
قطاع الطريق : ناميسة ؟ .. انت بتهجص، بتقول إيه يا عسكري ؟ دي
ح تتجوز أمير ؟ ..
العسكري : لأ .. دي هى قالت إنها عاوزه تتجوز الطالب
المسكين بهير..
قطاع الطريق : "يقفز من على الشجرة ويكاد يختنق فينقذه
العسكري"
أنا ؟ ..
العسكري : أنت ؟ ..
قطاع الطريق : أنا ! .. أنا الطالب المسكين الغلبان، المطرود المتهزأ
المنهان، أنا اشتغلت قطاع طريق، وقاسيت زيادة
عن ما أطيق، كتبت الشعر بأقلام من ضلوعى،
وشايف البحيرة دي ! "يشير بيده".
العسكري : فين ؟ "ينظر إلى حيث أشار".
قطاع الطريق : اللي هناك دي. "يشير بعيداً".
العسكري : "يتطلع" آه .. مالها ؟
قطاع الطريق : أهى دي دموعى.
العسكري : خد بالك الشيطان جاى لها على صورتك، وهى

- فاهمة أنها حتتجوزك أنت.
قطاع الطريق : بعنى بتحبينى ؟
العسكرى : "بلهجة مسرحية" حتى الموت ! .. "يكمل طبيعى"
أنا سمعت بنفسى.
قطاع الطريق : "يصيح" أنا ح اقتل الشيطان ده .. "يطلق مسدسه
مرتين فى الهواء".
العسكرى : حيلك، الشياطين ما تخافش من ضرب الرصاص،
ياللا بينا على الزاهد وهو يساعدنا.
قطاع الطريق : طب يالله بسرعة .. أحسن ما نلحقش نخلص البنيت
من الشيطان قبل الزفة .. لازم نروح من هنا على
الزاهد بسرعة زى .. زى . الرصاصه.

* يطلق المسدس بنفسه مستفعلن فعلمن.

- يام يام يام يام يام
الزاهد الطيب
من ربنا قريب
وايده مبروكة
ولا عمرها تخيب !
العسكرى : تمام.
قطاع الطريق : طيب يالله بسرعة .. بسرعة .. ما تعطلناش .. بسرعة ..



المنظر السابع

* نفس ديكور المنظر الثاني، فهلوانتش جالس على حجر عال ينتظر، ينظر في الساعة.

فهلوانتش : أدينى موجود أهه، وبسلامته مش موجود .. سرح على

فين ده ؟ .. يمكن اقتنع بكلامى امبارح وراح له كباريه ..

بس هو مش نبيهه بالدرجة دى ؟

"يدخل كراماتو، دون أن يدري فهلوانتش"

كراماتو : دستوور بكرة تفرج، هانت وآخرها بانى، قول يا

مهبوب، يحضر المطلوب

* يذهب ليقرا مهبوب

فهلوانتش : بتقول إيه ده ؟

مهبوب مهبوب شمعون كلكعون ..

أنا عمري ما سمعت كلام بالشكل ده ..

كراماتو : "بعد مرات التعزيمه على سبحة فيها عشر تلاف حبة وهى

موضوعة بشكل يلف حول المكان. ويسبح فيها فيجذب

فى كل مرة حبة" مهبوب مهبوب شمعون كلكعون ..

* يهتز يمينا وشمالا.

فهلوانتش : أما فرجة صحيح !! . أنا امبارح جيت له ساعة الغدا

مالحقتش المشهد "يميل ويهتز مع كراماتو يمينا وشمالا"

حلو .. اتدلع .. شوية مزيكه كمان ..

"يعرف على الكمنجة".

كراماتو : الفرح باين عليه ابتدا .. المزيكه أهه جايه من سراية

السلطان أنا مارضيتش اتعزم "يرقص" التيت .. التيت ..

"يتوقف" يا ودانى ما تسمعيش المزيكه "يرقص غضب

عنه" .. الله، الله!..

ما تسمعيش .. ما تسمعيش .. طيب إزاي ؟ .. إزاي ؟ .

"يتوقف" أعلى صوتى أقوم ما تسمعيش "يرفع صوته

ويستأنف" مهبوب مهبوب شمعون كلكعون ..

فهلوانتش : "يرفع صوت الكمنجة".

كراماتو : "يرفع صوته أكثر".

فهلوانتش : "يشير بقوس الكمنجة فيبدأ أور كسترا جاز" ما اجتمع
رجل وشيطان إلا وكانت المرأة ثالثهما .. باللا ..

مارلين :

"نظهر وتغنى بالأمريكانى"
Some Like it hot
Some Like it cold
Come an` gettit !..
This One is Hot,
And this Is Cold,
Boy ! Run for it

كراماتو : "ببلاهة" مش فاهم .. بتقول إيه دى ؟ !

فهلوانتش : "بنفس اللحن" :

فيه يحبوا السخن وفيه يحبوا البارد
كام آن جيبت تبت "لنفسه" دى ما تترجمش!
آديهوا السخن وآديهوا البارد

"ترقص"

مارلين :

Boy ! run for it !..UMPA, UMPA, UMPA..
Come an` gettit !.. UMPA, UMPA, UMPA..

كراماتو : "ذاهالا" إيه ؟ .. تهيؤات ..

فهلوانتش : "يعنى" أومبا .. أومبا .. أومبا .. أومبا .. أومبا .. أومبا ..

أومبا ..

قوم وبلاش كهن يا جناب الزاهد
آدى عندك سخن وآدى عندك بارد

كراماتو : "صارخا" تهيؤات .. بس جديدة ! .. "مارلين تندلع" لأ ..

دى مغريات !

فهلوانتش : "ساخرا" ياه ! .. تو ما عرفت ؟

كراماتو : "صارخا" مغريات .. دستوور .. يا مهبوب .. "يهشها" هش

.. هش. "لنفسه" ما بتتهشش .. طيب أعود بالله من
الشیطان الرجيم .. "تختفى".

أخص "يختفى".

فهلوانتش :

كراماتو : معجزة ! .. "للجمهور" أنا اللي عملتها، مش برضه جدعنة

؟ .. مغريات مش بطالة مغريات بشعر أصفر "يتماسك"

الأعمال الكاملة للشاعر

لكن يامههوب .. هات المطلوب ! "يصيح".
فهلوانتش : "خارجا" غلطة منى .. فى تقدير مستوى الذوق عند
الأشكال دى "يراقب كراماتو جالساً يهمهم ويتمايل
بحركات مثل الرقص البلدى" عرفت اللى ينفع له .. نمره
16 الراقصة اللولبية لولا مهلبية "تظهر أرتست حقيرة
جدا ترقص وتغنى".

لولا : كدهه أنا غاوية الرجالة ودى غية ماهياش بطالة
أحسن من شغل الكروشييه والأبصر إيه مدرك إيه
الرجالة الرجالة هم وبس .. وكله زبالة
ليه ليه ؟ كدهه
كده ليه ؟ كدهه
كدهه .. كدهه .. كدهه ..
أنا غاوية

مهما ياروحى يكونوا كسالى دول رجالة
أوحتى جد وشغالة دول رجالة دول
مهما يعاكسونى .. برزالة رجالة دول
والا يجولى .. بهبالة رجالة وانشالله
وانشالله يكونم بريالة ملاحيس بغزالة
دول رجالة .. دول رجالة هم وبس وكله زبالة
ليه ليه ؟ كدهه
كده ليه ؟ كدهه
كدهه .. كدهه .. كدهه ..
أنا غاوية

مندا علادا .. أنا وياهم الفقرا .. والناس إياهم

أنا غاويةهم

المديون زى الديان الدكتور زى العيان

أنا غاويةهم

الجاهل والمتعلم المبسوط واللى مبلم

أنا غاويةهم

وانشالله يكونوا تعابن وانشالله يكونوا شياطين

دول رجالة .. هم وبس وكله زبالة
 دول رجالة
 لييه ليه ؟ كدهه
 كده ليه ؟ كدهه
 كدهه .. كدهه .. كدهه ..
 أنا غاوي

كراماتو : لولا .. هو انتي ؟
 لولا : أبوه أنا يا قطقوطي، عرفني إزاي ؟
 كراماتو : كدهه .. كدهه .. كدهه ..
 أنا غاوي
 لولا : طب يالله على طول بقي قوللي
 وما تقعدشي كده مدهوللي
 قوللي .. قوللي .. قوللي
 كراماتو : إيه بس ؟
 لولا : أنا يعني كده يعني عجبتك
 قوللي وأنا اتشلق في رقبتك
 كدهه
 فهلوانتش : غمزت .. ح أشدها !
 كراماتو : أعود بالله من الشيطان الرجيم (تختفي).
 فهلوانتش : اخص .. (يقطس في الأرض).
 كراماتو : يعني حبكت دلوقتي ؟ فات الكثير ما بقي إلا القليل،
 (ينظر في السبحة الطويلة) فاضل نص باب .. دستوور
 بكرة تفرج.
 فهلوانتش : (يخرج من الأرض) معلش بكرة تفرج برضه دردحناه
 شوية، كل يوم من ده ! (يختفي).
 كراماتو : (وحده) يا مهبوب اسعني بالمطلوب، كدهه، كدهه،
 كدهه (يرقص) ..

* يسمع صوت العسكري وقاطع الطريق.

العسكري : يا سيدنا الزاهد.

الأعمال الكاملة للشاعر

- قطاع الطريق : يا سيدنا الزاهد.
كراماتو : وإيه دول كمان اللي جوني، في نشوتي يزعجوني ؟
"يدخلان"
العسكري : لامواخدة يا عم، قطعنا عليك .. خلوتك.
كراماتو : تهيؤات تاني ؟ .. هش .. هش.
العسكري : مالك ؟ .. احنا بني آدمين.
كراماتو : لأ .. تهيؤات.
العسكري : لأ ياسيدنا الزاهد .. أنا قدور ثابت، عسكري سابقا ..
وده بهير قطاع طريق سابقا. وطالب سابقا .. ومعرفش
إيه كمان سابقا.
كراماتو : يعنى مش تهيؤات ؟
العسكري : لأ.
كراماتو : طب بتزعجوني ليه ؟
العسكري : البرنيسة ناميسة ح تتجوز.
كراماتو : ما أنا عارف .. ح تتجوز واحد أمير.
العسكري : مش واحد أمير، واحد شيطان .. لو انسلت جزمته
تشوف حوافره .. ولو طارت برنيطته .. تلاقيله قرون.
كراماتو : كيد النسا كيد .. من كيدهن عدت هارب
يتحزمووا بالحنش .. ويتعصبوا بالعقارب
"دستور"
قطاع الطريق : أيا سيدنا الزاهد.
كراماتو : داهية تلعنهم.
العسكري : حاسب شوية في اللعنات يا عمنا، دول بنات على
نياتهم، وقعوا في النار، والصابايا زي الحليب، لو
غفلت عنه فار .. لازم تراعيهم.
قطاع الطريق : اعمل معاهم كرامة من كراماتك ..
كراماتو : عمل يعاملهم ويكثر دما لهم .. هم اللي أذنبوا، أنا
ما بهمونيش.
العسكري : إزاي دي ؟ .. أنا راجل مش طيب ولا حاجة لكن
بهموني الناس .. وأنت الراجل الطيب مش واجب

عليك تساعد الناس؟!

كراماتو : عشر تلاف يوم وأنا آكل جراد، وهم ياكلوا لحمة ..
وأنا أشرب ماء قراح، وهم يشربوا عصير تفاح. ويناموا
على ريش نعام وياخدوا كل يوم حمام، وعائزهم
كمان مايروحوش جهنم؟! ياخي دهده!

العسكري وقطاع (معا) يا سيدنا الزاهد .

الطريق : كراماتو : بس .. بلا تمحيك! .. محروقين أنتم والبنات
بتوعكم .. دهده.

* يدخل الصومعة ويقفل على نفسه.

العسكري وقطاع الطريق : يا سيدنا الزاهد.

كراماتو : (بطل من الطاقة) داهية تلعنكم، وتلعن اللي يعكر عليا
خلوتي .. دهده ..

* تصل أصوات وزغاريد وموسيقى الفرحة

قطاع الطريق : سامع؟ .. الفرحة ابتدا وضاع كل شيء.
العسكري : طول ما البنى آدم ماشى على رجليه، مش ممكن
حاجة تضيع .. ياللا بينا يا قطاع الطريق.

قطاع الطريق : على فين؟

العسكري : انت تروح الفرحة، وأنا أروح جهنم.

قطاع الطريق : تروح فين؟

العسكري : جهنم. عشان أجيب الورق من الشيطان. جاما دوية
كابراقوية (يقع في باطن الأرض).



المنظر الثامن

* جهنم .. إبليس جالس على منضدة عليها تليفون، وآلة حاسبة، وأجهزة أخرى، ومن خلفه مروحة أو جهاز تكييف هواء، إبليس جالس في استرخاء يقرأ في مجلة تايم.

إبليس : (يصفق لعامل البوفيه) واحد قهوة ..

عامل البوفيه : مطبوط ؟

إبليس : هنا كل حاجة لازم مطبوط .. انت عارف.

عامل البوفيه : والقهوة ؟

إبليس : ولد ! .. انت بتلائم على مين دلوقت ؟ ! ..

عامل البوفيه : يعنى مطبوط ؟

إبليس : أيوه.

عامل البوفيه : زى بتاعة الصبح ؟

إبليس : بتاعة الصبح ماكانتش قهوة مطبوط ..

عامل البوفيه : ليه بس ؟ .. أنا مش جبت الشاي لسعادتك .. قلت لى ..

ده مش شاي، دى قهوة مطبوط ؟

إبليس : طب هات واحد شاي.

عامل البوفيه : حاضر يا أفندم فهمت.

إبليس : (للجمهور) آخ من بتوع البوفيه دول !. حطيت صباعى

فى الشق منهم. غلبت منهم !. طهقت منهم .. أعود بالله

من بتوع البوفيه (يدق الجرس للساعى).

الساعى : أفندم.

إبليس : أنا مين ؟ .. (يسأله بإنهيار)

الساعى : سعادتك إبليس ..

إبليس : (يتماسك بقلاطة) طب انده لى السكرتير اللى معاه

الكشف.

الساعى : حاضر يا أفندم .. (لهب ودخان يظهر منهم السكرتير).

إبليس : عندك كام من ضحايايا ؟ .. (يزداد قلاطة).

السكرتير : (يقرأ) من المنجلين خلقيا .. ثلاثة.

إبليس : كويس.

- السكرتير : مزورين .. تمانيه.
 إبليس : كويس ..
 السكرتير : مرتشين .. نص مليون
 إبليس : ياه ! .. كل دول ؟ ..
 السكرتير : قاتلين مراتاتهم .. ميه واتنين.
 إبليس : مش بطال.
 السكرتير : وأربعين واحد غرروا بالبنات.
 إبليس : غيره .. (طول الوقت يعد فى الآلة الحاسبة).
 السكرتير : رزلا وتلاقيح ورغايين .. واحد بس .
 إبليس : قليل.
 السكرتير : بنات اتغرر بيهم .. مافيش !.
 إبليس : طب إزى دى ؟ اندهولى معاون جهنم.

* يختفى السكرتير فى اللهب ويظهر شيطان آخر.

- إبليس : كام شيطان راحوا العالم النهارده ؟
 المعاون : (يقرأ) توجه إلى العالم اليوم، الشياطين الآتى ذكرهم :
 - على شكل أطفال أبرياء عشرة
 - على شكل مطربين ستة
 - على شكل شحاتين مقرمين .. حداشر
 - على شكل أصدقاء مخلصين .. ستاشر
 تمرجية وصحفيين، ومحامين، ومندوبين .. تأمين، ومواطنيين
 صالحين 1657 شيطان.
 إبليس : كام ؟
 المعاون : 1657
 إبليس : قليل جدا .. اندهولى الدكتور خنزور.
 المعاون : حاضر (يختفى فى اللهب ويظهر الدكتور خنزور).
 إبليس : أخيرا وصلت ؟ .. أنا بأزعجك كثير .. عملت إيه فى موضوع
 البنات ؟ ..
 خنزور : (يضع مظروفا على المكتب) اتفضل يا اكسلانس.

- إبليس : عظيم .. أنت شيطان عبقرى .. كانت عملية صعبة ؟
 خنزوور : (ينظر فى الورق) عال .. بنت بنتين . تشرب قهوة ؟ ..
 خنزوور : لأ ميرسيه .. كولا .. ده الورق بس، ومع صياح الديك الثالث،
 البرنسيمة ناميسه وبطة، ح يشرفوا هنا.
 إبليس : آه .. من حق .. كان فرح النهارده .. أقدر أقول ميروك ؟ ..
 خنزوور : لأ، للأسف يا سيد إبليس. الفرح ماتمش.
 إبليس : مش فاهم يا دكتور، إليه اللي حصل ؟
 خنزوور : يا دوب خارج مع العروسة من السراية، إلا وطب بهير.
 إبليس : حيلك حيلك، ما أنت كنت بهير.
 خنزوور : أنا كنت بس شكل بهير، إنما هو كان بهير شخصيا.
 إبليس : شخصيا ؟
 خنزوور : راح شايلى الشعر العبرة والناس كلها شافت ..
 إبليس : قرونك ؟
 خنزوور : أيوه يا سيدى .. واضطريت اختفى ..
 إبليس : نزلت تحت الأرض ؟
 خنزوور : أعمل إيه !
 إبليس : يادى المصيبة.
 خنزوور : مصيبة .. إنما فى المستقبل لازم نعمل حسابنا .. قرونا تمللى
 بيفضحونا .. لازم نقطعهم.
 إبليس : إزاي نقطعهم ؟ .. القرون حلوين.
 خنزوور : حلوين حلوين. لكن بيفضحونا .. بيطفشوا منا الزباين ..
 الناس لما بيشفوا القرون والديلى، بيحاسبوا منا
 إبليس : شيطان إزاي من غير ديل ؟ .. الديول دى الشعار بتاعنا.
 خنزوور : لازم نتخلص من الديول .. تعرف إن الديل بيضايقنى لما
 بآجى أتقلب بنى آدم .. ييلخمنى طول الوقت، بابقى
 محتاس فيه، أخيبه فين، ما أنا عارف أرفعه لفوق وإلا ألفه
 حوالين رقبتى .. ده غير الألم اللي فى العملية نفسها.
 إبليس : طب والعمل ..
 خنزوور : الديول لازم تتأصل.

- إبليس : (مستكرا) مش عارف يا خنزوور .. انت طالب مسألة خطيرة،
إحنا على أى حال مش معيز.
- خنزوور : لازم نواجه الحقائق .. احنا بسبب القرون والديول، بقينا
موضة قديمة، حاجة أنتيكة .. وكمان لازم نعيد النظر فى كل
نظام جهنم.
- إبليس : أنت تقترح إيه ؟
- خنزوور : قبل كل شئى .. لازم نغير الياقطة، ما يصحش نسمى جهنم
جهنم .. كل جهنم بقت غير محبوبة.
- إبليس : أمال نسميها إيه ؟
- خنزوور : الجنة.
- إبليس : إيه ؟
- خنزوور : ال .. جن .. نة !
- إبليس : أنت بقيت شيطان !
- خنزوور : مش قوى .. والشياطين لازم نسميهم ملايكة.
- إبليس : لكن دى مسخرة ..
- خنزوور : هو ده الصح .. الشيطان فى صورة ملاك هو الشيطان
الحديث ..
- تحياتى.
- إبليس : "مفكرا" اقتراح جرى جدا.
- "يسمع صوت بطة"
- بطة : جرى إيه ؟ استنوا !
- إبليس : إيه ده ؟ .. مين ؟
- خنزوور : من صوتها .. دى تبقى بطة، صاحبة ناميسة البرنيسة.
- إبليس : آه، هى وصلت ؟

* يدخل برايند وكركر، فى ملابس النبلاء، ومعهم بطة.

برابند : ال .. ال .. ال .. ال ..

كركر : البنت ؟ العروسة ؟ ..

برابند : لا .. ال .. الحقونى.

- بطة : أنتوا واخذيني على فين ؟ .. جرى إيه فى الفرح ؟ أنت
يا عريس أنت ؟
- برابند : إسمعى .. أنا مش عا .. عا .. عا .. عا ..
- كركر : مش عايز دوشة !
- برابند : لأ .. أنا مش عريس أنا عا .. عا .. عا ..
- كركر : عايز دوشة ؟
- برابند : لأ .. أنا عفريت، قول لها .
- إبليس : هو عفريت يا شاطرة .. هم الاتنين كده، شياطين ..
روحوا ع المطبخ خليه يفرقوا لكم طبقين جهنمية ..
باللاع المطبخ.
- برابند : أنا عا عا .. عا .. عا ..
- كركر : عايز ؟ عايز إيه تانى
- برابند : لا مش عايز حاجة، دهدى، هو أنا عايز حاجة ؟ أنت كل
حاجة تقاطعنى تقاطعنى تقاطعنى، أنا عا .. عا .. عا ..
- عاجز عن الشكر. "يخرجان".
- بطة : "تأمل ما حولها" أنا فين ؟ ..
- إبليس : فى جهنم يا شاطرة.
- بطة : فى جهنم بحق وحقيق ؟
- إبليس : فى جهنم بحق وحقيق.
- بطة : وأنا إيه يقعدنى هنا ؟ .. مش قاعده .. فين باب الخروج ؟

- إبليس : الناس مالهمش باب خروج من هنا، باب دخول بس !
- بطة : "تبكى" يا وقعتك يا بطه، يانايتك يا بطه، ضحكوا
عليكى .. جوزوكى شيطان .. إيه العمل دلوقت ؟
- "تسمع أغنية العسكرية"
- العسكري : "بنفس لحن أغنيته"
- أنا عسكري معرفش أخاف
لو كنتو ملايين مش آلاف
عارفكو يا شياطين ضعاف

- وح ادوسكوا زى الصراير
ياالله يا ضلمة اتقهقرى
أنا ح أغلبك أنا عسكرى
ما باشقكيش بخنجرى
أنا باشقك بالنفير
وده إيه ده كمان ؟ : إبليس :
- ده عسكرى جاى جهنم .. إنما أكبر سافل
"يدخل العسكرى" : خنزور :
- لى الشرف يا أفندم .. "يرى بطة" بطة ؟ !
أنت عايز أى شيطان هنا ؟ : إبليس :
- الباششيطان ! .. وانت مين ؟ .. بتشتغل إيه هنا ؟ : العسكرى :
- أنا إبليس .. أمير الظلمات !.. : إبليس :
- أهلا وسهلا .. وأنا قدور ثابت، عسكرى فى المعاش.
قوللى هنا .. يعنى انت مش شيطان ؟ : العسكرى :
- جرى لك إيه ؟ .. إنسان.
وجاى لنا يا عسكرى، فى أى مأمورية ؟ : إبليس :
- عشان ورق البنات، اللي سرقه منى الدكتور خنزور،
ما تأخذنيش فى دى الكلمة .. إنما ده كان ولأجدع
نشال.
خنزور : "الإبليس" يا اكسلانس .. أنا كسبت الورق ده فى لعبة
الكوتشينة.
- أنا لاعبته على الطاوية مش ع الورق. : العسكرى :
- إيه يا عسكرى اللت والعجن ده ؟ .. الهفه قلمين وخذ
منه الورق.
منه الورق.
- انتى ما تديش أوامر هنا ! .. ورق مش ح نديله.
طب أشتريه منكم. : إبليس :
- وأنت حيلتك إيه ! .. ده انت شحات.
أديلكم روحى بدل روح البنيتين.
هو إيه ده يا قدور ! : خنزور :

الأعمال الكاملة للشاعر

- إبليس : وإحنا إيه يخلينا نبذل روحين، بروح واحدة ؟
 خنزور : "لإبليس" ممكن يا اكسلانس نباده .. دى مش روح
 عادية .. روح زى الفولاذ لا تعرف لا خوف ولا فزع ..
 وافق سعادتك.
- إبليس : عندك حق، روح العسكرية غالبية .. أنا موافق، أكتب
 ورقة.
- العسكري : هات الورقة.
 إبليس : أديله ورقة، وقلم.
- بطة : ح تعمل إيه يا قدور .. أنا وناميسة خلاص .. المهم انت،
 الحق روحك واهرب من هنا.
- العسكري : اسكتى يا بطه.
 خنزور : "يعطيه ورقة وقلم" مع تحياتى.
- العسكري : ادينى ضهرك يا دكتور.
- خنزور : ضهرى ليه ؟ ..
- العسكري : أمال ح استند على إيه ؟ ..
- إبليس : زى ما هو عايز .. زى ما هو عايز كويس كده يا عسكري ؟
- العسكري : أيوه.
- إبليس : أكتب .. أنا قدور ثابت، عسكري فى المعاش
- العسكري : "يكتب".
- بطة : قدور ! ..
- إبليس : كتبت ؟ ..
- العسكري : هاه
- إبليس : أعطيك روحى ..
- بطة : يا حول الله !
- إبليس : كتبت ؟ ..
- العسكري : هاه .. وبعدين ؟ ..
- إبليس : بدل روح البنيتين ..
- العسكري : ال .. بن .. تين .. ته مربوطة ؟

- إبليس : أيوه .. وامضي ..
العسكري : خلاص.
إبليس : خد يا خنزؤور منه الورقة.
خنزؤور : هات.
العسكري : هات أنت الأول .. أنا عارفكم يا شياطين.
خنزؤور : لأ .. أنا عارفك يا عسكري .. هات أنت الأول.
العسكري : طب اديني واديلك .. في نفس واحد.
خنزؤور : اتفضل.
بطة : قدور ! ..
العسكري : "يمزق ورق البنات" ودلوقت بطه وناميسة أحرار .. بطه،
أخرجي من هنا.
بطة : أنا مش منقولة .. مش ح اخرج من غيرك ..
خنزؤور : يابن اللدنية ؟ .. هي دي الورقة ؟ .. إيه اللي أنت رسمه
ده ؟ "لإبليس" شوف سعادتك راسم إيه ؟
إبليس : إيه اللعب ده ؟ إيه اللي أنت راسمه ده ؟ يا بن ستين في
سبعين، راسم حمار ؟ ..
العسكري : إيه ؟ مش عاجبك ؟ ..
إبليس : طب أنا ح أوريك .. وفي الزيت المغلي ح أقليك .. وح
أفرمك زى الكفتة واشويك ..
العسكري : كيك كيك كيك ! .. "يضحك" زعلان عشان مش طالع
شبهك ؟ .. أنا مش رسام محترف .. أهو زيك !
عامل البوفيه : "داخلا بالقهوة" مضبوط ..
إبليس : "يضرب القهوة فيقلبها" سافل ! .. "يقصد العسكري".
خنزؤور : أكبر سافل .. "يقصد العسكري".
عامل البوفيه : وحياة راس سعادتك .. دي مضبوط
إبليس : بتتدلح !؟ .. "الخنزؤور" اسمع يا خنزؤور .. اسلخ جلدك
"عامل البوفيه يتقهقر مدعورا معتقدا أن الكلام عليه"
واحشيه قش وعلقه على الباب
خنزؤور : سمعا وطاعة "يهرب عامل البوفيه".

الأعمال الكاملة للشاعر

- إبليس : "مشيرا إلى بطة" هو وهي !
العسكري : إزاي بقى ناويين تحشونا قش ؟ .. وح تعملوا إيه فى روحنا!.
- خنزور : "بهدوء" ح نطبخها فى القزان اللي ع النار .. ح نعملها جهنمية.
- العسكري : انتو حدقين قوى .. إنما أنا أهدق منكم .. أنا ما أديتكوش ورقة بروحى .. وورق البنات قطعته .. أنا عارف القانون
- إبليس : أنت ح تعلمنا قانون جهنم على آخر الزمن ؟ .. القانون فى جهنم إن مفيش قانون .. "يدق الجرس فيهرع الشياطين ويحيطون ببطة والعسكري".
- الشياطين : "أغنية التخويف التى سبق أن غناها برايند وكركر فى الطاحونة".
- إبليس : "بشكل رهيب" كونوا جهنمية ! ..
- العسكري : وشك فى الحيط وفتاك ليه .. أنا ح أنده لكل أصحابى بالنفير .. وح يادبوكم كويس .. "ينفخ".
- بطة : انفخ .. انفخ ..
- * ترد عليه آلاف النفاير، بألحان ثورية من جميع البلاد.
* الشياطين يتطايرون من شدة النفخ.



المنظر التاسع

* ديكور المنظر الثاني والرابع، كراماتو يصيح بالسبحة الطويلة.

كراماتو : "يشد آخر حبة" مهبوب مهبيب شمعون كلكعون ..

عشر تلاف، "يرمى بالسبحة ويتنطط" هيه ! ..

والنهاردة اليوم العشر تلاف .. هيه .. دستوور .. بكره

تف .. "يتوقف" لأ .. دلوقت حالا تفرج .. افتح يا

مهبوب .. "ينتظر" مهبيب ؟ "ينتظر" شمعون ؟ "ينتظر"

كلكعون ؟ .. "ينتظر" افتح بقى خليك ظريف .. أنا

عملت اللي عليا .. اعمل انت اللي عليك .. هه ؟

"ينصت" هه ؟ "يسمع صوت أقدام" أهم .. البوابين

جاين يفتحوا.

"يسمع صوت قطاع الطريق"

قطاع الطريق : يا سيدنا الزاهد.

كراماتو : "يزمجر لنفسه" أنا مش هنا ! .. "يحاول الاختفاء" لأ

.. والكنز ؟ .. "يقف" ماحدث مهوب ناحية هنا .. دى

حاجة مافيهاش هزار دلوقت.

* يدخل قطاع الطريق يحمل نامية البرنيسة مغمى عليها.

قطاع الطريق : الحمد لله اللي لقيتك .. ساعدنى .. ده مغمى عليها من

ساعة ما خطفتها من الشيطان .. ساعدنى يا عم ..

كراماتو : عمى الدبيب .. "يدفعه بعيدا فتسقط نامية" ابعده عنى

ما تجيش هنا .. مالكش حاجة هنا .. محدش له حاجة

هنا ! ..

قطاع الطريق : "ينحنى على البرنيسة" آه يا حبيبتى.

البرنيسة : "تصحو" مين ده ؟.

قطاع الطريق : أنا بهير

البرنيسة : آه يا ملعون ..

قطاع الطريق : خلاص يعنى نسيتى صوتى ؟ .. ده أنا بهير .. بهير

الحقيقى .. بهورة، بهورة حبيبك.

فهلوانتش : سامعين ؟ .. ودعوا بعض.

الأعمال الكاملة للشاعر

قطاع الطريق : أنا مش مديها لك ! .. هه ! .. يا تسينا إحنا الاتنين يا
تاخذنا إحنا الاتنين.

فهلوانتش : بس كده ؟ .. تبقى زيادة الخير خيرين، والأرض
مفتوحة لاتنين ! جامادوية .. "نفتح الأرض ويظهر لهب
وتخرج بطة والعسكري".

كراماتو : مش ح نخلص الليلة دي إحنا .. كل شوية ناس .. ناس

العسكري : صباح الخير.

البرنيسة : بطة ؟ ..

بطة : البرنيسة "تعانقان".

فهلوانتش : تاني .. العسكري ؟ ..

قطاع الطريق : قدور .. قدور .. إحنا وقعنا .. وآهو جه ياخذ ناميسة، وأنا
كمان رايج معاها هناك .. وح نتعذب مع بعض إلى
الأيد.

كراماتو : حق .. هناك طريقكم .. أوعوا بقي من طريقى ..

فهلوانتش : حق ..

كراماتو : انكشحو كلكم.

فهلوانتش : حق .. الزاهد بيلعنكم .. يالله على جهنم.

كراماتو : حق.

بطة : مالهه كده بيتكلموا زى بعض ؟ زى ما يكونوا نافخين

فى قلب بعض.

فهلوانتش : حق ! ..

العسكري : اخرس ! ضربة فى حقتك ! .. دول حرين، وأدى ورقهم،

اتفضل "يلقى بالورق الممزق من الطاوية".

قطاع الطريق : جبتهم إزاي ؟ ..

العسكري : من إبليس يا شيطان جهنم .. أصل اللي ما يخافش من

الشياطين تخاف منه.

كراماتو : "يصرخ" امشوا من هنا .. ابعدوا من هنا .. يا عجر يا

بلاوى يا تلاقيح "لنفسه" يمكن عارفين ومستنين

مخصوص "يصرخ" ماحدث له حاجة هنا ..

البرنسية : بهير بحق وحققي ؟! يهورة ؟ ..
 قطاع الطريق : عرفتيني يا حبيبتى ؟ ..
 البرنسية : عرفتك يا حبيبي ! ..
 قطاع الطريق : خلاص اتقابلنا ؟
 البرنسية : وماحدث ح يقدر من دلوقت يفرقنا !

* فهلوانتش يظهر من طقاطيق الأرض.

فهلوانتش : أتأخرتى يا عروسة الشيطان .. حسب ما انتى كاتبه
 فى الورقة لازم تكونى فى جهنم عند صياح الديك
 الثالث .. "صياح ديك 1".
 البرنسية : لأ .. لأ .. لأ .. "تصرخ" لأ ..
 قطاع الطريق : مش ح تاخدها يا شيطان .. ارقبها يا سيدنا الزاهد،
 رقوتك تأخذ بإيدها ..
 البرنسية : خد بإيدى يا عم كراماتو ..
 كراماتو : إبليس ياخذك ..
 فهلوانتش : حق ..
 كراماتو : "لقطاع الطريق" وانت جك ستين إبليس يلهفوك
 فهلوانتش : حق.
 كراماتو : "لفهلوانتش" وانت جاك تسعين داهية تشيلك من
 خلقتى، غوروا من هنا .. ماحدث له حاجة هنا.
 فهلوانتش : حق .. يالله بقى، ده راجل طاهر، ومالوش دعوة بينا
 كراماتو : أيوه أنا راجل طاهر وماليش دعوة بأى حد.
 فهلوانتش : وله أجر عظيم عظيم عظيم.
 كراماتو : غصبن عنكم.
 فهلوانتش : ما تزعجوهوش .. ده وراه حاجات خطيرة ما
 تفهموهاش.
 كراماتو : حق .. عنده ألف حق "صياح ديك 2".
 فهلوانتش : أرجع جهنم إزاي دلوقت، بإيديا فاضيين ؟ دول
 يرفدونى.
 العسكري : "هامسا لفهلوانتش" بسيطة .. ما تاخذ سيدنا الزاهد

الأعمال الكاملة للشاعر

معاك.

- كراماتو : بيتوشوشوا عليا .. اسمعوا، ما حدث له في الكنز ده
حاجة .. فاهمين .. ده بتاعى أنا بس ..
الجميع : كنز إيه ؟
كراماتو : أيوه اعملوا نفسكو مش فاهمين .. لكن أنا
فاهمكم .. بقالكم يومين رايعين جايبين عليا
عشان عارفين إنه ح يتفتح دلوقت .. لكن ده
بعدكم .. ده ليا أنا ..
الجميع : هو إيه ده ؟ ..
كراماتو : الكنز .. كنز الملك سليمان .. أنا اللي قعدت جنبه
عشر تلاف يوم .. آكل الجراد، وأقول مهيبوب مهيبوب
"يجرى" وأنا اللي ح أخده .. "يدق على
الصخور" افتح يا مهيبوب "يلتفت لهم" امشوا من هنا
"يدق" يا مهيبوب يا مهيبوب.
العسكري : هيبوب للصبح ما حدث ح يفتح لك.
فهلوانتش : رائع .. ده حته نموذج عشان الماجستير .. "يذهب
إلى كراماتو" اخص عليك يا خالى مش كنت تقول
لى من زمان إن أنت عايز كده ؟ .. تسمح لى
أساعدك ؟
كراماتو : ابعدوا عنى كلكم .. ابعد .. اختفى هش .. هش أعوز
بالله من الشيطان الرجيم .. "يدق" افتح
فهلوانتش : مفيش فايده مش ح اتحرك ..
كراماتو : باقول لك أعود بالله من الشيطان الرجيم.
فهلوانتش : "يقرب منه" مفيش فايده .. عن إذنك .. "يدق على
الصخر" يا مهيبوب ..
كراماتو : "يدفعه" ابعد "يدفع العسكري وبطة وقطاع الطريق
وناميسة بعيدا" ابعدوا يا حرامية
فهلوانتش : أيوه يا مهيبوب .. أنا فهلوانتش .. مش عيب عليكم
خالى كراماتو يخبط وما تفتحوش .. أنا زعلان خالص
.. افتحوا...

صلاح جاهين

"بهمس" جامادوية كبرافوية "ينفتح الكنز" انفضل يا
خالى! .. "يدخل كراماتو إلى الكنزل مذهولا -
تعزف الموسيقى نعمة السلام الملكى القديم ببطء"
"يغنى"

فهلوانتش :

عن إذنكم .. عندى عمل .. ما تشاغلونيش
عمل دقيق .. عمل جرى .. ما تخايلونيش
ماتعاتبونيش .. ما تحاسبونيش .. ما تضايقونيش
عندى عمل ما تأخذونيش

"يدخل الكنز فتخرج منه نيران ثم يقفل"

"للعسكرى" تمام يا أفندم

بطة :

أفندم ؟ .. ده انتى الى أفندم ! كله تمام يا قمورة
مانتى شايفة.

العسكرى :

حتى مع فهلوانتش .. كله برضه جه تمام

بطة :

* بهير يقترب من البرنيسة ويهم بتقبيلها .. يرى الطفلة التى تحمل طرف ثوبها .. فيتوقف.

"للطفلة" يالله انتى يا شاطرة .. "لا تتحرك" يالله على

بهير :

بيتكيم.

"للطفلة" خلاص مش عاوزاكي يا اسمك إيه ؟

البرنيسة :

"لا تتحرك" "تخلع لها حرملتها وتتركها وتسير مع بهير

بغير حرملة الإمارة" ولا عاوزه دى كمان "الطفلة

تنصرف وهى مازالت ممسكة بالحرملة".

أخيرا "يقبل البرنيسة" .. نموسة ..

بهير :

بهورة.

البرنيسة :

"للعسكرى" اسمع يا عسكرى .. أنا مش ح أقارلك

بهير :

أبدأ.

"لقطاع الطريق" وأنا معاك.

البرنيسة :

"للعسكرى" وأنا معاك.

بطة :

بس ح نعيش فين ؟

البرنيسة :

فى الطاحونة القديمة .. ح نطرده الشياطين، ونصلح

العسكرى :

الطاحونة، ونعيش هناك احنا الأربعة.

"يكلم الجمهور"

ياالله يا ناس يا طيبين

الأعمال الكاملة للشاعر

تعالولنا نطحن حبكو

"يغنون":

الجميع:

أحنا أربعة ح نعيش سوا

مع بعض يجمعنا الهوى

أربع قلوب يتشبعوا

وتمان إيدى يتحركوا

تبقى طاحونة الهوا

ينادون الطاحونة:

تبقى طاحونة

والناس يجونا

ويجربونا ..

ويعرفوا.

"للجمهور":

ولو النهاردة حبيتونا

تعالولنا تانى شرفوا

* قدمتها فرقة الماريونيت على مسرح القاهرة للعرانس فى موسم 63-1964 عن أصل روسى هو مسرحية "طاحونة الشيطان"، وعربها وأعدّها وكتب لها الأشعار صلاح جاهين، وأخرجتها درزينا تنارسكوف.





الفقرتين



الفهرس

الصفحة	الموضوع
7	* السيرة الذاتية *
15	* العامية المصرية *
17	- على اسم مصر (الجزء الأول)
37	- على اسم مصر (الجزء الثانى)
41	- المرافعة
44	- شوفى قد إيه
47	- أغنية إلى ذكرى صديق
50	- سيد درويش
52	- الموتى
56	- المقابر
58	- بكائية إلى جون كنىدى
61	- إلى اللقاء
64	- اللي جرى لجميلة
70	- المطبعة
72	- فى الربيع
74	- الأمير
76	- شنوان
78	- ميلاد
80	- الدرس انتهى
83	- عناوين جرائين المستقبل
86	- صديق عمرى
94	- بكرة أجمل من النهاردة

الصفحة	الموضوع
99	- العرس
100	- كلام إلى يوسف حلمي
105	- قصاقيص الورق
108	- الشاي باللبن
110	- زى الفلاحين
111	- روحانية
112	- تراب ودخان
115	- بكائية
116	- بوابات الرحيل
118	- بكائية إلى ناظم حكمت
121	- بكائية
123	- بحرى
126	- مرحب
127	- أرض مصرية
129	- أنغام سبتمبرية
132	- أمر الله
133	- الثعلب والعنب
134	- باليه
135	- فاطمة
136	- فنان
138	- أهل الهوى
141	- سوناتا 1
142	- سوناتا 2
143	- سوناتا 3

144	- سوناتا 4
145	- سوناتا 5
146	- سوناتا 6
147	- سوناتا 7
148	- على الربابة
161	* الرباعيات *
199	* الازجال *
201	- اتنين صباحاً
203	- الزباين
205	- البنت والولد
206	- رأس السنة
207	- دموع ورا البرقع
211	- آلهة
212	- وكيل
213	- التلامذة
215	- تحويل مجرى الأردن
217	- الانتصار
219	- قصة
220	- التفرقة
222	- أجمل ما فيهم
223	- الأدب
225	- أكتوبر
226	- ألفية ابن دنلوب
228	- برافو برافو

الصفحة	الموضوع
231	- بعد الفطار
232	- حديث تليفزيوني
234	- الحرب مش نزهة
235	- دعاية انتخابية
236	- رد
237	- روزنبرج
239	- سلم التطور
240	- فزورة
242	- فى الجنة
243	- فى النادى
244	- فى ايطاليا
245	- فى دمشق
246	- لاجئ
249	- وقال يا بلد
251	* الاغانى *
253	- احنا الشعب
254	- يا أهلا بالمعارك
260	- أغنية إلى أسوان
262	- أجازة فى البحر الأحمر
264	- أحكم يا شعب
266	- أغنية ولد صغير
267	- اسكندرانى
269	- من الشباك
271	- أغنية هزار

272	- الله معك
274	- أغنية البنت أم صغيرة
276	- أغنية للقطن
278	- اتنين
280	- باحب السلام
281	- بالأحضان
283	- بستان الاشتراكية
285	- البيانولا
286	- توسيع القنال
288	- الدنيا
290	- شوف
291	- عصفورة
293	* المنوعات الغنائية *
295	- أغنية : أحب الخيال
297	- دويتو : الشارع
300	- أحلى كلام
301	- توت توت
302	- خضرة
304	- لحن العيد
306	- زنقة الستات
308	- ستات البلد دي
311	- عجائب
313	- فرقة عزت الآلاتي
314	- كلبى

الصفحة	الموضوع
316	- كلام الليل
318	- فيلسوف
320	- الصبح دق الباب
323	- صباح الخير يا مولاتي
326	- دويتو : البحر والصحراء
328	- أغاني مسلسل "رخصة في القلب"
331	- ربنا
333	- جنب الدفاية
335	* اوبريت الليلة الكبيرة *
349	* المسرحيات *
351	- مسرحية الشاطر حسن
383	- مسرحية حمار شهاب الدين
429	- مسرحية صحصح لما ينجح
466	- مسرحية الفيل النونو الغلباوى
502	- مسرحية قاهر الأباليس
569	* الفهرس



اسم مصر

على اسم مصر التاريخ يقدر يقول ما شاء
أنا مصر عندي أحب وأجمل الأشياء
بحبها وهي مالكة الأرض شرق وغرب
وبحبها وهي مرمية جريحة حرب
بحبها بعنف وبرقة وعلى استحياء
واكرهها وألعن أبوها بعشقي زي الداء
واسيها واطفش في درب وتبقى هي ف درب
وتلتفت تلاقيني جنبها في الكرب
والنبض ينفض عروقي بألف نغمة وضرب
على اسم مصر

صلاح جاهين

صلاح جاهين